

«ШАРҚ» НАШРИЁТ-МАТБАА
АКЦИЯДОРЛИК КОМПАНИЯСИ
БОШ ТАҲРИРИЯТИ
ТОШКЕНТ — 2001 ЙИЛ



117-2325


ТОФАЙ МУРОД

**БУ ДУНЁДА
ЎЛИБ
БЎЛМАЙДИ**

*Роман,
ҳикоялар,
мақолалар*

«ШАРҚ» НАШРИЁТ-МАТБАА
АКЦИЯДОРЛИК КОМПАНИЯСИ
БОШ ТАҲРИРИЯТИ
ТОШКЕНТ — 2001 ЙИЛ

Абдулла Қодирий номли Давлат мукофоти лауреати, Ўзбекистон халқ ёзувчиси Тоғай Муроднинг «Бу дунёда ўлиб бўлмайди» романи XX аср ўзбек зиёлларининг кўргиликлари, дард-аламлари, фожиалари ҳақидадир.



10
2664282

Таги күрмаганга гилам битмасин.

Қодир қулни чевараси, Холмат малайни невараси, Эсон хизматкорни боласи Ботир қүшчи тумандан айниб келди.

Қүшчи қалондимоғ-қалондимоғ қадам босди. Кибор-кибор қулоч отди. Керма қош-керма қош боқди.

Колхоз идораси қошида оёқ илди. Идора томига сердимоқ назар солди. Гап йўқ, сўз йўқ — нарвондан томлади.

Томда қўлларини кетига қўйди. Том бош-адогилаб қадамлади. Вазмин-вазмин қадамлади. Олисларга доно-доно боқиб қадамлади.

Бирдан қозикдай қоқилиб қолди. Мисоли ҳайкал бўлиб қолди. Ерга шаҳодат бармоқ ўйнатди. Лик-лик ўйнатди. Қоровулни имлади.

Қоровул ҳадаҳа-ҳадаҳа келди. Нарвон пойида ҳайронна-ҳайронна турди. Қоши узра кафт соябон эта-эта мўлтайди.

— Чақиргандай бўлдингизми? — деди.

Қўшчи ҳокимона-ҳокимона сиёсат этди.

— Халқ йифилсин! — деди. — Халқни йифинг!

Қўшчи қўллари кетида тағин қадам олди. Мағрибга боқиб қадам олди. Машриқда боқиб қадам олди.

Қоровул гапни кулги-мутойибага йўйди.

— Ҳа, халқ келади! — деди. — Тайинлаб қўйиб эдим, халқ ҳализамат келиб қолади!

— Халқ йифилсин, дедимми, йифилсин!

Қоровул ҳайрондан-ҳайрон бўлди. Туриб-туриб... ғаши келди.

«Ўзинг бир қўшчи бўлсанг, — демоқчи бўлди. — Сенга ким қўйибди идорани томига чиқишга?»

Яна-тағин, шайтонга ҳай берди.

— Халқни нима қиласиз? — деди. — Мана мен халқ, ўзимга айта беринг!

— Йүқ, халқ үйғилсін!

Шу вақт дарвоза олдіда беш-олти деңқон қора берди. Деңқонлар нарвон пойига түп бўлди. Кулги-мутойибага ўтди:

— Син-симбатингизни даладан кўриб келдик.

— Туманда нима гаплар бор, гапириңг, қани?

— Қани, тумандан гурунг беринг, қани?

Қўшчи томдан тушди. Ҳовуз бўйлаб юрди. Ҳовуз супада тик турди. Қўлларини орқа этди. Йўқ қоринни олға сурди. Йўқ қоринни олға сурман дея... кетига чалқайиб қолди. Йўқ қорин олдинда қолди... Кети ичкари кириб йўқолди. Ўзи кетига чалқайиб қолди!

Қўшчи деңқонларга бармоқ ниш этди.

— Шундай туриңглар! — деди.

Деңқонлар супа пойига түп бўлди.

Қўшчи супага бармоқ бигиз этди.

— Ўтириңглар! — деди.

Деңқонлар чўк тушди. Чордана қуриб ўтиради.

Қўшчи белқарсдан билак ўtkазди. Белқарс тутамлади. Йўқ қоринни тағин-да олға сурди. Кети тағин-да ичкари кириб йўқолди.

— Аммо-лекин! — деди. — Айтинглар, қани, мен кимман?

Деңқонлар ўзаро қарашиб олди. Биламиз демишдай, бош иргади. Ҳазил демишдай, мийиқларида кулди.

— Ким бўлардингиз, ўзимизни Ботир қўшчи-да, — деди.

Қўшчи йўқ қоринни олға силтади.

— Йўқ! — деди. — Аммо-лекин тополмадиларинг!

Деңқонлар бурчакка бет буриб келди. Деңқонлар оғиз ушлаб кулди.

— Колхоз тузилгани қачон эди? — деди Қўшчи. — Сизларга қачон ақл киради? Топинглар, мен кимман?

Деңқонлар юзидан кулгич қочди. Бари ўйлаб қолди. Охири чидаб ўтиромади.

— Унда, ўзингиз айтинг?

— Биз бир далада юрган деңқон бўлсак?

— Сиз туман бориб келдингиз, сиз айтинг?

Қўшчи икки қўлини кўксига кўйди. Кўкрагини олға шиширди.

— Мана шу... мен-а? — деди. — Мана шу мен! Айтинглар, қани, мана шу мен кимман?

Деңқонлар тағин бир-бировига қаради.

— Ҳа, шу сиз, шу сиз! — деди.
— Үнда, сизларга топшириқ: боринглар, мени ким
эканимни билиб келинглар!

Құшчи шундай дея, супадан тушди. Құчага равона
бүлди.

Бир деҳқон құшчини изидан етди. Құшчини била-
гидан тутамлади.

— Менга қара, Ботир, — деди. — Отангни күрдим,
аҳмади фориғ, әнанғни күрдим, товони ёриқ, дейди-
лар. Отанг шул, әнанғ шул, нима қиласан, осмонга
чиқиб? Туш пастга, туш!

Құшчи қайтиб келди. Құшчи күкрагига кафт қўйди.

— Мен! — дея кўкрак урди. — Мана шу мен, Ботир
Фирқаман, Ботир фирмә!

Деҳқонлар ўзаро қарашиб-қарашиб олди.

— Ким-ким? — деди.

— Бир сўз билан айтсак: Ботир фирмә!

Құшчи шундай дея, супа бош-адогилаб одимлади.
Деҳқонларга қараб-қараб одимлади.

— Бир сўз билан айтсак, мен шу кундан бошлаб
Ботир фирмә бўлдим! Айни вақтда, қишлоқ шўросини
раиси-да бўлдим! — деди. — Кимда-ким мени Ботир
фирқа демас экан, ўзидан кўрсин!

Деҳқонлар бақа бўлиб қолди.

2

Құшчини Ботир фирмә демагичлар бўлди.

Биров — фирмә сўзига тушунолмай айтмади. Би-
ров — құшчи сўзига ўрганиб қолиб айтмади. Тағин
биров — құшчига фирмә сўзи ярашмайди, дея айт-
мади.

Ана шунда, Ботир құшчи... чилласида чироқ кўрма-
ган бўлди.

Құшчи бировни меҳнат ҳақини қирқиб ташлади. Би-
ровни томорқасини сувдан қисди. Бировни мол-ҳоли-
ни емишдан тортди.

Отига «фирқа» сўзини кўшиб айтмагичларни: «Халқ
душмани», дея айблади.

Шу-шу, құшчи бир оғиздан — Ботир фирмә бўлди.

3

Ботир фирмә Ўзбекистон пойтахти Самарқандда
олти ойлик сиёсий ўқишни битириб келди.

1933 йил түлди.

Нон чучук бүлди. Нон ширин бүлди.

Ота ўз ўғлини бир зогора нонга алмашди.

Она ўз қизини бир ҳовуч келакка алмашди.

Одамзот кунжара ейишгача борди.

Она бир эшакли ўткىнчига кафтларини узатди.

— Мана шу қизалоқни олиб кетинг, катта бўлса, эшигингизни супуради! — деди. — Бир ҳовуч кепакка бераман, бир ҳовучгина!

Ўткىнчи ўзини эшиитмасликка олди. Бозор учун нархнавони сўрамади. Бошли-кўзли болани сўраб-суриштирмади.

Она ўнгга қаради, она чапга қаради. Бозорда ўзидан бошқа қолмади.

Шунда, она боласига боқиб хўнг-хўнг йиғлади. Боласига боқиб увв-увв йиғлади.

Она энкайди. Бўйин эгди. Боласини бўйнига миндирмоқчи бўлди.

Аммо боласи ўзини орқага олди. Йўқ, ишорасини берди.

Шунда, она, боласини елкаларига қўйиб-қўйиб олди.

Боласи овози борича йиғлади.

Она ўнг гапирмади — чап гапирди:

— Ўчир, бозори касод! Ўчир, зогора нон!

Она энди боласини қулоқ-чаккаси аралаш қўйиб-қўйиб олди.

Ниҳоят, таёқ ўтди. Боласи жонҳолатда турди. Жонҳолатда онаси елкасига осилди. Бўйнидан қучоқлаб олди.

Она рўмоли учига тугиклик бир нимани қўлтиғига олди. Тугунни эҳтиётлаб-эҳтиётлаб қўлтиқлади. Ё пирим, дея, жойидан қўзғолди. Оёқлаётисб, қалқиб-қалқиб олди. Ўзини ўнглаб олди. Бир-икки қадам босди.

Она елкасида бола, йўл олди. Она қўлтиғида тутун, йўл олди.

Бола онаси бошини опичлаб борди. Овоз бериб, йиғлай, деди. Онасидан қўрқди. Онаси оёқларини чимчилаб олишидан қўрқди. Бола бор-йўғи инг-инг этиб борди.

Барибир, она күксіда шалвираб боражак боласи оёқларидан ўйиб-ўйиб олди.

Она ўнг гапирмади — чап гапирди:

— Ўчир, бозори касод! Сидирға ўтири, бозори касод, сидирға ўтири!

Бола ингилламай қолди.

Она ёлғизоёқ сүқмоқ бўйлаб юрди. Қишлоқни мўлжаллаб юрди.

Қишлоқ бир қадам кўринса-да, хийла олис бўлди.

Бир илон сўқмоқни кесиб ўтди.

Она таққа тўхтади. Сесканиб олди. Ўзини орқага олди.

Шунда, елкасидаги боласи кетига чалқайиб кетди. Кети билан йиқилиб тушай деди.

Она боласини оёқларидан ушлаб қолди.

Она ёқасини кўтариб, ичига «туф-туф» этди. Илон юрмиш ўт-ўлан шитир-шитир тингуничча қимирламади. Жойида турди.

Тагин йўлида давом этди.

Бола онасини бошини опичлаб-опичлаб олди.

— Эна, нон... — деди.

Она парво этмади. Бир маромда одимлади.

Қош қорайиб борди.

Она қадамини катта олди. Аммо қадами ўнгмади. Боши айланди. Кўз олди тебранди.

— Эна, но-он...

Элас-элас бир ит ҳурди. Ит кимга ҳурди? Ит нимага ҳурди?

Она оёқ илди.

«Ит менга ҳуряпти, менга! — дея ўйлади. — Ит бир нимани ҳидини олди. Ит нон ҳидини олди, нон. Ит ана энди чопиб келади!»

Она ит ҳуришини... боласидан кўрди.

«Болам нон-нон деяпти. Ит «нон» сўзини эшилди», дея ўйлади.

— Нон дема-я, қирилиб кетгур! — дея, боласи сонини ўйиб-ўйиб олди. — Ана, ит келяпти, нон дема-я!

Боласини нафаси ичига тушиб кетди.

Она тагин йўлида давом этди.

Ит яна бир ҳурди.

Она ана шунда ит бор тарафга қараб кетаётганини англади. Йўлинни чап солишни ўйлади.

Аммо сўқмоқ ёлғиз бўлди. Ўз оти ўзи билан, ёлғиз-оёқ йўл бўлди.

Она: «Ит нон ҳидини олди-ёв. Чопиб келиб ёпиш-маса-ёв», дея ўйлади.

— Эна, но-он...

Она йўлини сўқмоқдан чап солмоқчи бўлди. Бешолти одим босди. Аммо оёқлари чирмовуқларга илашиб қолди. Ёввойи бедаларга илашиб қолди.

Шундай кетса, оёқлари чалишиб йиқилишидан кўрқди. Ёмондан-ёмони... ўт-ўланлар ичидаги боягидай илонни босиб олишидан кўрқди.

Она яна қайтиб сўқмоқча тушди. Кўлтиқ тугунини маҳкамроқ босди.

— Эна, но-он...

Она елкаларини учирди. Боласини силкиб-силкиб олди. Жеркиб-жеркиб олди. Оёқларини шапиллатиб-шапиллатиб уриб олди.

— Нон дема! — деди. — Нонни отини атама!

Она ҳамон ҳадик билан қадамлади.

Ит ёпишади, дея ҳадиксиради.

Кун ботиб борди.

Кунботар алвон-алвон шафақ бўлди. Ҳаводан салқинлик уфурди. Ҳаводан оқшом нафаси уфурди.

— Эна, но-он...

Ит тобора яқин бўла борди.

Она эҳтиёт учун... ит тараф қўлтиғи — ўнг қўлтиғидан тутунни олди. Авайлабгина... чап қўлтиғига қистирди. Кўнгли хиёл ором олди. Дадил одимлади.

Боласи ич-этини тирнаб зорланди:

— Эна, но-о-он, но-о-он...

Она итдан эллик-олтмиш қадам беридан ўтди. Батамом бемалол ўтди. Боиси, ит... боғлоқлик бўлди.

Қош қорайиб-қорайиб қолди.

Она кулбасига етиб келди. Ўчоқ бошида чўнқайди.

Боласи елкасидан сирғалиб тушди. Жойида ўтириб қолди. Ўрмалаб-ўрмалаб олди. Оёққа қалқди. Той-той юрди. Атак-чечак юрди. Тетапоя-тетапоя юрди. Оёқларини ёйди. Теварак-бошга сер солди: қаерларда нон бўлади?

Бола ана шу жойларни титкилади. Даствурхонни очиб қаради. Тўнтариқлик тобоқлар остини қаради. Ўроғлик супрани ёйиб қаради...

Онани энка-тенкаси куриди. Энтикиб-энтикиб нафас олди. Ўзини ўнглади. Ўзига келди.

Сўғин, қўлтиғидан тутунни олди. Ўчоқ бошига ёйди: тутунда кафтдай зогора нон бўлди!

Узалиб, обтовани олди. Жүмрагидан ерга икки томчи томизди. Жүмракни оғзига қўйиб қўтарди. Кўтариб сув ичди. Энтикиб сув ичди.

Зогора нонни олиб... чаппа бурилди. Нонни катта-катта тишлади. Нонни катта-катта чайнади. Нонни катта-катта ютди...

Зогорадан ушоқ-да қолмади!

Тагин... ўнг бурилди...

Боласи ҳали-ҳамон тобоқлар остидан... нон қидирди!

— Бери кел! — деди она. — Бери кел, мана нон!

Бола ҳадаҳалаб келди.

Она боласини бағрига олди. Она боласи оғзига... кўкрак солди. Боласига кўкрак берди.

6

Оналар... тасбеҳдай-тасбеҳдай тизилиб ўтиреди.

Она бир йўловчига кўл чўзди.

— Мана шу қизалоқни ола кетинг, сизга қиз бўлади! — деди. — Бир кулчага алмашаман, бир кулчага!

Она бир йўловчига боласини кўрсатди.

— Мана шуни зогора нонга алмашаман! — деди. — Кафтдай зоғора нон бўлса бўлади!

Мазкур йўловчи... Ботир фирмә бўлди. У эътибор бермади. Бепарво ўтди.

Беш-ён қадам ўтиб, оёқ илди. Боиси, овоз таниш туюлди. Кетига қайрилиб қаради. Кетига қайтиб келди.

Чин, туюлганича бор бўлди. Боласини олдига олиб ўтирмиш она... Мирзахўжабойни беваси бўлди.

Ботир фирмә қўлларини белига қўйди. Бевага қараб турди.

Она ерга қаради. Боласини бутлари орасига тортиб-роқ ўтиреди. Боласини елкаларидан қучоқлаб ўтиреди. Пешонасини боласи бошига қўйиб ўтиреди. Она бетларини бекитиб ўтиреди.

— Изимдан юрилсин!

Ботир фирмә шундай дея, йўлида одимлади.

Она жойидан қўзғолди. Боласини уст-бошини қоқди: боладан хас-чўп тушди. Боладан чанг-тупроқ тушди. Бола... гупиллаб-гупиллаб чангиди!

Она ўз уст-бошини тузатди. Этагини қоқди. Желагини бетига тортиб қўйди. Боласини қўлидан етаклади.

Ботир фирмә кетига қайрилмай қадамлади. Ердан қўзини олмай қадамлади.

Холилатиб-холилатиб оёқ илди. Онага қайрилмай гап очди. Ердан күз олмай гап очди. Оҳиста-оҳиста гап очди:

— Сиз Мирзахўжабойни кенжа заифаси... Зайнаб...
Зайнаб хотинмисиз?

- Шундай, шундай.
- Қизалоғингизни оти нима?
- Обод.
- Обод, Обод... Мирзахўжабойни қизими?
- Шундай, Обод... ўша кишидан!
- Сиз кимни зурриётини бозорга олиб чиққанингизни биляпсизми? Кимсан, Мирзахўжабойни зурриёти!

Она миқ этмади. Она ерга тикилди.

— Мирзахўжабойни зурриёти-я! — деди Ботир фирмә. — Чин, Мирзахўжабойлар совет ҳукуматини тан олмай, Афғонистонга қочиб кетди. Лекин у киши Сайдхўжа эшонни тўнгич ўйиллари. Бир сўз билан айтсак, эшонзода, эшонзода!

Ана шунда, она тилга кирди. Желаги ёқаси билан оғзини ушлаб тилга кирди.

— Бир норасидани товонига қолмайин деяпманда, фирмә бова, — дея йиғлади. — Шугина норасида пешонамга сиғмаятти!

- Шугина бир... гўдакни боқиб бўлмай қолдими?
- Йўқ-да, фирмә бова, йўқ-да. Хонумонимиз куйди! Биз куйиб-куйиб... кул бўлдик!
- Мирзахўжабойни гўдаги учун-а?
- Кунжара берсам, емаса нима қилайин? Зоғора нон отлиққа йўқ бўлса, нима қилайин?
- Бир бориб айтсангиз... қадамингиз кира тилайдими?

Ботир фирмә умид сувлари сепиб-умид сувлари сепиб кетди.

Ботир фирмә оқшом вақти аёлига тайинлади:

- Мирзахўжабойни бевасига битта кулча олиб бориб бер, — деди. — Фақат бирор билмасин, замон ёмон.
- Битта кулча нима бўлади? — деди аёли.
- Ҳар тандир ёпишингда биттадан кулча бериб келасан, тушундингми? Бевасига айт, бирор билмасин. Замон ёмон, жуда ёмон...

1934 йил оёқлади.

Нон чучукдан-да чучук бўлди. Нон шириндан-да ширин бўлди.

Илик узилди!

Кулбаларда бекаси билан хўжаси узала тушиб ўлиб ётди.

Бекаси бағрида қизалоги ўлиб ётди. Хўжаси кўйни-да ўғилчаси ўлиб ётди.

Одамзот йўлларда ўлиб ётди. Ариқ бўйларида ўлиб ётди. Дараҳт тагларида ўлиб ётди.

Бирор зоғора нондан шишиб ўлди. Бирор кунжарадан шишиб ўлди. Бирор шуларни-да тополмай — очидан ўлди!

Қабристонлар лиқ-лиқ тўлди. Жасад қўяжак ер туғул, оёқ босажак ер қолмади.

Шунда Ботир фирмә бошлиқ фаоллар туман йўл олди. Катталарга мурожаат этди.

— Мозористонда соғ жой қолмади, — деди Ботир фирмә.

— Бутун туманда шундай, — деди катталар. — Биз юқорига хабар бердик, ёрдам берамиз, деди.

— Унгача жасадларни қаерга қўямиз?

— Топилади, тирикка топилган ер, ўликкайм топилади!

Қиши қариди.

Эл кўкламни пойлади. Интиқ-интиқ пойлади.

Ўт-ўлан амал олишини қаради.

Ўт-ўланлар билан кун кечиришни ўлади. Кўкат еб, қорин тўйдиришни ўлади.

Чин, юқоридан ёрдам келди. Полуторка миниб келди.

Учта НКВД ходими келди. Учовини-да белида маузер бўлди.

Туман вакили НКВДчиларни танитди.

— Бу ўртоқлар очарчиликка қарши курашиш учун келди! — деди.

— Очарчиликни тугатиш учун! — дея тузатди НКВД командири.

— Виноват, ўртоқ командир, виноват, — деди туман вакили. — Сиз фаоллар, мана шу ҳукumat вакилари очарчиликни бартараф этишлари учун яқындан ёрдам берасизлар!

— Биз, сиз фаолларга сұянамиз! — деди командир. — Сизлар қанчалик күп ёрдам берсаларингиз, биз очарчиликни шунчалик тез тугатамиз. Биз бу борада етарли тажрибага әгамиз. Йигирманчи йилларда Украинада худди шундай очарчилик авж олиб зди. Миллион-миллион курбонлар бўлиб зди, миллион-миллион! Москва бизни Украинаға сафарбар этди. Биз жуда қисқа муддат ичиди Украинада очарчиликка нұқта қўйиб келдик!

— Биз учун келибсизлар, қўлимиздан келган ёрдамни берамиз, — деди Ботир фирмә. — Мана, тушунчали-тушунчали фаолларимиз ўтирибди.

— Бизга тушунчали одам керак эмас, — деди командир. — Бизга юк ташувчи одам керак!

— Хўп, мана фаолларимиз, танлаб олинг. НКВДчилар олтита фаолни танлаб олди.

13

Айтилмиш маҳкамани ўз қабристони бўлди. Ўз мозори бўлди.

НКВД ходимлари ўр-жарларни кўрди. Сой-Қирларни кўрди. Ўйдим-чукурларни кўрди. Ҳароба-чолдеворларни кўрди. Ниҳоят, ана шу... қабристонни топди!

Қишлоқдан беш-олти чақиримда эски бир ҳовуз бўлди. Гир айланмиш толзор ҳовуз бўлди. Кўпдан бўён қаровсиз ётмиш ҳовуз бўлди. Сув тўлдирилмаса-да, таги сернам ҳовуз бўлди.

— Мана шу жойни танладик, — деди командир.

Ботир фирмә тушунмади. Бир ҳовузга қаради, бир командирга қаради. Қишлоқ қибласида ёйилиб ётмиш қабристонга қаради.

— Аммо-лекин ҳар юргни ўз қабристони бор, — деди.

— Бор, тўғри, бор, — деди командир. — Лекин ана шундай буйруқ ҳам бор!

— Қабристон кўчирилсин, дегич буйруқми?

— Йўқ, бошқачароқ буйруқ, бошқачароқ...

— Хүп, айтинг, қандайчикин буйруқ экан? Мен қишлоқ шүрөси раисиман, билишим керак?

— Қизимант, ўртоқ раис, қизимант. Биз ишимизни билиб қиласыз. Биз Украинада очарчиликка қарши курашиб, роса тажриба тұплаганмыз. Биз ана шу тажрибаларимиздан келиб чиқиб иш қиласыз.

— Хүп, қани, тажрибаларингизни айтинг?

— Тажрибаларымыз бундай: сиз айтган анави қабристон ўз ажали билан ўлғанлар учундир. Фақат... очлиқдан ўлғанлар учун эмас!

— Нима фарқи бор, ўз ажали билан ўлди нима, очлиқдан ўлди нима? Бариям ўлим-да, бариям гүрга киради-да?

— Барибир эмас-да, ўртоқ раис, барибир эмас-да. Ахир... нега очлиқдан ўлади? Совет замонида-я? Нега сиз билан биз юрибмиз, улар эса очлиқдан ўлади? Совет замонида-я? Буни совет тузуми душманлари эши-тиб қолса нима дейди? Жар солиб ёяди, карнай қилиб чалади-ку! Ўзингиздан қолар гап йўқ, ёш совет тузуминг душманлари кўп. Улар совет тузумини бўғиб ташламоқчи, ҳа, ёш совет тузумини йўқ қилмоқчи. Сиз билан биз фирмамиз. Шундай экан, сиз билан биз совет тузуми душманларига қарши кўкрагимизни қалқон қилишимиз керак.

— Фирқамиз, фирқа! — деди Ботир фирқа ғурур билан. — Ҳа, фирмамиз!

— Ҳа-а, ана, ана! Оғзинг тўла қон бўлсаям, душманинг олдида тупурма, дейдилар. Шунинг учун сиз билан биз очарчиликка қарши шафқатсизларча кураш олиб боришимиз керак. Яъни очлиқдан ўлғанларни ҳеч кимга билдирамасдан... ими-жимида... мана шундай ўраларга... кўмиб ташлашимиз керак.

Ботир фирқа бирдан сергак бўлди. Кулоги динг бўлди. Қўзлари пир-пир бўлди.

— Манавигами? Бу... ҳовуз-ку? — деди.

— Нима фарқи бор, ўртоқ раис, нима фарқи бор? Тайёргина чуқур! Бирор билади, бирор билмайди. Билмаса, ҳовузни кўмиб ташлабди, дейди-кўяди. Шу билан гап тамом бўлади. Биз мана шундай йўл билан очарчиликка қарши курашамиз. Қарабисизки, тез кунда очарчиликни тутатамиз.

— Буни... буни туман катталари билан бир масла-ҳатлашиб кўриш керак.

— Туман катталари ўёқда турсин, бутун совет ҳукумати катталари билади, ўртоқ раис. Бу ҳақда буйруқ

бор. Очарчилликка қарши ана шундай курашилсин, деган буйруқ бор. Украинада очарчилликни ана шундай йўл билан бартараф этдик. Насиб бўлса, Ўзбекистонда ҳам очарчилликни ана шундай услубда тутатамиз. Ана иккитасини олиб келдик, ана.

Ботир фирмә гап билан андармон бўлиб билмади. Эътибор этмади.

Ана энди эътибор берди. Ҳовуз тагига қаради. Кунт билан қаради.

Ҳовуз тагида... иккита қора нарса устма-уст тахлаб қўйилди. Иккита қора нарса узала-узала тахлаб қўйилди.

Ботир фирмә анграйиб қолди. Бир нарсаларга анграйиб қаради, бир командирга анграйиб қаради.

— Булар... одам... — дея дудуқланди Ботир фирмә. — Булар... одамми?

— Йўқ, улар очдан ўлганлар, — деди командир. — Улар... совет ҳукуматига қарши очдан ўлганлар!

Ботир фирмә беихтиёр... беихтиёр ҳовузга тушиб борди.

Тахланиб ётмиш жасадларни қаради. Юзларни очиб қаради. Икковини-да таниди: бирори Ашир момо бўлди, бирори Чори бобо бўлди.

Ботир фирмә мархумларга тикилиб турди-турди... беихтиёр қўлларини кўтарди. Мархумлар ҳақига дуо ўқимоқчи бўлди.

Бирдан эсини йифиб олди. Фирма эканини ўйлади. Шўро раиси эканини ўйлади. Энг ёмони — тепасида НҚВДчилар қараб туриши бўлди.

Ботир фирмә қўлларини туширди. Ҳадик билан НҚВДчиларга кўз қири ташлади: йўқ, улар ўзларича гапиришиб турди.

«Хайрият, қўлларимни кўтарганимни кўриб қолмади, хайрият», деб хотиржамланди.

Ботир фирмә тахланиб ётмиш мархумларга тикилди... ичидаги фотиха ўқиди, ичидаги қуръон ўқиди.

Сўғин, юқорилади. НҚВДчилар олдига бориб турди.

— Рангингиз оқариб кетибди, кўрқдингизми? — деди командир.

— Йўқ, нега қўрқаман, йўқ... — дея мингиллади Ботир фирмә.

— Рангингиз докадай оқариб кетибди? Яна-тагин, дудуқланяпсиз?

— Ҳа, энди... эл-юртчилик, ўртоқ командир, эл-юртчилик. Үз эл-юртингиз эмасми, одамга пича ботар экан. Унча-мунча малол келар экан.

— Ўртоқ раис, бу ҳақда буйруқ бор, буйруқ! — дея овозини кўттарди командир. — Буйруқ! Совет ҳукуматининг буйруғи! Совет ҳукуматининг хоҳиш-иродаси! Ёки совет ҳукуматидан норозимисиз?

Ана шунда, Ботир фирмә бир сесканиб олди. Теваракка олазарак-олазарак бўлиб олди.

— Ундей деманг, ундей деманг... — дея каловланди. — Ахир, мен... фирмаман, фирмә!

— Фирма бўлсангиз, нета иккиланасиз?

Ботир фирмә бирдан... қаддини ростлади. Қоматини адл-адл этди. Бошини тик-тик тутди.

— Яшасин, шўро ҳукумати! — деди тантанавор. — Шўро ҳукуматига шон-шарафлар бўлсин!

Ботир фирмә шу кўйи қотиб турди. Мижжа-да қоқмади. Нафас-да олмади!

— Ана бу бошқа гап! — деди командир.

Ана шундан кейин Ботир фирмә ўзини... одам ҳис этди. Ўзини эркин ҳис этди. Одамга ўхшаб нафас олди.

14

Шу вақт сўқмоқ йўлда полуторка кўринди.

Полуторка ҳовуз кемтиги олдида кўндаланг бўлди.

Машинадан бир НКВДчи «тап» этиб тушди. Машина орқасини очди. Машинага елка тутиб турди.

Машина устидагиси шолчага ўроғлиқ бир нарсани бурчидан судраб келди. Ўрам бир учини шериги елкасига кўйди. Ўрам иккинчи учини ўз елкасига кўйди.

Иккита НКВДчи ўрамни елкалаб, ҳовузга тушди. Ўрамни бояги устма-уст жасадлар устига қўйди. Шолчани бир четидан тортди. Шолча ичидан... учта жасад... жасадлар устига юмалаб тушди!

НКВДчилар шолчани қоқиб-қоқиб ташлади. Ҳовуздан чиқиб келди. Шолчани машина устига ташлади. Командирлари олдига келди.


— Тағин учтасини олиб келдик, — деди бирови.

— Иккита десаям бўлади. Битта майдагина болача, — деди иккинчиси. — Менимча, боласи бўлса керак, бағрига босиб ётиби.

— Боласи ўғилми-қизми? — сўради командир.

— Ким қарабди, ўртоқ командир. Ишқилиб, бир гўдак одамча-да.

Шунда, Ботир фирмә ажабтовур бир овоз эшитди. Фирма аланг-жаланг бўлди. Овоз кўқдан келяпти ё ер-



дан чиқяптими, билолмади. Бир күкка қаради, бир теваракка қаради, бир НКВДчиларга қаради.

Командир ияги билан ҳовузга имо этди.

— Ўрадан келяпти, ўрадан, — деди.

Ботир фирмә ҳовузга тикилди. Чин, овоз ҳовуздан келмиш бўлди. Назарида... назарида, жасадлар қимир-қимир этмиш бўлди.

Ботир фирмә ёқа тутамлаб-ёқа тутамлаб, анграйди. Ботир фирмә ёқа туфлаб-ёқа туфлаб, анграйди.

— Ия! — дея командирга қаради.. — Ия-ия...

Ўз-ўзидан... ҳовузга тушиб борди. Кўрқа-кўрқа борди.

Овоз қадам сайн яқин эшишилди.

Ботир фирмә жойида қотиб қолди. Қадам босишини-да билмади, кетига қайтишини-да билмади.

Овоз тобора яқиндан келди.

Ботир фирмә ёқасини маҳкам тутамлади. Кўзларини ярим юмди. Ҳам қўркув, ҳам шижаот билан юмди. Ичиди пичир-пичир калима қайтарди. Дадил-дадил қадам қўйди. Жасадлар бошига борди. Кўзларини чирт юмиб турди-турди... бирдан ялт-ялт очди.

Шунда... шунда, Мирзахўжабойни бевасини кўрди! Мирзахўжабойни зурриётини кўрди!

Ботир фирмәни ичидан... бир нима ўпирилиб тушди. Тан-жони жимири-жимири этди. Тан-жони увишиб-увишиб олди. Сочлари орасида мисоли кумурсқа юрди. Кўзларини тагин чирт-чирт юмди...

— Уларни танидингизми, ўртоқ раис?

Ботир фирмә ана шунда кўзларини очди. Ёнларидаги НКВДчиларни кўрди.

Ботир фирмә танидим, демишдай бош ирғади. Тагин жасадларга тикилди.

Ана шунда, Мирзахўжабойни беваси кўзларини ярим очди! Бошидагиларга ўлик нигоҳ билан боқди.

Ботир фирмә... биқинини чанглаб-чанглаб инқиллади.

— У-у-уҳ!.. — дея оҳ урди. — Тирик, тирик! Ўртоқ командир, улар тирик!

Командир шерикларига юз солди.

— Дарҳақиқат, улар ҳали нафас олмоқда-ку? — деди.

— Тўғри, тирик, тўғри! — деди бирори. — Лекин ҳозирча тирик, ҳозирча!

— Барибир... ўлади! Бугун, бугун бўлмасаям... эртага ўлади! — деди иккинчиси.

Мирзахўжабойни беваси жонсарак-жонсарак боқди.
Мўлт-мўлт боқди.

— Йўқ, йўқ... — дея пичирлади. — Фирқа бова, нон
йўқ. Бўлмаса, келмас эдим...

Гапидан, Мирзахўжабойни беваси қаерга келиб
қолганини билмади, қаердалигини билмади.

— Тағин битта кулча беринг, фирмқа бова, — деди
бева. — Боламга берайин, нон деяпти...

— Бераман, бераман... — Ботир фирмқа шундай дея,
командирга юз солди.

— Ўртоқ командир, тирикларни кўмиш қандай
бўлади?

— Энди, нима қилайлик, ўртоқ раис? Замон шун-
дай! Очарчиликни бартараф этмасак бўлмайди.

— Аммо-лекин... тирик-да, тирик! Ана, бағридаги
боласи-да тирик! Шўро ҳукуматига ишчи кучи керак,
ўртоқ командир, улар ҳали иш беради.

— Тушунаман, ўртоқ раис, тушунаман. Аммо улар
барибир... ўлади-да, ўлади! Нима еб, жон сақлади?

— Мен уларга биттадан кулча бериб тураг эдим,
ўртоқ командир. Бундай бўлишини билсам, иккитадан
кулча берар эдим, ўртоқ командир. Мен энди уларга
иккитадан кулча бериб тураман, ўртоқ командир, ик-
китадан!

Командир Ботир фирмқага ўсмоқчилаб-ўсмоқчилаб
қаради. Бир кўзини қисиб-қисиб олди.

— У билан... апоқ-чапоқмисиз дейман? — деди. —
Балки қўлидаги боласиям... ўзларига қарашибидир, ўртоқ
раис?

— Йўқ, йўқ, ундан хаёлга борманг, ўртоқ коман-
дир, ундан хаёлга борманг. Гап шундаки...

— Хўш, гап нимада?

— Гап шундаки, ўртоқ командир, улар жуда азиз
зотларни беваси, жуда табаррук зотларни зурриёти.

— Ўртоқ раис, сиз айтгандек, казо-казоларга қара-
ладиган бўлса, очарчиликни тутатиб бўлмайди. Украи-
нада генералларнинг бола-бакрасини кўмдик, генерал-
ларнинг! Кўпларини тириклай кўмиб ташладик, ти-
риклай! Бўлмаса очарчиликни тутатиб бўлмас эди!

Мирзахўжабойни беваси Ботир фирмқага мўлтиради.

— Сув, сув... — деди. — Боламга сув беринг.

— Учир! — дея ўшқирди бир ходим. — Ўладиган
одамга... сув нима керак?

— Тўғри, ўликка... сув нима керак? — деди иккин-
чи ходим.

Мирзахұжабойни беваси ана шұнда қаерда эканини билди. Олазарак бүлди. Ботир фирмәға ёльворди.

— Фирқа бова, мени олиб кетинг, — деда инқиллади.

— Үзимга эн бүлолмайман, сизге қандай бүй бұла-
ман? — деда ўксинди Ботир фирмә.

— Мен отасини ёлғыз тирноғини одам қилишим
керак...

Бир ходим бирдан ҳүшёр бүлди. Аланг-жаланг бүлди.

— Нима-нима?! — деда. — Уйға кетасан? Кета-
сан-а, кетасан, кетиб бүпсан! Энди, сенинг... ўлиғинг-
ни орқалаб келиш учун яна борамизми? Нима, се-
нинг... ўлиғингдан бошқа ишимиз йүқми?

— Ўликларга дүк қилманг, ўртоқ, ўликларга дүк
қилманг, — дед Ботир фирмә.

— Дүк қилмай бўладими? Ўзи, аллақачон ўлиб
бўлган. Яна-тағин, уйға кетаман, дейди.

— Олдин ўлсин... — деди Ботир фирмә.

— Ўлади! Ўлимга маҳкум этиғган, ўлади! Ана, ран-
гида ҳаёт асари йўқ. Биргина шу... ўлик учун тағин
борамизми? Бунақада очарчиликни қачон тутатамиз?

— Йўқ, улар ўлимга маҳкум этилмаган, — деди
Ботир фирмә. — Мен олдин уларга биттадан кулча бе-
рас эдим. Энди, иккитадан кулча бераман...

Командир шерикларига назар солди.

— Ана, ўртоқ раис, иккитадан кулча бераман, де-
япти, — деди. — Битта шу... ўликка раҳм-шафқат қиласай-
лик? Келинглар, уйига олиб бориб қўйинглар.

НҚВДчилар ўзаро қарашиб-қарашиб олди. Ноилож
қолди.

Биттаси машинадан шолчани олиб келди. Алам би-
лан ёйди. Биттаси она-болани оёғидан олди, биттаси
бошидан олди. Аччиқ ҳам зарда билан шолчага ўради.
Ўрамни қўлтиқлаб, машинага йўл олди.

15

Биринчи кинотеатр қурилажак бўлди.

Лойиҳа тасдиқ бўлди.

Ботир фирмә кинотеатр довруғини оламга ёяжак
бўлди. Республика миқёсида достон этажак бўлди.

Шу мақсадда Йўлдош Охунбобоевни таклиф этди.

Курилиш бошида катта йиғин бўлди. Карнай-сур-
най чалинди. Ўйин-кулги бўлди. Қозон осилди.

Йўлдош Охунбобоев қарсақлар остида пойдевор ора-
сига эсдалик ёдномасини жойлаштирди. Ёднома усти-

дан биринчи ғильтни қўйди. Ғильт устини андава билан лойлади. Кейин, андавани Ботир фирмага узатди.

— Марҳамат, ўртоқ Эсонов, марҳамат! — деди.

Ботир фирмага Охунбобоевни кўлидан андавани олди. Бир қўлига ғильт олди.

Ботир фирмага кинотеатрни... иккинчи ғильтини қўйди!

Қарс-қарс қарсаклар бўлди. Ура-ура, ҳайқириқлар бўлди.

Ботир фирмага Йўлдош Охунбобоевни назарига тушди.

Ботир фирмага Йўлдош Охунбобоевни дастурига тушди.

— Бизга сиздек коммунистлар керак! — деди Охунбобоев. — Олдин Тошкентда ўқитамиз, кейин Москва-да ўқитамиз. Биз сизни кўтарамиз!

Турмуш баҳтиёр бўлди, Ботир фирмага ундан-да баҳтиёр бўлди!

16

Беш-олти кундан кейин... НКВД ходимлари келди. Курилишни айланниб қаради. Бош иргаб-иргаб қаради.

— Маданий-маиший иншоотларга кенг йўл! — деди.

Кейин, теварак-атрофни айланди. Шунда, Сайдхўжа эшонни хонақосини кўриб қолди.

Хонақо кинотеатрдан юз қадамлар холисда бўлди. Ариқ бўйида бўлди.

Ариқ шовуллаб-шовуллаб оқди. Суви тоза ҳам тиник оқди.

Эл-юрт ана шу ариқдан сув ичди. Қўшҳовучлаб-қўшҳовучлаб сув ичди.

Эл-юрт ариқда ёмон нарса ташламади. Ариқни ҳаром этмади. Сувни булғамади.

Шу боисдан-да Сайдхўжа эшон ана шу сув бўйида хонақо қурди.

НКВДчилар хонақони гир айланниб кўрди. Ичкарини айланниб кўрди. Илма-тешик этиб кўрди.

— Бузилсин! — дея буюрди. — Янги турмуш ёнида эскилиқ сарқити бўлиши мумкин эмас! Бузилсин!

НКВД гапи — қонун! НКВД гапи — отилган ўқ!

Эл-юрт нафас ютди.

Эл-юрт сув сепмишдай жимжит бўлди.

Эл-юрт аза тутди.

17

Хонақони мұмтоз усталар қуриб эди.

Хонақо дарвозалари нақшинкор-нақшинкор дарво-

залар эди. Деразалари жимжимадор-жимжимадор деразалар эди. Фоят оханжомали эшик-дарвозалар эди, дераза-пештоқлар эди.

Дераза-дарвозалар қадимги Шарқ меморчилик санъатини ноёб намунаси эди!

Айниқса, мазкур оханжома дераза-дарвозалар... арча дараҳтидан эди. Арчадан ясалиб эди. Арчадан яратилиб эди.

18

Ботир фирмә фаолларга юз солди. Фаоллардан маслаҳат сўради.

Фаоллар... Биров юзини олиб қочди. Биров эшитиб-эшитмасликка олди.

Фаол зоти бор — ўзини олиб қочди.

Ботир фирмә энди... яккаш ўзи ўйлади. Бир эскича ўйлади, бир янгича ўйлади. Эскича билан янгичани кўшиб ўйлади.

Ана шунда, Ботир фирмә юрак ютиб... бир ишга кўл урди.

Кечаси эл-юртни ухлатди. Тўртта ҳалол деҳқонни эргаштириб, хонақога борди. Дарвоза-деразаларни буздириб олди. Колхоз ўтинхонасига ташитди. Бир бурчакка қалатди. Устидан тут кундаларини бостириди. Кундалар устидан шох-шаббалар ташлатди.

Ўтинхонани қулфлади. Калитни чўнтакка солди.

— Туя кўрдиларингми-йўқ? — деди.

— Йўқ, — деди деҳқонлар.

— Агар ҳиди чиқса, бештамиз ҳам манави ёқقا борамиз.

Ботир фирмә бармоқларини панжара-қамоқхона қилиб кўрсатди.

Эртаси куни хонақо бузилди.

Излар бости-бости бўлди.

19

Кинотеатр кун сайин қад кўтарди.

Марказдан ашё-анжомлар келди.

Ботир фирмә кинотеатр эшик-деразаларини мактабга қўндириди. Боиси, мактаб эшик-деразалари қийшайиб ётиб эди. Қиши эса, бўсағада эди.

Кинотеатр эшик-деразаларини қўндириш вақтида курувчилар қараса — эшик-да, дераза-да йўқ бўлди.

Курувчилар марказга хабар берди.

Марказдан тафтиш келди. Текшир-текшир бошлади.

Шунда, Ботир фирмә тафтишчиларга мактабни күрсатди. Важ-сабабларини айтди.

— Аммо-лекин ўқувчи авлодни совуқдан сақлаб қолдим! — деди.

Тафтишчилар бош иргади. Ботир фирмәни құллаб-куватлади.

— Тұғри қилибсиз, — деди. — Хүш, энди нима қылмоқчисиз?

— Энди... Энди, гап бундай, — деди Ботир фирмә. — Хабарларингиз бұлса керак, анави сув бүйіда бир... эскилип сарқити бұлар эди.

— Эскилип сарқити?

— Шундай-шундай. Хонақоми, мачитми... шундай бир бало дейилар эди. Ишқилиб, дингорлар йиқилиб-турадиган намозхона эди. Мен отам замондан қолган ана шу намозхонани буздириб ташлаб әдім. Шара-бараларини ташлатиб юбориб әдім. Эскилип сарқити-ни шара-бараси кимга керак, тұғрими? Ана шу шара-бараларни қоровуллар ўтін қилиш учун ўтинхонага олиб бориб ташлабди. Коровуллар билади-да, арча ёғоч яхши ёнади.

— Арча ёғочданми? — деди тафтишчи.

— Бари ашқол-дашқол арча ёғочдан әди-да, арча ёғочдан! Энди, ана шу эски-тускилардан фойдаланиб тұрсақ деб әдім.

— Қани, ўша эски-тускилар?

Ботир фирмәгә жон кирди. Тафтишчиларни ўтинхонага олиб борди.

Тафтишчилар энкайиб қаради. Тафтишчилар қийшайиб қаради.

— Вой-бу-үй, қани, күринмайди-ю? — деди.

— Мана шуларни тагида ётиби, — деди Ботир фирмә.

— Тайёр жиҳозниям шундай қыладими-а? — дея бош чайқади тафтишчи.

— Бу ўзи бир... эскилип сарқити бұлса, нимасини аяиди? — деди Ботир фирмә. — Бу иш халқни эскилипка нафрата-ю, совет тузумига ҳурматидан!

— Тұғри, лекин шундай жиҳозлар бекордан-бекор ўтін бұлғандан күра... фойдаланса бўлмайдими?

— Бўлади, бўлади.

— Ўзи, қайта тикласа бўладими?

— Жуда бўлади-да! Шундай қўли гул усталаримиз бор, боплаб ташлайди.

— Унда, ўша усталарингизни қақириб, дарҳол ту-заттииринг! Кейин, фойдаланишга топширинг!

Ботир фирмә учун шу гап керак эди. У юқорини буйруғини бажарди.

20

Ботир фирмә Тошкентда түққиз ойлик сиёсий ўқиши тамомлаб келди.

21

«Гитлер уруш бошлашдан олдин... мағлуб бўлди. Ўз-ўзига гўр ковлади. Ўз бошини ўзи еди.

Гитлер СССР армияси имкониятларини билди. 1-фронт кучларини тоштарози этиб кўрди. 2-фронт кудратини-да ўлчаб кўрди.

Аммо-лекин 3-фронт ҳақида ўйлаб кўрмади. Оқибат, 3-фронтни ҳисобга олмади.

3-фронт... фронт орти бўлди. Меҳнаткаш халқ бўлди. Чол-кампирлар бўлди. Бева-бечоралар бўлди. Етим-есирлар бўлди. Майиб-мажруҳлар бўлди. Бир сўз билан айтсак, тонгдан шомгача... фронт учун тер тўкувчи жафо-каш халқ бўлди».

Ботир фирмә иккинчи жаҳон урушидан кейин ана шундай ўйлади. Фалабани ана шундай шарҳлади.

— Аммо-лекин Гитлер... мени сезмади, — деди Ботир фирмә. — Фронт ортида... мен меҳнат қилаётанимни Гитлер билмай қолди!

22

Туман ижроия қўмитаси биноси икки қаватли бўлди.

Ботир фирмә бино хоналарини айланди. Ҳар бир хонани алоҳида қараб кўрди. Деворларни кўрди. Эшикларни кўрди. Деразаларни кўрди.

— Отасига раҳмат, — деди. — Ҳамма ишни партия-вий аниқлик билан бажарибди.

Кейин, қўмита ҳовлисини айланди. Бино теваракбошини қаради.

Фавқулодда қаққайиб қолди. Энсаси қотди. Пешонаси тиришди. Лабларини бурди. Теварак аланглаб, елкақисди. Ажабланиб, кучогини бир очиб олди.

— Курувчилар қани? — деди.

— Курувчилар бинони топшириб кетди.

— Энди қачон келади?

— Курувчи келармиди, фирмә бова. Бинони топшириш қоғозига құлимизни қүйдирди-ю, жүнаб қолди.

— Олдинги раисларингиз шундай қабул қилиб олдими?

— Ҳа-да, мана тайёр бино. Ўзингиз ҳам отасига раҳмат, деяпсиз-ку.

Ботир фирмә кескин бош чайқади. Кескин ҳай-ҳай, деди.

Боиси, бинони йигирма гектарча ҳовлиси... бийдай бүм-бүш бүлди. Қуп-қуруқ дала бүлди. Теп-текис дала бүлди.

Ақалли бир ниҳол бүлмади. Ақалли бир... янтоқ бүлмади!

«Қасам урган ерга ўхшайди, — дея ўйлади Ботир фирмә. — Қарғышга учраган ерга ўхшайди».

— Бугун қандай күн? — деди Ботир фирмә.

— Бешинчи май, — деди бир ходим.

— Вақт пича ўтибди, — деди Ботир фирмә. — Пичагина ўтибди. Аммо-лекин ҳалиям кеч эмас.

Ботир фирмә бир ҳафта қўмита биноси ичига кирмади.

Ҳовлида ходимлар билан ҳандақ қазиди. Ходимлар билан турли-туман ниҳол экди.

Ўрик экди. Олма экди. Гилос экди. Дераза остида атиргул экди. Бўсаға олдида намозшомгул экди.

Ботир фирмә улкан дарвоза олдида ўйлаб қолди. Кетмон суюниб ўйлади. Теварак аланглаб ўйлади.

«Ҳовлини тўлдириб мевали дараҳт экдик, — деди. Энди, дарвоза олдига-да мевали дараҳт эксак. Масалан, олма эксак. Олмани сояси ўзига яраша бўлади. Берса, беш-олти кипига соя беради. Бу дарвоза ўз оти ўзи билан ижроқўм дарвозаси бўлади. Келим-кетим кўп бўлади. Ҳалқ дарвоза олдида йифилади. Ичкари кириш учун навбат кутади. Олма қайси бирига соя беради? Йўқ, беш-олтита улкан дараҳт керак, улкан!»

Ботир фирмә ўйлади-ўйлади — дарвоза олдида... ёнғоқ экар бўлди. Ёнғоқ ҳам мевали дараҳт, ҳам улкан дараҳт, дея ўйлади. Кейин, ушбу фикридан-да қайтди.

«Ёнғоқ ўзидан одам учун зиён ҳид чиқаради, — деди. — Ижроқўмга қўзидан ёши оққанлар келади. Бирортаси йиғлаб-йиғлаб, ёнғоқ остида... ухлаб қолса нима бўлади?»

Ботир фирмә тағин ўйлади. Ниҳоят, чинор экажак бўлди.

— Ўн туп чинор керак, — деди Ботир фирқа. — Бирдан униб ўсадиган, дадил-дадили керак.

Ходимлар машинада колхоз-совхозларга йўл олди. Яхши-яхши чинор топиб келди.

Ходимлар чинор томирини хандақقا солди. Чинор бўғзидан бир кўллаб ушлади.

Ботир фирқа чинор остига бир сатил сув солди. Устидан нураб тушган девор тупроғини солди. Чинор томирлариқа девор тупроқ билан кўмди. Устидан енгил-енгил тепкилади. Тағин бир сатил сув солди. Энди, хандақقا ўзидан чиққан тупроқни солди. Тепкилаб-тепкилаб текислади.

Ботир фирқа шу қабилда ўн-ўн бештacha чинор экди.

— Насиб бўлса, қулф уриб ўсади! — дея кулди у. — Насиб бўлса, бу чинорлар бутун туманга соя беради!

Ботир фирқа эртаси куни ижроқўм раиси кресло-сидан жой олди.

23

1956 йил бўлди.

Ўзбекистонда телевизор жорий бўлди.

Ўзбек халқи телевизор кўражак бўлди.

Шу боис телевизор отлиқча йўқ бўлди.

Ушбу антиқадан бир донаси туман хотин-қизлар қўмитаси ихтиёрига келди.

Қўмита фаоллари мазкур мужда отини тополмай қийналди. Тўпорироқ фаол «кути», деди. Илғорроқ фаол, «ойна», деди. Ўқимишилироқ фаол «дилбузар», деди.

Фаоллар муждани қўйиб кўражак бўлди. Тўпори фаол мужда қофоз халтасини йиртди. Илғор фаол муждани халтадан сугуриб олди. Ўқимишили фаол муждани «қизил бурчак»ка кўтариб қўйди.

Бўлди — ундан ўёғига бирорини-да ақли етмади!

Телевизор шу туришида ойлаб турди. «Қизил бурчак»ни безаб турди.

Бегим кунлар — 8 март келди.

Қўмита совға-саломлар тайёрлади. Хайр-эҳсонлар тайёрлади. Ана шу телевизор Обод Мирзахўжаевага совға этилар бўлди.

Қўмита фаоллари телевизор қўйгич уста топиб келди.

Уста телевизорни бир аравачага босди. Аравачани ўзи тортди.

Фаоллар туман ижроқұми раиси Эсонов бошчилигіда Мирзахұжаеваларни кириб борди.

Дастурхон турланди, турланди!

Күнгилтортарлар дастурхон теварагидан жой олди.

Уста телевизорни қўйиш билан машғул бўлди. Уйга кирди-уйдан чиқди. Томга чиқди-томдан тушди. Охири телевизорни қўйиб берди.

Телевизор бинойидай кўрсатди.

Барча чапак чалиб юборди.

— Яшасин, меҳрибон шўро ҳукумати! — деди Ботир фирмә. — Озод Шарқ хотин-қизларига алангали саломлар бўлсин!

Тағин чапак бўлди.

Эркаклар ёнма-ён хонадан жой олди. Ўрта дераза очиб қўйилди. Эркаклар ана шу деразадан телевизор кўриб ўтири.

Ботир фирмә билан уста қиттай-қиттай олди.

Ботир фирмә деразага қараб қадаҳ кўтарди. Деразага қараб тантанавор сўзлади:

— Ҳурматли ўртоқ Обод Мирзахұжаева! Биз, шонли совет халқи, халқаро хотин-қизлар байрами 8 мартни бутун халқимиз, жонажон коммунистик партиямиз, меҳнаткаш колхозчи деҳқонларимиз, қаҳрамон ишчилар синфимиз, қўйингки, жамики шонли совет зиёлиларимиз КПСС XX съезди тарихий қарорларини улкан ғайрат-шижоат билан турмушга тадбиқ этмоқда бўлган бир вазиятда кенг байрам қилмоқдамиз. Ҳа, шонли коммунистик партиямиз XX съездидан кейин ҳали ҳеч қанча вақт ўтганича йўқ. Аммо-лекин биз совет халқи шугина қисқа вақт мобайнида оламшумул муваффақиятларни қўлга киритдик, бу билан бутун совет халқи, шу жумладан, озод Шарқ хотин-қизлари ҳар қанча фахрлансалар арзиди...

Ботир фирмә қишлоқ хўжалиги, халқ хўжалиги, саноат соҳасида эришилган ютуқларни рақамлар билан санаб берди.

Эркаклар ана шу шонли ютуқлар учун қадаҳ чўқишитирди. Аёллар... чой чўқишитирди.

Шу вақт аёллар давраси ғимир-ғимир этиб қолди.

— Вой, ўлдим, вой! — дея овоз эшишилди. — Вой, шарманда бўлдим!

Эшиклар қарсиллаб ёпилди. Аёллар бири қўйиб, бири овоз берди:

— Нима гап?

— Тинчликми?

Ботир фирмә деразадан қараңдан орланди. Дастан-хондан күз олмай сүради:

— Нима бүлди, ўртоқ Мирзахўжаева?

Жавоб бўлмади. Ичкаридаги вой-войлар ташқарилади. Ичкаридаги ҳа-ҳулар ҳовлилади.

Ботир фирмә жойидан қўзголди. Эшикни ярим очди. Ҳовлига мўралади.

Ҳовлида бир паранжилик аёл бўлди. Паранжилик аёл қўлида ҳасса бўлди. Аёлни буқчайишидан — момо бўлди.

Ана шу момо ҳовли дарвозасига қараб талпинди. Дарвозага қараб юлқинди.

Бир аёл момони тирсагидан олди. Бир аёл елкасидан олди. Бир аёл паранжи бурчидан ушлади.

Мирзахўжаева момони йўлида тўғоноқ бўлди.

— Ҳа, борасиз-да, эна, — деди Мирзахўжаева. — Аллақайтиб айланиб кепсиз, борасиз-да.

— Қоч, йўлимни бер! Қоч дейман!

— Ҳўп, ичкари киринг. Одам ҳоврини одам босади!

— Бетингни мурдашўй кўргурлар! Қари-қартанг бир момони гуноҳга ботирган сенларни худо кўтарсин!

— Эна, у бир ойна, эшитяпсизми, ойна!

— Ҳа, ойнанг бошингдан қолсин, бошгинангдан қолсин!

— У бир дилбузар, хола, дилбузар!

— Қариган чоғимда юрувсиз бўлдим-а, юрувсиз-а!

— Хола, анави ичкарида фирмә бовалар ўтирибди, кўп жавраманг.

— Ичкариланг. Икки пиёла чой ичинг. Нон эгаси билан чучук!

Шунда, момо уй тараф қаради. Ботир фирмәга қаради. Ҳассасини уй тарафга қўйиб дўқиллатди. Оҳиста изига бурилди.

— Майли, туз тортган экан, кираман, — деди. — Лекин бирорингният бетингга қайрилиб қарамайман!

Ботир фирмә момони таниди. У Мирзахўжаевани кекса онаси Зайнаб момо бўлди.

Зайнаб момо ҳассасини дўқ-дўқ уриб ичкарилади. Остонада ҳассасини деворга суяб қўйди. Бўсағада тиктурди. Теваракка разм солди.

Телевизор қиблагоҳда — Зайнаб момони чап тарафида бўлди. Шу боис, Зайнаб момо чап тарафидан юзини бурди. Рўмолини пешонасига тортиб қўйди. Рўмоли чап тарафи бурчидан ушлади. Рўмоли бурчини юзи узра кўтариб... юзини яширди. Телевизорда сўзловчи диктордан... юзини яширди.

Зайнаб момо шу ҳолда ичкарилади. Ҳали ўзи ўтиришиш тўрдан жой олди. Сандиқقا қараб ўтириди. Рўмоли бурчини ушлаб, телевизорга... елка буриб ўтириди. Телевизордан юзини бекитиб ўтириди.

Узатилмиш чойни енги ичидаги олди. Рўмолини қўйиб юбормай олди. Қайрилиб қарамай олди.

— Дастурхонга қараб ўтиринг, хола, — деди бир фаол.

— Йўқ, қарамайман, — деди. — Номаҳрамларга қарамайман!

— Дастурхон номаҳрам эмас-ку?

— Дастурхон бўлмаса, анави кутида жавраётган бетавфиқ номаҳрам!

Фаоллар оғиз ушлаб кулди. Бир-бирини туртиб кулди. Бир-бирини чимчилаб кулди.

Ботир фирмә барини билиб ўтириди. Зимдан кузатиб ўтириди. Кўнгли, Зайнаб момо билан саломлашай, деди. Пиёла гардишига тикилиб гап бошлади:

— Зайнаб момо, маза қандай? — деди. — Ўйнаб-кулиб юрибсизми? Суяк дадилми?

— Шукур, фирмә бова, шукур. Ўзингиз қандай, бола-бақра катта бўляптими...

— Шукур, шукур. Аммо-лекин овозингиз баланд-баланд чиқяпти, тинчликми?

— Тинчлик бўлмай нима бўларди, фирмә бова. Худога шукур, қизларим ўзидан тинган. Шу қизлари курфур, ўйламай-нетмай, номаҳрам эркакларга рўпара қиласида. Ўлганимни кунидан ўтираманда.

— Энди, у телевизорда, Зайнаб момо, телевизор.

— Ҳа... кутиси бошидан қолсин! Бир сурбет... кутидан бошини чиқариб қарайди денг. Гуноҳларга ботиб ўлдим, гуноҳларга-я!

— У бир дикторда, Зайнаб момо, диктор.

— Ҳа... Үндай эркакни оти ўчсин, отгинаси ўчсин! Эркак зоти бунчалик сурбет бўлмайдида! Шундай келиб ўтиришимни биламан — менга кўзини лўқ қилиб... гап отиб қолса бўладими?

— Шундай туюлади, Зайнаб момо. Аслида, диктор ҳаммага қараб гапиради.

— Қирчинингдан қийилгур, менга қараб гапириди! Кўзимга бақрайиб гапириди! Ишшайиб кулди ҳам!

Шу вақт телевизор бир куй чалди.

Бир фаол Обод Мирзахўжаевани етти-саккиз ёшли кўхликкина қизини силаб-сийпади.

— Отинг нима? — дея сўради.

- Диля! — деди қыз.
 - Йўқ, ўзингни отинг нима?
 - Дилбарчик.
 - Ҳа-а, Дилбар. Мана шу меҳмонларга бир ўйнаб бер, Дилбар. Ашула билсанг, ашула айтиб ўйна, хўпми?
- Диля ашула айтиб-айтиб хиром этди:

Мунча ўйку босди сизи, оналар,
Фикр этингиз, ўйлаб у пешоналар,
Илм, маориф била бегоналар,
Бўлдингиз оламга сиз афсоналар,
Мазлумалар, жонлара жононалар,
Қизларингизни ўқитинг, оналар!

Аёллар қарс-қарс қарсак чалди. Қийқириб-қийқириб олқишлиди.

— Қизлар... эркаклаб кетди! Ана, қизлар эркаклаб кетди! — деди Зайнаб момо.

Зайнаб момо 8 март давраси давомида телевизордиктордан... бетини бекитиб ўтириди!

24

Ботир фирмә олий партия мактабида ўқиб келди.

25

Юқоридан катта келса — фаоллар йиғилишидан қайтар эди. Юқоридан катта келса — боғлар қўйнидан қайтар эди. Юқоридан катта келса... балиқ овидан қайтар эди.

Бир саратонда Шароф Рашидов келди.

Күёш шарқ буржидан... фалак гиламига қадам қўяр бўлди. Оламни содиқ зотлар қалбидай равшан ҳам мусаффо этар бўлди.

Шароф Рашидов туманма-туман айланди. Колхозма-колхоз айланди. Далама-дала айланди.

— Энди, мана буёкқа ҳайданг!

Шароф Рашидов шундай дея, адир тарафни кўрсатди.

Майда машиналар карвони адир оралаб йўл олди. Машиналар адир оралаб юрди-юрди... бийдай чўлдан чиқиб қолди!

— Мана шу ерда тўхтатинг! — буюрди Шароф Рашидов.

Шароф Рашидов машинадан тушди. Теваракка назар солди. Кафтини пешонасига соябонлаб қаради. Кўзларини қисиб қаради.

Қиблаи олам бийдай чүл бўлди. Дунё мисоли чўлдан иборат бўлди. Кунботар-да кўриниб турди, кунчиқарда кўриниб турди.

Саратон... ошиқ юрагидай ёнди! Маъшуқ юрагидай ёнди!

Бир чақиримча олисда оппоқ бир тасма узала тушиб ётди. Оппоқ тасма бир... машина йўл бўлиб кўринди, бир... сўқмоқ йўл бўлиб кўринди.

Бу — Амударё бўлди.

Амударё сокин-сокин оқди. Шу боис, оқиб кетяптими ё тўхтаб турибдими — билиб бўлмади.

Шароф Рашидов фаолларга қараб-қараб юрди, оёқлари ости қум-тупроқларга тикилиб қолди. Тупроқдан кўз олмай бош чайқади.

— Ишламабсиз, ўртоқ Ражабов, ишламабсиз, — деди.

Вилоят партия қўмитасини биринчи котиби Ражабов каловланиб қолди.

— Энди, ўртоқ Рашидов... Мен обкомга яқинда келдим, — дея манқаланди. — Ҳали-ҳозирча, областни яхши ўрганганим йўқ. Шу сабабли, ҳамма ишни келган жойидан давом эттириб турибман.

— Сиз ишни келган жойидан давом эттирманг! — овозини кўтарди Шароф Рашидов. — Биласизми, совет ҳокимияти келгунича бу ерлар кимга қарашли эди?

— Бухоро амирлигига қарашли эди.

— Ҳа, Бухоро амирлигига қарашли эди. Бухоро амири ким эди?

— Амир Олимхон эди.

— Ана шу амир Олимхон... ҳарамидан нари кетмасди. Дейдиларки, қавми Лутни ишини ҳам қилган фуррат топса. Нима, энди сиз ҳам амир Олимхонни ишларини... келган жойидан давом эттиromoқчимисиз?

— Мен... мен...

— Совет ҳокимияти ўрнатилганига неча йил бўлди? Жавоб беринг?

— Мен... ҳалол коммунистман, Шароф Рашидович, ҳалол! — дея кути ўчди Ражабов. — Чин коммунист сўзим. Мен баъзи бирорлар юрган йўлларидан юрмайман. Мана, обком аъзолари гувоҳ.

— Мен сизни охирги амирга тенглаштиromoқчи эмасман. Мана, сиз фарғоналиксиз. Боғ-роғлар водийсидансиз, қўли гул боғонлар юртидансиз. Шунинг учун ҳам партия сизни мана шу воҳаларни боғ-бўстонларга айлантиrsин, деб юборди. Мана шу эл-юртни обод

қилсін, деб юборди. КПСС Марказий Комитетининг чўлларни боғ-бўстонга айлантириш ҳақидаги қарорига неча йил бўлди? Жавоб беринг?

— Виноват, Шароф Рашидович, виноват. Мен... тушунмабман.

— Ишни келган жойидан давом эттиряпман эмиш. Қанақа ишни? Амирларга ўхшаб, чўлларни чўллигича қолдириш, даштларни даштлигича қолдириш ишиними? Хонларга ўхшаб, фақат ўз нафсини қондириш, ўз қорнини тўйдириш ишиними?

Шароф Рашидов нега йўлини чўлга бурди? Нега чўл ўртасида тўхтади? Нега дабдурустдан бундай гап бошлади?

Ражабов бу бурилиш тасодиф эмаслигини энди билди. Бу гаплар олдиндан ўйлаб қўйилганини энди билди.

Билди-ю... Ўзбекистонни барча катталарига хос баҳонани қўллади. Ўзбекистонни барча катта зоти дастак этиб олмиш баҳонани қўллади:

— Сув йўқ, Шароф Рашидович, сув йўқ! — деди.

Ражабов Ўзбекистон катталарини қўллаб-кувватлаб келмиш сув баҳонасини айтди-ю... балоларга қолди!

— Сув? Анави сув бўлмай, нима?!

Шароф Рашидов шаҳодат бармоғини Амударёга ниш этди.

— Анави сув бўлмай, нима? Кўз борми?!

Ражабов мунғайиб-мунғайиб қолди. Ражабов бошини елкалари ичига олди.

— Сув, тўғри, сув... — дея минғ-минғ этди. — Лекин Орол... чекиняпти.

— Нима-нима?

— Амударё суви тўлалигича этиб боролмаётганлиги учун Орол денгизи қурияпти.

— Орол денгизи? Энди, шу баҳонани топдингизми? Орол сиз билан биздан олдин ҳам бор эди, сиз билан биздан кейин ҳам бўлади! Суви камаяди, аммо қуримайди. Суви камайса, сиз билан биз айбдор бўлмаймиз. Амударё билан Сирдарё ҳам айбдор бўлмайди. Чунки Орол ҳамма тарафдан ёпиқ бир... кўл. Денгиз океанга чиқиши керак. Орол эса, океанга чиқмайди. Демак, Орол — кўл. Океан билан туташмайдиган, океан суви тушиб турмайдиган ҳар қандай сув — қуриш хавфи остида бўлади. Ўнта Амударёни олиб бориб қуйсалар ҳам суви камайиб бораверади. Орол ҳам шундай. Сиз, чўл-биёбонда ҳаёт кечираётган халқни ўйланг! Сиз,

оёқларингиз остида чўллаб ётган тупроқни ўйланг! Қаранг, ер қақраб ётибди, қақраб! Ер чатнаб ётибди, чатнаб! Асрлардан буён чўл-биёбон бўлиб ётибди. Сиз билан биз мана шу чўл-биёбонларни инсон яшайдиган маконга айлантирмасак... коммунист бўлиб нима қилиб юрибмиз? Жайдари тил билан айтганда... одам бўлиб нима қилиб юрибмиз? Қани, Ўзбекистон гимнини айтинглар-чи? Қани-қани?

Вилоят катталари тасбеҳдай-тасбеҳдай тизилиб турди. Катталар ер чизди. Катталар қизарип-бўзарди.

— Ҳали, Узбекистон гимниниям билмайсизларми? — дея димогида кулди Шароф Рашидов. — Ўзбекистон гимнини-я? Ана, холос! Чўл ўзлаштиришни эплай олмасаларингиз, гимн айтишни билмасаларингиз... коммунист бўлиб нима қилиб юрибсизлар?

Ана шунда, райком Эсонов жонланди. Ўз жойидан овоз берди:

— Мен пича айта оламан, ўртоқ Рашидов.

— Пичами, тўлиқми?

— Ҳа, энди, гимн бўлгач, тўлиқ бўлади-да, ўртоқ Рашидов.

— Үнда, иккаламиз айтамиз. Қани, келинг!

Райком Эсонов чопқиллаб-чопқиллаб борди. Шароф Рашидовни ёнида банда мисол-банда мисол турди. Шароф Рашидовга кўз қири билан қараб-қараб турди.

— Қани, ўртоқ райком, иккаламиз мана шуларга бир намуна бўлайлик!

Шароф Рашидов қўлларини ёнларига босди. Қоматини мағрур керди. Бошини адл кўтарди.

Шароф Рашидов бепоён чўл-биёбонга боқиб-боқиб... Шўролар Ўзбекистони гимнини айтди:

Серқуёш ўлкада кўрмасдик зиё,

Дарёлар бўйида эдик сувга зор...

Уфқаларга туташ чўл. Сап-сариқ чўл. Бийдай чўл.

Ана шу сап-сариқ чўл қўйнида гимн янгради.

Бари катта ғоз турди. Гимн айтар бўлиб, оғиз пи-чираплатди.

Шароф Рашидов катталарга мурожаат этди. Сўзни қалин-қалин қилиб айтди:

— Ана, эшитдиларингизми? Дарёлар бўйида эдик сувга зор... Бу, ким ҳақида? Сиз билан биз ҳақимизда! Ўзбекистонда яшовчи барча қоракўз халқ ҳақида. Лекин қоракўз халқда айб йўқ. Халқ саратон сарифида чанг ютиб, қаҳратон совуғида муз қотиб меҳнат қила-

ди! Айб сиз билан бизда! Қаранг, асрлар мобайнида Амударё, Сирдарё деган азим дарёлар бўйида яшаганмиз. Аммо сувга зор бўлиб яшаганмиз. Асрлар давомида азим-азим дарёларнинг шундайгина қирғоғида яшаганмиз. Аммо сувга ташна бўлиб турмуш кечирганмиз. Бу нимадан? Бу, сиз билан бизнинг... Гап келганда, отангни аяма, дейдилар. Мана шу бийдай чўлда айтай, норасмий равишда айтай, қулоқларингизга айтай: бу сиз билан бизнинг ювошлигимиздан, ҳа, қўймижозлигимиздан! Бегона тиллар бизни «баран-баран», деди. Мана, баранлик! Энди, буни қаранг: бутун бошли област раҳбарияти, ўнлаб район раҳбарияти... Ўзбекистон гимнини билмайди! Ана, қўймижозлик!

Райком Эсонов шунча зот орасида битта ўзи Ўзбекистон гимнини айта олишидан қувонди. Аммо Шароф Рашидовни гапларидан ғоят таъсирланди.

«Ўзи, ўртоқ Рашидов куюнганича бор-да, — деди райком Эсонов. — «Баран» бўлмасак, Амударё бўйида сувга ташна яшаймизми? «Баран» бўлмасак, эл-юрт йўлбошчиси бўла туриб, Ўзбекистон гимнини билмаймизми?»

26

Тушдан кейин қабулга кирувчилар адо бўлди.

Райком Эсонов керишиб-керишиб яйради. Эмин-эркин бўлди.

Бир чойнак чой буюрди.

Чойни котиба қиз эмас... Обод Мирзахўжаева кўтариб кирди.

Райком Эсонов ажабланиб қолди. Жойидан туриб борди. Мирзахўжаевани қўлидан чойнакни олмоқчи бўлди.

Аммо Мирзахўжаева кўнмади. Чойни ўзи олиб келди. Чойнак қошида ўтирди.

Райком Эсонов Мирзахўжаева билан юзма-юз ўтириди. Ундан ҳол сўради.

Мирзахўжаева чой қайтара-қайтара бош иргади. Чой суза-суза жавоб берди. Бир пиёла чойдан кейин мақсадга ўтди.

— Бир бола бор, Ботир Эсонович, — деди. — Ўзи Москвани битириб келган. Газетада ишлайди. Ўсадиган бола. Шоир!

— Шоир? Зўр-ку!

— Зўр бўлғандаям, улай-булай зўр эмас. Лаббайгўй эмас. Саркаш шоир. Янги оқим шоири. Француз авангардизми... дейдими... Ана шундай авангард шоир!

— Сиз француз авангардизмини қаердан биласиз, ўртоқ Мирзахўжаева? — дея жилмайди райком Эсонов.

— Мен тушунмайман, Ботир Эсонович. Қизимдан эшитаман, қизимдан.

— Айтгандай, қизингиз шоира бўлди-а?

— Ҳа, шеър ёзади. Шеърлари қўшиқ ҳам бўлди.

Райком Эсонов кўзларини пирпиратди. Кўзларини олиб қочди. Деразага қаради. Ундан чинорларга қаради.

«Шеърлари қўшиқ бўлибди. Қизингизни ўзи ким бўлибди?» — дегиси келди. Боиси, Мирзахўжаевани ана шу қизи ҳақида узун-калта гаплар эшитди. Яхшиёмон гаплар эшитди. — Аммо-лекин шундай фаолларимизни қизи ишқбоз бўлса, бошқалардан нима умид, нима хайр? — деди райком Эсонов. — Кимсан, илфор фаол Обод Мирзахўжаевани қизи нопок йўллардан юрса. Ўзидан сўрасаммикин? Уят, минг қилса-да, онаси. Ҳартугул, бир илмоқли гап отиб кўрай. Қизидан хабари бўлса — ярасини ёради».

— Ҳозирғи ёшлар.. ўйинқароқ бўлиб қолди, ўртоқ Мирзахўжаева.

— Замони келибди, ўйнаб-кулсин-да, Ботир Эсонович.

— Чекиш, ичиш...

— Бизни Диля ҳам чекади. Ичишини билмадим. Тўймаъракаларда ичади, дейишади. Мен ҳали кўрмадим.

— Совет хотин-қизлари чекмаслиги керак, ўртоқ Мирзахўжаева. Чекиш-ичиш совет хотин-қизларини ахлоқ-одоб нормаларига тўғри келмайди.

— Хотин-қизларни чекиб-ичиши эскичагаям тўғри келмайди, Ботир Эсонович. Диляга кўп айтдим. Чекмачекма, ледим. Қайда, фойдаси бўлмади.

— Бир сўз билан айтсак, хотин-қизларимизда коммунистик ахлоққа зид қилиқлар кўпайиб кетмоқда.

Райком Эсонов шундай дея, кўз қири билан Мирзахўжаевага разм солди: Мирзахўжаевада ўзгариш сезмади.

«Демак, қизини... ишқбоз эканини билмайди, — деди райком Эсонов. — Қизидан хабари йўқ. Бўлмаса, қизариб-бўзарар эди. Гапини йўқотиб қўяр эди. Майли, ишқбозлик дарди шахсий масала».

— Майли, ёшларни ўзи билади. Хўш, шу қизингиз?

— Шу қизим тушунириб туради. Шу бола етук авангард шоиримиз, дейди.

— Тушундим, хўш?

— Шу бола неча йилдан бери партияга ўтолмай юрибди экан. Ўрин йўқ, дейишар экан.

— У бола сизга ким бўлади?

— Қизим билан бир жода ишлайди. Қизимни шеърларини ўрисчага сўзма-сўз таржима қилиб беради. Ўрисчани сувдай ичади.

— Ўрисчани сувдай ичади? Шундайлар керак.

— Жуда керакли бола. Шу болага... ҳидоят қўлингизни узатсангиз, деб эдим?

— Бошидан ўтмаганни қошидан ўтма, дейдилар. Қани ўзи?

— Ташқарида. Чинорни остида ўтирибди. Чақирайми?

Мирзахўжаева қабулхонага чиқиб келди.

— Котиба қизга айтдим, чақириб келади, — деди.

Райком Эсонов ўз креслосига бориб ўтириди.

Мирзахўжаева... чойни оқлаб келди.

Остонада бир йигит қора берди: дароз-дароз. Сочлари елкаларида. Кулоклари остида.

Райком Эсонов йигитни ичкари таклиф этди. Кўришиб-сўрашди. Гапни нимадан бошлишни ўйлади.

«Дароз одамни эси камроқ бўлади, — дея ўйлади.— Шу боис, фақат бўйига ўсади. Буни эси қанақа экан?»

— Қани, ўзингизни таништиринг-чи?

— Мен Мадиев... Ленин район, Ленин совхоз, Ленин участкасида тугилдим. Ленин номли мактабда ўқидим, Ленин номли университетни тамомладим. Ленин комсомол сафига ариза бериб кирдим.

— Энди, Ленин партияси сафига кирмоқчисиз, шундайми?

— Ҳа! — деди Мадиев тантана билан. — Мен Ленин шанбаликларида қатнашаман. Ленин ҳақидаги шеърларни ёддан биламан. Лениннинг болалик ҳаётидан иншолар ёзганман. Ленин асарларидан диплом иши ёқлаганман. Мен Ленин сиймосини кўксимда олиб юраман!

Мадиев шундай дея, кафти билан ёқа силади. Ёқасида Ленин расми бор думалоқ значок бўлди.

— Кўрдим, кўрдим, — деди райком Эсонов. — Кўкрагингиздаги расм, ўртоқ Ленинни ёш вақти бўлса керак?

— Ҳа, доҳиймиз Ленин ҳамиша ёш! — деди Мадиев. — Ленин ҳамиша навқирон! Ленин тириклар ичратирик! Ленин ҳамиша биз билан!

— Ўртоқ Ленин ҳақида шеър ёзганмисиз?

— Ёшлик қилдим, тажрибам етмади, — деди Мадиев. — Ленин ҳақида албатта шеър ёзаман!

Райком Эсонов партиявий-ташкилий ишлар бўлим мудирини чақирди.

27

«Ўзингдан баланд амалдор нима деса — ана шуни бажар. Сўзсиз бажар. Аҳмоқона бўлса-да, бажар. Аблакона бўлса-да, бажар. Кўр-кўронга бажар. Ана шунда — ўсасан!

Ўзингдан баланд амалдордан... кўрқиб яша. Ўзингдан катта амалдор.. етти пуштингни ҳақорат этиб сўкса, сен... кечирим сўра!

«Ҳаммамиз учун ҳурматли ва азиз» қўшимчаси билан аталувчи амалдорни... Мункар-накир деб бил! «Муҳтарам зот», «улуг зот» «вич-вич» қўшимчалари билан аталувчи амалдордан қўрқ. Қўрқмасанг-да, ўзингни қўрқсанга ол. Боиси, амалдор зоти... ҳайиқиб турувчи одамни ёқтиради. Амалдор зоти қўлини кўксига кўйиб турувчи одамни яхши қўради.

Бир қудратли амалдор... оталиғида бўл. Ана шу амалдорга қўл бер. Ана шу амалдорни пиrim — шефим, деб бил. Ана шунда — қўтариласан!»

Ботир фирмә коммунист бўлибдикি — ана шу ҳаёт мантиқларини шиор этиб олди. Ана шу ҳаёт мантиқларига амал этиб яшади.

Оқибат — ҳузур-ҳаловат кўрди.

Ботир фирмәни тағин нималар кутарди?

Қўрқув! Кимдандир қўрқув, нимадандир қўрқув: гап тегиб қолмаса эди. Шов-шув бўлиб кетмаса эди. Хўжайин билиб қолмаса эди. Ревизия келиб қолмаса эди. Охири вой бўлмаса эди...

Ботир фирмәни тағин нималар одам қилди? Ҳужжатлар! Партиявий-сиёсий ҳужжатлар. Ҳукуқий ҳужжатлар. Молиявий ҳужжатлар...

Ботир фирмә... тирик инсонга ишонмади. Ботир фирмә... қофоз-ҳужжатта ишонди. Ботир фирмә... юз-хотирга ишонмади, қасам-лафзга ишонмади. Ботир фирмә... қофоз-ҳужжатга ишониб яшади.

Оқибат — Ботир фирмә қофоз-ҳужжатлардан... таянч-садоқат кўрди!

Ана шундай бир муҳтарам зот телефон этиб қолди. Ётар вақти... ётар вақти партиявий топшириқ бериб қолди.

Оқшом вақти Тұрақулов вафот этиб әди. Тұрақулов собиқ райком секретари әди. Мархұм әртага дағн этилар әди.

Партияй вий топшириқ ана шу ҳақда бўлди.

Ботир фирмә ётолмади. Ётиш учун юрак бетламади. Уйқуси йўқолди.

Партияй вий топшириқни бажариш учун шайланди. Машина буюрди.

Тұрақуловни хонадонига йўл олди.

Машина хиёлда йўл танобини тортди.

Хонадон... мотамхона бўлди. Зим-зиё қоронизор бўлди. Жимжит зулмат бўлди. Мунгли ҳам қайғули бўлди.

Хонадондан ажаб-ажаб ис анқиди.

Ботир фирмә бўсағада машинага суюниб турди. Тұрақуловни тўнгич ўғлини айттириб келди.

— Мана шу анқиётган нима? — деди Ботир фирмә.

— Исириқ.

— Исириқ, исириқ... қирқинчи йилларда мана шу исириқ учун одамлар сургун бўлган, қатағон бўлган. Шуни биласизми?

— Исириқ тутатиб, отамни... инс-жинслардан қўриқ-ляяпман.

— Ана гап, ана! Ким айтади сизни райком секретарини ўғли деб? Инс-жинс эмиш! Сиз ўзи қайси жамиятда яшаяпсиз?

— Ичкарида... отам ётибди. Гигиена дегандай, гигиена...

— Гигиена керак бўлса... дезодорант сепинг, дезодорант! Исириқ... эскилил сарқити! Шундай, исириқ эскилил сарқити!

— Хўп, ўчириб ташлайман, хўп.

— Бу, бир. Иккинчи: әртага дағн маросимида партиясовет арбоблари келади, обком секретарлари келади. Бир сўз билан айтсак, жамиятни қаймоги келади. Аммолекин дағн маросимида жаноза ўқилмайди.

— А?

— Ўртоқ Тұрақуловга жаноза ўқилмайди! Тұрақулов райком секретари әди, депутат әди, қўша-қўша орден-медаллар соҳиби әди. Бир сўз билан айтсак, асл коммунист әди. Асл коммунист эскилил сарқитларидан юксак туради! Шундай экан, биз ўртоқ Тұрақуловни асл коммунистчасига дағн этамиз. Ҳарбий оркестр мотам маршини чалади. Партия-совет арбоблари фахрий қоровул бўлади...

— Отам...

— Катта гапирганда, жим туриң! Қанақа одамсиз, ўзи? Сиз қайси жамиятда яшаяпсиз, ўзи? Мана, куни кеңең үртоқ Хрущев катта нұтқ сүзлади. КПСС программаси қабул қилинди. Программада: совет халқини ҳозирғи авлоди коммунизмда яшайды, деб айтилди. Дунё бўйлаб бир шарпа — коммунизм шарпаси кезиб юрибди, дейилди. Сизни хонадонингизда эса... исириқ-кезиб юрибди, исириқ! Қанақа одамсиз, ўзи?

— Хўп, узр.

— КПСС программасида коммунизмга таъриф берилди. Коммунизм — эркин ва онгли меҳнаткашларни юксак даражада уюшган жамиятидир, тараққий этган жамиятидир, дейилди. Ана шундай жамиятда... жанозага бало борми?

— Тўғри, лекин... мусулмончилик, увол-савоб, деган гаплар бор.

— Машинага кириңг. Мана, ручка, мана, қофоз. Ёзинг: тилхат...

Тўрақулов... жанозасиз кўмилди.

28

Жамоат суди шаҳар маданият уйида бўлди.

Суд раиси — маданият уйи директори саҳна тўрида ўтириди.

Суд ҳайъати аъзоси Ботир фирмә раисни қабатидан жой олди.

Айборд саҳна билан зал оралиғида ўтириди.

Зал деярли тўлди.

Ана шунда раис жараённи бошлади. Расмий бўлимдан кейин мақсадга ўтди. Айбордга сўз берди.

Ўргада ўтирмиш айборд жойидан қўзғолди. Бир саҳнага қаради, бир залга қаради. Вазмин-вазмин сўзлади. Сипо-сипо сўзлади:

— Мен, журналист Мадиев... редакция топшириғи билан командировкага бориб эдим, қайтишимда обжаво ёмонлашиб, самолёт учолмай қолди. Аэропортда ўёққа югурдим, буёққа югурдим. Нима қилишимни билмадим. Редакцияга телефон қилдим. Уша куни ҳамма пахтага кетган экан, ҳеч ким телефонни олмади. Пахта вақтила бундай юриш ёмон оқибатларга олиб келишини ўйладим. Бир ўртоғимга телефон қилдим. «Шаҳар ҳувиллаб ётиби, ҳамма пахтага кетган», деди ўртоғим. «Бирор-бир раҳбарга узримни айтиб қўймоқчиман», дедим мен. «Шаҳар бўйича фақат обком секретари

Ражабовни деразаси ёруғ бўлиб турибди. Бошқа раҳбарлар далада юрибди», деди ўртоғим. Мен ўйлаб-ўйлаб, аэропортдан област партия комитетини биринчи секретари Ражабовни қабулхонасига телефон қўилмоқчи бўлдим. Лекин тортиндим. Обком секретарини телефонда безовта қилиш одобдан эмас, деб ўйладим. Кейин, ўртоқ Ражабов номига срочний телефонограмма бердим.

— Нега айнан ўртоқ Ражабовга телеграмма бердингиз? Ахир, ўртоқ Ражабов сизнинг редакторингиз эмаску? — деди раис.

— Бош редакторимиз пахтада экан-да. Колаверса, газетамиз обкомни органи. Ўртоқ Ражабов бизнинг энг катта бошлиғимиз ҳисобланади. Шу сабабли, катта бошлиғимизга телеграмма бердим. Бошлиқقا телеграмма бериш айб эмас-ку? Қайси айбим учун мени жамоатчилик судига кўяяпсизлар?

— Қайси айбингиз учун? Ҳали, айбингизни билмайсизми?

Раис бир телеграммани боши узра кўтарди. Телеграммани тантанали суратда чапга кўрсатди, ўнгга кўрсатди. Кейин, телеграммани ўқиб берди:

— «Я, корреспондент Мадиев... задерживаюсь!»

Зал бирдан жонланди.

Бир партия активи бош чайқади. Бир партактив лабларини чўччайтирди. Тағин бир партактив ҳуштакнамо овоз чиқарди. — Қандай наглость!

— Валакисаланг, валакисалант!

— Этика йўқ, этика!

— Сиёсий кўрлик бу, сиёсий кўрлик!

— Бундайларга партия сафида ўрин йўқ!

Мадиев чучуксўз-чучуксўз бўлди. Мадиев таваллотавалло этди.

— Хўп, устозлар, хўп. Тавба, устозлар, тавба, — деди. — Ўзи, нима гап? Мен тушунмаяпман, ўзи, нима гап?

Суд раиси ручкасини Мадиевга ниш этди.

— Судланувчи, қора курсингизга ўтиринг! — деди.

Айборни шахсий иши муҳокама бўлди.

Биринчи бўлиб област партия комитетини идеология секретари сўз олди:

— Ҳурматли жамоатчилик суди, муҳтарам раис, партия активлари! Марксизм-ленинизм социал-сиёсий тараққиёт соҳасида шаҳар билан қишлоқ ўртасидаги, жисмоний меҳнат билан ақлий меҳнат ўртасидаги му-

хим тафовутларни бартараф этиш, социалистик миллатларнинг бир-бирига янада кўпроқ яқинлашуви, мориф системасини такомиллаштириш ва маданиятни ўстириш, давлатни мустаҳкамлаш, социалистик демократияни такомиллаштириш соҳасидаги проблемалар — актуал проблемалар бўлмоқда. Буржуа ва ревизионистик идеологияга қарши муросасиз кураш масалалари, меҳнаткашларни коммунистик руҳда тарбиялаш, уларнинг марксча-ленинча дунёқарашини шакллантириш масалалари биринчи даражали муҳим проблема бўлмоқда... Ана шундай бир шароитда, коммунист Мадиевнинг хатти-ҳаракати — буржуача хатти-ҳаракат бўлиб қолмоқда. Коммунист Мадиевнинг хатти-ҳаракати — партия-совет раҳбариятига, шахсан ўртоқ Ражабовга нисбатан ҳурматсизлик бўлиб қолмоқда!

Мадиев сапчиб турди. Мадиев тувақди. Мадиев жигибийрон бўлди.

— Қанақа буржуазия?! Қанақа ҳурматсизлик?! Айтсаларингиз-чи, ўзи, нима гап?! — дея бобиллаб-бобиллаб берди.

Мадиев Ботир фирмага кўз тикиди. Илтижо билан кўз тикиди. Паноҳ сўраб кўз тикиди.

Ботир фирм... залга тикилди. Ботир фирм... пинак бузмади. Ботир фирм... киприк қоқмади!

Залдан орден-медаллик бир кекса киши кўл кўтарди. Сўз беришларини пойламади — кўл кўтариб чиқиб келди. Мадиевни елкасидан босиб ўтиргизди. Жеркиб-жеркиб ўтиргизди.

— Пича тийилсанг-чи, қанақа боласан, ўзи? Онангни ичиди қанақа ётгансан, ўзи? — дея жеркиди. — Мана, қулоқ сол: партия-совет раҳбарларига, особенно, биринчи шахсга бунақа телеграмма жўнатиш мумкин эмас. Биринчи шахсга: «Я задерживаюсь», дейиш ўта ҳақорат бўлади, ўта сурбетлик бўлади. «Начальство не опаздывает, а задерживается», деган гап бор-ку? Ҳамма гап шундан келиб чиқмоқда! Сен ўзи кимсанки, «задерживать» қиласан? Сен билан биз фақат «опаздывать» қиласмиш, фақат айб қиласмиш. Партия-совет раҳбарияти, особенно, биринчи шахс кечикмайди, айб ҳам қилмайди! Сен: «Я задерживаюсь», деган телеграмманг билан ўзингни... биринчи шахс қилиб қўйгансан. Биринчи шахс ўртоқ Ражабовни эса... пешка қилиб қўйгансан, пешка! Энди тушундингми?

Област комсомол комитетини биринчи секретари гапирди. Область газетасини бош редактори гапирди.

Айбдорни жазолаш учун тақлифлар муҳокамаси бўлди.

Гап... ўзгача тўн кийди:

— Строгий виговор берилсин!

— Ишдан ҳайдалсин!

Мадиев чидаб ўтиrolмади. Важоҳат билан турди. Теваракка олазарак қаради. Хунибийрон қаради. Пишпиш энтиқди. Пиш-пиш нафас олди.

— Шу иккита сўз учун ишдан ҳайдайсизларми? — дея пишиллади. — Шу иккитагина сўз учун-а?

Мадиев чучук сўз тилаб... Ботир фирқага мўлтиради. Муте-муте мўлтиради.

Ботир фирмадан... садо бўлмади.

Энди, Мадиев суд аҳлига қаради. Бежо-бежо қаради. Фазабнок-ғазабнок қаради... Энди, чапарасталаб-чапарасталаб сўқди:

— Унда, сен чиновникларни..! Чиновниклар тўнка! Чиновниклар баран! Чиновниклар чўчқа! Т-фу, чиновниклар, т-фу!

Мадиев бот-бот тупурди. Ичидан балғам тортиб-тортиб тупурди. Қақириб-қақириб тупурди. Ичидан туруги тугагуница тупурди.

Мадиев шаҳд билан ташқари отилди.

Кетидан партактивлар чиқиб келди. Бири қўйиб, бири хитоб этди:

— Ушланг бандитни, ушланг!

— Хулиган кетди, хулиган!

— Милиция чақиринг, милиция!

Мадиев милицияни эшитиб, тўхтади. Партақтивларга шиддатли қайрилди. Кулочларини ёйди. Партақтивларни ўзига чорлади. Қаҳр ҳам алам билан бобиллади:

— Кел, кел! Кел, буржуазия вакилини ушла! Кел, совет ҳукумати душманини ушла! Кел, чет эл разведкачисини ушла, кел!

Партақтивлар жойида қолди. Бир одим олдин бослмади. Аксинча, кетига тис-тис бўлди.

Мадиев бир партақтивни ушлаб, иккинчи партақтивга олиб бориб урди. Унисини бунисига урди.

Тўс-тўполон бўлди. Тасир-тусур бўлди. Қий-чув бўлди.

Шу вақт зинапояда милиция кўринди.

Мадиев милициячилар чангалида талпинди. Мадиев милициячилар чангалида бақирди:

— Күйиб юборинглар, мен разведкачиман! Мен чет элга кетаман!

Милициячилар Мадиевни құлларини асир мисол кетига қайирди. Асир мисол ташқари олиб чиқди. Асир мисол — олдиларига солиб кетди.

29

Ботир фирмә Мадиевни кетидан қараб қолди.

«Туз-қалампир бола экан, туз-қалампир. Энди, орган штраф олади ё ўн беш суткага ётқизади, — дея ўйлади. — Ҳартугул, орган жиной иш құзғамаса бўлди. Болапақир, шоирлигига боради. Ўзига жавр этади».

30

Жамоат суди раиси Ражабовни ҳузырига йўл олди.

Ражабовга суд жараёнини оқизмай-томизмай айтиб берди.

— Ну-ну! — деди Ражабов. — Ахир, биз у болани бир... тарбиялаб қўймоқчи эдик-ку? Шунақа қилдими-а?

— Шунақа қилди. Социалистик жамиятга антипатияси борлигини ошкора намойиш этди. Партактивларга тупурди. Туф-туф, деди.

— Ну-ну! Мен бу болада руҳий касаллик аломатларини кўряпман, руҳий касаллик!

— Узини буржуман, деди.

— Буржуй?

— Разведкачиман, леб кўкрагига урди.

— Разведкачи? Қанақа разведкачи?

— Разведкачи бўлгач, капиталистик бўлади-да! Социалистик бўладими?

— Демак, жинни!

— Капитализм жамиятига симпатияси бор экан. Чет элга қочиб кетмоқчи бўлди.

Ражабов сапчиб турди. Галстугини тортқилади. Бўйинини бўшатди. Қўлларини шими чўнтағига солди.

— «Чет элга» қочиб кетмоқчи бўлди? — дея, олакўз бўлди. — Прямо, суд залидан... чет элга қочмоқчи бўладими? Коммунист Ибодов, ўйлаб гапиряпсизми?

— Чет элга... кетаман, деди.

— «Кетаман» дейиш бошқа, ўртоқ Ибодов, қочиб кетмоқчи бўлиш бошқа!

— Ишқилиб, коммунистик партияга ошкора тупурди. Буржуазия дунёсига симпатиясини тантанавор намойиш этди.

— Ну-ну, ҳақиқий жинни!

— Бутун партактив олдиди, афкор омма олдиди шундай қилди.

— Жинни, жинни! Жиннини жойи — жиннихона!

31

Райкомни машинаси баҳайбат дарвоза олдиди бел бўлди.

Машинадан Ботир фирмә тушиб келди. Дарвозани томоша этди.

Дарвоза қоп-қора бўёқлик бўлди. Дарвоза автомат билан бошқарилди. Очилса — чап тарафига кириб йўқолди. Ёпилса — тағин қайтиб келди. Дарвоза овозиздан — дарвоза чўяндан бўлди.

Дарвоза ўнг ёнбошида қабулхона бўлди. Дарвоза билан қабулхона орасида ўтиш йўлаги бўлди. Йўлак билакдай трубалар билан ўроғлик бўлди.

Йўлак бошида иккита оқ халатли йигит ўтирди. Оқ халатли йигитлар авзойидан... ё ҳарбий, ё мелиса бўлди.

Қабулхона деворида: «...психоневрологическая больница» битикли вивеска бўлди.

Оқ халатли йигитлар Ботир фирмәни ҳужжатини текшириб кўрди, юз-кўзларини қараб кўрди.

Бирори Ботир фирмәни ичкари эргаштириб жўнади. Бош врач қабулига олиб борди.

Бош врач оёққа қалқиди. Бошлиқнинг креслосига... Ботир фирмәни ўтиргизди. Ўзи пастдан жой олди. Мактаб ўқувчиси мисол итоаткор тикилиб ўтирди.

Ботир фира райкомона гап очди:

— Ўртоқ Мирзаев, вақт зиқ, мақсадга ўтамиз. Бир журналистимиз шу ёққа тушиб қолибди. Фамилияси Мадиев.

— Бор, Мадиев бор. Клара, бемор Мадиевнинг касаллик варақасини олиб келинг!

Ҳамшира бемор Мадиевни касаллик дафтарини олиб келди.

— Мана, Мадиев Мирза — 1948 йилда туғилган, — ўқиди бош врач. — Диагноз: шизофрения параноиальный синдром. Реактивный психоз. Депрессивно-параноидный синдром.

— Ия-ия... — дея ажабланди Ботир фирмә. — Ка-нақа-қанақа?

— Маниакально-депрессивный психоз. Вяло протекающая шизофрения.

— Ўртоқ бош врач, мен партия раҳбариман. Бир сўз билан айтсак, мен масалага партиявий ёндашаман. Сиз ҳам масалага партиявий ёндашиб, медицина терминларини партиявий тушунтириб беринг.

— Хўп бўлади, Ботир Эсонович. Шизофрения — бу, мия қобилиятининг бузилиши, фикрлаш тарзининг ишдан чиқиши, пароканда бўлишидир. Шизофренияни биринчи бўлиб Швейцария врач Эйген Блейлер ўйлаб топган ва жорий этган. Блейлернинг таълимотича, шизофренияга йўлиқкан бемор, ҳаёт ҳодисалари олдида ўзини жиловлаб ололмайди, тилини тийиб туролмайди, ёпиб юролмайди. Инсоний қонун-қоидаларга итоат этолмайди, инсоний ахлоқ-одобга риоя этолмайди. Шизофрения — кўнглига нима келади, ана шуни бажаради, тилига нима келади, ана шуни айтади. Айтгандаям, телбаларча айтади, сурбетларча айтади. Шу сабаб, шизофрения — партия-хукумат учун бамисоли бемаҳал қичқирган хўroz бўлади.

— Йўқ-е, унчалик эмасдир?

— Шунчалик, Ботир Эсонович, мана шу... Мадиевчалик! Хў-ўш, паранойя — бу мунтазам давом этадиган руҳий парокандаликдир. Бунда, бемор восвос ҳолатда ҳаёт кечиради. Восвослик узлуксиз давом этади. Бу дардга чалингган беморга ким қарши гапирса, ана ўша одамни ўзига душман деб билади. Совет медицинаси тараққий этиб, шизофрения билан паранойянинг янги янги турлари очилди. Академик Снежневский «вяло протекающая шизофрения» — секин-аста, кўзга чалинмай дардманд этадиган шизофренияни кашф этди. Бу ўта хавфли касалликдир. Академик Снежневский кашфиётининг буюклиги шундаки, бу диагнозни... манман деган одамни пешонасига ёпишириб... психбольницига ўтқизса бўлади. Бу диагноз совет медицинаси учун... ўта қулай диагноздир. Чунки инсонпарвар совет даврида... файритабиий фикрловчилар бўлиши мумкин эмас, ҳардамхаёллар бўлиши мумкин эмас. Партиявий тил билан айтганда, орамизда «инакомысляющие диссидент»ларга ўрин йўқ!

— Шундай, шундай.

— Ўзига бино қўйиш, ўта тажанглик, ўта таъсирчанлик, ҳар нарсани кўнглига олиш... руҳий касаллик симптомлари! Шизофрения! Паранойя! Мана, bemor

Мадиев... ўз ватанини рад этиш дарди, ўз ватанидан кечмоқчи бўлиш дарди, ўз ватанини тарк этмоқчи бўлиш дарди! Бемор қонунга хилоф равишда ўз она ватанидан чет элга чиқиб кетмоқчи бўлган.

— Чет элга кетмоқчи бўлган?

— Ҳа, чет элга қочиб кетмоқчи бўлган.

— Ия-ия...

— Ўзини чет эл разведкачисиман, деган.

— Ия-ия...

— Хуллас, чет элга қочиб кетмоқчи бўлиб юрганда... фош бўлиб қолган!

— Ия-ия... Туппа-тузук бола эди-я! Ўсадиган коммунист эди-я! Ҳай, аттанг, сизларга тушиб қолибди.

— Гап бизда эмас. Мадиев кундалик турмушда ўзи шундай бўлган.

— Сиз Мадиевни қаердан биласиз?

— Қаердан билардим, ишончли манбалардан биламан. Мана, област партия комитетининг биринчи секретари ўртоқ Ражабовнинг рапорти. Жамоатчилик суди, ҳалқ милициясининг ҳужжатлари. Инкор этиб бўлмас ҳужжатлар! Биз ана шу ҳужжатлар асбсида... диагноз қўйдик! Коммунистик партия сўзи — диагноз! Коммунистик партия диагнози — совет медицинаси диагнози!

Ботир фирқа жойидан қўзғолди. Кабинетни ичкаридан қулфлаб келди. Бош врач рўпарасидан жой олди. Врач билан бетма-бет бўлиб ўтирди. Самимий гап очди:

— Ука, шахсан мен ўзим сизни коммунистик партия сафиға қабул қилдим. Шу даражага қўтарилишингиз учун хиёл бўлса-да, улушим бор, деб ўйлайман.

— Албатта, Ботир Эсонович, албатта. Мени партияга ўтказмаганингизда, бош врачлик креслоси қаерда эди?

— Раҳмат, ука, раҳмат. Ҳали, яна қўллаб-қувватлайман. Энди, мана шу касалхона районимиз территориясида эканиданми ё сизни қўллаб-қувватлашимни билганиданми, ўртоқ Ражабов мени жўнатди. Шахсан ўзлари жўнатди!

— Бажонидил, коммунистик партия нима деса шу, бажонидил.

— Яшанг, партия чизигидан чиқмасангиз, кам бўлмайсиз. Гап орамизда қолсин: мана шу Мадиевни чиқариб юборинг. Фақат бирор билмасин.

Бош врач бирдан ўзгарди. Елкалари тик бўлди. Кўкси керилди. Юзи бешафқат тус олди. Кўзлари синов ҳам гумон билан тикилди.

— Илож йўқ, Ботир Эсонович, илож йўқ. Касалхонамизнинг ўз ички қонун-қоидалари бор. Ана шу ички қонун-қоидаларни бузган врач... боши билан жавоб беради.

— Партия талаб қиляпти, ука, партия!

— Тўғри, партиянинг талаби биз учун қонун! Лекин медицинанинг ўз ички қонун-қоидалари бор. Биз Гиппократ олдида қасам ичганмиз. Гиппократ! Қасамни бузган врач — врач эмас.

— Шахсан ўртоқ Ражабов илтимос қилмоқдалар! Мана, ўша Ражабовнинг рапорти. Мана, шахсий имзоси. Шахсан ўзи қўл қўйган! Ўртоқ бош врач, Лев Троцкийни машхур бир гапи бор. Ўртоқ Троцкий бундай дейди: партия мисоли икки қаватли бинода яшайди. Иккинчи қаватда партия қарор қиласди. Биринчи қаватда партия мазкур қарорни ижро этади. Ўртоқ Троцкий айттанидек, иккинчи қаватда обкомпартия қарор қилди, биринчи қаватда райкомпартия — биз ана шу қарорни бажармоқчимиз, холос.

— Шундай экан, ўшанда ўртоқ Ражабов рапорт ёзмасин эди? Кейин, сўзидан қайтмасин эди?

— Ражабов сўзидан қайтмас эди. Шу, овозинг ўчгур... радио ёмон-да.

— Бу ишга радионинг нима алоқаси бор?

— Ия, ҳали хабарингиз йўқми?

Ботир фирмә юзларини эгди. Шаҳодат бармоғи билан врачни имлади. Врачни қулогига оҳиста ширвирлади:

— Яқинда, овозинг ўчгур «Голос Америки» шу ҳақда... хурибди. СССР, КПСС, жиннихона, шоир, деб хурибди.

— Гапирса-гапираверсин!

— Энди, бутун дунёга шарманда бўлмайлик дейман-да. Москва нима дейди? Юқоридагилар нима дейди? Партиявий жазо оламиз, партиявий! Шу боис, ўртоқ Ражабов масалани босди-босди этмоқчи.

— Иложи йўқ, Ботир Эсонович. Бемор келтирилганда, уч-тўрт кун медицина текширишидан ўтказилади. Диагноз белгиланади. Ана ўшанда бир иложини қылса бўлар эди. Энди, bemor белгиланган муддат мобайнида ётиб даволанмаса... озодликка чиқарилмайди.

— Бизни Мадиев қанча ётади?

— Бемор Мадиевми, хў-ўш... бир йил ётади!

— Бир йил?

— Шунаقا, бир йил ётади. Лекин сизнинг ҳурматингиз учун даволаниш муддатини олти ойга камайти-

риб беришим мумкин. Буёғи, масала сиёсий тус олибди экан, шунинг учун.

— Сиёсий тус олмас эди-ю, боласи қурғурни... шеър ёзадиган қилиги бор-да.

— Шеър? Шоир денг?

— Шундай, шундай. Болапақир, шу ҳолига... шеър ёзишни одат қилиб олган! Одатланган... қилигини қаранг? Ёмонни бир қилиги ортиқ деганлари шу-да. Ёмонни ана шу... шеър ёзиш қилигини «Голос Америки»... дўмбира қилиб чалибди! КПСС адабиётни бузяпти. КПСС талантларни жиннихонага ўтқизяпти... деб акиллабди.

— «Голос Америки» гапираверади. Гап шу, Ботир Эсонович, даволаш муддатини бир йилдан олти ойга камайтириш қўлимдан келади, ҳолос.

— Хўп бўлмаса, ўртоқ Мирзаев.

32

Ботир фирмә бош врач билан узун даҳлиз бўйлаб юрди. Теваракка қараб-қараб юрди.

Даҳлизни икки тарафида қатор палаталар бўлди. Палаталар панжара-деворлик бўлди. Панжара-деворлар йўғон бармоқдай темирдан бўлди. Панжара-деворлар ораси бармоқ сиғар даражада зич-зич бўлди.

Ичкарида... беморлар сулайиб-сулайиб ўтди. Давра бўлиб ўйнади. Ўзларича рақсга тушди. Бир-бирини қучоқлаб танцага тушди. Бир-бирига навбат бермай ашула айтди.

Беморлар панжара-девордан... тилини чиқарди, тилини осилтириди, тилини ўйнатди. Беўхшов-беўхшов тиржайди...

— Мен бу даргоҳга биринчи келишим, ўртоқ бош врач. Бундай, ўёқ-буёқни таништиринг-да?

— Таништирмайман, Ботир Эсонович, таништиролмайман.

— Мен райкомни биринчи секретариман, партия посбониман. Мендан нимани бекитасиз? Қисқача справка беринг, билиб қўй. Партиявий-ташкилий ишларда керак бўлиб қолади.

— Фақат, гап шу ерда қолади.

— Партибилетим билан жавоб бераман!

— У ҳолда, умумий справка бераман. Мана бу корпусимиз беш қаватдан иборат. Ҳар қаватида ўн иккитаdan палатамиз бор. Беморларимиз йигирма хилга бўли-

нади. Яъни йигирма хил руҳий касални даволаймиз. Йигирма хил руҳий нотавонга шифо берамиз. Масалан, мана бу палаталарда диний-руҳий беморлар даволанади. Диний-руҳий касал деганимиз шуки, жамиятимиз коммунизм қураётган бир даврда... булар шариат ишлари билан шуғулланганлар. Намоз ўқиганлар. Тоат-ибодат қилганлар. Ўзлари камдай, соф вижданли совет кишилари орасида диний тарғибот ишлари олиб борганлар. Шу сабаб, булар — диний-руҳий беморлардир. Мана булар эса — ҳукуқни ҳимоя қилувчи беморлар ҳисобланади. Аниқроғи, тарихчи-руҳий касаллардир. Бу тарихчи-руҳий касаллар тарих дарсликларига қарши чиққанлар. Ҳалқа тарихни қинғир-қийшиқ қилиб тарғиб қилганлар. Бу қинғирликлари билан «озод ва ҳур» совет ҳалқи онгини заҳарлаганлар. Масалан, анави тиржайиб турган бемор... акам ўзларича Россия Ўзбекистонни қўшиб олмаган аксинча, босиб олган, деб тарғибот қиласилар. Биз бу донони даволаяпмиз. Манавилар — бойвачча беморлар. Буларда уй-жой, машина, мол-дунё мўл. Булар ана шу мол-дунёсини бирорвга мерос қолдиришни истамайди. Меросхўрлари эса кўп. Оқибат, меросхўрлар ўзаро жанжал қиласиди. Бойвачча эса, хаста бўлиб қолади. Кейин, бир меросхўри, мана бўлмаса деб, бойвачча беморни... бизга олиб келиб топширади. Мана бу беморлар эса — ҳарбий қонун-қоида қурбонлари. Булар ўз вақтида ҳарбий хизмат қилишдан бош тортган. Армияда хизмат қилишни истамаган. Ҳарбий хизмат вақтида армиядан қочиб кетган. Совет армияси шаънига ҳақоратомуз сўзлар айтган. Совет армияси қамоқхона, деган. Хуллас, совет армиясининг душманлари. Манавилар — ихтирочи-кашфиётчилар. Бу беморлар ўз касблари бўйича улкан кашфиётлар қилган, ихтиrolар яратган. Кашфиётларини ўз ақллари билан яратган. Ихтиrolарини ўз қўллари билан яратган. Манави бемор ўзининг кашфиёт — ихтироси совет фанига қабул қилинаётган вақтда... теннаклигини намойиш қилиб кўйган. Биласиз, совет жамияти колективизм асосига қурилган. Коллектив бўлиб меҳнат қилиш, коллектив бўлиб яратиш, коллектив бўлиб яшаш... Шу жумладан, совет фани ҳам коллектив меҳнат самарасидир. Шу сабаб, илмий текшириш институти директори, директор ўринбосари, лаборатория мудири... жами беш киши мана шу бемор... билан соавторлик қилмоқчи бўлади. Бу тентак эса... соавторликни рад этади! Ёлғиз ўзи кашфиёт қилиб, фан

яратмоқчи бўлади. Бундан кейин, буни ким деб аташ керак? Жинни-да, жинни. Ана, ўтириби.

Ботир фирмә эшишиб борди. Теваракка қараб борди. Бош иргаб-иргаб борди.

«Бу касалхона эмас, қамоқхона. Шундай, қамоқхона», дея бош иргади.

Бош врач, райком гапимни кўллаяпти, дея ўйлади. Гапида давом этди:

— Мана булар-партия-ҳукумат раҳбарлари ҳаётига суюқасд қилмоқчи бўлганлар. Партия-совет арбоблари-ни ҳақорат қилганлар. Коммунистик партия билетини йиртганлар. Табибликни даъво қилганлар. Учар тарелкалар билан Қор одамни тарғиб қилганлар. Совет органдари ишига қарши чиққан нонкўр юристлар... Мана булар эса — ҳақиқатсеварлар.

— Ким-ким?

— Ҳақиқатсеварлар, адолатпарварлар. Сиз шоир-шоир дейсиз. Мана шу палатада... генерал ётибди, генерал!

— Генерал?

— Ҳа, совет генерали. Генерал Григоренко, Григоренко!

Ботир фирмә матбуот хабарларини эслади: генерал Григоренко Москвада — партия конференциясида сўзга чиқиб, КПСС фаолиятини кескин танқид қилади. Шундан кейин КПСС генерал Григоренкони партиядан ўчиради. Узоқ Шарққа сургун қилади. Шу вақтда Новочеркасскда ишчилар ўз ҳақ-ҳукуқларини талаб қилиб, намойиш ўтказади. КПССни буйруғи билан ҳарбийлар... намойишчиларни отади. Ушбу фожиани партия-ҳукумат бекитади. Генерал Григоренко эса, ана шу фожиа тафсилотини... варақа қилиб тарқатади! Генерал Григоренкони бу иши КПССни ғазаблантиради. Бир йиғилишда КПСС Марказий Комитети секретари ўртоқ Суслов: «Григоренко жинни», деб юборади. Ўртоқ Сусловни ана шу гапи... совет медицинаси учун диагноз бўлади! Генерал Григоренкони Москвадаги Сербский номли институт эксперт-психиатрларига жўнатади. Профессорлар: «Генерал Григоренко паранойя кўринишили руҳий қасал», деб диагноз қўяди. Даволаш учун Ленинградга юборганди. Яқинда эса, Тошкентга жўнатди.

— Шундай зот... шу ерда ётибдими-а? — деди Ботир фирмә.

— Ҳа, ичкарида ётибди. Энди, Тошкент Кремлдан йироқроқда. Бу деган сўз, генерал Григоренко совет

халқи назаридан олисда, чет әл матбуотидан олисда, жағон оммаси әзтиборидан олисда, деган сүз.

— Аммо-лекин ана шу генерал ҳалол коммунист, дейишади. Беёзиқдан-бейзиқ ётибди, дейишади.

— Бұлса бордир. Лекин КПСС диагноз қўйган! Ўртоқ Суслов: «Григоренко жинни», деб айтган! Ана, бизда кимлар даволаняпти! Сиз бұлса, шоир-шоир, дейсиз. Шоириңгиз ким бўпти?

— Даволаш керак, жамиятимизга соғлом коммунистлар зарур, даволаш керак.

— Даволаяпмиз, совет медицинасининг сўнгги ютуқлари асосида даволаяпмиз.

Ботир фирмә касалхонага қарай-қарай юрди. Касалхонага қарай-қарай машинага ўтирди.

«Қабристон, қабристон! — деди Ботир фирмә. — Бу касалхона эмас, тирик инсонлар қабристони. Асл қабристонга ўлик инсонларни кўмади, бу қабристонга... тирик инсонларни кўмади».

33

Брежневдан кейин ССРР остин-устин бўлди.

Шароф Рашидовдан кейин... Ўзбекистон алғов-даллов бўлди.

Эл-юртда: қайта қуриш, демократия, шариат сўзлари оралаб қолди.

Замон қалтис келди. Дўппи тор келди.

Ботир фирмә ўз аризаси билан... пенсияга жўнади.

34

Тонг саҳар — сут оқармаган вақт.

Тонг саҳар — оқ ип билан қора ипни ажратиб бўлмас вақт.

Ботир фирмә зироат сувлади.

Шланг билан настарларига сачратиб сув сепди. Атиргулларига сачратиб сув сепди. Сувни ток жўяси бошидан оқизиб қўйди.

Ўзи зироат айланди.

Саҳар салқин бўлди. Сувли зироат саҳардан-да салқин бўлди.

Шу вақт кўчадан иккита оппоқ соя ўтди. Соялар зироат қабатлаб-қабатлаб ўтди. Гангир-гунгир гаплашиб ўтди:

- Манави боңда кимдир юрибди.
- Ким бўлади, эгаси-да.
- Ўзи, кимни боғи бу?
- Эсонов деган бор-ку, ўшаники.
- Ҳа, Қизил денг, Қизил!
- Қизилки... айтгили йўқ. Қизил Байроқ!
- Шугина Қизилда олам-жаҳон боғ бор-а?
- Қизиллар умрида кўлини совуқ сувга урмаган.

Авом халқни ишлатиб боғ яратган.

Оппоқ соялар ўтиб кетди.

Ботир фирмә уларни кетидан қараб қолди.

«Ажабо, булар нега бундай оппоқ либосда юрибди? — дея ўлади. — Арвоҳ-а, арвоҳ. Ўзи, булар бемаҳалда қаердан келяпти?»

Ичкари кирди. Кўрганларини кампирига айтиб берди.

— Биламан, кўзим тушган, биламан,— деди кампири.

— Арвоҳга ўхшайди-я? Оғироёқ аёл дуч келса... бўйидан тушириб қўяди.

— Ҳаммаёқ мусулмонобод бўлиб кетди, раис бова, мусулмонобод бўлиб кетди. Мусулмонлар ана шундай кийинади. Сизгаям шунаقا уст-бош олиб берайми?

— Ўзи, у қанақа кийим бўлди?

— Оппоқ иштон-кўйлак. Нима қипти?

— Бошидаги... тувакка бало борми?

— Тувак?

— Ҳа, ёш болани тагига қўядиган тувак.

Кампири ҳиринг-ҳиринг кулди. Тиззасига уриб-урив кулди.

— Такя, раис бова, такя! — деди.

— Такя? У нима энди?

— Мусулмончилик белгиси.

— Энди, шуларни киймаса нима қипти?

— Такя киймаса мусулмон бўлмайди, раис бова.

Олиб бер, десангиз, олиб бераман.

— Уларни кийиб нима қиласман?

— Мусулмон бўласиз, нима қиласдингиз, мусулмон бўласиз.

— Т-фу-у-у!

Кампирини дами ичига тушди. Дарҳол гапни бурди.

— Айтдим-қўйдим-да, раис бова, — деди. — Сиз катта одамсиз, партия ветеранисиз. Сизга ярашмайди.

Ботир фирмә кампирини гапидан тинчланди. Ўзича бош иргади.

— Ўзи, бу болачалар тонг саҳарда нима қилиб юрибди? — деди.

— Чойхонада азон намози ўқиб келяпти.

— Азон намози? Шулар намоз ўқигич бўлдими? Мен буларни биламан. Булар эски алкашлар, эски бангилар. Анави Мадиев дегиши керосиндан бошқа нарсанни ичади. Қилмаган аҳмоқчилиги қолмаган. Келиб-келиб, шулар намоз ўқийдими? Яна-тагин, чойхонада намоз ўқийдими?

— Чойхонада намоз ўқиса, эл-юрт кўради, раис бова.

— Намоз ўқиши бирор кўриши шартми? Намоз ўқиш — эътиқод. Эътиқод — юракда бўлади.

— Э-э, раис бова, бу намозхонларда... эътиқод нима қиласи? Замон эски изига қайтгудек бўлса, фирмага аъзо бўлади қайта, азон намози қолиб...

— Шу намозини уйида ўқиса бўлмайдими?

— Уйида намоз ўқиса, ким кўради? Уйида такя кийса, ким кўради? Ҳеч ким кўрмайди! Кўча-кўйда намоз ўқиса — эл-юрт кўради. Фалончи намозхон экан, дейди. Кўча-кўйда такя кийса, юрт кўради. Фалончи мусулмон экан, дейди.

— Шу болачалар нега шуларни олдин қилмади? Олдин ҳам такя учун сурп бор эди. Жойнамоз учун сурп бор эди.

— Бу замонни болаларини қилиғи кўп, раис бова, қилиғи кўп.

— Шартми энди, мусулмон бўлиш учун бошига оппоқ тувак...

— Такя!

— Оппоқ такя кийиб олиш? Оппоқ иштон-кўйлак кийиб олиш? Аммо-лекин латта-путтага суюнган, соқол-мўйловга ишонган мусулмончиликни охиривой бўлади. Тоат-ибодатга берилган мусулмончиликни оқибати ёмон бўлади. Мусулмончилик... дилда бўлади, кампир. Мусулмончилик одамни дилида бўлади.

— Имонингиз пок бўлса бўлти-да, раис бова.

— Шундай, шундай. Ҳамма гап — имонда! Инсонни инсон этувчи — имон. Дунёни дунё этувчи — имон. Бир сўз билан айтсак, имон билан яшаш керак! Замон бўлса — тескари кетяпти. Мана, ҳамма худога сифиниб бошлади. Буни оқибати яхши бўлмайди. Худога сифиниш бора-бора нималарга олиб келади, биласанми? Худога сифиниш... шахсга сифинишга олиб боради! Ишончим комил, худога сифиниш... шахсга сифинишга олиб боради.

— Шулар худони биладими? Иши йўқ намоз ўқийди, нони йўқ рўза тутади, дейдилар. Ана, булар кимлар.

— Чин, ҳар бир мусулмон фарзанди учун Куръон табаррук китоб. Айтишларича, Куръон еттинчи асрда нозил бўлган. Аммо-лекин ҳозир йигирманчи аср якунланяпти, йигирманчи аср! Еттинчи аср гапи тутул, мана шу йигирманчи аср бошидаги гаплар бутунги кунга тўғри келмай қолди. Йигирманчи аср шундай бир нуқтага келди... Ўтган йилги гап бу йилга тўғри келмай қолди. Кечаги гап бутунга тўғри келмай қолди! Масалан, Куръон ҳам Ҳадисларда... отангни ўлдиргандга... онангни бер, дейди. Душманинг чап юзингга урса, сен... ўнг юзингни тутиб бер, дейди. Ушбу панд-насиҳатларни қандай тушунса бўлади? Ким қандай тушунади — ўзи билади. Аммо-лекин ушбу панд-насиҳатларни мен мана бундай тушунаман: эй ҳалқ, қўймижоз бўл! Эй ҳалқ, пода бўл! Бизни баран-баран дейдилар. Афсуски, шу гапда жон бор. Асрлар мобайнида миямизга сингдириб келинмиш мазкур панд-насиҳатлар... бараплигимизни тамал тоши эмасмикин? Йиллар мобайнида қулогимизга қуйиб келинмиш ушбу панд-насиҳатлар бизни... қўймижоз қилиб қўймадимикин? Эртадан-кечгача қулогимиз остида жаранглаб турмиш панд-насиҳатларидан... қўймижоз бўлиб қолмадикимикин? Худога шукур, биз ҳам мусулмон фарзандимиз. Худони ўзи кечирсин. Аммо-лекин шу ҳақда бир ўйлаб кўришимиз керак...

35

У, телевизорга... ўта илтифотли эди!

Телевизорни бурагичдан ўчирап эди. Стабилизатордан ўчирап эди. Устидан баҳмал ёпиб қўяр эди.

— Бамисоли келин, келин! — дер эди.

Бугун... шаҳд билан турди. Шаҳд билан борди. Розеткани чангальлаб ушлади. Силкилаб тортди. Розеткани куличкашлаб отди.

Розетка бир бурчакка тарсиллаб тушди.

Телевизор бир айланиб... ана шу бурчакка юз буриб қолди!

Кампири эшикдан юз кўрсатди.

— Ҳа, раис бова? — деди.

— Чой! — дея бақирди.

Кампири чой дамлаб келди.

— Тинчликми, раис бова? — деди.

Ботир фирқа ёнбошлиди. Оёқларини узатди.

- Ўлмаган жон күрар экан! — деди.
- Ҳа, яна нима гап?
- Гап күп! Мосқвалик қайта қурувчилар ўртоқ Ленинни мавзолейдан олиб чиқиб ташлаш ташаббуси билан чиқибди. Шуни телевизорда күрсатди.
- Ё тавба, Ленинни-я? Лениндай бир зотни-я? Қаёққа олиб чиқиб ташлар эмиш?
- Ким билади, қаёққа олиб чиқиб ташлайди. Биро-ви, Ленин коммунистлар қабристонига күмилсин, деди. Биро-ви, Новодевичье қабристонига қўйилсин, деди.
- Сизнингча, қаерга қўйгани маъқул?
- Масалага партиявий ёндашадиган бўлсак, ўртоқ Ленинни Волковский қабристонига қўйиш керак. Ленинградда ана шундай қабристон бор. Ўртоқ Ленинни онаси билан синглисиям ана шу қабристонда ётибди. Ҳаётлигида ўртоқ Ленинни ўзиям ана шундай васият қилиб эди.
- Ботир фирмадан Ленин ҳақидаги китобни олиб келди. Бир бошдан вараклади. Ленинни расмларини томоша этди. Ленин мавзолейи расмини кампирига кўрсатди.
- Ана, КПСС ўйлаб топган қаср, — деди. — Ана, КПСС қурган қаср. Қаср бўлгандаям, санъат қасри. Партия санъати қасри! Сеҳрли қаср, сирли қаср. Ана шу қасрда буюк Ленин ётибди. Бир ўзи адёлга ўралиб ётибди. Мавзолей — КПССни илоҳий кудрати. Шу илоҳий кудрат бор экан — КПСС руҳи хукм суради. КПСС мангу яшайди! КПСС ўлдузи мангу порлайди!
- Порлайди, порлайди.
- Ўртоқ Ленин ҳаётбахш зот эди, умидбахш зот эди. Масалан, ҳамма иш ўнглаб бўлмас даражада пачава бўлар эди. Оқибат, ҳамма ўзини йўқотиб қўяр эди. Аммо-лекин ўртоқ Ленин ўзини йўқотмас эди. У киши, энг аввало, душманларини хатосини пойлар эди. Гўё, тақдирга тан берган киши бўлиб туар эди. Душманлари хатоликка йўл қўйдими — ўртоқ Ленин бирдан оёққа туар эди. Душманлари хатосидан ўз вақтида, унумли фойдаланар эди. Ўртоқ Ленин душманларини хатолари туфайли зафар қозонар эди. Ўртоқ Ленин омадли зот эди. Омад деганлари ҳаммага ҳам насиб этавермайди. Энг охиригача чидай олгич зотларгагина омад насиб этади. Боши берк ишларда ҳам энг сўнгги дақиқагача кураша олгич зотларгагина омад насиб этади. Ўртоқ Ленин ана шундай зот эди! Шу боис, ўртоқ Ленинга ҳамиша омад ёр эди.

— Ленин ўз оти ўзи билан Ленин-да.

— Мана энди, коммунистлар битта-битеттадан тас-лим бўлмоқда. Бирор қўшқўллаб ишини топширмоқда. Бирор қўшқўллаб партия билетини топширмоқда. Садқаи коммунист деган ном кетгурлар. Садқаи инсон деган ном кетгурлар. Йўқ, мен охиригача бораман. Мен охиригача курашаман!

— Ҳали отрайсиз, раис бова, отрай!

— Ё бир Москвага бориб келсаммикин? Ўртоқ Ленинни зиёрат этсаммикин? Ўртоқ Ленин, туриңг, жойингиздан — юрtingиздан капитализм ҳиди анқиб қолди, десаммикин? Капитализм... номини эшишиб, ўртоқ Ленин... гўрида тикка туриб кетса керак? Ўзи ўртоқ Ленинда... гўр борми? Мана ўз оти билан мавзолей, КПСС қасри. Унда, ўртоқ Ленинни... гўри қаерда?

Ботир фирқа китобни варактлаб-варактлаб ўйлади. Чой ҳўплаб-ҳўплаб ўйлади. Охиратни ўйлади. Беш кунлик дунёни ўйлади...

— Аммо-лекин инсон дунёга бир келади, инсон дунёдан бир кетади, — деди. — Инсон дунёдан кетар вақти — уч кун. Жон бердими — уч кун ичида кетиши керак бўлади. Уч кун! Айтишларича, марҳум уч кун мобайнида ерга кўмилмаса, марҳум қабрга кирмайди, шундай, қабрга кирмайди. Марҳум жисман қабрга кирради, аммо-лекин арвоҳи қабрга кирмай қолади. Марҳумни ўзи ер остида бўлади, арвоҳи эса... ер устида қолади! Шу боисдан-да, уч кунлик ўлик фолак билан ер ўртасида аросатда қолади: тириклар орасига қайтай дейди — қайтиш йўлини билмайди. Ўликлар орасига борай дейди — бориш йўлини билмайди. Уч кунлик ўлик — аросат азобини тортади, сарсонлик азобини тортади.

— Оқибат, тирикларни қийнаб бошлайди. Тирикларни қон-қақшатиб бошлайди, тирикларни куйдириб бошлайди.

— Ҳа, яша. Ниҳоят, уч кунлик ўлик... тириклардан алам олади, тириклардан хун олади. Мотам ҳовлида бир нима... чирқ-чирқ учади.

— Ана ўша... уч кунлик ўлик арвоҳи, раис бова, уч кунлик ўлик арвоҳи. Ана шу арвоҳ тириклардан... уч олиш учун учади. Тириклардан қасос олиш учун... чирқ-чирқ этади.

— Арвоҳ чирқ-чирқ этиб... тириклар кўнглига ғулғула солади, тириклар қалбига таҳлика солади. Ана шу арвоҳ

чирқ-чирқ этиб... тирикларни адойи тамом қилади! Шу боис — уч кун! Мархум уч кун меҳмон бўлади.

— Ўлмак, ўлмакни иши кўммак, дейдилар.

— Ўртоқ Ленин эса, етмиш йил... етмиш йилдан бўён... кўмилмайди! Етмиш йилдан бўён ўртоқ Ленин арвоҳи чирқ-чирқ этади. Етмиш йилдан бўён ўртоқ Ленинни арвоҳи чирқ-чирқ этиб... совет халқларини қийнайди! Етмиш йилдан бўён ўртоқ Ленинни арвоҳи чирқ-чирқ этиб... совет халқларидан қасос олади!

— Уч кунлик ўлик етмиш йилдан бўён аросатда ётади, денг. Арвоҳи... аллақачон хилқатда сайр этиб юрибди, денг.

— Ўртоқ Ленинни мияси... Давлат Банкасида сақланади, шундай, Давлат Банкасида. Ичак-чавоқлари... ўша вақтдаёқ олиб ташланган. Ўзини устидан эса... Сиёсий бюро аъзолари қатор бўлиб юради! Байрам оти бор, парад оти бор — Сиёсий бюро аъзолари ўртоқ Ленин устиди... саф бўлиб туради, ура-ура дея, қўл силкиб туради. Ўртоқ Ленин устидан... тепкилаб-тепкилаб туради. Мана, етмиш йилдан бўён ўртоқ Ленин... Сиёсий бюргора оёқости бўлади!

— Бечора Ленин... на тириклар орасида бор, на ўликлар орасида бор!

— Мен сенга бир нима айтайми, кампир? Шу... мавзолейга ўртоқ Ленинни кўриш учун кирган одам, у ердан чиқиб... бир бошқа бўлиб қолади! Ҳа, одам мавзолейдан чиқиб... ажабтовур бўлиб қолади!

— Ўлик — ўз оти билан ўлик-да.

— Мавзолейдан чиққан одамлар бир бошқа бўлиб... уй-уйларига тарқалади. Чирқ-чирқ... товушлар остида тарқалади. Чирқ-чирқ... овозлар оғушида тарқалади. Фарб мамлакатлари совет давлатини «ёвузлик империяси», деб атайди. «Ёвузлик империяси» деб аталиши — шу... мавзолей боис эмасмикин? Шу мавзолейдан келиб чиқмиш... ажабтовурликда эмасмикин? Ана шу чирқ-чирқ... товушдан эмасмикин? Чин айтаман, кампир, бечора Ленин на... тириклар орасида бор, на... ўликлар орасида бор.

36

Ботир фирмә қайта қурувчи демократларни... уч тоифага бўлди. Уч авлодга бўлди.

Ўз топқирлигидан ўзи қувониб олди. Ўз топқирлигидан ўзи... сесканиб олди!

«Бу авлод ўз ўрнини топмаган авлод. Бу авлод ҳамиятта муҳтож авлод, — деди Ботир фирмә. — Биринчи авлод... етти-үн саккиз ёшлилар авлоди. Бу ёшдагилар... бозорда олибсөтәрлик қиласы. Күча-күйда савдо-сотиқ қиласы. Сақиң сотади. Ароқ сотади. Бекаттарда йүловчи машиналарни ювіб, пул ишлайды. Транспортларда чүнтак қирқады. Күча-күйда хотин-қизлар тақынчогини қулоғидан юлиб қочади, бўйнидан шишлиб қочади...

Иккинчи тоифа авлод — ўн саккиз-үттис ёшлилар авлоди. Бу авлод... мафия авлод, рэкет авлод. Бу авлод холидан битта машина олиб қочиш учун... туққан онасины беради, никоҳидаги хотинини беради. Хонадондан битта видеомагнитофон ўғирлаб чиқиш учун... азиз жонини беради, гулдай умрини беради...

Учинчи тоифа авлод — ўттис-қирқ беш ёшлилар авлоди. Бу авлод... ҳаётдан кўп нарсаларни хоҳлаб эди. Кўксини тўлдириб орзу-ҳаваслаб эди. Оғзини тўлдириб ўй-ниятлаб эди. Бу авлод... мансабдор бўлмоқчи эди, амалдор бўлмоқчи эди, шон-шуҳрат тахтига ўтироқчи эди. Бу авлод... Абдулла Қодирий бўламан, деб эди, Чингиз Айтматов бўламан, деб эди, Абдулла Орипов бўламан, деб эди. Ойни кўзлаб эди, юлдузни кўзлаб эди...

Охир-оқибат, бу авлод... қайта қурувчи демократ бўлди. Аммо-лекин ҳаёт учун куллан зиён авлод бўлди. Халқ учун хавф-хатар авлод бўлди.

Боиси — бу авлод... омадсиз-омадсиз авлод! Аламзада-аламзада авлод!

Бу авлод... ҳавода муаллақ осилиб қолди. Ўз касбкори бўйича ўёқлик-да бўлмади, буёқлик-да бўлмади. Аросатда қолди! Оқибат ғайир авлод бўлиб қолди!»

37

«Хўп, қайта қурувчи демократларчалик ҳам борайлик, — деди Ботир фирмә. — Майли, шуларниям сазаси ўлмасин. Қайта қурувчилар совет тузуми... жойида янги жамият курамиз, дейди. Хўп, қур! Тағин айтаман — қур!

Аммо-лекин қани ўша янги жамият?

Жамият мисоли бир иморат бўлади. Эски иморатни бузишдан олдин янги иморатни куриш керак бўлади. Бўлмаса, бузувчи хароба иморат ичига қолади. Ёмондан-ёмони — бузувчи вайрон иморатда қолишини-да

билмайди, ҳали битмаган имаратга күчіб ўтишини-да билмайди. Аросатда қолади. Аросатдан ёмони йўқ!

Чин, биз дунёда биринчи бўлиб социалистик жамият қуриб эдик. Совет тузуми қуриб эдик. Янги тузум тамал тошини қўймасдан — эскисини бузиб эдик. Кўли-мизга қурол олиб эдик. Елкамизга байроқ кўтариб эдик. Бошимиз узра шиор ҳилпиратиб эдик.

Аммо-лекин бизда... марксизм-ленинизм утопияси бор эди, марксизм-ленинизм утопияси! Чин, марксизм-ленинизм ўз оти ўзи билан утопия эди. Аммолекин утопия бўлса-да... бор эди-да, бор!

Манавиларда эса... утопия-да йўқ! Ақалли, утопиягина-да йўқ!

Яна-тағин, ўзларини: оппозиция, оппозиция, дейди.

Ўзи, оппозиция нима? Оппозицияни учта талабтамғаси бор: нима қилса — келажак яхши бўлади? Нима қилса — келажакда юрт обод бўлади? Нима қилса — келажакда халқ тўқ бўлади?

Ана шу учта талабга жавоб берувчи зот... оппозиция шон-шавкатига лойиқ бўлади. Ана шу учта талаб учун курашувчи зот... оппозиция шон-шавкатига муносиб бўлади...

Утмишга қайрилиб бош эгувчи зот, келажакка талпиниб енг шимарувчи зот — чин оппозициячиидер!

Манавилар эса... ўз тарихига тош отишдан бошқа нимани билмайди. Ўз ўтмишига тупуришдан бошқа нарсага кучи етмайди. Ўз аждодлари шаънига лой чаплашдан бошқа иш қўлидан келмайди».

38

Ботир фирмә партиявий ўйлади:

«Етмиш йил Улуф Октябр революцияси... дея сифи-ниб келдик. Улуф, улуг... дея ҳамду санолар айтиб келдик. Энди, Октябр тўнтириши, Октябр суиқасди... дегич гаплар чиқиб қолди. Ҳатто, ўн еттинчи йил октябррида тож-тахт хўжасиз эди. Большевиклар биттаям ўқ отмай, тахтни эталлаб олди, дегич гаплар оралаб қолди. Йўқ, мен ишонмайман, йўқ».

Ботир фирмәни ичини ит тирнади. Мувозанатини ўйқотди. Кўли ишга бормай қолди. Газета-журнал тит-килаб бошлади. Шу ҳақда бир тарихий хужжат топди.

Чин, 1917 йил 25 октябрида Николай II тахтини топшириб кетади. Керенский лашкар тўплаш учун

Псковга жүнаб кетади. Оқ подшо тахти хұжасиз қолади! Смольний қарбий-инқилоб құмитаси аъзоси Пестковский шу куни поляк ҳамшахри Дзержинский билан учрашиб қолади. Дзержинский бу фавқулодда учрашувдан фойдаланади. «Хозир биз сенга мандат ёзиб берамиз, сен шу мандат билан бориб, почтамптни эгаллайсан», дейди. Пестковский ҳамшахрини топширигини бажаришга киришади. Йүлда яна бир танишини эргаштириб олади. Иккови йүловчи машина ушлайди. Почтамптни эгаллаш учун йүл олади. Энг один қоровулхонага кириб боради. Аскарлар билан ўзаро келишиб олади. Шундан кейин телеграф, телефон станцияларини құлға олади.

Биттаям отишка бүлмайди, биттаям қурбон бүлмайди!

Бу вақтда ўртоқ Ленин Фофановлар уйи ертұласыда бекиниб ўтиради. Революционерлар ўртоқ Ленинни таклиф этмайди. Чunksи ўртоқ Ленин бундан олдин икки марта құзғолон уюштириб, қар икки құзғолонни-да хароб этиб эди. Шу боис, революционерлар ўртоқ Ленинга хабар бермайди. Ҳатто... ўртоқ Ленинга билдirmайдилар. Сабаби, революционерлар ўртоқ Ленинни... ўта экстремист, деб билади.

Аммо-лекин ўша Октябр кечаси ўртоқ Ленинни қалби нималарни дир сезади. Ўртоқ Ленинни қалби Октябр революцияси... Ленинсиз ғалаба қозонажагини тушуниб қолади. Ўртоқ Ленинни қалби Россия тож-такти... Ленинсиз эгалланажагини билиб қолади. Ўртоқ Ленинсиз-а?

Ўртоқ Ленин кечани қоронғилатиб, күчага чиқади. Революционерлар таклиф этмасалар-да, Смольнийга ўзи кириб боради!

Ўша Октябр кечаси соат бирларда бир тұда революционер бош штаб арқидан чиқиб... император дарвозасы томон юради.

Улар орасыда машұр Жон Рид ҳам бўлади.

Қишки сарой телефончиси ўз журналиға: «Тахминан уч юз кишидан иборат делегация саройға яқынлашиб келмоқда», дея қайд этиб кўяди.

Ана шу делегация қиши учун ғамлаб қўйилган ўтинлар уюми устидан ўтиб... дарвоза олдига келади. Аммо дарвоза берк бўлади. Бир революционер шу яқинда жойлашган Преображенский полки казармасига йўл олади. Революционер казармадан лом сўрайди. Полк

соқчиси эса: «Полк ухляяпти, сенлар бўлса, революция қиласман, дея ивирсиб юрибсан», дея сўкиб беради.

Шундай бўлса-да, революционерлар кечаси соат бир яримларда бир амаллаб дарвозани очади. Қишки саройга кириб боради. Сарой ичидаги соатчалини дайдиб юради. Нима қилишларини билмайди. Охир-оқибат, Қишки сарой ичидаги адашиб қоладилар!

Ботир фирмә ушбу ҳужжатни ўқиб, теваракка қаради! Теварак жимжит бўлди, одамзот йўқ бўлди!

Тағин ҳужжатга қаради: барча сатрлар чин. Барча сўзлар чин. Барча ҳарфлар чин. Ана, манаман, деб турибди. Ана, аскардай саф тортиб турибди. Ўчиргич билан ўчирса ўчмайди. Олмос билан тирнаса, кетмайди.

Бу совуқ сатрларни қандай йўқотсак бўлади? Бу қоп-қора ҳарфлардан қандай қутулса бўлади?

Ботир фирмә газетани олдин тўрт буклаб йиртди. Кейин, икки буклаб йиртди. Тағин майда-майда этмоқчи бўлди. Аммо қурби етмади. Газетани қулочкашлаб, пақирга отди.

Газета устидан... оғзини тўлдириб-тўлдириб тупурди. Томогини қириб-қириб тупурди. Газета устидан... бурунларини қоқиб-қоқиб ташлади.

Бир пиёла совуқ сув ичди. Ўзини босолмай энтиқди. Оғир-оғир энтиқди. Пақирга тикилиб қолди.

Назарида, газета пақир ичидан... чиқиб келажакдай бўлди. Одамлар орасида қўлма-қўл... ўқилажакдай бўлди.

Ботир фирмә шаҳд билан қўзғолди. Қаҳр билан гурт чақди. Фазаб билан газетани... ёқди!

«Ана, ана энди бирор ўқиб бўпти, — деди. — Мендан бошқа бирор ўқиб бўпти. Мен эса, тия кўрдингми йўқ».

У ана шунда газета нусхасини эслади. Газета... уч миллион нусхада бўлди. Яна-тағин... Москвани газетаси бўлди.

Шундай бўлса-да, ўз-ўзидан кўнгли тўлди. Ўз-ўзидан миннатдор бўлди. Ич-ичидан ором топди. Ич-ичидан таскин топди.

«Мен ўз партиявий бурчимни бажардим, — деди. — Битта фаламисликни йўқ қилдим. Битта фисқ-фасодни тор-мор этдим. Ҳали яна... ўн саккиз миллион коммунист бор. Уч миллионта газета ўн саккиз миллион коммунист олдида нима деган гап? Ишонаманки, менинг ўн саккиз миллион коммунист сафдошларим ана шу

уч миллионта газетани... бурда-бурда қилиб ташлайди! Яшасин ва яшнасин, Улуф Октябрь социалистик революяси!»

— Ура-а-а! — дея хитоб этди.

Хитобдан уй ичи зир-зир этди. Дераза токчасида турмиш мусича пириллаб учди.

Ботир фирмә босиб-босиб чой ичди. Ўзини босиб олди.

Пешона терларини арта-арта ётди. Чалқанча ётди. Дастрўмолини пешонасига қўйиб ётди. Кўзларини юмиб ётди.

У энди замонавий ўйлади. Қайта қурувчиларча ўйлади. Демократларча ўйлади.

«Замон сенга боқмаса, сен замонга боқ, дейдилар, — деди. — Хўп, анави қайта қурувчи шоирларча ўйлайлик, дейлик. Чин, Улуф Октябр революяси... қайси бир юртлар учун инқироз бўлди, қайси бир халқлар учун фожиа бўлди. Масалан, Болтиқбўйи республикалари учун... инқироз бўлди. Болтиқбўйи халқлари учун... фожиа бўлди. Боиси, Болтиқбўйи юртлари Европа мамлакатлари эди, цивилизация ўлкалари эди. Литва немисдан қолишмас эди. Латиш инглиздан, эстон француздан кам эмас эди. Совет тузуми ана шу цивилизацияли Болтиқбўйи республикаларини... кўп қатори қилиб қўйди. Совет тузуми цивилизацияли латиш билан... ўз ёзуви йўқ чукчани... баб-баравар этиб қўйди. Совет тузуми Санкт-Петербургдан Сахалингача ёйилган мамлакатни... бир хил этиб қўйди. Санкт-Петербургдан Сахалингача ёйилган турли даражадаги халқларни... тенглар ичра тенг этиб қўйди. Ваҳоланки, Улуф Октябр революясигача ёлғиз... Санкт-Петербург Европа цивилизацияси даражасида эди. Совет тузуми келгунича Ўзбекистон... феодал ўлка эди, феодал! Совет тузуми ўзбек халқи турмушига... цивилизация олиб келди! Чин, бизда олдинлари-да цивилизация бор эди. Бухорода цивилизация бор эди. Самарқандда цивилизация бор эди. Хивада цивилизация бор эди! У... осиёча цивилизация эди! Совет тузуми... европача цивилизация олиб келди! Илғор цивилизация олиб келди! Ўзи, империя — цивилизация, демак! Империя азал-азалдан цивилизация тарқатади. Империяни империя этиб турувчи қудратлардан биряям — цивилизациядир. Шу боис, империяни қадами борган жойга цивилизацияда боради. Масалан, Искандар Зулқарнайн забт этган эл-юрт маданияти гуллаб-яшнади. Икки-уч аср яшна-

ди! Ушбу барқ уриб гуллаган давр тарихда эллинизм даври, дея ном олди. Ана шу эллинизм давридан кейин Искандар Зулқарнайн империяси-да тугади. Кейин, римликлар Европага юриш бошлади. Римликлар... варвар Европани цивилизацияга даъват этди. Римликлар варвар европаликларга... варварларча муносабатда бўлди. Варвар европаликларни... цивилизациялаштириди! Кўп ўтмади, римликлар империяси-да барҳам топди. Совет империяси-да... ана шундай бўлди! Совет империяси... феодал ўзбек халқини цивилизациялаштириди! Совет империяси... феодал ўзбек халқини... ўрис халқи савиясига кўтарди, украин халқи савиясига кўтарди. Билмадим, совет империяси бўлмаса... савиямиз қандай бўлар эди...»

— Яшасин совет тузуми! — деди Ботир фирмка. — Совет тузумига шон-шарафлар бўлсин!

39

У дарвозадан инқиллаб кирди.

Токсўри остида чўкди. Дами чиқмиш копток мисол ўтириди.

Кампири ошхона деразасидан юз кўрсатди.

— Келдингизми, раис бова? — деди.

— Чарчадим, итдай чарчадим.

— Йиғилиш яхши ўтдими?

— Дунёни... сурбет босиб кетибди, кампир. Кечагина туғилган болалар... шундай сурбет, шундай безбет! Олди-кетига қарамай, акиллайди. Бугунни эртаси бор, демай акиллайди.

— Эси кириб қолади. Бир тўхтамга келиб қолади. Ошкоралик бўлиб, болалар ўзидан кетиб қолди. Ошкоралик — янгилик. Одамзот янгиликни кўрса, босартусарини билмай қолади.

— Чин, ошкоралик — янгилик. Аммо-лекин ошкоралик — шаллақилик эмас. Ошкоралик — безбетлик эмас.

— Замон сенга боқмаса, сен замонга бок, дейдилар. Сиз замонгаям... бундай бир қаранг-да, раис бова. Ҳозир ҳаммаёқ... оти нима эди?

— Демократия!

— Ҳаммаёқ... ана ўшанақа бўлиб кетди!

— Кампир, демократия — конституцияга амал қилиш, демакдир. Демократия — конституциявий яшаш, демакдир. Демократия — қонун-қоидаларни

тұла-түкис бажариш демақдир, қонун-қоидалар чегарасидан чиқмаслик, демақдир. Бу демократлар конституцияни оёқости қылмоқда, қонун-қоидаларни ертеп-қиламоқда.

- Ҳали, демократияни... ақл тиши чиқиб қолади.
- Сен қаердан биласан?
- Итта биттан-битта биттан ақл тиши... демократияга битмайдими? Битади, демократияни-да... эси кириб қолади.
- Нима овқат қиляпсан?
- Жияннингиз қишлоқдан зигир мой олиб келди.

Шуни чучитяпман.

Шу вақт айвонда телефон жириңглаб қолди.

Кампири ошхонадан ҳадаңалаб келди. Ботир фирмани құлтиғидан олди.

— Мойимга қараб туринг, раис бова, — деди. — Бўлинг-бўлинг! Мен телефонни олай. Туринг-туринг!

— Ҳе...

Ботир фирмә сўкиниб-сўкиниб қимирлади.

Ошхонадан... диморини зигир мой иси олди. Ҳорғин тани тетик бўлди. Сўлғин руҳи қувват олди.

Қозон бошида тик турай деди. Бўлмади — оёқлари ҳолсизланди.

Осма радио ости стулчага ўтиради. Деворга суюнди. Деворга бошини кўйди.

Нутқ сўзловчи радио бирдан тинди. Бирдан гулдурос қарсаклар бўлди. Совет Иттифоқи гимни янгради.

Ботир фирмә... лик этиб турди. Ёқаларини тузатди. Ўнгирларини тортиб кўйди. Қўлларини ёнларига босди. Қоматини ростлади. Бошини тик-тик тутди. Шифтга тикилиб... қотиб қолди.

Ошхонани тутун олди. Ошхонани мой иси олди. Мой иси... димоқни кўйдирди.

Кампири шанғиллаб кириб келди.

— Вой ўлдим, вой ўлигина қолдим, — дея шанғиллади.

Кампири питир-питир этиб, газни ўчирди.

Совет Иттифоқи гимни-да соб бўлди, қозон тўла зигир мой-да соб бўлди.

— Қозон шундай қошингизда эди-ку, раис бова. Шундай келиб, қарасангиз... қадамингиз кира тилайдими?

— СССР гимни янграгандада... қозонга бало борми?

— Зигир мойим күйиб кетди-я, зигиргина мойим күйиб, адо бүлди-я! Ҳа, ўша ашулангизга күйдирги чиқсин, ашулагинангизга күйдиргигина чиқсин!

— Мен масалага партиявий ёндашаман, партиявиий!

40

Ботир фирмә... ўзига-ўзи гапиригич одат чиқарди. Ўзи гапириб-ўзи эшитгич одат чиқарди. Ўзи гапириб-ўзи күлгич одат чиқарди.

Бу одатини олдин ўзиям билмади. Ўйлаб күрмади. Эътибор бермади. Кейин билиб қолди. Билди-ю... вос-вос кунда қолди.

— Тентак-пентак бўлиб қолган бўлсам-а? — деди. — Бўлмаса, одам ўзига-ўзиям... гапирадими?

Ботир фирмә теварак-атрофига аланг-жаланг бўлди. Теваракда одамзот йўқ бўлди.

— Хайрият, бирор йўқ. Бўлмаса, бечора партия ишида ишлаб-ишлаб, эсини... еб қўйибди, дер эди. Худони ўзи кўрсатибди, дер эди, — деди. — Барибир, эсимни... еб қўйганимни ҳеч ким исбот қилолмайди. Кимда-ким оғзини очса... мен сенга гапирганим йўқ, дейман...

Ботир фирмәни бир кўнгли, дўхтирга бор, деди. Аммо бу фикридан қайтди. Дўхтири халқини оғзи бўш бўлади. Бирорга айтиб қўяди. Оқибати ёмон бўлади.

Боиси, замон ёмон: совет тузумида ким амалдор бўлса — ўша одам мараз. Совет тузумида ким мансабдор бўлса — ўша одам малъун. Совет тузуми раиси — муттаҳам. Совет тузуми директори — абллаҳ.

Кечагина тухумдан чиқсан зумрашалар... совет тузуми арбоблари тагини ковлади. Ҳали бурниниям артиб олмаган жинқарчалар... совет тузуми раҳбарлари тагини ковлади.

Бу жўжалар Ботир фирмәни мазкур қилиқларини билиб қолса... оламга достон қиласди! Майна қилиб кулади. Бармоқларини чаккаларига нуқиб-нуқиб кулади. Анави... ана шунаقا, дея кулади. Эл-юрт ичида юрувсиз қиласди.

Йўқ, дўхтирга бориб бўлмайди. Бирорга-да айтиб бўлмайди. Аммо кампирига айтса бўлади. Кампири давосини топади.

Ботир фирмә тортина-қимтина дардини айтди. Кейин, кампирига кўз остидан қараб-қараб олди. Кўзларини пирпиратиб-пирпиратиб қараб олди.

Кампири пинак бузмади. Ўзини сокин тутди.

— Биламан, биламан... — дея минғиллади.

— Нимани биласан, нимани биласан? — дея бидиллади Ботир фирмә.

— С приветом... анақароқ бўлиб қолганингизни.

— Ҳе, энангни... — дея ўдағайлари Ботир фирмә.

Кампири ҳовлига юргилаб чиқди. Ҳовли ўртасида кафтини оғзига қўйиб кулди. Кўзларини артиб-артиб кулди.

— Раис бова, нима, умр бўйи қирчиллама йигит бўлиб ўтаман, деб эдингизми? — деди. — Қарилик қарилигини қиласди-да. Старость — не радость, дейдилар. Ҳаммаси ёшдан, раис бова, умрдан...

Кампири дераза ойнасидан кўриб турди: Ботир фирмә болишга ёнбошлади.

Ана шундан кейин ичкарилади. Яна қочиб чиқиш қулагай бўлсин учун... эшик олдирогидан жой олди. Тиззаларига йигилиб қолмиш этакларини тортиб-тортиб текислади.

— Сиз, ўзи... ким эканлигингизни биласизми, раис бова? — деди.

Ботир фирмә тескари ўгирилиб ётиб олди. Зарда билан ётиб олди.

— Билмайман! — дея тўнғиллади.

— Сиз, республика яратган одамсиз, раис бова, сиз республика қурган одамсиз! Сиз бўлмаганингизда... бундай республика қаерда эди, бундай кунлар қаерда эди?

— Қандай республика? — тагин тўнғиллади. — Қанақа республика?

— Қанақа республика бўларди — мустақил Ўзбекистон Республикаси!

Ботир фирмә ўнгига ағдарилиди. Кампирига қараб ётди.

— Ўзбекистон-а? — деди. — Мустақил Ўзбекистон-а?

— Албатта-да, раис бова. Сиз бўлмаганингизда... бу иморатлар қаерда эди, бу юртлар қаерда эди?

Ботир фирмә... жон кирди! Қимир-қимир тўлғонди. Оҳиста-оҳиста турди. Кампирига қараб ўтириди.

— Кўп гапирма-да, аччиқ чой дамлаб кел, — деди.

Кампири дарров турди. Калишларини оёқларига ила-ила юргилади. Чой дамлаб келди. Дастурхон ёзди.

Ботир фирмә чордана куриб ўтириди. Чап қўлини тиззасига тиради. Бақалоқ шиширди. Томоқ қирди. Қироат билан йўталди. Салтанат билан йўталди.

Амалдорона-амалдорона чой ҳўплади. Мансабдорона-мансибдорона чой ҳўплади. Ўзига-ўзи ҳайкал қўйди:

— Эркак... худони ердаги пайғамбари! — деди.

Кампири дастурхон бир бурчид мунғайиб-мунғайиб қараб ўтириди. Чолини оғзига қаради. Чолини пешонасига қаради. Чолини пиёласига қаради.

Кампири амалдордан пенсия сўраб келган муштипар мисоли... мўлтираб-мўлтираб қараб ўтириди.

Ботир фирмә кўрсаткич бармоғини кампири тарафга ниш этди.

— Мана, сен! — деди. — Тилинг бор-а?

— Тил? Тил, бор. ҳа, тил бор!

— Тилинг бўлса, айт: анови Ҳамза кинотеатрини ким қурган? Тилинг бўлса, айт!

— Ҳамза кинотеатриними? Давлат қурган, нима эди?

Ботир фирмә ўнг кафтини кампирига пешлади. Аччиқ ҳам хунибийрон бобиллади:

— Қанақа давлат?! Қандай давлат?!

— Сиз қургансиз, раис бова, сиз қургансиз! — бид-бид этди кампири. — Давлат дегани сиз, сиз дегани давлат, раис бова!

— Шундай де! Давлат, давлат, дейсан! — дея тинчланди. — Ана шу кинотеатри... мачит қўлибдилар! Ана, бўлмаса!

Кампири бу гапни аллақачон эшитган бўлса-да — ўзини энди эшитганга олди. Мазкур кинотеатр аллақачон мачит бўлганини билса-да — ўзини энди билгандга олди. Ёқаларини кампирона-кампирона ушлаб-ушлаб... ажабланди.

— Ё тавба, кинотеатри-я? — деди. — Ўша Ҳамза кинотеатрини-я? Ё тавба, шундай бир маданият даргоҳини мачитга айлантирибдиларми-а? Бу тентаклик қайси аҳмоқдан чиқибди-а?

— Қайси аҳмоқдан бўларди, анави кўча-кўйда акиллаб юрган... муслим ва муслимарапдан чиқади-да.

— Энди нима бўлади, раис бова?

— Нима бўларди, энди... кечаю кундуз намоз ўқидилар-да, қайта қуриш қўлидан келмагач... намоз ўқидилар-да. Эл-юрт учун бирор нарса яратолмагач... беш вақти намоз ўқидилар-да.

— Эсизгина кинотеатр-а? Яхши-яхши кинолар кўйиб берарди. Концертлар бўларди.

— Энди кинони тушингда кўрасан. Ма, чойингдан босиб-босиб қуй.

Аччиқ-аччиқ чой ҳовурини босди. Ўпкасини босди.
Вужудини вазмин-вазмин этди.

Аммо күнгил хижиллиги босилмади. Күнгил ғашлиги босилмади.

Лик этиб турди. Уст-бошини тузатди. Ташқари йўл олди.

Изидан кампири эргашиб келди.

— Ҳа, йўл бўлсин, раис бова? — деди.

— Ўёқ-буёқни айланиб, оёғимни ёйиб келай.

— Бинойи қиласиз, раис бова, бинойи қиласиз.

Кўнгилни чигили ёзилади-да.

Кампири шундай дея-дея, ичкариламоқчи бўлди.
Яна-тагин ўйлаб қолди. Айтайми-айтмайми, демишдай, оғзини ушлаб ўйлади, чоли кетидан қараб ўйлади.
Охири чоли кетидан айтди:

— Ай, раис бова, йўл-юзда бирор билан майдачуида гап қилиб юрманг?

— Гап? — дея кетига қаради Ботир фирмә. — Гапку, гап... Шу қайта қурувчи демократларга... ўнгирим тегиб кетсин, шу ўнгиримни қирқиб-қирқиб ташлайман!

— Бинойи қиласиз, раис бова, бинойи қиласиз.

41

У дарахт тагларидан юрди. Кўлларини орқасига кўйиб юрди.

Хиёбон айланди: скамейкаларда дам олиб-дам олиб айланди. Куз япроқларини шитир-шитир босиб айланди. Япроқлар уст-бошларига тўкилиб-тўкилиб айланди. Дарахтларда гурр-гурр этмиш чумчуқлар галасини томоша этиб-етиб айланди. Ариқда тип-тиниқ куз сувларини кузатиб-кузатиб айланди.

Куз сувларини ёқалаб юрди-юрди — ўша Ҳамза кинотеатри олдидан чиқди.

Бир келган йўлига қаради, бир сувга қаради, бир кинотеатрга қаради. Чўнтағидан қўлрўмолини олди. Скамейка устини артди. Қўлрўмолини қоқиб, жойига солди. Плаши этакларини йигиб, скамейкага ўтириди. Елкасидан нафас олди. Сувга тикилди. Сувда ўз аксини кўрди. Ўз аксига қараб ўтириди.

Бошлари узра хазон ёғди. Уст-боши узра хазон ёғди.

Сув юзини хазон ёпди. Сув юзида хазон қалқди.

Сув бўйида бир каптар бўқоқ шишириб... ғанимiga ягрин берди.

Ҳаводан куз ҳиди анқиди. Ҳаводан ҳазон ҳиди анқиди.

Қишдан... чопар келди!

Дунё куз бўлди. Дунё ҳазон бўлди.

Ботир фирмани кўнгли... куздан-да куз бўлди. Ботир фирмани кўнгли... ҳазондан-да ҳазон бўлди.

Кинотеатрга тикилди: ана, ўша... қўш тавақали, залворли дарвоза! Ана, ўша... нақшинкор эшик! Ана, ўша... жимжимадор дераза!

Кинотеатрдан бир тўда ёш-ёш... муслим йигитчалар чиқиб келди. Муслим йигитчалар бошида оппоқ-оппоқ такя бўлди. Елкаларида оппоқ-оппоқ желаклар бўлди.

Муслим йигитчалар ерга қараб одимлади. Қироат билан одимлади. Шариат пешволарича одимлади. Муслимана-муслимана одимлади.

Муслим-муслим йигитчалар... демократларча одимлади. Қайта қурувчиларча одимлади.

Ботир фирмә тағин сувга тикилиб қолди. Ҳадеб ўтириши жонига тегди. Жойидан оҳиста қўзғолди.

Бу вақт... қуёшдан нур кетди. Ёруғдан қувват кетди. Оқлиқдан ранг кетди.

Оппоқ олам доғланди-доғланди... Оқшом дегич ранг кириб келди.

Ботир фирмә намозхонларга халақит бермаслик учун — кинотеатр орқа тарафидан келди. Кинотеатр деворларига бош-адоқ қаради. Синчилаб-синчилаб қаради.

Кинотеатр бурчагига бориб турди. Деворга ўнг кафтанини қўйди. Деворни силаб-силаб олди. Гўдак пешонасини силамишдай... девор бетини силади. Девордан кафт олмай — кинотеатр ёқалаб юрди.

Кафтлари девордан майда кесакларни уматиб туширди. Ҳасларни учириб туширди. Қумларни кўчириб туширди.

Девор кафтларига ғадир-будур ботди. Девор кафтларини тирналади. Девор кафтларини қитиқлади.

Айни вақтда кафтлари... девордан ҳузур олди. Девордан завқ олди. Девордан роҳат олди.

Кафтлари ушбу завқ-шавқни... кўнглига узатди. Кафтлари ушбу ҳузур-ҳаловатни... кўнглига тақдим этди.

Ботир фирмә энтиқди. Ботир фирмә орзиқди. Ботир фирмә мисоли... капитар бўлиб учди!

Каптар мисол... девор бошида оёқ илди. Девордан кафтини олди. Кафтини кафтига уриб қоқди. Пуфлаб-пуфлаб қоқди.

Ботир фирмә кафтларига қараб-қараб... кулимсиди. Деворга қараб-қараб... кулимсиди.

— Ана, бизни кинотеатримиз, ана! — деди.

Ботир фирмә кинотеатр син-симбатига назар солиб... кулимсиди.

— Ҳар бир маконда.. бизни қадамимиз бор! — деди. — Ҳар бир иморатда... бизни құлымиз бор!

Үзи гишт қүйган жойни ўйлади. Шу жой қаерда эди, дея одимлади. Девор ёқалаб одимлади. Хомчұтлаб-хомчұтлаб одимлади.

— Мана шу ерда эди, мана... — деди.

Ана шу жойга әгилди. Ана шу жой деворини сийпади. Ана шу жой пойдеворини силади.

— Йўлдош Охунбобоев биринчи гиштни қўйиб эди. Мен эса... иккинчи гиштни қўйиб эдим! — деди.

Шу вақт иккита ёш-ёш муслим кинотеатрга келди. Олдинма-кетин ўтди. Девор тагида әгилиб турмиш одами кўрди.

— Анави мўмин банда ким бўлди? — деди бир муслим.

— Оти нима эди. Қизил, Қизил! — деди иккинчи муслим.

— Астағфурулло, Қизил бундай табаррук даргоҳда нима қилиб юрибди, тақсир?

— Ким билади, балким намоз ўқимоқни ихтиёр этгандир?

— Астағфурулло, Қизил намоз ўқийдими? Қизил коғирдан баттар-ку? Ўз оти ўзи билан Қизил-ку? Қайдам, даргоҳга... учирмоқчидир.

— Үнчалик эмасдир, тақсир.

— Қизиллардан келади, тақсир. Қизиллардан ҳар бало келади. Улардан хонақоҳ деворига... чуриллатиш келади! Бориб, ҳайдаб юборингиз!

— Ёши улуғ одам, яхши эмас. Ичкари кириб, мўйса-фидларга айтамиз, мўйсафидлар гаплашиб қўяди. Қани, кирсинлар, тақсир!

Вақт шом еди.

Ботир фирмәни кўнгли... шомдан-да шом бўлди. Ботир фирмәни кўнгли... шомдан-да маъюс бўлди, шомдан-да мунгли бўлди.

— Жувонмарг бўлгур муслимлар! — деди Ботир фирмә. — Ҳа, биз Қизилмиз, Қизил! Аммо-лекин биз

Қизил бўлиб, яратдик! Биз Қизил бўлиб, қурдик! Бу муслимлар оппоқ қайта қурувчи бўлиб... нимани яратди? Бу муслимлар оппоқ демократ бўлиб... нимани қурди? Ҳа, биз Қизил Байроқ остида меҳнат қилдик. Аммолекин меҳнат қилдик! Бу муслимларни қўлидан беш вақти намоз ўқишдан бошқа иш келмайди. Бу муслимлар беш вақти намоздан бошқа нимани билмайди. Майли, менга деса.. оқ бўл, кўк бўл. Лекин ярат, кур! Майли, менга деса, қора бўл, сариқ бўл, пистоқи бўл. Лекин ярат, кур! Майли, шу муслимларчалик ҳам борайлик. Мана, мана шу иморат. Шу иморатни биз қуриб эдик. Хўш, шу иморатни қайси жойи Совет? Қайси жойи Қизил? Шу иморатни қайси жойи коммунистик? Бир сўз билан айтсак, иморатни қайси жойи зиён-заҳмат? Ҳе, сендай қайта қурувчи муслимларни...

Ботир фирмата катта йўлга қараб юрди. Юрди-юрди — кетига бурилиб қаради. Кинотеатрга бошадоқ разм солди.

— Биринчи фиштини Йўлдош Охунбобоев қўйиб эди, — деди. — Иккинчи фиштини... мен қўйиб эдим, мен!

42

Ўзбек хотин-қизларини... хотин-қизлар мажлисига олиб келиш азоб эди! Ўзбек хотин-қизларини бир жойга тўплаш қийин эди. Ўзбек хотин-қизларини уйидан кўча-га чиқаришни ўзи... катта гап эди!

Биров — касал дер эди. Биров — қозон-тобогини важэтар эди. Биров — эркагим жавоб бермайди, дер эди.

Шунда, эркакларни чақириб жавоб сўралар эди. Шунда-да жавоб бермагичлар бўлар эди.

Ана шунда, Ботир фирмата эркакларни мажлисларда муҳокамага кўяр эди.

— Сен феодалсан, феодал! — дер эди. — Сен совет хотин-қизларига бойларча муносабатда бўласан!

Ботир фирмата хотин-қизларни... хотин-қизлар йифилишига олиб келмай, мактабдан ўқувчи қизларни чақирав эди. Ўқувчи қизларни қатор ўтиргизиб қўйиб, тумандан келмиш вакилага тавсия этар эди:

— Мана, фаол хотин-қизларимиз! — дер эди.

Бугун — қайта қуриш даврида...

Ботир фирмата 8 март байрамини кўп кўриб эди. 8 март маросимларини ўзи ташкил этиб эди. Аммо... бунгидай 8 март байрамини кўрмаб эди!

Бу нима — халқ сайлими? Хотин-қизлар гап-гаштагими? Хотин-қизлар курултойими?

Барчаси деса-да бўлади!

«Ана буни демократия деса бўлади! — деда ўйлади Ботир фирмә. — Ана, қайта қуриш шарофати, ана!»

Одатича, сарой бир бурчидан жой олди. Теварак-бошдагилар билан бош иргаб салом-алик этди.

«Совет хукумати... етмиш йилда етолмаган ютуққа, қайта қуришни дастлабки кунларидаёқ... етдилар! — деда фикрлади Ботир фирмә. — Ҳа, жамият қайта қурил япти. Янги ҳаёт бошланяпти. Ҳа, ўзбек хотин-қизлари қайта ҳаёт куряпти. Бу таҳсинга лойиқ. Ана буни қайта қуриш деса бўлади».

Хотин-қизлар бири қўйиб, бири минбар кўтарилиди. Бирови Оролни ҳимоя этди. Бирови табиатни муҳофаза этди. Бирови атроф-муҳитни ифлосланишига қарши нутқ сўзлади. Бирови алюмин заводига қарши бонг урди.

«Мана шулар... қозон-тобоғидан бери келмас эди, — деди Ботир фирмә. — Ана энди... ўс, ўзбек хотин-қизлари, ўс! Олға, ўзбек хотин-қизлари, олға! Барчаси... Улуг Октябрь социалистик революцияси туфайли. Барчаси... совет тузуми туфайли».

8 март йиғилишини бошқариб борувчи айтди:

— Энди сўз, оташнафас қайта қурувчимиз, демократия байробини боши узра кўтариб юрувчимиз... Дилбар Мирзахўжа қизига!

Баланд пештоқли дераза остидан оппоқ бир нарса қимирилади. Оппоқ нарса... бош-адоқ оппоқ бўлди. Бошадоқ оппоқ матога бурканмиш бўлди.

Оппоқ нарсанни... боши қаерда, билиб бўлмади. Юзи қаерда, билиб бўлмади. Елкаси қаерда, билиб бўлмади. Оёқ-кўли қаерда, билиб бўлмади.

Оппоқ нарса минбар сари қимирилаб борди. Ҳа-ҳа, қимирилаб борди!

Оппоқ нарса қимирилади-қимирилади — минбарга чиқиб борди. Йиғилганлар сари юзланди.

Ботир фирмә ана шунла оппоқ нарсанни бет-бошини кўрди: кулчадай бир юз бўлди, қорамағиз бир юз бўлди.

Кулча юз халойиқча тик қарамади. Халойиқдан нигоҳини бекитди. Кўлидаги қоғоздан кўз олмади.

Ботир фирмә оппоқ нарсага тикилди-тикилди — ким эканини билмади. Теварак-бошдан сўрай деди — аёл кишини суриштиришдан орланди.

«Ия, бу отинбиби ким бўлди? — деди Ботир фирмә. — Бундай отинби билар йўқ эди-ку? Бундай оппоқ кийим-бош кийиш йўқ эди-ку? Ё шундай оқ кийим-бош мода бўлдими?»

Оппоқ нарсани лаблари... булк-булк этди. Афтидан, оппоқ нарса... калима ўқиди. Кулча юзларига фотиҳа тортди. Олдин ўнг тарафига туф-туф-туф этди. Кейин чап тарафига туф-туф-туф этди.

Ботир фирмә минбар кўрди — бундай минбар кўрмади. Нотиқ кўрди — бундай нотиқни кўрмади.

«Чиндан-да, бош-адоқ оппоқ кийиниши... мода бўлдимикин-а?»

Ботир фирмә шу хаёлда сарой аланглади. Чинданда, саройда оппоқ матога бурканган хотин-қизлар мўл бўлди. Ҳар учта хотин-қизни биттаси оппоқ матога ўралган эди.

«Ҳа-а, буям яхши, — деди Ботир фирмә. — Оқлик — эзгулик!»

Оппоқ нарса тағин теварак-бошига туф-туф, этди. Ёнбошларига туф-туф этди. Кейин, нутқини бошлиди:

— Бисмиллоҳир раҳмонир роҳийм. Расулуллоҳ саллоллоҳу алайҳи ва саллам ансорларига иймондан ўйт бериб, ҳаёп иймондандур, дейдилар....

Ботир фирмә ана шунда оппоқ нарсани таниди. «Ия, бу Диля-ку, Диля! — деди. — Ўша ўзимизни Диля...»

Ботир фирмә оппоқ нарсани оғзида бўлди, хаёллари оппоқ нарсани ўтмишида бўлди...

Оппоқ нарса давоми этди:

— Жаноб пайғамбаримиз Муҳаммад алайҳиссалом Куръони карим муқаддас китобларининг йигирма тўртинчи сура, ўттиз биринчи оятларида шундай дейдилар: мўминаларга ҳам айтинг, кўзларини номаҳрам эркакларга тикишдан тўссинлар ва авратларини ҳаромдан сақласинлар! Ҳамда кўриниб тургандан бошқа зебзийнатларини, яъни, устларидаги либосларидан бошқа зеб-зийнатларини номаҳрамларга кўрсатмасинлар ва кўкракларини рўмоллари билан тўссинлар! Улар зебзийнатларини кўрсатмасинлар, магар эрларига ё оталарига, ё эрларининг оталарига, ё ўғилларига, ё эрларининг ўғилларига, ё ўзларининг оға-иниларига, ё ўзларининг оға-иниларининг ўғилларига, ё опа-сингилларининг ўғилларига, ё ўзлари каби аёлларга, кўл остидаги чўриларга, ё аёллардан беҳо-

жат бўлган, яъни жуда кексайиб қолган ёки ақлсиз-девона эркак хизматкор қулларга, ё аёлларнинг аврат-ларидан хабардор бўлмаган гўдакларгагина кўрсатишлари жоиздир. Яна яширган зеб-зийнатлари билинсин учун оёқларини ерга урмасинлар! Барчаларингиз Оллоҳга тавба қилинглар, эй мўминлар! Шоядки, шунда нажот топсангизлар! Шундай экан, мен ожиза банда, шу ерда ўтирган барча мўмин-мусулмон мазлумаларга Муҳаммад алайҳиссаломимиз ўғитларига амал қилиб, бошларига рўмол ёпинишларини сўрайман...

Ана шунда Ботир фирмә бир қалқиб тушди. Теварак-бошига аланглади.

— Ия-ия! — деди. — Бу нима деяпти?

Олд қаторда ўтирмиш бир аёл кетига бурилиб қаради.

— Тўғри айтмоқда! — деди аёл. — Мусулмончиликка қайтиш вақти келди!

Ботир фирмә тагин ўёқ-буёғига аланглади. Бошиқа бир гап кутди. Аммо шу гапни эшитолмади. Боиси, шу гапни айтажак зотни тополмади.

Иложисиз қолди. Бошини эгди. Тиззаларига тикилди. Оёқлари учига тикилди. Жойидан оҳиста қўзғолди. Оҳиста ташқари йўл олди.

«Мусулмончиликка қайтиш вақти келди эмиш, — деди Ботир фирмә. — Шу вақтгача қаерда эдинг? Шу вақтгача ким эдинг?»

Ботир фирмәни қўллари белида бўлди, хаёллари аллақаёқларда бўлди...

«Бу жувон қайси бир эркакларни тиззасида ўтирмади, — ўйлади Ботир фирмә. — Бу жувон қайси бир эркакларни кучоғида ётмади».

43

Ботир фирмә хаёллар оғушида уйига кириб келди.

Уйида чалқанча ётиб ўйлади. Ёнбошлаб ётиб ўйлади:

«Булар ким бўлди, ўзи? Монах аёлларми? Монах аёллар ўрисларда бўлади-ку? Монах аёллар қоп-қора либостга бурканиб юради-ку? Булар оппоқ матога ўраниб, мажлисларда нутқ сўзлаяпти-ку. Барчаси мусулмон фарзанди-ку. АҚШда ана шундай оппоқ либостга ўралган бир тўда бор. Отини ку-ку-лукс-клан дейди. Ку-ку-лукс-кланлар ҳамиша бошдан-оёқ оппоқ либосга бурканиб юради. Шу боис, ку-ку-лукс-кланларни

кимлигини билиб бўлмайди. Ё булар ҳам ку-ку-лукс-клан бўлмоқчими?»

Ботир фирмә ана шу ерда ўз фикридан қайтди.

«Ку-ку-лукс-кланлар АҚШда-ку? — дея мулоҳаза этди. — АҚШ капиталистик мамлакат-ку? Йўқ, менинг кўрганларим совет хотин-қизлари, социалистик хотин-қизлар! Масалага партиявий ёндашиш керак, ўртоқ Эсонов, партиявий!»

Ботир фирмә ана шундай мулоҳазага боргани учун... ўзини-ўзи айблади.

«Падарлаънат, мегажин! — дея сўкинди Ботир фирмә. — Ўзи, булар нима қилмоқчи? Ўзбек хотин-қизлари йигирманчи аср... бошига қайтмоқчими? Феодализмга... феодализмга қайтмоқчими? Қайси мақсад билан феодализмга қайтмоқчи? Мусулмончиликками? Эскича урф-одатгами? Иффатгами? Ўзбек хотин-қизлари... феодализмда шунчалар мусулмон эдими? Ўзбек хотин-қизлари феодализмда шунчалар... иффатли муслима эдими? Ўзбек хотин-қизлари феодализмда шунчалар... хурэркин эдими?»

Ботир фирмә... гоясиз хаёлларга бормаслик учун токчадан «КПСС программаси»ни олди. Ёнига қўйди. КПСС программасига қараб-қараб овқат еди. КПСС программасига қараб-қараб чой ичди.

Кампиди Ботир фирмәни бу қилиғидан ҳайрон бўлмади. Аксинча, Ботир фирмәни кўнглини олиш йўлини қилди: КПСС программасини силаб-силаб қўйди.

— Хўп бинойи қиласиз, раис бова, — деди кампиди. — Қайта мутолаа илмни онаси, илмгинани онаси!

Ботир фирмә маъқуллаб бош ирғади. Барibir, оппоқ нарсалар хаёлидан кетмади.

«Агар феодализм замонида бўлса эди, Дилядай аёллар... бирор бойни ё ўнинчи, ё ўн бешинчи хотини бўлар эди, — деди Ботир фирмә. — Дилялар феодализмда қаерда ишлар эди? Бу ҳоли билан... ҳеч қаерга сифмас эди! Қайси бир бойни кир-чирини ювиб кун кўрар эди. Оёги бузуклар... феодализмга-да сифмайди! Бундайлар қайси бир... фоҳишахоналарда жон сақлар эди».

— Фанимат гарники, дейдилар, — деди Ботир фирмә.

— Лаббай?

— Гар қариса отин бўлади!

— КПСС программаси устида ундаи деманг, раис бова.

Ботир фирмә хиёл бўлса-да, ўзини тийди. КПСС программасига қараб-қараб бош иргади:

— Чин айтасан, кампир, партиявий фикрлаш керак, партиявий, — деди.

Ботир фирмә кампирига 8 март йиғилишини айтиб берди. Оппоқ-оппоқ нарсаларни айтиб берди.

— Кошки, одамлар уларни кимлигини билмаса, — деди Ботир фирмә. — Қайси юз билан тоат-ибодат қиласди? Одамда бет бўлса! Ор-номус бўлса! Far қариса отин бўлиб... Куръондан сабоқ бериб ўтирибди. Олатларингизни ювинг, дейди! Ҳе, олатинг бошингдан қолсин! Олатингга... куйдирги чиқсин!

Ботир фирмә оппоқ нарсаларни... чапарасталаб сўкмоқчи бўлди. Яна-тағин... КПСС программасини юз хотир этди!

44

Лик этиб қўзғолди.

Ховли айланди: дарахтларни ушлаб-ушлаб айланди. Дарахт учларига қараб-қараб айланди. Ер тупуриб-ер тупуриб айланди.

«Намоз ўқиш учун торгина бурчак керак. Хилватгина бурчак керак, — деди Ботир фирмә. — Намоз бир метрча жойда ўқиласди. Ҳа, йиқилиб-туриш учун бир метргина ер керак. Беш-олти минутгина вақт керак. Ахир, совет давридаям тор бурчаклар бор эди-ку? Совет давридаям беш-олти минутлик вақт бор эди-ку? Нега булар совет даврида намоз ўқимади? Чин, коммунистик партия намозга қарши эди. Аммо-лекин КПСС шу намоз ўқимасин дея... деразангдан мўралаб турмаган эди-ку? КПСС шу ётиб-турмасин дея... оёқ-қўлингни ушлаб турмаган эди-ку? КПСС шу намоз вақтини билолмай қолсин дея... билагингдаги соатингни олиб қўймаган эди-ку?

Намоз ўқиш учун... таҳорат олиш лозим бўлади. Ахир, КПСС таҳоратхонанг тирқишидан мўралаб турмаган эди-ку, шу таҳорат олмасин, дея? Таҳорат — ювиниб-чайнииш демак, ҳалоллациб-покланиш, демак. Ахир КПСС таҳоратхонангга кириб келиб... пок-ҳалол бўлма, дея, зуғум этиб турмаган эди-ку?

Чин, совет тузумини қусурлари кўп эди. Чин, совет тузуми кўп нарсаларга қарши эди. Аммо-лекин инсон таҳоратига қарши эмас эди! Унда, нега булар бирдан... шариатпеша бўлиб қолди? Бирдан... намоз-

хон бўлиб қолди? Бирдан... муслим ва муслимагар бўлиб қолди?

Бир улуғ зот шу ҳақда зўр гап айтиб эди. Бу зот Камол Отатурк эдими ё Лев Толстой эдими? Ким бўлса-да, хўп айтиб эди. Ана шу доно гапни даври келди: бечора дин... фар-ӯғрилар учун қалқон бўлади. Бечора дин... мараз-муттаҳамлар учун қалқон бўлади. Бечора дин... аглаҳлар учун қалқон бўлади. Дин, балога қолган дин!

Ишдан ҳайдалган ожиз банда — ўзини шариатга уради. Иш тополмаган қўли калта — художўй бўлади. Қўлидан фойдали иш келмаса — намозхон бўлади. Егани нон тополмай қолса — қўлига тасбех олади. Борадиган жой тополмай қолса — мачитга боради. Юрар йўлини билмай қолса — шариат йўлидан юради. Муслим бўлади! Муслима бўлади!

Бечора худо, бечорагина худо! Бечора пайғамбар, бечорагина пайғамбар!

Чин, одам ўз динидан ташқарида яшай олмайди. Одамни одам этиб турувчи-да динидир. Одам қиёфасига солувчи-да диний мазҳабидир.

Мана, XX аср тамом бўляпти. XX аср якунланяпти. Ана шундай кунда... манавиларни ишини! Шундай тараққиёт кунида манавиларни қилигини!»

Ботир фирмани хаёллари ўтмишларга учди. Оёқлари заминда бўлди. Хаёллари кечмишда бўлди...

«Совет тузуми ўзбек хотин-қизларига нима каромат кўрсатди? — деди Ботир фирмә. — Совет тузуми ўзбек хотин-қизларига бешта каромат кўрсатди. Каромат деса дегулик! Ўзи, совет тузумидан олдин ўзбек хотин-қизларни бор эдими? Бор бўлса... оти... ожиза эди! Оти... тавқи лаънат эди! Совет тузуми уларга ном берди: ўзбек хотин-қизлари! Улар ана шу ном билан... инсон саналди. Ана шу ном билан ижтимоий-сиёсий куч бўлди. Ана шу ном билан маданий-маънавий қудрат қасб этди.

Бу — совет тузумини биринчи каромати бўлди.

Совет тузумини иккинчи каромати — совет тузуми ўзбек хотин-қизларига... паранжи-чиммат ташлаттириди! Ўзбек хотин-қизлари халтага ўроғлик... булбул эди. Ўзбек хотин-қизлари енг ичидаги... бедана эди. Ўзбек хотин-қизлари юзига парда тортиғлик... ойна эди.

Совет тузумини учинчи каромати — совет тузуми ўзбек хотин-қизларини... хат-саводли этди! Чин, эскича мактаб-мадраса бор эди. Аммо-лекин мактаб-мадрасаларда фақат... ўғил болалар ўқитилар эди. Ўқиш заи-

фалар учун... гуноҳ эди! Совет тузуми ана шу гуноҳни... бекор этди!

Совет тузумини тұртингі каромати — совет тузуми ўзбек хотин-қизларини... никоҳдан ўтказди! Чин, эскида ҳам никоҳ бор эди. Аммо-лекин эски никоҳ... Эски никоҳ хотин-қизлар қақ-хуқуқи билан ҳисоблашмади. Совет тузуми ўзбек хотин-қизларини... ЗАГСдан ўтказди!

Совет тузумини бешинчи кароматини... тан олиш лозим! Совет тузуми ана шу бешинчи кароматда... қош құяман, деб, күэ чиқарып қўйди! Чин, совет тузумини мақсади — ўзбек хотин-қизларини эркаклар билан тенг ҳуқуқли этиш эди. Чин, тенг ҳуқуқли этди. Аёллар билан эркакларни тенгма-тенг кўрди. Аммо-лекин аёл билан эркакни бир қолипга солди. Аёл ким, эркак ким — билиб бўлмай қолди. Ўзбек хотин-қизларига... бульдозер ҳайдаттириди, трактор ҳайдаттириди!»

45

Ботир фирмә оёқейди учун ташқарилади. Хиёбонга йўл олди.

Хиёбонда одам кам бўлди. Барча ишга шошилди. Бирор питир-питир шошилди. Бирор бир нималар еб-еб шошилди. Бирор чопқиллаб-чопқиллаб шошилди.

Одам одамга қарамади. Одамлар кўзи оёғи остида бўлди. Билагидаги соатда бўлди. Бекатда бўлди.

Ботир фирмә теваракка сокин боқди. Хотиржам на-фас олиб боқди.

Ленин ҳайкали қошига келди. Бошидан похол шля-пасини олди. Ленинга қараб... таъзим бажо этди.

— Саломатмисиз, ўртоқ Ленин! — деди.

Шляпасини бошига қўндириди. Йўлида давом этди. Кўм-кўк ўтлар ёқалаб юрди. Турли-туман атиргуллар олдидан юрди.

Атиргуллар... атриёт анқитди.

У гулларга қараб... димогини тўлдириб-тўлдириб на-фас олди.

— Оҳ-оҳ-оҳ! — деди.

Ботир фирмә мириқди!

Сайр этиб юра-юра — хиёбон четидан чиқиб қолди. Тағин изига қайтар бўлди. Аммо оёқлари толиққандай бўлди. Анифи, пича ўтиргиси келди.

Шу яқинда турмиш узун скамейкадан жой олди. Скамейка суюнчиқларига қулочларини ёйди. Оёқлари-

ни кериб-кериб узатди. Оёқлари шундай роҳат олди, шундай роҳат олди!

У ҳаётдан завқ-шавқ олди. У тўйиб-тўйиб хўрсинди. У ҳаётдан... шукур этди.

Шунда, шу яқиндан шитир-шитир товуш эши билди. Мисоли, дарахт япроқлари шитирлаб учуб тушмиш бўлди. Мисоли, еллар хазонларни шитирлатиб учирмисш бўлди. Мисоли, чумчуқлар хазонлар оралаб юрмисш бўлди.

Ботир фирмә эътибор бермади. Диққат этмади.

Шитир-шитир мунтазам бўлди. Тез-тез бўлди. Тобора яқиндан бўлди.

Ана шунда Ботир фирмә аланглади. Бош-адоқ назар солди.

Скамейка кетида ёйилиб ётмиш кўкаламзорда иккита оппоқ... Оппоқдан-оппоқ нарса турди. Энг ҳайратли жойи — оппоқ нарсалар... майдада майдада бўлди. Дўмбоқ-дўмбоқ бўлди!

Оппоқ-оппоқ дўмбоқчалар... беш-олти ёшли... қизалоқлар бўлди! Оппоқ кўйлак-лозим кийгувчи қизалоқлар бўлди. Оппоқ рўмол ўрагувчи қизалоқлар бўлди.

Қайта қурувчи шариатпешволар тили билан айтсак... муслиматлар бўлди!

«Ё тавба! — деди Ботир фирмә. — Тушимми ё ўнгими? Нима бало, қайта қурувчилар мени эсимни киритиб кўйиш учун шундай ташкил этяптимикин? Қайта қурувчилардан келади. Жувонмарг бўлгур қайта қурувчилардан ҳар бало келади».

Ботир фирмә аланг-жаланг бўлди. Синчков-синчков аланглади. Диққат-эътибор билан аланглади.

Йўқ, бу яқинда қайта қурувчи сувратлар йўқ. Йўқ, бу яқинда шариатпешво сиймолар йўқ.

Ботир фирмә хотиржам бўлди. Ўнг тирсагини скамейка устига тиради. Юзини ўнг кафтига кўйди. Дўмбоқ муслиматларга ўйчан тикилиб қолди. Маъюс тикилиб қолди.

«Шуларни ёши, бўлса, беш-олтиларда. Кечагина туғилган қизалоқлар, — деди Ботир фирмә. — Афтидан, булар ҳали мактабниям кўрмаган. Булар ҳали бурнини ям артиб олмаган. Нега энди, айнан шу бугун... шулар кўзимга кўриняпти?»

Ботир фирмә ўйлаб қолди. Гўё, туш кўрди. Гўё, дунёни энди кўрди. Гўё... бир балога йўлиқди!

Қоматини хиёл ростлади. Томоғини қирди. Бошини ўёқ-буёқча қимирлатди. Ўта жиддий бўлди. Энди, партиявий ўйлади. Партиявий фикрлади:

«Менимча, бундай жажжи муслималарни кўрган бўлишим керак. Аммо-лекин раҳбарлик феълим кўзиб... майда-майда одамчаларга эътибор бермаган бўлишим керак. Раҳбарлик димоғим қўймай... оёқ остида ўралашиб юрган муслимачаларга қайрилиб қарамаган бўлишим керак. Яна-тағин, кексалик... бемалолхўжалигим ҳам қўшилиб, гўдак муслималарга дикқат этмаган бўлишим керак».

Ботир фирмә жажжи муслималар билан сўрашмокчи бўлди.

— Ҳа-а, яхшимисизлар? — деди.

Гўдак муслималар жойида қолди. Ёнма-ён бўлди. Кўлларини кўксиларига қўйди. Бошларини эгди. Кўзларини калишлари учига қадади.

— Димоғларинг чомми?

Гўдак муслималар сукут сақлади. Калишларидан кўз узмади. Миқ этмади. Салом бермади.

Ботир фирмә ана шунда тушунди. Негалигини англаб олди. Үзича бош иргади.

«Айтмоқчи, шариат бўйича муслималар эркакларга қарамайди. Эркаклар билан салом-алик этмайди, — деди. — Тўғри, ғана шугиналар тоат-ибодат этади. Намоз ўқийди, рўза тутади. Аммо-лекин муслима бўлиш учун... худони кимлигини билиш керак. Муҳаммад пайтамбарни кимлигини билиш керак. Бунинг учун аввалио... Куръонни ўқиш керак, Ҳадисларни ўқиш керак. Бор-йўғи беш-олти ёшлик муслималар бунча илмни қачон ўрганиб олди? Бор-йўғи беш-олти ёшлик муслималар Куръону Ҳадисларни қачон ўқиб олди? Ёмондан-ёмони, бу муслимачалар... катта бўлса, ким бўлади? Эл-юрт тақдири шуларга қоладими? Шулар юрт келажаги бўладими?»

Ботир фирмә чидаб ўтиrolмади. Тиззаларини муштлаб қўзғолди. Ерга тупуриб қўзғолди. Оҳ-оҳ уриб қўзғолди.

46

Ботир фирмә Москва телевидениесини кўриб кофе ичди. «Тонг» томошасини кўриб кофе ичди.

Мазкур томошада ажаб бир синоатни кўрди: Париж олий ўқув юртларида сабоқ оловчи эронлик қизлар... паранжи ўрабди! Кўчада паранжи ўраб юрибди! Институтда паранжи ўраб юрибди. Дарсда-да паранжи ўраб ўтирибди!

Париж мэри бундан хабар топибди. Паранжида юриш тақиқлансан, дея қарор чиқарибди. Ким паранжида юрса, олдин жарима солинсан. Кейин, ўз юртига қайтариб юборилсан, дебди.

Эрон хотин-қыздар ушбу қарорни эшишиб, Төхрондаги Франция элчихонаси олдида намойиш ўтказибди. Бу, мусулмончиликка қарши қарор, тезда бекор қилинсан, дея норозилик билдирибди.

Элчихона олдида түда-түда хотин-қыздар, қоп-қора паранжилик хотин-қыздар. Бошдан-оёқ қоп-қора хотин-қыздар!

Ботир фирмани завқи келди. Ич-ичидан шод бўлди.

«Жуда тўғри қарор! — дея маъқуллади. — Ана мэр, ана раҳбар! Ахир, Париж мэри... коммунист эмас-ку? Ахир, Париж мэри... Қизил эмас-ку?»

Ботир фирмада ғайрати жўшди. Жойидан даст қўзголди. Кафтини кафтига урди. Кафтини кафтига ишқади.

— Барibir... ҳақиқат бор! — деди.

Айвонда тимирскиланиб юрмиш кампири овоз берди:

— Ҷақирдингизми, раис бова?

— Яшаса бўлади! — деди Ботир фирмада.

47

Хиёбон тўла одам бўлди.

Одам мисоли чумчук бўлди.

Одамлар елкасига чумчук бўлиб қўнса бўлди... аммо одамлар оралаб юриб бўлмади.

Одам.. қайнади!

«Райком буюрсаям бунча одам йигилмас эди, — дея ўйлади Ботир фирмада. — Райком партиядан ўчираман, десаям бунча одам келмас эди. Демократия шарофати бу, демократия шарофати».

Ботир фирмада одамларни ёриб юролмади. Ичкарироқ, киролмади. Теварак-бош аланглади. Азим чинор остида турмиш бир кишига кўзи тушди.

Бу киши — собиқ обком секретари ўртоқ Ражабов бўлди.

У ана шу Ражабовни қоралаб борди. Ражабов билан кўришиб-сўрашди. Кўлларини костюми чўнтакларига солди. Минбарга қаради. Йигилиш бошланишини пойлади.

Ўрта яшар киши бир минбарга қаради, бир Ботир фирмада қаради, бир чинор шохларига қаради.

— Биз ҳам бор, мана шу чинорлар ҳам бор. Нима дедингиз? — деди.

— Чин, чин, — деди Ботир фирмә. — Чинорлар ҳам бор... биз ҳам бор!

— Шу чинорларгаям... йигирма йиллар бўлиб қолди-ёв?

— Ундаи, паст кетманг. Бу чинорларни умри... ярим асрдан ошиб кетди.

— Ярим аср? Гапингизда жон бор. Чунки мен ҳам бор, шу чинорлар ҳам бор.

— Шундай, асрлик чинорлар, шундай.

— Қаранг, ярим асрдан зиёд эл-юртта соя-салқин бериб келади-я?

— Шундай, шундай.

— Бобонинг тол тиккани — ўзига ном эккани, дейдилар. Қайси бир... ота-боболаримиз экиб кетган-да?

Ботир фирмә юзларини четга буриб кулимсиdi. Чинор шохларига қараб кулимсиdi.

— Ким билади, — деди.

— Қаранг, бутун бир хиёбонни яшнатиб турибди. Яхшидан... боғ қолади, деганлари шу-да?

Ботир фирмә кўзларини олиб қочиб кулимсиdi. Бош иргаб-бош иргаб кулимсиdi.

— Чин, яхшидан боғ қолади, чин, — деди.

— Шу чинорларни ким экиб кетган бўлсаям... жойи жаннатда бўлсин!

Ботир фирмә оёқлари учига тикилди. Ботир фирмә хиёл хўрсинди. Ботир фирмә хиёл қизарди.

«Раҳмат, раҳмат», — деди ичидা.

Шу вақт, минбарга қайта қурувчи демократлар кўтарилиди. Жой-жойини эгаллади.

Йиғилиш Орол денгизини ҳимоя этиш ҳақида бўлди.

Орол ҳимоячилари бирин-бирин минбар кўтарилиди. Аланг-жаланг нутқлар сўзлади.

Ботир фирмә нутқларни қунт билан эшитди. Ўнг қулоғини нотиқларга қаратиб эшитди. Кафтини қулоғига елпана этиб эшитди.

Ботир фирмә бир нарсани фаҳмлаб қолди: улар нутқини Оролдан бошлаб... бошқа гапларга бурди. Орол номи бутунлай йўқолди.

Йиғилиш Орол ҳақида бўлди. Чинорларда осиғлик шиорлар Орол ҳақида бўлди. Минбар бетида илиғлик алвон чақириқ Орол ҳақида бўлди. Нутқлар бошланиши-да Орол ҳақида бўлди. Кейин, Орол номи... тамомила фойиб бўлди!

«Буларни дарди Орол эмас, — деди Ботир фирмә. — Йўқ, буларни қайғуси Орол эмас. Бўлмаса, нима?»

— Энди сўз... Мирзабуллоҳ ибн Усмон ўғли ал-Мадийга!

Йиғилиш аҳли чайқалди. Йиғилиш аҳли қарсак чалди.

«Исми шарифидан... Арабистондан меҳмон келган чиқали, — деди Ботир фирмә. — Исми шарифидан... араб шайхларидан бўлса керак».

Минбарга дароздан-дароз бир бола чиқиб келди.

Ботир фирмә кекса кўзларига ишонмади. Кўкрак чўнтағидан кўзойнагини олиб тақди, эътибор бериб қаради.

Чин, бу ўша... Мадиев бўлди. Ўша дароз шоир бўлди.

«Тавба, — деди Ботир фирмә. — Булар ўзи нима истайди? Бу билан нима демоқчи? Ўзларини намозхон қилиб кўрсатмоқчими? Ўзларини шариат пешволари қилиб кўрсатмоқчими?»

— Бисмиллоҳир раҳмонир роҳийм... — дея сўз бошлади Мадиев.

«Аввало, гап исми шарифдами? — деди Ботир фирмә. Масалан, мен ўзимни ал-коммунист... ибн фирмә... дея атасам, шариат пешвоси бўлиб қолармидим? Намозхон бўлиб қолармидим?»

Мадиев нутқини Оролдан бошлади. Бир-икки марта Орол-Орол, деди. Кейин...

— Жаноблар, афтидан, кекса авлод осонликча таслим бўлмоқчи эмасга ўхшайди. Кекса авлод осонликча жон бермоқчи эмасга ўхшайди! — деди. — Шу сабабдан, кекса авлод дуч келган нарсага ёпишмоқда. Кўзига кўринган нарсага тиш-тирноғи билан ёпишмоқда. Ҳа, бу табиий ҳол. Чўкаётган одам чўпга ёпишиши табиий ҳол. Сизга маълумки, кекса авлод уруш ғалабасига ёпишиб кўрди. Биз ғалаба қозондик, деб кўкракларига орден-медаллар тақдилар. Парадлар ўтказдилар. Жаноблар, ғалабани оддий солдат қўлга киритган, оддий солдат! Ғалаба қозонгандар Европа қабрларида ётибди. Улар йигирма миллион, ҳа, йигирма миллион! Кекса авлоднинг тоталитаризм ўтмишлари, милитаризм кечмишлари энди ўтмаганидек, бу ёлғон даъволари ҳам ўтмайди! Жаноблар, кекса авлод ўзлари она-ватанимизни зулматга айлантирган тоталитаризм режимига, она халқимизни қулга айлантирган ўша милитаризм тузумига сизни ҳам, бизни ҳам қайтариш учун ёш авлоднинг... этагидан тортмоқда, ҳа, этагидан тортмоқда!

Халқ... күклем елларидан чайқалмиш бүгдойзор мисол... түлқинланиб-түлқинланиб олди!

Халқ... күкни күтарди!

— О-о-о! У-у-у! — дея нидо этди.

Ботир фирмани күксі қизиди. Күксі ёнди. Күксі ғалаён этди.

— Ъртоқ Ражабов, уйга меҳмон келмоқчи эди,— деди.

— Мениям ишим бор эди, — деди Ражабов.

— Унда, кетдик!

Улар одамларни ёриб-ёриб юрди.

Катта күчага чиқиб олди.

48

Ботир фирмә елқадан нафас олди. Юзларини рўмолча билан артди.

Ражабов... оғиз тўлдириб-оғиз тўлдириб тупурди. Қақириб-қақириб тупурди. Босиб-босиб бурун қоқди.

— Булар нима деяпти, ўртоқ Ражабов?

— Итим биладими, нима деяпти!

— Гапира беради-да.

— Шу-да, ўртоқ Эсонов. Минбарга отилиб чиқиб, лақиллайверади-да.

— Ўз оти ўзи билан қайта қурувчй-да.

— Нима, шулардан бошқа қайта қурувчи йўқми?

— Бор, мана, сиз, биз ҳам қайта қурувчимиз.

— Бўлти-да, ҳозир ҳамма қайта қурувчи.

— Энди булар лидер, ҳа, лидер!

— Қайси, ўшаларми? Маҳмадона, денг, маҳмадона.

— Йўқ, улар интеллектуал, ўртоқ Эсонов, ҳа, улар интеллектуал.

— Мен буларни юзида ҳам, сўзида ҳам интеллектуаллик кўрмаяпман, ўртоқ Ражабов.

— Бор, сиз билан биз ёшларни билмаймиз, бор. Ёшлар Ницшени ўқиган, Камюни ўқиган, Прустни ўқиган, Фрейдни ўқиган.

— Сиз обком Ражабовсиз, сиз буржуа мафкурачиларини намуна қилманг, ўртоқ Ражабов!

— Бақирманг, ўртоқ Эсонов, бақирманг. Кўчадан ўтган-кетганлар нима деб ўйлади? Бор, барибир, ёшларда бор.

— Бақирсан-бақирмасам? Нима бор, нима бор?

— Интеллектуаллик бор. Интеллекгуаллик донолик деб ўйлайсизми? Кечириб қўясиз. Интеллектуаллар халқ

ҳисобига яшовчи бетайин бир тоифа бўлади. Интеллектуаллар халқ қалбидан нима дард бор, ҳеч қачон англаб етмайди. Шу сабаб, интеллектуаллар халқдан ёёғи узилиб қолган зотлар бўлади. Интеллектуаллар китобга қараб ўйлайди, китобга қараб фикрлайди. Интеллектуаллар китоб саҳифаларида яшайди, китобий яшайди. Шу сабаб, китоблардан оғзини тўлдириб цитаталар келтиради, тарихдан сабоқлар ўқийди. Аммо... кўчат экиб, дарахт ўстиролмайди. Лой қориб, иморат қуролмайди. Гўнг сепиб, ерни тўйдиролмайди. Сабаби, интеллектуалларда ҳаётний ақл бўлмайди! Китоб бошқа, ҳаёт бошқалигини тасаввур ҳам этолмайди. Оқибат, ҳаёт ҳақида қофоздай қуруқ ўйлайди, қофоздай жонсиз ўйлайди. Ўлари ҳаётдан жуда-жуда олис бўлади. Лекин интеллектуаллар ўзларини ниҳоятда ақдли деб билади, ниҳоятда замонавий деб билади. Шу сабаб, ўзларини ҳамиша мен ҳақ, деб билади. Аслида эса, интеллектуаллар жисман ҳам, руҳан ҳам заиф зотлар бўлади. Масалан, интеллектуаллар изғирин шамол нималигини яхши билади, аммо ана шу шамолга бардош бериш қўлидан келмайди. Интеллектуаллар ўз мақсадлари йўлида ҳеч балодан тап тортмайди. Маразлик билан бўлса ҳам — кўзлаган мартаба-mansablari эгаллайди. Аблаҳлик билан бўлса ҳам — ўйлаган шон-шуҳратларига эришади. Кейин... Ватани ёниб кетмайдими — интеллектуаллар телевизорга қараб ўтираверади. Халқи ўлиб кетмайдими — интеллектуаллар газета-журнал ўқиб ўтираверади.

— Ўзи, булар намунча бақириб-чақиради? Намунча шаталоқ отиб югуради? Намунча питир-питир этади? Битта шулармикин десам, бутун СССР халқлари шундай бўлиб қолди. Қафасда яшаётган каптарни кўйиб юборса нима бўлади? Каптар пат-пат этиб, озодликка отилиб чиқади. Дастрлаб, қаёқقا учишини билмайди. Ерга кўнишиниям билмайди, кўкка учишиниям билмайди. Оқибат, боши оққан тарафга қараб учади. Шамол эсган ёққа қараб учади. Пойинтар-сойинтар учади, пала-партиш учади. Қаёқقا учаётганини ўзиям билмайди. Такдири энди нима бўлишиниям билмайди. Озодликка қандай эришди? Озодликни худо бердими ё ўз хўжайини бердими? Буниям билмайди! Озод бўлдим, дея патира-путур учаверади. Шундай учеб кетаверса — бир балога дучор бўлишиниям билмайди. СССР халқлари ана шу... каптар ҳолига тушиб қолди! Совет халқлари ҳали... озод яшаш нима эканини билмайди! Совет халқлари ҳали... ҳур-эркин парвоз этиш нима эканини

билмайди. Нега шундай? Совет халқлари шу вақтгача коммунистик партия қанотлари остида яшаб ўрганган. Коммунистик партия нимани ихтиёр этса — ана шуни бажарип яшаб келган. Коммунистик партия нимани берса — ана шуни еб яшаб келган. Совет халқлари ўзларича... мустақил бир қадам босиб яшаб кўрмаган!

— Сиз, совет халқларини қафасдан қутулиб чиқ-қан... капитарга ўхшатяпсиз-да? Йўқ, капитар беозор бўлади. Каптар эзгу ниятли бўлади.

— Унда, кимга ўхшат, дейсиз?

— Булар.. Буржуа мағкурачилари СССРни халқлар турмаси, дейди-ку? Энди, ана шу гапдан келиб чиқамиз-да? Булар... Турмадан озод бўлиб чиқсан... маҳбусларга ўхшайди! Булар турмадан халос бўлган маҳбус каби хавф-хатарли. Боиси — маҳбус турмада хоҳиш иродасиз яшаган. Орзу-умидсиз яшаган. Уй-хәёлсиз яшаган. Ташаббус-илҳомсиз яшаган. Чин, у, тўғри, маҳбус бўлган. Аммо партия уни текин даволаган. Чин, у маҳбус бўлган. Аммо партия бир сўм пули билан... бир кун яшаган! У фавқулодда озодликка чиқиб қараса... теваракда олдингидаи назоратчи йўқ, тақиқловчи йўқ! Демак, кўнгилга келганини қиласа бўлади! Қайта қуриш-часига айтсак... озодлик, демократия! У шу вақтгача фақат... план бажарар эди, социалистик мажбурият бажарар эди. У... яшаш нималигини билмас эди! Яшаш қанақа бўлади — бу ҳақда ўйлаб кўрмас эди. Аниқроғи... у яшамас эди! У... қимиirlab юрар эди! Ҳол сўрасалар... қимиirlab турибмиз, деб қўяр эди. Чинчин, у ойлик маошини қўл қўйиб олиш учун... қимиirlab турар эди! Ана шу маҳбуслар... қайта қурувчи бўлди! Узи хон, ўзи бек бўлди!

49

Ражабов олдинда юрди, Эсонов кейинда юрди.

Юрди-юрди — йўл чети скамейкадан жой олди. Йўловчи машиналарни кузатиб ўтирди.

— Қалайсиз энди, ўртоқ Эсонов?

— Бир нави, ўртоқ Ражабов, бир нави.

— Қайта қурувчилар озодлик, озодлик, дейди. Озодлик — тўрт тарафинг қибла, оғзингга келганини гапир, дегани эмас-ку? Озодлик — бақириб-чақириб мансаб эгалла, шон-шухратга эриш, дегани эмас-ку? Ё озод бўлиш... ит бўлиб ҳуришми? Озод бўлиш... кўринган одамни этагига кучук бўлиб ёпишишми?

— Чин, ўртоқ Ражабов, чин. Озодлик — намойиш ўтказиш эмас, мажлис қилиш эмас. Телевизорда маҳмадоначилик қилиш эмас, газета-журналларда ялтироқ сўзлар айтиш эмас.

— Тўғри, озодликни куйлаш керак, кўкларга кўтариб куйлаш керак. Лекин озодликни куйлаш учун... элъюрт узра озодликни ўрнатиш керак! Бундай кунларга етиш учун... бир ўлиб... бир тирилади! Ўртоқ Эсонов, биз учун озодлик — тақдир инъоми бўлди! Биз учун озодлик — бахт қуши бўлди!

— Озодлик учун... оғизни юмиш керак, қулоқни бекитиш керак, қадамни тийиш керак! Озодлик учун... шон-шуҳрат талашмаслик керак, мансаб-амал талашмаслик керак!

— Афсуски, айнан ана шундайлар даврага отилиб чиқади. Кўкрагига уриб... ўзини халқпарвар кўрсатади, ўзини ватанпарвар кўрсатади! Ўзини ботир кўрсатади! Ана шундайлар олдинда байроқ кўтариб юради, шиор кўтариб юради. Нутқ сўзлаб юради, бақириб-чақириб юради. Аслида эса... тескариси бўлади! Шу сабаб, азал-азалдан дунё бир кам дунё бўлиб келади. Шу сабаб, азал-азалдан халқ бошига энди офтоб чиққанда... халқни бурни қонайди!

— Озодлик демак — ўз оламини ўзи топиб олиш демак. Ўз йўлинни ўзи топиб олиш демак. Ўзлигини топиб олиш демак.

— Минг афсуслар бўлсин, биз ҳали... озодликка тайёр эмас эдик! Онгимиз... озодликка тайёр эмас эди! Ақлимиз... озодликка тайёр эмас эди! Озодлик-озодлик, сўзларини билар эдик. Аммо мазкур сўзларни мазмуни нима эканини билмас эдик! Чунки мазкур сўз бағрида... бир кун бўлса-да... ҳа-ҳа, бир кун бўлса-да... яшаб кўрмаган эдик! Мана, Яратганни ўзи бизни мазкур сўз бағрига топширди. Биз мазкур сўз бағрида... чақалоқ бўлиб ётибмиз! Биз ҳали отамиз ким, билмаймиз, онамиз ким, билмаймиз. Энг фожиали жой... дўстдушманимиз ким — билмаймиз!

— Ўзи, яхшилаб ўйлаб қаралса, сиз айтган озодлик... тенгсизлик, демак. Шундай, озодлик, тенгсизлик демак. Кўрасиз, бой бойга, камбағал камбағалга ажralиб қолади. Ким бой, ким камбағал — кўриниб қолади. Масалан, магазинга кирасиз — қимматбаҳо кийим туради. Бой бўлсангиз, ана шу қиммат кийимни олиб киясиз. Ошхонага кирасиз — қиммат таомлар қаторлашиб туради. Бой бўлсангиз, ана шу қиммат таомни олиб ейсиз. Айтай-

лик, бой бўлсангиз — самолётда юрасиз. Камбағал бўлсангиз — лиқир-лиқир поездда юрасиз. Ана сизга озодлик, мана сизга озодлик! Олдинлари... тенглик эди, халқ магазиндан хоҳлаган кийимини олиб кияр эди. Халқ ошхонадан иштаҳаси тортган таомини олиб ер эди. Халқдан ҳар бири самолётда уча олар эди!

Совет ҳукумати давлат бошига келиб қолибоқ... ерни халқда бўлиб берди. Халқ учун шаҳар-қишлоқларда ёп-пасига уй-жой қуриб берди, бошпаноҳсиз халқ бирдан уй-жойли бўлди. Ўзи қуриб берган уй-жой учун халқдан пул олмади! Бундан ортиқ яна қанака ҳукумат бўлсин? Мен уни олийдан-олий каромати — бепул уй-жой деб биламан! Эзгудан-эзгу мероси — текин уй-жой деб биламан!

— Чин айтасиз, ўртоқ Ражабов, чин айтасиз.

— Энди, совет медицинасини айтинг... Совет халқи онасини қорнидаёқ медицина ёрдами олди. Ҳали туғилмаган совет чақалоги медицина ёрдами олди. Кейин, аёл туғруқхонага тушди. Совет чақалоги туғруқхонада врачлар кўзи олдида ётди. Совет чақалоги... совет медицинаси қўли билан туғилди. Совет чақалоги... совет врачлари кафтида дунёни кўрди, оппоқ чойшабларда ўралиб ётди. Совет чақалоги... текин даволанди! Энди, манави қайта қурувчилар совет медицинасини сўкиб бошлади. Агар совет медицинаси бўлмаса, манави қайта қурувчиларни кўпчилиги... онасини қорнида ўлиб кетар эди! Тўғри, совет медицинаси малакасиз даволади. Бу совет медицинаси ёмон, деган гап эмас. Бизда халқ кўп, ер кўп. Ҳаммани малакали медицина билан таъминлаш қийин. Энди...

— СССР халқлар турмаси, халқлар турмаси... дейди. Ўзи, шу гап кимдан чиққан, ўртоқ Ражабов?

— Албаттa, Farb мафкурачиларидан чиққан-да! Кимдан бўларди?

— Йўқ, бу фитна, бу ифво. Чин, СССР улкан деворлар мамлакати, узун деворлар мамлакати. Бу улкан деворлар метин қонун-қоида учун хизмат қиласиди. Покдомон хулқ-ахлоқ учун хизмат қиласиди. Чайир тартибинтизом учун хизмат қиласиди. Масалага партиявий ёндашсак, СССР таркибида юзлаб элатлар бор. Улар неча-неча асрлардан бўён киндик қони томган азалий юртида яшаб келди. Ҳали миллат даражасига кўтарилимаган элатлар-да бекаму кўст умр кечирди. Майдада элатлар улғайиб... миллат даражасига кўтарилиди. Митти-митти уруғ-аймоқлар кўпайиб... халқ даражасига етди!

Халқ бўлди! Совет тузумида... аймоқлар миллат бўлди! Элатлар халқ бўлди! Совет тузумида... биронта-да халқ йўқ бўлмади! Фарб мамлакатларида халқларни сон-саноғи йўқ эди. Бош-адоги йўқ эди. Ана шу халқлар ўз-ўзидан... пароканда бўлиб бошлади! Ана шу халқлар ўз-ўзидан... йўқолиб бошлади! Бутун-бутун халқлар ер юзидан... фойиб бўлди! Масалан, Европада кельт ҳамда иилирий, деган халқлар бўлар эди. Кельтлар-да, иилирийлар-да тарихий халқлар эди. Юксак маданиятли халқлар эди. Биласизми, «Буюк Британия» номи қаердан келиб чиқади? Ана шу тарихий кельт халқлари оиласига мансуб «бритт» халқи номидан келиб чиқади! Қани ўша халқлар, қани? Бритталарни немислар билан инглизларни ўзи... йўқ қилиб юборди! Улкан-улкан славян халқлари бор эди. Болтиқ халқлари бор эди. Роман халқлари бор эди. Масалан, прусс, дегич Болтиқ халқи бўлар эди. Нихоятда ўзига хос халқ эди, қани ўша прусс халқи? Пруссларни бошига... немислар етди! Шундай маданиятли халқдан прусс, деган ном қолди, холос. Пруссия номи тарихий манбаларда бир учраб қўяди, холос. Ҳозир ҳам Европада бир қатор халқлар ер юзидан йўқ бўлиб кетиш хавфи остида яшамоқда. Масалан, Буюк Британиядаги ирланд халқи, Испаниядаги баск халқи. Ирландлар-да, басклар-да халқ сифатида йўқ бўлиб кетмаслик учун... жон талвасада кураш олиб бормоқда! Шундай экан, энди масалага партиявий ёндашайлик...

— Масалани партиявий ҳал этайлик!

— Хўп, масалани партиявий ҳал этайлик. Энди, Фарб мамлакатларини... нима деб атасак бўлади? Европа — халқлар қабристони, десак ярашадими? Европа — халқлар мозористони, десак эп бўладими?

— У-у-у, ўртоқ Эсонов... каллангиз калла эмас — қомус, ҳа, қомус! Майли, Фарб мафкурачиларини қўйиб турайлик. Ўзимизни КПССга қайтайлик. Манави қайта курувчилар КПССни... суд қиласиз, дейдими?

— Айтди, КПССни суд қиласиз, деб айтди.

— Үнда, қора курсида ким ўтиради? Ким айбдор бўлади? Ўртоқ Ленинми? У зот мавзолейда ётиби-ку? Ўртоқ Брежневми? У киши аллақачон хилқатта кетдику. Ўзи, нимани суд қиласи? Марксизм-ленинизмними? Социализмними? КПСС қора курсига ўтирмайди. КПСС тавба-тазарру этмайди. КПСС учун... мана, мен айбдор бўламан! КПСС нима номаъқулчилик қилган бўлса — шу номаъқулчиликни мен қилдим! КПСС қандай хатоликка йўл қўйган бўлса, шу хатоликни мен

Қилдим! Мана, мен — обком Ражабов! КПСС — Стalin дегани эмас. КПСС — Брежнев дегани эмас. КПСС — миллион-миллион фақирдан-фақир коммунист демакдир. КПСС — миллион-миллион меңнаткашдан-меңнаткаш ишчи-дәхқон демакдир! Қайта қурувчилар ана шу миллионлар юзига лой чапламоқда. Ана шу миллионларни бадном этмоқда! Умр бүйи КПСС ош-тузини еб, энди КПССГа... тупурмокоқда! Булар... хунасалар! Эркак эмас, хунасалар! Мана, мен КПССни бир зарраси әдим — мен КПССни зарраси бўлиб қоламан! Судда КПСС учун... ўзим жавоб бераман, ўзим!

— Булар судни биладими, ўртоқ Ражабов. Оғзига келганини гапираверади-да. Булар бир... оломон, оломон! Оломонда тўртта таркибий хислат бўлади. Бу қандай хислатлар? Булар — ғоя, ирода, рух, ахлоқ. Ана шу тўртта хислат жам бўлса — оломон бўлади. Ана шу тўртта хислат туфайли оломон қурратли ҳам даҳшатлидир. Оломон — бўрон, оломон — ёнғин, оломон — сел! Шу боисдан-да, оломон бўлар-бўлмасга қўзгола бермайди. Оломон бирор-бир ғоя учун қўзголади. Янги бир ғоя дунёга келса — оломон ана шу янги ғоя учун қўзголади. Мазкур ғоя порлоқми ё тубанми — оломон учун аҳамиятсиз бўлади. Оломон қатордан қолма, кўпдан қолма — шиорлари остида саф бўлади. Оломон учун жамиятни яхши куниям бир, ёмон куниям бир. Жамият бирор ютуққа эришса — оломон қўзголади. Жамият бирор парокандаликка учраса — тагин оломон қўзголади. Оломон яхши кунда бир сиёсатдонни улуғлайди. Ёмон кунда... айни шу сиёсатдонни ер билан баравар этади! Оломон... тўқимтабиат бўлади! Бир кунлик кайфият билан жам бўлади. Бир соатлик мақсад билан йигилади. Кейин, бирдан... айниб қолади. Бирдан... тариқдай тарқаб кетади! Оломон жуда осонлик билан ўзига лидер топади. Чунки оломон лидерсиз бир қадам босолмайди. Лидерсиз бир сўз айттолмайди! Лидер оломон номидан фанимiga қаратса биринчи бўлиб тош отади. Биринчи бўлиб ўқ отади. Шу боис, оломон ўз лидери кетидан... кўрларча эргашади! Ўз лидери изидан... подаларча юради! Ким оломон лидери бўла олади? Ўзида йўқ... фазилатлар билан оломонни ишонтира олувчи, ёлғон-яшиқ ғоялар билан оломонга таъсир эта олувчи, маза-бемаза шиорларни хорижий тиллар билан қўшиб сўзлай олувчи зот — лидер бўла олади! Инсон генерал бўлиши мумкин, аксинча, лидер бўлол-

майди. Инсон министр бўлиши мумкин, аксинча лидер бўлолмайди. Масалан, Николай II оқпошшо бўлди. Аммо-лекин лидер бўлолмади. Ўртоқ Ленин оқпошшо бўлолмади. Аммо-лекин лидер бўлди!

50

Газетада Орол денгизини қутқариш мажлиси ҳақида эълон берилди.

Ушбу мажлис бўлди.

Оролпаноҳлар бирин-кетин минбарлади.

Оролпаноҳ Мадиев бир ўнгга таъзим этди, бир чапга таъзим этди, бир олға таъзим этди.

— Хонимлар ва жаноблар! — деди.

Ботир фирмә кулиб юбормасин учун — кафтини оғзига қўйди. Узини йўтал тутаётган кўрсатиш учун оғзини ушлади. Узини кулгидан аранг тийди. Ерга қараб ўтириди.

«Э, тавба, — деди, — сенга ким қўйибди бундай гапларни? Нима бало, инглиз лордимисан ё француз қиролимисан?»

— Хонимлар ва жаноблар, мана, қайта қуриш туфайли она-ватанимиз тубдан ўзгариб бормоқда. Заводлар, фабрикалар қурилмоқда. Маданий-маиший корхоналар, маданият уйлари очилмоқда. Мана шундай маданий-маиший корхоналардан бири тарихий ва кўхна Кўқон шаҳрида очилди. Бу Кўқон зардўзлик фабрикасидир. Бу фабрикада қўли гул чеварларимиз турли-туман жилолик зардўзлик матолари, сарполари, дастурхону пардалар, қўйингки, турфа ранг зардўзлик либослари тикиб чиқармоқда. Буни қарангки, шу қўқонлик зардўз чеваралар тикиб чиқараётган матолар ичida жойнамоз ҳам бор экан. Жойнамоз! Оппоқ жойнамоз! Тўрт бурчакли жойнамоз! Ҳозиржавобликни қаранг, миллийликни қаранг! Ахир, озод ватанимиз мусулмонобод бўлиб қолди-да, мустақил халқимиз намозхон бўлиб қолди-да. Кўқон чеварлари ҳур ва озод халқимиз хоҳиш-иродаси учун лаббай, деб жавоб берган-да. Энди, ана шу Кўқон чеварлари жойнамозидан собиқ партия-совет арбоблари, бугунти пенсионерлар ҳам битта-биттадан олсалар. Жойнамозга пешоналарини қўйиб... беш вақти намозни бошласалар. Партия-совет ташкилотларида фаолият кўрсатиб, қилган айбугуноҳларини ювсалар. Ҳудои таолонинг бағри кенг — гуноҳларини бўйнига олиб, тоат-ибодатни бошлаб

юборган бандасининг гуноҳидан ўтади. Беш вақти на-
моз гуноҳларини ювади! Марҳамат, собиқ партия-со-
вет арбоблари, чеварларимиз тиккан жойнамозлар сиз-
ларга мунтазир!

Қайта қурувчилар партия-совет арбобларидан тав-
ба-тазарру кутди. Қайта қурувчилар партия-совет ар-
бобларидан... узр-маъзур кутди.

Партия-совет арбоблари коммунист эди... комму-
нист бўлиб қолди!

Партия-совет арбоблари... Брежнев мисол миқ эт-
мади! Брежнев мисол мижжа қоқмади. Брежnev ми-
сол... турғун бўлиб ўтириди. Брежнев мисол... ҳайкал бўлиб
ўтириди!

Мадиев куйди, Мадиев ёнди! Мадиев... лўлилик
йўлига ўтди.

— Йўқ, биз энди сабр-тоқат қилолмаймиз! — де-
ди. — Йўқ, сабр-бардошимиз ниҳоясига етди! Биз энди
содир этилган жиноятлар учун кимлар айбдор эканли-
гини аниқлаб олишимиз керак ва зарур. Биз етмиш
йил мобайнида жиноятчи партия-совет арбобларининг
бутун бир авлодини тайёрлаб етиштирдик. Минг аф-
суслар бўлсинки, улар ҳар қадамда учраб туради, ҳар
дақиқада учраб туради!

Мадиев партия-совет арбобларига қўлини пешлади.
Кўрсаткич бармоғини бигизлади.

— Биз булар билан... бўлмаймиз! — деди. — Йўқ,
йўқ, биз булар билан бўлмаймиз!

Ботир фирмани назарида... Мадиев кўрсаткич бар-
моғини... Ботир фирмани пешонасига нуқди. Назари-
да, бармоқ учи Ботир фирмани... пешонасига тегди.
Дук-дук тегди... тик-тик тегди! Назарида, бармоқ учи
Ботир фирмани пешонасида... ёпишиб қолди!

Ботир фирмаки кўзларини юмди — Мадиевни бармо-
ғини кўрмай деди! Мадиевни бармоғидан қутулай деди.

Шу билан мажлис адo бўлди.

Мажлис аҳли тарқалди.

Ботир фирмаки билан Ражабов ҳамроҳ бўлди.

— Булар ҳали-ҳозир тили билан юряпти. Кейин-
кейин, устимиздан тўрт тарафга ёзади. Бу шахслардан
келади, — деди Ботир фирмаки.

— Шахс? Шулар шахсми? — дея қўл силтади Ра-
жабов. — Булар... бечора гўрсўхталар! Булар гўрсўхта
бўлмай, ким гўрсўхта бўлади? Мана, мен. Мен кур-
дим, мен яратдим, мен савоб ишлар қилдим! Шундай
экан, мен пири бадавлат шахсман. Мен бус-бутун шахс-

ман. Мен етук шахсман! Хүп, ана шуларчалик ҳам борайлик. Айтайлик, тоат-ибодат қилиш учун худони билиш керак. Бу бечора гүрсүхталар худони қаердан билади? Булар эски алкашлар, эски гарлар!

51

Улар йўл четидан юрди. Оёқлари учига тикилиб юрди. Гап-сўзсиз юрди.

Йўлбўйи чойхонага келди. Юзма-юз ўтирди. Бирбирига тикилди. Елкадан нафас олди.

Ниҳоят, Ботир фирмә кўкка бармоқ нишлаб-нишлаб сўзлади:

— Сўзловчи нодон бўлса, сен доно бўл! Халқ мақоли!

Ражабов бирдан жонланди. Юзларида ёруғлик ўйнади. Кўзларида қувонч балқди.

— Офарин, ўртоқ Эсонов, офарин! — деди Ражабов. — Сиз доно партия-совет арбобисиз!

Ботир фирмә қомат ростлади. Ботир фирмә кўкрак керди. Қириниб-қириниб йўталди. Теваракка мағрур-мағрур боқди.

— Курашамиз, курашамиз, дейди, — деди Ботир фирмә. — Ким билан курашади? Мен биланми? Ахир, мен Гитлер бўлиб, шаҳар-қишлоқларни вайрон этмадим, халқни қатл қилмадим. Гиммлер бўлиб, тирик одамларни ўтда куйдирмадим, буғдойзорларга ўт кўймадим. Ниҳояти... коммунист бўлдим! Мени нимам билан курашади? Отни ўлими — итни байрами, дейдилар. Булар... қари-қурилар билан курашмоқчи бўлиб юрибди. Булар... Дон Кихот! Йўқ нарса билан курашувчи Дон Кихот! Булар қуп-қуруқ галварслар. Фарид-бенаво галварслар. Булар олдин-да шундай эди, бундан кейин-да шундай бўлиб қолади. Мана, Борис Ельцин. У олдин ҳам ўғил бола эди, ҳозир ҳам ўғил бола!

— Ўртоқ Ельцин коммунистик эътиқод билан енг шимариб, коммунистик ишонч билан бел боғлаб... янгича ишламоқда! Коммунистик ватанпарварлик, коммунистик халқпарварлик билан тер тўкиб меҳнат қилмоқда. Ўртоқ Ельцин олдин ким эди? Собиқ партком, райком, обком, горком... хуллас, коммунист, ҳа, коммунист! Келинг, масалани партиявий ҳал этайлик: ўртоқ Ельцин коммунист бўлмаса, президентлик шоҳсупасигача кўтарилиб кела олар эдими? Йўқ, кўтарилиб келмас эди. Ўртоқ Ельцин коммунист бўлмаса...

президент бўлолмас эди! Ўртоқ Ельцин гайрат-шижоат билан қайта қуриб бошлади. Ишонч-эътиқод билан демократия тушиб бошлади. Ўртоқ Ельцин ўтмишидан кечмади. Яъни ўзидан кечмади. Ўртоқ Ельцин йўлини ўзгартириди, холос.

— Бу борада ўртоқ Ельцинни противопоставляем Аввакум билан қиёсласа бўлади. Аввакум ота-боболардан қолган қадриятлар ва ўтмиш меросларини қайта тиклаш, асраб-авайлаш учун курашади. Ўртоқ Ельцин ҳам Аввакум мисол йўлдан борди.

— Мана шу қайта қурувчилар олдин ким эди? Мен ҳамма қайта қурувчи ўртоқ Ельцинга ўхшаб, олдин обком бўлсин, демайман. Ахир, янги тузум демак — янги қурилажак иморат демак. Янги иморат қуриш учун куч-куват керак, маблағ керак, малака керак. Мен мана шу Мадиевни шеърларини ўқиганман. Шеърларида ҳаётдан нишона бўлса — ўлсин агар! Авангард шоир эмиш. Француз авангардларига тақлид қилиб, беш-олтита шеър ёзган. Француз авангардлари қачонлардир ўтиб кетган. Бу зот француз авангардизмига... энди етиб келибди! Шу беш-олтита шеъриниям ўзича эплай олмай, француздарга тақлид қилиб ёзибди. Ўзидан чиқариб, тўртта шеър ёзолмаган зот... қандай қилиб қайта қуради? Ўзининг тўртта мустақил фикри йўқ зот... қандай қилиб демократия қуради?

— Булардан нима умиду, нима хайр, ўртоқ Ражабов.

— Унда, кимдан умидланиш керак? Дехқон ўз оти ўзи билан дехқон. Дехқон бечорага кетмон бўлса бўлди.

— Булар мансабга талпиняпти, ўртоқ Ражабов, мансабга! Майли, даври келибди, мансабларни эгалласин. Аммо-лекин биз демократмиз, дея кўкрак уради. Яхши, демократия яхши. Демократия — хур фикрлаш демак. Демократия фақат хур фикрлаш билан кифояланниб қолмайди. Демократия — келажак фойдаси йўлида ҳалол ҳам илфор баҳолаш демакдир! Ана шу Мадиевларга айтгим келади: демократ, сен ўтмишга тош отма. Ўтмишга тош отиш, ўликни тепкилаш демакдир. Ўликтирилиб, хатолари учун сендан кечирим сўрамайди. Ўликтирилиб, қайта қуриш учун бир иш қилиб бериб бермайди. Демократ, ўтмишдан сабоқ олиш керак, сабоқ. Ана шу сабоқни хулосалаб, бугунни ўйлаш керак, бугунни. Бугунни хулосалаб, келажакни ўйлаш керак, келажакни. Демократ, сен ўтмишга тўппонча отсанг, ўтмиш сени тўпга тутади!

— Нега энди бари ёппасига минбарга отилиб бошлади? Бари шиор күтариб бошлади? Теварагига гурух түплаб бошлади?

— Булар депутат бўлмоқчи, ўртоқ Ражабов, депутат.

— Депутат бўлиш учун минбардан тушмаслик керакми? Бақириб-чақириш керакми? Шаккоклик қилиш керакми?

— Одатда, уч тоифа одам ҳалқ зътиборини олади. Уч тоифа одам овоз олади. Биринчи тоифа — рицарь бўлади. Бизда рицарни ҳалқ қаҳрамони, дейди. Ҳалқ қаҳрамони ботир бўлади, жасур бўлади. Шу боис, курашсиз яшай олмайди. Ҳалқ қаҳрамони осойишта ҳаёт нималигини билмайди. Билса ҳам тинч-осойишта яшамайди. Боиси, ҳалқ қаҳрамони.. тинчликни ёмон кўради. Бу тоифа одам инқилоб вақтида биринчилардан бўлиб кўлига қурол олади. Яловбардор бўлади, ураурачи бўлади, оташзабон бўлади. Қаҳрамонликлар кўрсатгиси келади. Мардлик-жасорат намойиш этгиси келади. Шон-шуҳрат орттиргиси келади. Орден-медаллар олиб таққиси келади. Иккинчи тоифа одам — олижаноб одамдир, улуғнамо одамдир, авлиёнамо одамдир. Бу тоифалар хўрланган ҳалқ учун қайғуради, ҳақоратланган ҳалқ учун қайғуради, эзилган ҳалқ учун қайғуради. Фарид ҳалқ учун, муштипар ҳалқ учун қулидан келган ҳамма ишни қиласди. Бечора ҳалқ учун ойлик маошини беради, қариллик нафақасини беради, ўлимлигини беради. Бу тоифалар эл-юртга эзгулик ҳам маърифат тарқатади. Учинчи тоифа одам — ишбилармон одамдир, тадбиркор одамдир, уддабурон одамдир. Булар фақат кишим-чиқимни билади, фойда-зиённи билади. Яратиб беради, қуриб беради. Бир сўз билан айтсак, бу тоифа одамлар фақат фойда беради. Ана, ана шу уч тоифа одам кўп овоз олади! Энди, манави Мадиевларни олайлик. Аввало, буларда мансаб-марта-бани ўзи йўқ. Эл-юрт олдида бурч нима, жавобгарлик нима, билмайди. Турган гап, ҳалқ бошқаларга овоз беради. Булар эса, йўл-йўлакай кулги бўлиб қолади, майна бўлиб қолади. Оқибат, ўзларини хўрланган ҳис этади, эзилган ҳис этади. Булар энди ҳақиқатни тиклаш учун ана шу... ғолибларга қарши кураш олиб боради. Ғолиблар билан ташлашади. Ғолиблар қараб турамиди? Ўртада ёмон-ёмон — сизу бизга ёмон бўлади. Сизу биз жафо чекамиз. Биримиз икки бўлмайди. Булар билмаяпти — улар ўзларини ўзлари кўтариш учун

Мадиевларни зинапоя ўрнида ишлатиб юрибди. Ўзларини ўzlари сайлаш учун — Мадиевларни құғирчоқ қилиб ўйнатиб юрибди.

— Манави Мадиев шоирни... соқолидан бошқа nimаси йўқ бўлса керак?

— Соқолда гап кўп, ўртоқ Ражабов. Соқолдор одам анча-мунча халқни ўзига эргаштиради. Чунки соқол кишига авлиёнамолик бахшида этади. Масалан, Фидель Кастрони «Қудрати» — соқолида.

— Биттаям оқ ораламаган соchlар. Биттаям сочи тўкилмаган бошлар. Ойнадай теп-текис, гард юқмаган пешоналар. Тип-тиниқ, ялтироқ юзлар... Ана, қайта қурувчиларни портрети! Ана, демократлар ким! Кўпчилик қайта қурувчиларни ҳали... мўйловиям сабза урманган! Шундай экан, қайта қурувчилар нимасига суюниб ваъз ўқийди? Демократлар нимасига таяниб оқсоқолчилик қиласди? Биз нима учун шуларга қулоқ солишимиз керак экан? Биз нима учун шуларга эргашибимиз керак экан? Келинг, масалани партиявий ҳал этайлик: одамда... эркакча юз бўлса! Бу юзда кўпни кўрган пешона бўлса. Бу пешонада узун-узун чизиқлар — олис олис йўллар бўлса. Мазкур чизиқ-йўллар сермашақват тақдирдан сўйлаб турса, эл-юрт тарихидан сўйлаб турса. Пешона дегани мисоли бир тарих китоби бўлса, мисоли бир қомус бўлса. Ўртоқ Эсонов... инсонда мазмун-маъноли юз бўлса! Бу юзда... мўл-мўл ажинлар бўлса, машаққатлар рамзи бўлган тириқлар бўлса, турли-туман дардлар асорати бўлса! Бу юзда... зўр қайгулар тамғаси бўлса, кўргиликлар белгиси бўлса, қора кунлар суврати бўлса! Ўртоқ Эсонов, инсон кўзларида... мунг бўлса, қайғу бўлса, дард-алам бўлса! Инсон кўзлари ҳам... тарихдан сўйлаб турса, ҳам... келажакка чорлаб турса! Инсон кўзлари остида қават-қават... ажинлар бўлса! Ушбу ажинлар варақ-варақ... тарих бўлса! Инсон кўзлари остида думалоқ-думалоқ... халталар бўлса! Ушбу халталар яхши-ёмон кунларни бекитиб ётган бўлса... Ўртоқ Эсонов, ана шундай кўзларга қараб ўтирса бўлади! Ана шундай пешоналарга эргашса бўлади! Ана шундай юзларга қулоқ солса бўлади!

— Буларни мақсади қайта қуриш эмас. Булар ленинчи кекса авлодни четга суриб ташласак — марра бизники бўлади, деб ўйлаяпти. Ленинчи авлоддан қутублиб олсак — тантана қиласмиз, деб ният қиляпти. Ҳамма мансаб-мартабаларни эгаллаб олиб — давримизни суриб ётамиз, деб мақсад қиляпти.

- Шундай, ўртоқ Эсонов, шундай.
- Булар ўзларини қайта қурувчи, деб юрибди. Булар қайта қурувчилар эмас, булар... қайта бузувчилар! Ҳа, ўртоқ Ражабов, булар — қайта бузувчилар! Қайта бузувчи бўлганда-да... нонкўр бузувчилар! Кўрнамак бузувчилар!
- Шу донолингиз учун... икки чойнак чой олиб келмасам бўлмади.
- Қимирламанг, ўртоқ Ражабов, ўзим олиб кела-ман.
- Мен сизнинг ақл-заковатингизга... обкомдаёқ қо-йил бўлиб эдим! Энди эса — мен сизга сифинаман!
- Ўртоқ Ражабов, сиз обкомни биринчи секрета-рисиз, бюро аъзосиз! Сиз ўтиинг, ўзим чой олиб кела-ман.

52

— Ҳонимлар ва жаноблар! — деди Мадиев. — Ке-йинги йилларда иқтисодий ва маънавий, сиёсий тур-мушимиздаги тарихий ўзгаришлар, улкан бурилишлар ўзбек халқи ҳаётини тамомила ўзгача баҳолашга эҳти-ёж ўйғотмоқда. Қонли Октябр тўнтаришидан кейин бошланган ва ҳалигача давом этиб келаётган эътиқод-лар кураши, ғоялар курашининг ғоятда қарама-қар-шилиги бугунга келиб ҳамманинг диққат марказида турибди. Кескин курашлардан иборат бу мафкуравий сиёсатлар ичидаги миллий масала алоҳида ўрин тутади.

Ботир фирмә бир қимирлаб олди. Уёқ-буёғига қара-ди. Мадиевни нутқидан ҳайрон бўлди.

«Галварс... гапни олисдан бошлади. Яхшиликка бўлсин... — дея ўйлади. — Барibir, гапини бизга олиб келиб тақайди. Ишқилиб, отимни атамаса бўлди. Эл-юрт олдида шарманда қилмаса бўлди».

— Тарихдан маълумки, турли-туман ҳонлар ўзбек мўмин-мусулмонларининг қонини сўриб келди... тери-сини шилиб келди, мусулмонларнинг ўсиб-улғайиши-га, юксак тараққий этишига тўғаноқ бўлди. Собиқ тота-литар тузум мўмин-мусулмонлар ўз ақл-хушларини йи-ғиб олмасликлари учун, маънавий ва маданий ривож-ланмасликлари учун, миллий маданият ва миллий тил тараққий этмаслиги учун, бир сўз билан айтганда — ўзлигини англаб олишига йўл бермаслик учун қўлидан келган барча чора-тадбирларни ишлаб чиқди ва амалга тадбиқ этди. Мўмин-мусулмонлар ўрис жаллодлари зул-

ми остида бир амаллаб кун кечирди. Қонхүрлар мүмин-мусулмонларни «ёвойи», деб атаб келди...

Ботир фирмә мисоли... янги кино күрди. Мисоли янги кинода янги қиёфа күрди. Шу вақтгача турли киноларда турли қиёфаларда күриб юрган артистини энди янги қиёфада күрди.

Бугунги кинодан гангиб қолди. Эс-хүшини йифиб ололмади. Минбардан күз ололмасди.

Ичидә Мадиевни сүкди. Бураб-бураб сүкди.

Ниҳоят, ўзини босди. Осойишта бўлди. Сокин бўлди. Ўзича бош иргади. Ўзича... Мадиевни... кўллаб-кувватлади!

Боиси, Ботир фирмә қалбан... миллатчи эди! Ҳа-ҳа, ич-ичидан... миллатчи эди!

Мана, умр ўтди — Ботир фирмә миллатчилигини тилига чиқармади. Мана, умр ўтди — Ботир фирмә миллатчилигини юзага чиқармади.

Вазмин-босиқлигиданми? Ичимдан топ одам эканлигиданми?

Ботир фирмә оғиз очмасликни... ички бир дунёқарашдан деб билди. Ички бир ақидан деб билди.

«Коммунистик партия сиёсатига бегона ғоялар — мен учун-да бегонадир», дея ўйлади.

Аммо... ўзи билан ўзи гаплашди! Ич-ичидан гаплашди:

«Миллатчилик — ўз киндик қони тўкилган ерга садоқатдан бино бўлади. Ўз халқига меҳр-оқибатдан бино бўлади. Ўз қариндош-уругларига меҳр-муҳаббатдан бино бўлади. Аммо-лекин миллатчиликни ёмон тарафлари-да бор. Миллатчилик — иблислар паноҳ то-пажак энг сўнгги паноҳ, демак. Миллатчилик — жаҳолат, демак. Миллатчилик — бир халқни бошқа бир халқа нисбатан нафрати, демак. Шу боисдан, жуда кўп фожиалар ана шу миллатчиликдан келиб чиқади».

Ё Ботир фирмә мансабидан тушиб қолишдан кўрқдими? Партибилетидан ажралиб қолишидан кўрқдими? Йўқ, яна йўқ!

«Миллатчилик мисоли бир олов, — дея ўйлади Ботир фирмә. — Олов ўз оти ўзи билан олов. Олов билан ўйнашиб бўлмайди. Одам оловни эҳтиёт қиласаса, бет-қўлини куйдириб қўяди. Одам оловни авайламаса, ўз уйини олов олдириб юборади. Бутун... дунёни ўт олдириб қўяди!

Чин, ашаддий миллатчи бўлиш керак. Ўз эл-юрти учун ўлимга-да шай миллатчи бўлиш керак! Кўнглида

миллатчилик ҳис-туйгулари йўқ инсон... инсон эмас! У бир... робот, робот!

Аммо-лекин ақл-фаросат билан миллатчи бўлиш керак. Ўта бил им билан миллатчи бўлиш керак. Замон шамоллари эсишига қараб миллатчи бўлиш керак.

Мана, XX аср оёқлади. XX аср мисоли эски уй бўлиб қолди. Аммо-лекин ана шу эски уй бўсағасида тагин бир уй бор.

У — бутунлай янги уй. Инсон қадам босмаган уй. Ҳали эшиклари очилмаган уй. Ҳали чироқлари ёқилмаган уй.

Бу уйни номи — XXI аср! Мўмин-мусулмонлар орзиқиб ошиқажак XXI аср! Мўмин-мусулмонлар баҳтсаодат кутажак XXI аср!

Энди, ана шу янги уй учун... талаш бўлади! Ер ол-ол бўлади. Юрт ол-ол бўлади. Эл ол-ол бўлади.

Барча ўз мақсадлари йўлида... миллатчиликни ишга солади! Ҳалқларни... миллий туйғусини ишга солади. Ҳалқларни... миллий фурурини олов мисол ковлади!

Большавойлар мусулмонларни терисини шилиб келди, қонини сўриб келди... эмиш. Ана гап!

Авваламбор, совет тузуми даврида... хўроз ҳамма юртда бир хил қичқирди! Бу хўrozни оти — КПСС бўлди!

КПСС хўрози овози остида ўрис-да бўлди, гуржида бўлди, латиш-да бўлди, ўзбек-да бўлди. Қайтанга, КПСС хўрози дастидан ўзбекдан кўра... ўрис қўп талафот кўрди!»

53

- Кетдикми, ўртоқ Эсонов?
- Кетдик, ўртоқ Ражабов, кетдик.
- Қайси йўлдан юрамиз?
- Манави ёқдан юрайлик. Йўлда музқаймоқ олиб бераман.
- Йўқ, музқаймоқ емайман, шамоллаб қоламан.
- Хўш, таассуротлар қалай?
- Шу, ўша-ўша!
- Буларни ўзи ким... даъволари дунёни бузади?
- Буларни гуруҳ деса-да бўлди, тўда деса-да бўлди. Тўда дейиш маъкулроқ. Тўдада оломонга хос тўртта хислат йўқ бўлди. Шу боис, тўда оломондан тубан туради. Ўз оти ўзи билан тўда бўлди. Тўда бирор ёмонликни олдини олиш учун тўда бўлмайди. Тўда бирор

масала юзасидан қайтurmайди. Тұдада аниқ бир мақсад ҳам бұлмайди, орзу-ният ҳам бұлмайди. Тұда ҳамиша айбдор излайди, ҳамиша гуноқор излайди. Ыша айбдор ё гуноқор, мана мен, дея тұда олдига отилиб чиқса — тұда нима қилишини билмай қолади, нима дейишини билмай қолади! Бойиси, тұдада айбдорни жазолаш нияти бұлмайди. Тұда бор-йүғи: «Ана, давлатни үтиргизган», «Ана, халқ қонини сүрган», «Ана, турғынлық тимсоли», деган баландпарвоз хитоблар айтиб туради. Тұда фақат... бақириб-чақириб туради, шиорлар силкиб туради, байроқлар ҳилпиратиб туради! Құл пахса қилиб туради, мушт дүлайтиб туради! Тұданы ҳамиша кимдир йиғади, кимдир жамлади. Ана шу кимдир тұданы бошқаради, тұданы йұллайди. Үзи эса... тұданы суғурилиб чиқиб қолади, бекиниб қолади! Тұда эса... бир-биридан илҳом олиб кетаверади, бир-биридан ранг олиб кетаверади. Бириңчи қадамдаёқ... тұда одам сифатида үзини йўқотади... үзини бой беради. Тұда оқни қора, дейди, қорани оқ, дейди! Тұда әл-յортга... үт күя олади! Ҳа, тұда әл-յортга үт күя олади! Нима учун тұда тез зътибор қозонади, тез күзга күринади? Бойиси, тұданы касби — фитна-фасод бұлади, иғво-ғаламислик бұлади. Фитна-фасод билан иғво-ғаламислик эса — ўта ёмон қурол, ўта ўткір қурол! Иғво шамол мисол тез ёйлади. Үқ етмаган жойға иғво етади! Үқ етмас жойни фитна тешади! Чивин учеб киролмовчи хонадонларға иғво кириб боради. Бомба құрқитолмовчи қалбларни фитна титратиб юборади, фитна қалтиратиб юборади! Фитна-фасод қанчалар ёлғон бұлса — шунчалар яшин тезлигіда тарқалади. Фитна-фасод яшин тезлигіда әл-յорт зътиборини олади, жамият ақлини олади. Фитна-фасод яшин тезлигіда... ҳақиқатга айланади!

— Үзи, шу тұдаларға нима етмаяпты-а?

— Фақат бир тахчиллик бор: амал-мансаб тахчил, раҳбарлық лавозимлари тахчил! Ұлиб кеттур, амал-мансаб деганлари... қовун-тарвуз бұлса экан, пайкалдан узib олиб, құлтиғига қистириб юборсанг. Амал-мансаб деганлари дала бұлса экан, беш-олти сотихдан ер бўлиб берсанг. Қачон демократия бұлади, қачон қайта қуриш бұлади? Мана шу бақириб-чақириб юрганлар мансаб билан таъминланмагунча... қайта қуриб бұлмайди!

— Үзи, азал-азалдан халқ икки тоифага бўлинади. Бири, амал-мансаб гаштини суреб юрувчи раҳбарлар. Иккинчиси, шу раҳбарларни... тагини ковлаб юрувчи мансабталаб даъвогарлар. Ана шу икки тоифа ҳамиша

курашиб келади. Олдинлари совет тузумидан құрқар әдилар. Энди эса, құрқмай қўйди. Ошкораликка ўтди.

— Йигилишларда бақириб-чақирадилар. Ўз овозлари камдай, оғизларини микрофонга қўйиб чинқирадилар, қийқирадилар. Ким қандай ўйлади, ўртоқ Ражабов, ҳар кимни ўзи билади. Аммо-лекин мен мана бундай ўйлайман: эл-юрга бўлган меҳр-муҳаббат... ўта ички бир муҳаббат бўлади. Ўта сеҳрли-сирли бир меҳр бўлади. Масалан... йигитни қизга бўлган муҳаббати мисол бўлади. Она юрга бўлган муҳаббат... йигитни қизга бўлган муҳаббати мисол... ботинан бўлади, асл бўлади. Бу меҳр-муҳаббатни... оломон олдида изҳор этиб бўлмайди. Эл-юрга бўлган меҳр-муҳаббатни... микрофон орқали изҳор этиб, бўлмайди! Шу боисдан-да уни оти меҳр-муҳаббат. Эл-юртта бўлган меҳр-муҳаббатни... амалда бажарадилар, амалда кўрсатадилар! Масалан... танжонини қурбон қилиб кўрсатадилар! Тинчлик замонида эса — меҳнат жасорати билан кўрсатадилар, фидойилиги билан кўрсатадилар, сабр-бардоши билан кўрсатадилар. Чунки эл-юрг демак, қон демак, тан-жон демак!

— У сиз, ўртоқ Эсонов, у сиз Ботир фирмә, коммунист Эсонов, райком Эсонов! Булар... реформатор, реформатор!

— Реформатор? Ўргилдим, бундай реформаторлардан! Реформа, реформа, деб бақиради. Булар ҳали реформа нималигини билмайди. Реформа қаёқда, булар қаёқда? Реформа кўп улуғ ҳам... қонли сўз. Реформа қилиш учун... каллани кундага қўйиш керак! Ана шу каллада... отни калласидай юрак бўлиши керак! Пётр Биринчи ана шундай зот эди, ана шундай калла эди. Россияни Россия қилган ана шу Петр Биринчи бўлди. Петр Биринчи туфайли Россия Европа мамлакатлари қаторига келиб қўшилди. Петр Биринчи Европага этиб олиш учун қанчалаб қурбон берди, қанчалаб қон тўқди. Россия ағдар-тўнтар бўлди, маданияти хароб бўлди, маънавияти хор-зор бўлди. Петр Биринчи маданият ва маънавият эвазига... улкан армия тўплади, курол-яроғ тўплади. Оқибат... айиқнамо Россия тузилди, ёввойи-намо Россия қарор топди. Россияни маданияти ва маънавияти... ҳарбий куч ҳамда курол-яроғ бўлиб қолди. Россия душманлари Петр Биринчи реформасига... ҳайбаракаллачилик қилиб турди! Булар рус оппозициячилари эди, бети йўқ мансабпаст-шуҳратпастлар эди. Иккинчи улкан реформатор Александр II бўлди. Ана у

xaқиқий реформатор эди, буюк реформатор эди! Александр II 1861 йилда крепостной хукуқни бекор қилди. Деңқонларни... қулликдан озод этди! Ундан кейин Петр Столыпин реформа үтказди. У аграп реформани амалга оширди. Олдин тинчлик, ана ундан кейин реформа, шиори остида реформа қилди. Кейин, Сперанский. Ундан кейин ўртоқ Ленин реформа қилди. Тан олиш керак, ана шу ерда коммунистик партия катта хатога йўл қўйди. Коммунистик партия... Петр Биринчини йўлидан борди. Коммунистик партия мамлакатни... ас-кархона қилди, қуролхона қилди! Биринчи коммунист ўртоқ Ленинми ё Петр Биринчими? Ана шуни билиб бўлмай қолди!

— Халқни ақл-идрокида қайта ўзгариш қилиш керак, халқни онгига чуқур янгиланиш содир этиш керак. Онг... онгни қайта куриш керак! Реформани энг оғир жойи ана шу ерда!

— Халқ эса янгича яшашни... ақлига сифдиролмаяпти! Аниқроғи, халқни... ақли етмаяпти! Шу сабаб, ким нима деса, халқ... эргашиб кетяпти! Ё... бақрайиб қараб турибди!

— Олдинлари ҳар бир яхши иш учун ҳам, ёмон иш учун ҳам — партия-хукумат жавоб берар эди. Энди эса, ҳар бир одам ўзи учун жавоб беради. Шу сабаб, одамлар қаёққа қараб юришини билмай қолди, кимга ишонишини билмай қолди. Одамлар ўзи учун ўзи жавоб беролмай қолди.

— Мафкура... мафкурасиз яшаб бўлмайди. Мафкурасиз олға босиб бўлмайди. Келажакка қадам қўйиб бўлмайди. Мафкура эса — ғояларсиз бўлмайди, гоя — мафкурани қон томиридир. Эл-юрт ҳамиша ғояларга ишониб келди, ғояларга сунниб келди. Эл-юрт ғоялар билан ўсиб-улғайди. Қайта қурувчилар тили билан айтсак: «ватан турғунлик ҳолатида ўси, халқ турғун бўлиб яшади». Ана шу ғоялар... эл-юртни турғун ҳолатда сақлаб келди! Урушларга йўл бермади. Мафия, рэкет, деган босқинчиликларга йўл бермади. Турли алғов-далғовларга йўл бермади. Совет халқи... мисоли бургут қаноти остида яшади: яхши-ёмондан қўрқмади. Иссик-совуқдан қўрқмади. Оч-ялангочликдан қўрқмади. Офат-балодан қўрқмади. Ана шу ғоялар... мамлакатни турғун ҳолатда сақлади! Аммо-лекин мамлакатни... осойишта-фаровон сақлади! Ғоя-ғоя! Улуг инқилоб ғояси, социализм ғояси, байналминаллик ғояси, коммунизм ғояси. Эл-юртни ана шу ғоялар қудратли этиб турди!

— Жамият мисоли бир тан-жон. Жамият руҳияти — мафкурадан иборат. Шу сабаб, жамият мафкура билан тирик, мафкура билан ҳаёт. Мафкура ҳаминқадар чайир бўлса, ҳаминқадар қудратли бўлса, ҳаминқадар покиза бўлса — жамият шу қадар ўсиб-унади!

— Мафкура жамият манфаатларини ҳимоя этувчи ҳукуқий-фалсафий ғоялардир, аҳлоқий-диний қарашлардир. Шу боис, улуғ ниятлар, улкан режалар — мафкурадан бино бўлади. Бизда ана шундай мафкура бор эди. Уни коммунистик идеология, дер эдилар. Энди, коммунистик идеология йўқ... Энди, миллат манфаати дунёга келди, миллат мақсади дунёга келди. Энди, миллат шавкати дунёга келди, миллат орзуси дунёга келди. Қайта қурувчилар ана шулардан... мафкура тизими битишлари лозим бўлади. Ана шуларни жамлаб... миллий мафкура яратишлари лозим бўлади. Уни — ўзбекона мафкура, деб аташлари лозим бўлади.

— Қайта қуриш демак — инқилоб демак. Инқилобни кароматлари кўп. Шундай кароматларидан бири — инқилоб... тўда-тўда кўпикларни юзага олиб чиқади. Тўда кўпиклар... юзада қалқиб юради, ҳаволаниб юради, савлат тўкиб юради. Кўпиклар асл нарсаларни... пастга уради, четга суради! Юзада эса... ёлғиз ўзлари қолади! Олисдан қарасангиз — кўпиклар жуда даҳшатли кўринади. Яқиндан қарасангиз — тайин-тутуриги йўқ... пухфаклар бўлади! Қўлингизга олиб кўрсангиз... йўқ бир нарса бўлади! Ана, ўша кўпиклар, ана! Тўда кўпиклар... асл меҳнат самараларини ерга урмоқда, асл зотларни ерга урмоқда! Юзада мисоли тўда кўпик бўлиб... ўзлари қолмоқда! Бир тўда кўпиклар... Октябр инқилоби Римдан келган, дейдими? Улуғ Октябр инқилоби-я?

— Ўзи, булар кўпик деса... кўпик экан! Шуниям тўлиқ билмас экан — тушунтиrolмади. Аслида эса, гап бундай. Буни бирорвга айтманг, ўртоқ Ражабов, гап орамизда қосин. XVI аср бошларида Москвани буюк князи Василий III Псков оқсоқоли Филофейдан бир қатор мурожаатномалар олади. Филофей шулардан бирида буюк княздан Москвани... «учинчи Рим» қилишини талаб этади. Боиси, биринчи Рим — «еретик» попистлар қўлида қолиб кетган бўлади. Иккинчи Рим — Константинополни эса, мусулмонлар эгаллаб олган бўлади.

— Константинополь...

— Ҳа, ҳа, ўша шаҳар. Энди, буюк рус князи Василий III олдида иккита оламшумул масала кўндаланг бўлиб қолади: бутун ер юзида Христос ғояларини тан-

тана қилдириш ва черков православи ҳукмини ўрнатиш. Шундай қилиб, буюк князь оқсоқол Филофейни даъватларини амалга ошириб бошлайди. Даастлаб, князни ўғли Иван Грозний ўзини подшо деб эълон қиласди. Иван Грозний ўзини Рим ва Византия «цезарлари» меросхўри этиб танилади. Қирғинбарот фаолият бошлаб юборади. Ундан кейин бу фаолиятни Петр Биринчи давом эттиради. Кенг қамров билан давом эттиради! Мазкур гоя XIX асрда «славянофиллар» номи билан кенг авж олади. Кучли оқим сифатида тармоқ отиб боради. Славянофиллар, славянофиллар... 1917 йилда мазкур гояни — «учинчи Рим» гоясини... коммунистлар илиб олади! Коммунистлар «учинчи Рим» гоясини ўзлаштириб олиб... «Октябр инқилоби» номи билан ҳаётга тадбиқ этади. Бир сўз билан айтсак, КПСС... Иван Грозний билан Владимир Ленинни пайвандидан ҳосил бўлади!

54

Ток ости сўри олачалпоқ кўлага бўлди.

Ботир фирмә ана шу сўрида ўтиреди. Сўри панжара-га орқа бериб ўтиреди. Инқиллаб-инқиллаб ўтиреди. Ўқчиб-ўқчиб ўтиреди, ерга тупуриб-тупуриб ўтиреди.

Кампири ним пиёла асал олиб келди.

Асалдан... баҳор ҳиди келди! Асал... гул атрини таратди!

Кампири асални чой билан суюлтиреди. Ботир фирмәни оғзига олиб борди.

Ботир фирмә асал ҳидидан бир сесканди. Асал ҳидидан икки ижирғанди. Бетини четга бурди.

— Кўзни чирт юмиб, ютиб юборинг, — леди кампири. — Мен сизга ароқ ичинг, деганим йўқ.

— Обком Ражабов қўймади, Ражабов.

— Ҳанифа Ражабовна телефонда айтиб эди. Чоли қурғур отяпти, деб эди.

— Шундай, обком Ражабов кўп ичгич бўлти. Менимча, манави алғов-далғов кунларга чидай олмаяпти. Совет даврида келажак аниқ эди, яшашдан мақсад аниқ эди. Совет халқи ёрқин келажакка ишониб яшар эди. Орзу-ҳавас билан яшар эди. Совет тузумини ўз шиорлари бор эди. Масалан, совет тузумини «озодлик — тенглик — қардошлиқ — баҳт-саодат», деган шиори бўлар эди. Қанчалар ҳаётбахш шиор эди, қанчалар эзгу шиор эди! Одам ана шундай шиорларни кўриб... яшаган сайин

яшагиси келар эди! Энди, қайси шиорга ишониб яшаб бўлади? Энди, қайси шиорга эргашиб яшаб бўлади? Энди, манавиндай шиорлар даври келди: «ўруш — босқинчилик — ўғрилик — талончилик». Энди, манавиндай шиорлар замони келди: «камбағалик — бечоралик — очлик — қувғинлик». Обком Ражабовни ана шундай шиорлар қийнаяпти. Ўзи ошкора айтди.

— Чин, кун кечириш қийин бўлиб боради. Бозор-ӯчар қиммат бўлди. Нарх-наво бекарор.

— Шундай, ҳамма нарса қимматлашиб, фақат... инсон арzonлашиб боряпти, инсон. Инсон сариқ чақачалик бўлмай қолди. Инсон сассиқ саримсоқчалик бўлмай қолди. Бир магнитофонни ўғирлаш учун... одами ни отиб кетяпти. Ушоқдай тилла тақинчоқни олиш учун... аёлни пичоқдаб кетяпти. Фалакми қажрафтор, турмушми бемаза? Бу — иқтисодий танглиқдан, демокдалар. Йўқ, бу иқтисодий қийинчиликдан эмас, йўқ. Бу — мафкуравий ожизликдан, кампир, мафкуравий заифликдан.

Кампири лимон қирқди. Лимон арчди. Ботир фирмани оғзига солди.

— Чайнаб-чайнаб ютинг, — деди. — Уҳ-уҳламанг! Ароқ совуқлик. Лимон совуқликни олади. Энди, босиб-босиб асал чой ичинг.

Ботир фирмә асал чой ичди. Пешонасидан дув-дув тер тўкилди. Юзларидан йилт-йилт тер сизилди.

Кампири сочиқ билан терларни артиб-артиб олди.

— Обком Ражабов тагин нималар деди? — дея сўради.

— Нимаям дейди... тақдир-пешонасидан куяди. Порлоқ келажак учун умр бўйи меҳнат қилдик... деб ичади. Порлоқ келажакка етиб келиб, нима кўрдик... деб тагин ичади.

— Кимдан куяди?

— Кимдан бўлади, қайта қурувчи демократларданда. Обком Ражабовгаям ҳайронман. Шу қайта қурувчи ларни нимасига куяди? Қайта қурувчи демократлар... касал, кампир, касал. Қайта қурувчи демократлар... мансаб-мартаба касалига йўлиқкан, шон-шуҳрат касалига йўлиқкан. Юракни даволаса бўлади, сукни даволаса бўлади. Аммо-лекин қайта қурувчи демократларни даволаб бўлмайди. Мансаб-мартаба дарди — даволаб бўлмас дард. Шон-шуҳрат дарди — сурункали дард. Бу дардларга йўлиқкан одам... ўлиб қутулади! Шу боис, мансаб-мартаба дардига йўлиқкан одам — қаллоблик,

пораҳўрликдан қайтмайди. Шон-шуҳрат дардига йўлиқ-кан одам — маразлик, ёвузликдан қайтмайди.

— Ўзи, шу қайта қурувчи демократлар ўзларини бир бало чоғлайдилар, бир бало чоғлайдилар-е?

— Буни, «мания величия», дейди. Уни руҳий қасаллик-да деб бўлмайди, ақлий соғломлик-да деб бўлмайди. Мания величия — эл-юрт бошига битган бало бўлади. Мания величия — мансаб-мартабаларга ўч бўлади, шон-шуҳратларга ўч бўлади, шов-шувларга ўч бўлади. Мания величия — жамиятни қўлга олиш учун курашади, жамиятни бошқариш учун курашади, жамиятни кафтида ушлаб туриш учун курашади. Бир сўз билан айтсак, жамият — эл-юрт гули бўлиш учун курашади. Ўз мақсади йўлида қўлидан келган барча ишни қиласди. Масалан, мания величия — ўзини кимдир қилиб кўрсатишга уста бўлади, ўзида йўқ нарсани бор қилиб кўрсатишга уста бўлади. Чала-чулпа шахсни — ёрқин юлдуз этиб кўрсатади. Чироқ ёқса ёришмовчи қалбини — оташ юрак этиб кўрсатади. Хом калласини — ақл халтаси қилиб кўрсатади. Мания величия — эл-юрт олдида ўзини жон фидо этиб кўрсатади, эл-юрт олдида ўзини улуғлар улуғи этиб кўрсатади. Охир-оқибат — ақл бовар қилмайдиган ютуқقا эришади. Юрадиган йўлини билмайдиган, қиласиган ишини билмайдиган, гапирадиган гапини билмайдиган бир жазавадор... эл-юртни оғзига қаратиб олади! Бир қилифи ортиқ, эси кирап-чиқар бир жазавадор... эл-юртни ўзига эргаштириб олади! Буларни барчаси жамият бетоблигидан бўлади, жамият хор-зорлигидан бўлади!

— Совет ҳукуматини қадри ўтди, раис бова.

— Шундай, совет ҳукуматини қадри ўтди. Шундай, КПССни қадри ўтди. Қайта қурувчи демократлар... совет ҳукумати ундей эди, КПСС бундай эди, дейди. Бекорларни беш марта айтибди! Қайта қурувчи демократлар кулдорлик жамияти иллатларини совет ҳукуматига олиб келиб ёпиштиряпти. Феодализм жамияти қусурларини КПСС бошига ағдаряпти. Капитализм жамияти айбларини совет ҳукумати устидан мағзава қилиб тўкяпти. Ёмон — совет ҳукумати ёмон, КПСС ёмон. Иван Грозний ўн бешинчи асрда ҳукмронлик қилиб эди. У ўз даври учун давлатни бошқариш тартиб-қоидасини яратди. Масалан, опричник номли алоҳида бир кўшин тузди. Опричник фақат Иван Грозний буйруғини бажарди. Опричниклар — эски жиноятчилар, оиласидан воз кечганлар, жиноят кўчасига кириб қолган-

лар, ҳеч балодан тап тортмайдиган қонхүрлар эди. Опричниклар халқни хоҳласа осди, хоҳласа сўйди, хоҳласа отди. Иван Грозний топшириғи билан айғоқчилар подшодан норози шахсларни аниқлади, гайритабиий фикрловчи шахсларни топди. Опричниклар уларни бешафқат қийноқлар, калтаклар, тўқмоқлар зарби остида бўйнига олишга мажбур этди. Айбловчилар ёвузона қийноқлардан кейин қилмаган ишларини қилдим, дейишга мажбур бўлди. Айбланувчилар қонхўронга азоблардан кейин бегуноҳ одамлар номини сотишга мажбур бўлди. Опричниклар бегуноҳ айборларни озодликда юрмиш ўғил-қизларини ҳам зиндан қилди, уруғаймоқлари, дўст-биродарларини зиндан қилди, ҳатто, айбланувчиларни вояга етмаган, норасида болаларини-да қамади ё сургун қилди. Иван Грозний ўз ўғлини қатл эттириди, амаки акасини қатл эттириди, жиянларини қатл эттириди. Қайта қурувчи демократлар Иван Грозний фаолиятини... совет ҳукуматига тўнкаб ўтирибди, ўртоқ Сталинга тўнкаб ўтирибди. Ахир, XV аср қаерда, XX аср қаерда?

— Уямас-да-буямас, эл-юртни шўри қуриди, раис бова.

— Шундай, қийин-қийин, халқقا қийин бўлди. Халқ умри мобайнида КПСС чизигидан чиқмай яшади, КПСС буйруғини бажариб яшади. Шу боис, халқ — иқтисодий ўқимай яшади, мафкуравий изланмай яшади, келажак ҳақида ўйламай яшади. Халқ учун КПСС ўйлади, халқ учун ҳукумат изланди. Халқ фақат... ишлади! Халқ жонажон коммунистик партия учун жон фидо этиб ишлади, халқ меҳрибон совет ҳукумати учун жонини жабборга бериб ишлади. Бундай халқни йўлдан уриш осон. Бундай халқни қўлидан етаклаб кетиш осон. Бундай халқни... қўйдай ҳайдаб кетиш осон! Қайта қурувчи демократлар ана шундай қилмоқда. Бурнини артиб олмаган мишиқилар... халқни лақиллатиб юрибди, халқни қўйдай етаклаб юрибди. Азал-азалдан шундай: кимdir бирор лақиллаб, нутқ сўзлаб қўяди. Балога қолган... халқ бўлади! Халқ... дардини ичига ютади! Шу боис, халқ ҳамиша ҳукуматдан норози бўлади. Гёё, ҳукумат халқ ғаними. Гёё, ҳукумат халқ зиёнига сиёсат олиб боради. Аслида эса ҳукумат — халқ посбонидир, халқ ҳимоячисидир. Халқни халқ қилувчи — ҳукумат. Халқни ички-ташқи оғат-ғанимлардан ҳимоя этувчи — ҳукумат. Оппозиция, оппозиция! Ана, халқ ғаними ким! Афсуслар бўлсинки, халқ оппозицияни... дўст

деб билади. Халқ оппозицияни... адвокат деб билади. Шу боис, халқ ҳамиша оппозицияни... ҳукуматта қарши қўяди. Халқни ўзиям оппозицияга қўшилиб... ҳукуматта қарши отланади. Аслида эса, оппозиция — халқ ҳимоячиси ниқобидаги... халқ душмани! Шундай, оппозиция — халқ душмани!

— Қайта қурувчилар лой чапламаган одам қолмади. Қайта қурувчилар бошидан мағзава ағдармаган одам қолмади. Бир куни радиони қўйиб эдим, қайта қурувчилар радиодан... Хрушевга мағзава тўқди.

— Радиодан мағзава тўқди?

— Ҳа, куппа-кундуз куни! Хрушевни бошига... радиодан мағзава тўқди. Хрушев — арпа ун, деди. Хрушев — маккажӯхори, деди.

— Маккажӯхори бўлса нима бўпти? Маккажӯхори — дала маликаси! Шундай, маккажӯхори дала маликаси, мўл-кўл озуқа. Хрушев даврида асрлар мобайнида қақраб ётган чўл-биёбонлар... боғ-бўстон бўлди, шаҳар-қишлоқ бўлди. Хрушев даврида одамзот фазога учди. Хрушев даври... ойга учди! Гагарин, Гагарин!

— Брежнев даврини айтмайсизми, Брежнев? Ҳай, бир давр эди-да...

— У-у-у, Брежнев даври, Брежнев даври! Брежнев даври — сокин давр эди, осуда давр эди, сув сепгандай жимжит давр эди! Брежнев даврида турмуш бир маромда давом этар эди. Бирор ўзгариш бўлмас эди, бирор янгилик бўлмас эди. Барча нарса жой-жойида қимир этмай турар эди. Брежнев даври... мангу ҳайкал эди, мангу ҳайкал! Брежнев даврида... қуёш ёрқин нур сочар эди! Брежнев даври қуёши... ярқироқ эди! Брежнев даврида... сувлар сокин-сокин оқар эди! Сувлар... қилт этмас эди. Брежнев даврида... осмон мусаффо эди! Оlam кўм-кўк эди, дараҳтлар ям-яшил эди. Кўкатлар бодроқ-бодроқ эди. Брежнев даврида... шабадалар майин-майин эсар эди! Брежнев даври... болалари-да мўмин-қобил эди! Катта-кичикка иззат-хурматда эди. Ор-номусли эди, диёнатли эди. Брежнев даври кексалари... мисоли тошкитоб, мисоли тошойна, мисоли тарих! Мана, манави ажинларим — колхоз-совхоз тузиш, манави ажинларим — чўл-биёбонларни ўзлаштириш, манавиниси — миллион-миллион тонналаб пахта териш... Ажинлар — умр, ажинлар — ёдгорлик. Брежнев давридан ёдгорлик.

— Брежнев даврида барча сизни ўртоқ Эсонов, дер эди, Ботир фирмә, дер эди.

— Энди эса... Қизил, дейди, Қизил!

— Брежнев даврида бизни қуюқ-қуюқ зиёфатларга чақырар эди. Бизни тұрга ўтиргизиб қүяр эди. Совғасаломлар берар эди. Сирғалар, узуклар берар эди. Олдимгә ноёб-ноёб сарполар қүяр эди. Сиз номер биринчи әркак әдингиз, мен номер биринчи аёл әдим.

— Энди эса, бизни фамилиямиз... пенсионерлар! XX асрни қурған миллион-миллион казо-казоларни фамилияси битта — пенсионерлар! XX асрни яратған миллион-миллион казо-казоларни фамилияси битта — ветеранлар! Жуда ҳурмат-эъзоз этса — қариялар! Бир асра әл-юрт учун тер түккан миллион-миллион партия-совет арбобида... фамилияда қолмади, унвон-да қолмади, орден-да қолмади! Ҳатто, фамилиясидаги... «ўртоқ» күшімчаси-да қолмади!

— Совет тузуми... ойдайгина тузум эди-я! Ойдайгина тузумни йўқ қилишди-я?

— Совет тузумини бирор йўқ қилмади. Совет тузуми... ўзини-ўзи йўқ қилди. Ўртоқ Ленин билан ўртоқ Сталин яратған совет тузуми диктатура асосига қурилған эди, ириб битган идеология асосига қурилған эди, чириб кетган сиёсий тармоқлар асосига қурилған эди. Шу боис, олдин КПСС қулаб тушди. Кейин, СССР ағанаб тушди. Бу бирин-кетин фожиа нимадан бўлди: Горбачев, Горбачев! Ўртоқ Горбачев Кремлга келиб, ўта кескин ҳам сиёсий йўл танлади: давлат билан партия функциясини бўлиб-бўлиб ташлади. Идеология билан сиёсий тармоқни партия қулига берди. Барча хўжалик тармоқларини ҳукумат қўлига берди. Ана шунда... совет тузуми пойдеворига зил кетди! Кремль саройида ўртоқ Ельцин партия билетини минбарга ташлади. КПСС саройидан тантана билан чиқиб кетди. Ўртоқ Ельцин КПССни ташлаб кетди. Ана шунда... КПСС пойдеворига зил кетди! Совет тузумини Горбачев тугатди, дейдилар, ГКЧП тугатди, дейдилар, Ельцин тугатди, дейдилар, жидомасонлар тугатди, дейдилар. Йўқ, тағин, йўқ! Совет тузуми... ўзини-ўзи тугатди. Совет тузуми... ўз бошини ўзи еди.

— Мен товуқ шўрвани сузуб келай. Товуқ шўрва ичдаги совуқликни олади.

Ботир фирмә үтмишини ўйлади. Ботир фирмә кечмишини ўйлади.

Олисларда қолмиш... совет тузумини ўйлади. Етим қолмиш... Совет ҳукуматини ўйлади. Есир қолмиш... КПССни ўйлади.

«Совет тузуми бунчалар азиз эди? Совет хукумати бунчалар қадрдон эди? КПСС бунчалар ардоқли эди? — деди Ботир фирмә. — Масалан, совет тузумида... ёшлигим қолди. Совет хукуматида... мартабам қолди. КПССда... шавкатим қолди. Масалан, Сталин даврида... дунё ёш эди, мен ёш эдим, кампирим ёш эди. Сталин даврида... кампирим қызы эди! Сочлари тақимини урувчи қызы эди. Сочлари түлғониб юрувчи қызы эди. Үримдан қочган зулфлари бор қызы эди. Юзлари юз эмас... анор эди! Сталин даврида... мен ошиқ эдим, кампирим маъшуқ эди!»

Ошхона тарафдан кампири келар бўлди. Кўш қўлида шўрва бўлди. Қўлтиғида тандир нон бўлди.

Кампирини соchlари... дока рўмолидай оппоқ-оппоқ бўлди. Юзлари... ажин-ажин бўлди.

Мункиллаб-мункиллаб қадамлар бўлди. Қадамлари ушбу дунёдай... тор-тор бўлди. Қадамлари ушбу дунёдай... қари-қари бўлди.

— Сталин даврида... мана шу кампирим... қызы эди! Барчин юзли-барчин юзли қызы эди! — пичирлади Ботир фирмә. — Мен ошиқ эдим, кампирим маъшуқ эди...

55

«...психоневрологическая больница».

Ботир фирмә ушбу вивескани ўқиди. Қайта-қайта ўқиди. Вивескага тикилиб қолди.

«Шу вивеска олдига келтанимга-да йигирма йил бўпти! Бир йигит ёши вақт. Бир қызы бўйи вақт! — дея ўйлади. — Аммо-лекин ўшанда райкомни машинасида юрар эдим. Отда эдим, оёғим узангизда эди. Энди, пиёда-пешка бўлиб келдим, пиёда-пешка...»

Ботир фирмә ўйлаганча бўлди.

Қабулхонада уни... бир дайдини текширмишдай текширди. Бир гадойни текширмишдай текширди.

— Майли, бир пенсионер чол экансиз, — дея киритди.

Ботир фирмә ичкарилади. Йўлак бўйлаб йўл олди. Изидан Ҳанифа Ражабовна юрди.

— Девордаги вивескани кўрдингизми, Ҳанифа Ражабовна? — деди.

— Ўқидим-ўқидим.

— Қаерга келиб қолдингиз, биляпсизми? Бир сўз билан айтсан, бу жой — шунача жой. Бу жойни номи касалхона, холос. Ҳали кўрасиз. Дўстингиз-ку

дүстингиз, душманингизни ҳам бу жойга тушгулик қилмасин.

— Менда нима айб, Ботир Эсонович, менда нима айб? Ражабов кафеда ичган-да, кафеда.

— Күча-күйда ичмасин эди. Кимсан, обком Ражабов оти бор.

— Яна-тагин, бир ўзи ичган денг. Кейин, автобус бекатига бориб, скамейкада ухлаб қолган.

— Ана, шу иши коммунист одамга эпми энди?

— Бекатдагилар Ражабовни юраги ёмон бўлиб қолди, деб ўйлаб, «скорий помош» чақирган. «Скорий помош»чилар Ражабовни машинага солиб кўрсалар, фирт маст бўлган. Айтишларича, маст одамни касалхонага олмас эмиш-ку?

— Шундай, маст одамни шифохоналар қабул қилмайди. Mast одамни ё мана шу жой қабул қиласди, ё хушёрхона қабул қиласди.

— Яна-тагин, «скорий помош» мана шу ерни машинаси экан денг.

— Мана шу жойними?

— Ҳа, мана шу ерни. Шу сабабдан, Ражабовни тўғри шу ерга олиб келибди.

— Бу жойдан кўра ҳушёрхонага олиб борса яхши эди. Беш-олти сўм жарима тўлаб, кутулиб кетар эди. Билмайман, энди нима бўлади.

— Энди бор умид сиздан, Ботир Эсонович.

— Ҳанифа Ражабовна, мен... ўзимга эн бўлолмайман, сизга қандай бўй бўламан?

— Сиз Ражабовни ҳам синфдошилиз, ҳам дўстисиз. Ўшани учун фақат сизга телефон қилдим.

— Айни вақтида телефон қилибсиз. Шу уч-тўрт кунда ҳал этмасак, кеч бўлади. Гап шундаки, беморга учтўрт кун мобайнинда диагноз қўйилади. Ана шу диагноз қўйилмасдан, обком Ражабовни бу жойдан олиб кетишимиш керак. Бугун иккинчи кун. Ҳали вақт бор. Ишонинг, бу борада... тажрибам бор!

Ботир фирмә бундан йигирма йил муқаддам келмиш кунларини эслади. Бир-бир эслади. Аммо Ҳанифа Ражабовнага билдирамди.

«Қайтар дунё деганлари чин экан, — дея ўйлади. — Ўшанда обком Ражабов шоир Мадиевни мана шу жойга жўнатиб эди. Беёзиқдан-бёёзиқ жўнатиб эди! Мана энди... обком Ражабовни ўзи келди! Ўз оёғи билан келди! Ё обком Ражабовни... худони ўзи жўнатдими? Унда... худо бор экан-да?»

Ботир фирмә баш бино олдида чекиб турмиш оқ халатли билан салом-алик этди.

— Баш врач Мирзаев җокимият мажлисига кетди, бутун келмайди, — деди оқ халатли.

Ботир фирмә оқ халатли билан гаплашди. Маңсади-ни айтди.

Оқ халатли ҳамдардлик билан баш иргәди. Икки қаватли бинони күрсатди.

Ботир фирмә ана шу бинога йўл олди. Ҳанифа Ражабовна эргашди.

— Эшигдингизми, Ҳанифа Ражабовна? — деди. — Ҳали аниқ бир хулосага келишмайди. Буёғи, Мирзаев ҳалиям баш врач экан. Бўлди, обком Ражабовни чиқарип оламиз!

Ботир фирмә наркология бўлимига кириб борди.

Бўлим бошлиғи Ботир фирмәни таниб қолди. Таклиф-такаллуф этди. Ҳурмат-эъзоз этди. Касаллик дафтари ни ёйиб күрсатди.

— Яхшиси, ўзингиз танишиб чиқинг, отахон, — деди.

Ботир фирмә Ражабовни касаллик варақаси билан танишиди:

«... Бемор Ражабов остоңада врачлар кўриниши билан каравотдан сапчиб турди. Палата ўртасида фоз бўлди. Оёқларини икки ёнига керди. Қўлларини белига тира-ди. Бўйини олға чўзди. Юзларини даҳшатли буриштириди. Лабларини чўччайтириди. Кўзларини ола-була этди. Важоҳат билан бақирди:

— Яқинлашманг деяпман, яқинлашманг!

Аммо врачлар ичкари кириб борди.

Бемор Ражабов ёввойиларча ҳайқириб... «Интерна-ционал» айтди:

Вставай, проклятьем заклейменный
Весь мир голодных и рабов!
Кипит наш разум возмущенный,
И в смертный бой вести готов!

Бемор Ражабов югуриб, дераза токчасига чиқиб борди. Дераза устида осиглик Қизил Байроқни юлиб олди. Тап этиб, пастга тушди. Қизил Байроқ дастасидан ушлаб баланд кўтарди.

— Мана, Қизил Байроғим, мана! — деб бақирди. — Бошимда Қизил Байроғим бор! Мен Қизил Байроғимдан паноҳ топаман!

Аслида эса, бемор Ражабов Қизил Байроқ дастаси билан... врачларни урмоқчи бўлди! Буни пайқаб қолган врачлар санитар йигитларни ёрдамга чақирди.

Санитар йигитлар Қизил Байроқ билан... қуролланган бемор Ражабовни қуролсизлантириди! Ражабовни... Қизил Байроқ қуролини тортиб олди! Ана шу ўз куроли билан Ражабовни оёқ-қўлини боғлаб ташлади.

Бемор Ражабов ўзини ўёқ-буёқча олиб урди. Санитарларга бақирди:

— Қизил Байроқни оёқча ўраб... хор қилманг! Шонли Қизил Байроқни оёқдан олинг!

Шундай кўриниб турибди — бемор Ражабов оёқ-қўлларини бўшатишни талаб этди. Талаби амалга ошмагач, бақириб... «Интернационал» айтди:

Весь мир насилья мы разрушим
До основанья, а затем
Мы наш, мы новый мир построим,
Кто был ничем, тот станем всем!

Кейин, бемор Ражабов ғайритабий фикрлар айтди:

— Одам маймундан тарқалган! Маркс, Маркс! Лекин мен маймун эмасман, мени боғламанг!

— Инсон озод бўлмоғи керак! Ленин, ўртоқ Ленин! Шундай экан, мени қўйиб юборинг!

— Маркс, Энгельс, Ленин тирик! Марксизм-ленинизм ғоялари тирик!

— Инсон ўз тақдирини ўзи ҳал қўлмоғи керак! Оёқ-қўлимни қўйиб юборинг, ўртоқ Рашидовга бораман!

— Рашидов оламдан ўтган? Йўқ, ўртоқ Рашидов барҳаёт! XX аср туркий ҳалқларида иккита доҳий бор: Камол Отатурк ва Шароф Рашидов!

Бемор Ражабов қай даражада бетоблигини ана шу гапларидан билиб олса бўлади».

56

Ботир фирмә қоғозга тикилиб ўйлаб қолди.

— Шу, ўзиниям бир кўрай? — деди.

— Аслида мумкин эмас. Лекин сизга майли. Фақат тез кириб чиқиш керак, — деди бошлиқ.

Бир санитар йигит ичкари бошлади.

Ботир фирмә ичкарилади. Жаранг-журунг қулф-калитлардан ўтди. Тарақ-туруқ темир эшиклардан ўтди. Бир эшик-панжаралардан кирди.

Палатада ўнтача каравот бўлди. Барча каравотни ўз бемори бўлди.

Бир bemор каравот қиррасига оёқларини кўйиб ётди. Бир bemор оёқларини деворга чиқариб ётди. Бирори кўлларини оғзига карнай этиб, «Андижон полька»си ни чалди. Бирори каравот устида «Андижон полька»си га ўйнади.

Тагин беш-олти bemор каравотга михлаб ташлан-мишдай ётди. Сокин ётди. Одоб билан ётди. Унсиз ётди. Тўшак остида бор-йўқлигини билдиrmай ётди.

Ражабов ана шу bemорлар сирасидан бўлди. У юзларини деворга буриб ётди. Кўзларини юмиб ётди. Нафас олишини билдиrmай ётди. Кўллари қаерда, оёқлари қаерда — билдиrmай ётди. Тирик жонми-йўқми — нишона бермай ётди.

Ботир фирмә Ражабовдай оташин бир коммунист ҳолидан... эзилди! Оташин коммунист ҳолидан... куюнди!

Санитар Ражабовни туртди. Юзига оҳиста шапатилиди.

— Бемор, кўзингизни очинг, bemор, — деди.

Ражабов кўз очиб қаради. Юзида илиқлик акс этди. Юзида ёруғлик акс этди.

— Ҳай, тузукмисиз? — дея бош силтади Ҳанифа Ражабовна.

Ражабов кўзларини очиб юмди: туппа-тузук, демиш бўлди.

Ҳанифа Ражабовна... эрини ўпиб-ўпиб йиғлади. Енглари билан кўзларини артиб-артиб йиғлади.

— Ойни ўн беши қоронги бўлса, ўн беши ёруғ. Бу кунлар ўтиб кетади, — дея йиғлади.

Ҳанифа Ражабовна ҳамёнини оғзига босиб-босиб йиғлади. Эрини юзига... юзини кўйиб-кўйиб йиғлади.

— Пешонам курсин... — дея йиғлади.

Ражабов нимжон ҳам ногирон овоз берди:

— Ўртоқ Эсонов, мени олиб кетинг...

— Бардам бўлинг, ўртоқ Ражабов, бардам бўлинг! — деди Ботир фирмә. — Мен сизни олиб кетаман!

Санитар Ражабовни устидан адёлни сурди. Оёқлари тарафга суриб-суриб кўйди.

Ботир фирмә ана шунда... ажаб бир синоатни кўрди!

Ўртоқ Ражабовни кўллари... каравотга боғлаб кўйилди. Ит бойлагич... қайиш билан бойланди. Оёқлари-да ёнларига ёйиб-ёйиб бойланди. Оёқлари-да... ит қайиш

билан бойланди! Маҳкам-маҳкам бойланди! Беллари-дан... отни айилидай қалин қайиш билан тортиб бой-лаб ташланди.

Ботир фирмә титради. Ботир фирмә қизиди. Ботир фирмә олов олди.

— Бу нима қилиқ?! — дея бақырди. — Обком секре-тари, Олий Совет депутати, меңнат ветерани-я?!

Ботир фирмә Ражабовни құліга ёпишди. Тугунни тимдалади! Кучи етмади. Ечолмади. Тугунга оғзини қүйди. Тугунни... тишлиб-тишлиб тортди! Тағин бўлма-ди. Ечолмади.

Санитар Ботир фирмәни қўлтиғидан кирди. Кучок-лаб тортди. Ражабовдан ажратиб олди.

— Ўртоқ Эсонов, оғир бўлинг! — деди.

— Ахир, обком Ражабов... қутурган ит эмас-ку?! — дея бақырди. — Обком Ражабов... адирдан ушлаб кел-ган ёввойи ит эмас-ку?!

Санитар... гапни эламади. Гапни корламади.

— Тўғри, бемор обком, бемор депутат... лекин со-биқ! Ҳа, сobiқ! — деди.

— Собиқ бўлса нима қипти, собиқ бўлса нима қипти?!

— Собиқ... ҳайитинг ўтди, демакдир! Собиқ... ҳайи-тинг ўтгач, хинони... кетингга қўй, демакдир!

— Қанақа ҳайит, қанақа ҳайит?!

— Шон-шуҳрат — арафа ҳайит! Мансаб-мартаба — уч кунлик ҳайит! Ҳайит ўтгач, хинони... кетингга қўй, дейдилар!

Ботир фирмә... ҳайкал бўлиб қолди. Юз-кўзи бўзрайиб қолди. Тили айланмай қолди.

57

Шу вақт узун айвонда... гурс-гурс товуш бўлди. Қарс-қарс овоз бўлди. Чил-чил синиш бўлди.

Мазкур палатада ётмиш беморлар... ёппа-барака қўзғолди. Ёппа-барака эшикка ёпирилди. Ёппа-барака боис — эшикка тиқилиб қолди!

Оқибат — бирори бирорини итарди. Бирори биро-вини муштлади. Бирори бирорини тимдалади. Қий-чув билан айвонлади.

Санитар... беморлар кетидан чопди!

Ботир фирмә ҳайрон бўлди. Уям айвонлади.

Айвонда бир тўда бемор... бўлим бошлиги тевара-гини олиб турди. Бошлиқни оғзига қаради. Анграйиб

қаради. Бақрайиб қаради. Мұлтайиб қаради. Бежо-беке қаради.

Бошлиқ... құлларини белига қүйди. Сиёсат билан ҳаволанди. Ерга тикилиб ҳаволанди. Сукут сақлаб ҳаволанди.

Чивин учса билинажак сукунат чүкди!

Бошлиқ ҳаволаниб бош күтарди. Оқиста-оқиста гап бошлади. Сокин-сокин гап бошлади:

— Хүш, нима гап, жаноб беморлар?

Шунда, беморлар... баравар сүзлади! · Баб-бараңар сүзлади! Шовқин-сурон билан сүзлади. Фала-ғовур билан сүзлади:

— Манави Наполеон бўлиб... ватанимизга бостириб келди!

— Мана бу Петр Первий... она юртимизга замбарак отди!

— Сен-чи, сен? Сен Кутузов бўлиб... қарши ҳужумга ўтдинг-ку?

— Сен палатадагиларни қиличдан ўтказдинг!

— Сен тўппонча билан отдинг!

— Сен замбарак отдинг!

— Бўхтон, бўхтон! Мен замбараклардан бир йўла йигирматадан ўқ отилсин, деб буйруқ бердим, холос!

— Полундра, полундра!

— Мен қайта қурувчиман!

— Мен демократман, демократ!

Ботир фирмә... масалани тушунмишдай бўлди. Беморларга бир-бир назар солди.

Бир bemорни бошида тўнтириқлик оқ тобоқ — Наполеонни қалпоғи бўлди. Кўлида узун найза — супурги таёқ бўлди. Тағин бир bemорни кўлида ичи тешик труба — дурбин бўлди. Бирорида узун супурги қилич бўлди.

Bеморлар Наполеон билан Петр Биринчи лашкарлари кийимида бўлди: бирор қалпоғини тескари кийиб олди. Бирор костюмини тескари кийиб олди. Бирор бекасам тўнини чаппа кийиб олди. Тағин бирор алюмин лаганин барабан мисол бўйнига осиб олди. Иккита алюмин қошиқ билан барабан урди.

Бошлиқ... байроқ кўтариб олмиш бир bemorga юзланди.

— Сизга нима бўлди? — деди. — Тупла-тузук профессор-а, профессор!

— Мен буларга тенг бўлмоқчи эмас эдим, жаноб дўхтири. Бундай қарасам, бирори Наполеон бўлиб, яна

бирови Петр Первий бўлиб уруш бошлаб юборибди. Мен айтдим, ҳой саводсизлар, дедим. Ахир, Наполеон бошқа асрда яшаган, Петр Первий бошқа асрда яшаган, дедим. Шундай экан, улар қандай қилиб, бирбири билан урушади, дедим. Шундай Петр Первийни бир генерали ўртага отилиб чиқди. Унда, Наполеон билан ким уруш қилган, деб қолди. Мен айтдим, ким бўларди, маршалл Кутузов-да, дедим. Петр Первийни генерали мана мен Кутузов деб, бошимга бир солса бўладими? Мен айтдим, сен Кутузов, шошмай тур, дедим. Сен Кутузовни бир кўзинг-ку йўқ... энди бу кўзингниям ўйиб олмасам кўрасан, дедим. Мен ҳам ўз кўшиналаримни тўпладим.

— Сизда ҳам кўшин борми? — деди бошлиқ.

— О-о-о, кўшин бизда бор-да! Қайта қурувчилар кўшини! Ҳа, қайта қурувчи замонавий кўшин! Манавиларни кўшини алмисоқдан қолган кўшин. Отам замондан қолган кўшин! Бизнинг кўшинимизда... кимлар йўқ дейсиз? Мана, куни кеча кўшинимиз... обком секретари билан бойиди, обком секретари! Депутат, ҳа, депутат!

Ботир фирмани бадани жимири-жимири этди. Боши қизиди. Юзи лов-лов ёнди.

— Сизга неча марта айтаман, аралашманг, деб? Мана, яна аралашибсиз! — куюнди бошлиқ.

— Аралашмай бўладими, жаноб дўхтири, аралашмай бўладими? Мана, қайта қуриш давом этмоқда. Биз демократик жамият қуриш йўлидан бормоқдамиз. Биз миллатни оқлашимиз керак, жаноб дўхтири, миллатни оқлашимиз керак! Биз қадриятларимизни тикилашимиз керак, жаноб дўхтири, қадриятларимизни тикилашимиз керак! Наполеон, Кутузов, Петр Первий... Ахир, бу ерда миллийлик қани, миллийлик? Айтайлик, Кутузов ким? Кутузов сизга ким бўлади? Ўзингизни панага олмай, жавоб беринг! Ҳой Кутузов, ўзингизни кўрсатинг!

Ботир фирмака бемор қўл пешламиш ёқقا қаради.

Бир бемор... бир кўзини қора латта билан бойлаб олмиш бўлди. Бошига кубанка қалпоғини кўндаланг кўндириб олмиш бўлди.

— Ана, Кутузов, ана! — деди бемор профессор. — Кутузов эмиш! Кутузов кимингиз бўлади? Холаваччангизми, поччангизми? Қани, бу ерда ватанпарварлик? Қани, бу ерда ўз халқига садоқат? Сиз энг аввали, ўз она-ватанингизни фарзанди бўлинг! Ўз она хал-

қингизни ўғлони бўлинг! Сиз Амир Темур бўлинг! Сиз Бобур бўлинг! Сиз Иброҳимбек бўлинг!

— Бу профессор миллатчи экан! Ур миллатчини, ур!

— Шовинистларга ўлим! Сол шовинистни, сол!

— Халоскор француз қўшиллари, миллатчилар устуга олга!

— Петр Первий матрослари, бос шовинистни, бос! Ур-тўполон бўлди. Тарс-турс бўлди.

Ботир фирмә палатага қараб қочди.

— Ҳанифа Ражабовна, кетдик-кетдик! — дея бид-бид сўзлади. — Ўртоқ Ражабов, сиз қимирламай ётинг, ўзим келиб олиб кетаман!

Ботир фирмә Ҳанифа Ражабовнани тирсагидан олди. Эшикка етаклади. Ташқари етаклади.

Ташқари чиқиб олди.

Уф-уф, дея энтиқди, галстугини бўшатиб энтиқди.

«Ўша-ўша қабристон, — дея энтиқди. — Тирик мурдалар қабристони!»

58

Хиёлдан кейин бошлиқ чиқиб келди.

Бошлиқ Ботир фирмәни қўлтиқлаб олди. Скамейка-га олиб бориб ўтиргизди. Теваракка қараб бош иргади.

— Ҳа-а, ўзингиз яхшимисиз, отахон, ўзингиз? — дея бош иргади. — Ўзингиз қалайсиз энди, ўзингиз?

— Шу, кўриб турибсиз?

Ичкаридан санитар йигит чиқиб келди.

— Бўлди, Наполеонни ҳам, Петр Первийни ҳам... боғлаб ташладим! — деди.

— Энди, Наполеон билан Петр Первийни реанимация хонасига олиб киринг. Наполеонга... сульфозин беринг, сульфозин! Петр Первийга эса... скипидар беринг, скипидар! Қўшин тортиб, уруш очиш оқибати нима бўлишини бир билиб кўйсин!

— Бўлди, болпаймиз!

Бошлиқ Ботир фирмәга бет бўлди.

— Ҳа-а, ўзингиз яхшимисиз, отахон, ўзингиз? Қалайсиз энди, отахон?

— Ҳозирча бир нави.

— Энди, гап бундай, отахон. Сиз ҳам, ўртоқ Ражабов ҳам она-ватанга хизмат қилиб қўйган зотсиzlар! Шу сабаб, мен сизларга ёмонлик соғинмайман. Асло, ҳалигилар ҳолига тушмангизлар. Шунинг учун ўртоқ Ражабовга тайинлаб қўйинг, ақл билан иш қилсан.

- Обком Ражабов ақдли коммунист! Нима қилишини билади..
- Күрдик... келганида ақлинин күрдик!
- Обком Ражабовни... ичкилик йўлдан оздириди.
- Мен сизларга ёмонлик соғинмайман. Қулоғига шивирлаб қўйинг, ўзини боссин. Бўлмаса, ҳалигилардай бўлади. Ҳалигилар дастлаб келишида... туппа-тузук одамлар эди! Ана, оқибатини кўрдингиз?
- Узи, булар ким?
- Ким бўларди, наркоманлар, алкашлар-да. Булар ўзини: «жеф», «мулка», «игнага ўтирган», «чифир», деб атайди. Буларни оти шунаقا. Кўзингиз тушмадими, «игнага ўтирган»ларни вена қон томирлари олдида уколлар изи бор? Кўлларида татуировкалар бор?
- Обком Ражабовни буларга тенг қилманг, ука.
- Кечагидай байроқ қўтариб бақираверса... даволовчи врачлар битта укол беради... ҳалигилардай бўлиб қолади, тамом!
- Укол... фойдали бўлади шекилли?
- Сиз айтган уколлар бошқа, отахон, бошқа. Масалан, сульфозин уколимиз бор. Ана шу сульфозин уколи берилса... шундай оғрийди! Оғриғи дўзах азоби бўлади. Касални тан ҳарорати... қирқ градусга қўтарилади. Битта сульфозиндан кейиноқ касал дод, деб чин-қиради. Ўзини ўёқ-буёққа олиб уради. Палата бўйлаб бақириб чопади. Касал битта сульфозиндан кейин тартибга келмаса, унда, иккита кураги остига биттадан сульфозин берилади. Кейин, касални қўллари... шол бўлиб қолади! Касални думбаларига биттадан иккита сульфозин берилади. Ундан кейин, касални оёқлари юролмай қолади! Қарабисизки, касални қўллари ҳам ишламайди, оёқлари ҳам юролмайди. Касал қўл-оёқсиз бўлиб қолади! Бу ҳолатни медицинада: «тўрт уяли услубда даволаш», дейдилар. Мана, укол билан даволаямиз, дейдилар. Аслида эса, сульфозин уколи... таёқ, дарра вазифасини бажаради! Сульфозин... жазо уколидир! Тўғри, сульфозин вақтинча талваса-телбаликни босади. Касални вақтинча караҳт қилиб ухлатади. Аммо касални... умрбод руҳий касал қилиб қўяди! Ярим жон қилиб қўяди! Скипидар деганлари... сульфозиндан ҳам ёмон! Скипидар уколи ҳам калтак ва дарра сифатида ишлатилади. Скипидар оёқ-қўлни... шол қилиб ташловчи... чилвир-арқон ўрнида фойдаланилади.
- Касал одамни чилвир-калтак билан даволайдими?

— Совет медицинасида касални даволаш учун чилвир билан калтак ишлатиш... қолоқлик, ибтидоийлик саналар эди-да. Касални урса — из қолади, шиш қолади, қон кетади. Касал күриш учун келган қариндошурұғлари буни күриб нима дейди? Албатта, юқорига шикоят ёзади. Текшир-текшир ўтказади. Сульфозин билан скипидар уколи эса... билинмайды, күринмайды.

— Ука, жон ука! — дея сапчиб турди Ботир фирмә. — Обком Ражабовни озод қилинг! Бизни Ражабовни озод қилинг, жо-о-он ука!

— Хүп, бош врач Мирзаев билан маслаҳатлашай. Эртагаям келасизларми? Үнда, ўртоқ Ражабовға айтинглар: уч-түрт күн ўзини босиб турсин, хүпми? Хүп, худони паноҳига!

59

Кампири Ботир фирмәга бўқоқлик шим кийдирди. Українча кўйлак кийдирди. Китель-костюм кийдирди. Баҳмал шляпа кийдирди.

Китель-костюмга Меҳнат Қизил Байроқ орденини тақиб кўйди.

— Нега шу орденини тақяпсиз, раис бова? — деди.

— Йиғилиш «Ўзбекистонда сув хўжалиги ишлари» деб аталар эмиш.

— Ҳа-а, шу орденини Катта Фарғона каналидан олиб эдингиз-а?

— Шундай, Катта Фарғона каналидан олиб келиб эдим.

— Шунгаям, ким қанча вақт бўлди-я?

— Ўттиз тўққизинчи йилда эди. Авжи саратонда бошлаб, сумбула туққанида қазиб бўлиб эдик.

— Қайта қурувчилар Катта Фарғона канали кунини ўтказар эмишми?

— Бу бир гап. Аслида, қайта қурувчилар гапни Орол денгизига олиб келиб уламоқчи.

— Оролга уласа, сизга нима. Сиз хизмат қилиб кўйгансиз. Мана исботи — орден!

— Ия, ҳа-да, ҳа! Катта Фарғона каналини қирқ беш кунда қазиб ташлаганмиз, қирқ беш кунда! Янатагин, кетмон билан қазиганмиз, фақат кетмон билан! У вақтларда техника қаерда эди!

— Орденингиз узукни кўзидај ярашиб турибди. Ўзингизни орденингиз эканлиги шундайгина кўриниб турибди. Фақат шу... уст-бошингиз ажабтовур-да, раис бова.

— Уст-бошимга нима қипти? Манави галифе шим француз генерали Галифе номи билан аталади. Бир сүз билан айтсак, мен француз генерали Галифе номи билан аталувчи шим кияман! Манави украинча күйлак. Хрущевский күйлак!

— Биламан, биламан.

— Бир вақтлар, бунақа украинский күйлак фақат... икки кишида бор эди, икки кишида! Ўртоқ Хрущевда бор эди ва ... менда бор эди!

— Биламан, биламан. Энди, шу уст-бошни... вақти ўтиб қолдимикин дейман-да?

— Вақти ўтмайди. Мен бор — галифе шим бор, мен бор — украинский күйлак бор!

— Қайта қурувчилар... кулмаса эди, дейман-да?

— Қайта қурувчилар — бошсиз чавандоз! Демократлар — бошсиз чавандоз! Қайта қурувчи демократлар қаёққа кетяпти, нега кетяпти — ўзлариям билмайди! Қайта қурувчи демократлар ўзларини ўзлари хурмат қилмайди. Қайта қурувчи демократлар ўз қадр-қимматларини билмайди, ўз иззат-обрўларини билмайди. Шу боис, қайта қурувчи демократлар... ўзларита ишонмайди, сафдошларига ишонмайди. Оқибат, ҳузур-ҳаловатини йўқотади, жиғибийрон бўлади. Оқибат, ўзини кўз-кўз этиш, оташин нутқлар сўзлаш — қайта қурувчи демократлар учун тасалли-таскин бўлади. Оқибат, қайта қурувчи демократлар учун мансаб-мартаба, шон-шуҳрат — дори-дармон бўлади. Шундай экан, қайта қурувчи демократлар куладими, йиғлайдими — садқаи сарима!

— Хўп, яхши бориб келинг, раис бова.

Ботир фирмә йўлда теварак-атрофни томоша этиб юрди. Тўхтаб-тўхтаб юрди. Пичир-пичир этиб юрди.

Ленин ҳайкали қабатидан ўтди. Ҳайкал қабатида оёқ илди. Бахмал шляпасини бошидан олди. Ленин ҳайкалига қараб... бош эгди. Ленин ҳайкалига қараб... бош иргади.

— Саломлар бўлсин, ўртоқ Ленин! — деди.

Шляпасини бошига кўндириди. Йўлида давом этди.

Йиғилишда одам мўл бўлди.

Ботир фирмә бир четдан жой олди. Шляпасини тиззасига кийдириди. Таниш-билишлар билан бош иргаб салом-алик этди.

Раислик этувчи кириш сўзи билан йиғилишни очди.

Биринчи бўлиб Мадиев сўзлади.

— Хонимлар ва жаноблар! — деди Мадиев. — Жамият қандай бўлса, инсон ҳам шундай бўлади. Жамият қандай бўлса, ҳукумат ҳам шундай бўлади, ҳукуқ-тартибот ҳам шундай бўлади, турин-турмуш ҳам шундай бўлади. Биз яшаган жамият — социализм жамияти эди. Биз қурмоқчи бўлган жамият — коммунистик жамият эди. Биласиз, социализм жамияти ақлли шахсларни жини ёқтириб эди. Социализм ақл-заковатли шахсларни бир четга суриб қўяр эди, овозини чиқармас эди. Чунки социализм ақл-заковатли шахслардан кўрқар эди! Мана, ватанимизга ҳам озодлик шамоли уфуриб, бизга ҳам эркинлик ҳукуқи тегди. Биз ҳам ўз сўзимизни айтиш ҳақ-ҳукуқига эга бўлдик. Бунинг учун худога минг қатла шукурлар бўлсин! Биз нега етмиш йил оч-наҳор яшадик? Чунки биз социализм тузуми занжирида яшадик. Социализм тузуми қонимизни сўриб келди. Социализм меҳнат ҳақимизнинг учдан бирини бериб келди, гадойга бериладиган меҳнат ҳақини бериб келди. Натижада, биз гадойларча яшадик. Биз коммунизм учун сув текин меҳнат қилиб яшадик. Пешона теримиз билан топилган меҳнат ҳақимизни эса, СССР отли аждарҳо ўз домига тортиб келди. Биз эса, куруқ қўл билан қолавердик. СССР бизни алдади. СССР бизнинг меҳнат маҳсулотларимизни, ер ости-ер усти бойликларимизни ташиб кетди. Биз энди ўз юргимизга ўзимиз бош бўлишимиз керак. Биз энди ўз мулкимизга ўзимиз эгалик қилишимиз керак. Биз энди ҳалқ бўлишимиз керак, ҳалқ!

Гулдурос қарсаклар бўлди.

Қайта қурувчи демократлар бирин-кетин сўзлади:

— Бундан беш-олти кун олдин Москвада бўлган Орол кунлари янгича тушунча ва янгича экологик тафаккурнинг бугунги жараёндаги реал имкониятларини намойиш этди. Милионлаб инсоният умид нигоҳини тикиб турган Орол фожиаси инсониятни мудҳиш фожиалардан огоҳ этувчи аччиқ сабоқ сифатида қайд этилди. Анжуманда Орол тақдирини ҳал этувчи тадбирлар дастури олға сурилди...

— Шарқий дарёларда беш-олти йилча умр кўрувчи кета, миттигина балиқ бор. Табиат кета балиғига гўзал ва фожиали умр ато этган. Кета балиғи насл қолдириш учун юзлаб километр йўл босиб, тоза сувларга сузиб келади. Тоза сувда уруғ ташлаб... жон беради. Яъни, зурриёт учун ўзини... курбон қиласи. Биз инсонлар-чи? Авлодларга нима қолдириб кетяпмиз? Наҳотки, шу миттигина кета балиғичалик бўлмасак?

— Пахтани «оқ олтин» деб, күкларга күттардилар. Бишқа барча ноз-неъматлардан юқори күйдилар. Бу бир ёқлама сиёсат барча ноз-неъматларни далалардан суриб чиқарди. Пахта деб... Оролни мана шу фожиага олиб келди. Бу фожиалар учун пахта яккажокимлиги айбдор. Бунга йўл кўйиб берган раҳбарлар айбдор!

Минбарда оппоқ либослик бир отинбиби бўй берди. Отинбиби юз очди.

Бу — Диля бўлди! Мирзахўжаевалар сулоласидан бўлди.

«Бу жувон... суюқоёқ эди, — ўйлади Ботир фирмә. — Юз-кўзидан... ҳамон ўша-ўша! Ана, юзлари суюқ, суюқ! Кўзлари... фар, фар!»

Диля қофозини очди. Қофозини ўқиди:

— Оллои таоло якшанба куни қўёш, осмон, ерни яратди. Душанба куни ой, кун, юлдузни яратди. Сешанба куни қуш, қурт, кумурсқани яратди. Чоршанба куни сув, шамол, булутни яратди. Жумладан, дов-дараҳтни, ўт-ўланни яратди. Айни ана шу куни ризқ-насиба-да улашиб берди. Пайшанба куни жаннат билан дўзахни яратди. Ниҳоят, Оллои таоло жума куни... одамзотни яратди! Шанба куни яратмади. Оллои таоло шанба куни... дам олди! Шу билан ҳафта етти кун бўлиб қолди. Нечун ҳафта етти кундан иборат бўлиб қолди? Нечун ҳафта олти кун бўлмади ё саккиз кун бўлмади? Сабаби, тоқлик — фақат Оллои таолога хос. Тоқлик — фақат Оллои таолога ярашади. Чунки Оллои таоло ягонадир, ягона! Мен ана шу яккаю ягона Оллои таоло номидан сўрайман: совет коммунистлари орден-медалларини топширсинг!

Ботир фирмә гап тагини илғамади. Гап мағзини англамади. Деразага қараб хаёл сўрди:

«Ана энди, қайта қурувчилар худони номидан сўзлагич бўлибдилар. Келиб-келиб, худони номидан сўзловчи... одамни қаранг! Қайта қурувчилар худога ўзак келтирмасалар экан, худони тинч кўйсалар экан. Ўзи айтмоқчи, худо битта. Қайта қурувчи зоти бор... ўзини худо фаҳмлайди! Демократ зоти бор... ўзини худо чоғлайди! Ёмондан-ёмона — инсон ўз маразлигини... тоат-ибодат билан ниқоблаб яшайди. Инсон ўз абраҳлигини... шариятпешволик билан бекитиб яшайди. Инсон ўз ҳаромилигини... худога эътиқод кўйиш билан яшириб яшайди! Азал-азалдан шундай. Балога қолган... худо, худо!»

Диля чўнтагидан нарса олди. Минбарга бир кутича кўйди.

— Мана, Меңнат шұхрати ордени! — деди. — Қайси бир йили 8 март байрами мұносабати билан беріб әдилар. На илож, мен нодон олаверибман. Үйламайнетмай, олаверибман. Мен ана шу йүл қўйған хатом учун сиз азизлардан узр сўрайман! Мен ана шу айбим учун сиз яхшилар олдида ўзимни гуноҳкор деб била-ман! Қизил совет ҳукуматининг ўзидаи қизил орденини қабул қилиб олганим учун... мен сиз улуғлар олдида уятлиман, уятли! Қизил ҳукуматнинг қизил орденини кўксимда тақиб юрганим учун... мени кечиринг, мўмин-мусулмонлар, мени кечиринг!

Диля лабларини бурди. Қўзларини рўмолча билан артди. Рўмолчани оғиз-бурнига босиб... бош эгди! Ана шунда... елкалари билинар-билинмас титради. Диля... йиғлади! Диля йиғлади!

Бузуки қариса-да, ғамзаси қаримас, бўлди!

Ботир фирмә ана шунда тушунди. Ҳанг-манг бўлди. Алант-жаланг бўлди. Олазарак бўлди.

Саросима билан... орденига қаради! Кейин, минбарга қаради.

Диля юз-кўзини артди. Оғиз-бурнини артди. Янада дадил сўзлади:

— Қизил коммунистлар орден-медалини олиб келиб... мана шу ерга қўйсин! — дея, минбарни муштлади.

— Қанақа орден? Қанақа коммунист? — залдан луқма тушди.

Диля... минбарни муштлаб-муштлаб айтди:

— Собиқ партия-совет чиновниклари! Етмиш йил халқ қонини сўриб, эвазига қўша-қўша орденлар олган қизил партократлар! Пахта яккаҳокимлигини ўрнатиб, Оролни қуритиб юборган қизил партноменклатурачилар! Ана, кимлар орденини олиб келиб топшириши керак!

Ана шунда, Ботир фирмәни чап кўксида... оғриқ қўзғолди. Қўкрак ости санчди. Қўкрак ости сиқиљди.

У сиқиљиш жой усти — орденига кафтини қўйди. Орденини ушлаб қўзғолди. Орденини ушлаб юрди. Қатор оралаб юрди.

Қўли кўксида кетажак Ботир фирмәни қузатмиш ўнг қатордагилар... фирмә биз билан қўлинини кўксига қўйиб, хайрлашяпти, дея ўйлади. Улар-да... қўлинини кўксига қўйди:

— Хайр, отахон, хайр, — деди.

Чап қаторда ўтирмиш ёш-ёш йигитлар Ботир фирмәни қўли кўксиди — орденида эканини кўриб... пиқпиқ кулди! Пичир-пичир этди:

- Қара, Қизил кетди, Қизил.
- Қизилларни уст-бошиям... советский!
- Орденини маҳкам ушлаб олишини қара.
- Орденимни тортиб олади, деб кўрқяпти.
- Бечора қизилларни орден-медалидан бошқа нарсасиям йўқ.

Ботир фирмә зинапоядан қўлини ордени — кўксига қўйиб тушди.

Эшикоға олдидан қўлини ордени — кўксига қўйиб ўтди.

Эшикоға-да қўлини кўксига қўйиб, хайр-маъзур этди.

Ботир фирмә бир амаллаб ташқарилади. Йўлга тушиб олди.

Йўл бўйи гулларга қараб энтиқди. Кўм-кўк дарахтларга қараб энтиқди. Шохларда чуғур-чуғур этмиш қушларга қулоқ солиб энтиқди.

Оғир-оғир нафас олди. Чуқур-чуқур нафас олди.

Ниҳоят... юраги қўйиб юборди! Юраги озод ҳам вазмин бўлди.

«Орден оласан-а, орден оласан! — деди Ботир фирмә. — Олиб бўпсан! Сенлардан орден қарзим борми? Сенлар қачон менга орден бериб эдинг? Бу орденларни менга Йўлдош Охунбобоев берган, Шароф Рашидов берган. Орден олганларингният кўраман!»

Ботир фирмә кўкси — орденидан қўлини олди. Қулоч отиб-қулоч отиб қадам босди.

«Шартаки бўл, санамараста бўл, эви билан бўл-да! Нонкўр бўл, эви билан бўл-да! — деди. — Сенлар, ўзи, қаердансан? Сенлар, ўзи, қаерда ўсдинг? Сенлар, ўзи, кимни боласисан? Осмондан туш-а, нонкўрлар, осмондан шалоплаб туш-а, нонкўрлар! Сенлар совет тузуми туғруқхонасида туғилдинг, совет тузуми боғчи-сида катта бўлдинг. Сенлар совет тузуми мактабида ўқидинг, совет тузуми институтида ўқидинг. Бир юмалаб... журнални ойнома, деб атадинг, газетани рўзнома, деб атадинг, редакторни муҳаррир, деб атадинг. Исми-фамилиянгни... Мирзахўжа қизи, деб атадинг. Бир янгилик шу, бор ўсиш шу, бор фарқ шу! Бу қадар нонкўр бўлма-да, қайта қурувчи демократ! Сенлар, ўзи, социализмдан чиқдинг. Сенлар, ўзи, порлоқ коммунизм сари олға бораётуб эдинг. Сенлар пионер эдинг, комсомол

эдинг. Сенлар коммунист эдинг, коммунист! Ана шундай бир вақтда Москвадан... шундай, Москвадан... бир баҳт қуши учиб келди. Баҳт қуши бошинг узра айланди-айланди... Охир-оқибат — бошингга келиб қўнди. Бу баҳт қушини оти мустақиллик бўлди, мустақилик! Бу баҳт қушини оти — озодлик бўлди, озодлик! Бу баҳт қушини... ошкоралик шамоли учирив келди, демократия шамоли учирив келди, қайта қуриш шамоли учирив келди! Бундай баҳт қушига эришиш учун халқлар... ариқ-ариқ қон тўқади, ариқ-ариқ қон! Бундай баҳт қушига эришиш учун ватанлари кунпаякун бўлади, кунпаякун! Сенлар эса... тайёр ошга эга бўлдинг, тайёр ошга! Шундай экан, тайёр ошни е энди. Оғзингдаги ошни ют энди».

60

Бўсағада кампири қутиб олди.

Кампири бошидан шляпасини олди. Елкасидан костюмини олди.

— Қалай ўтди, раис бова? — деди.

— Бузуқи қариса-да, ғамзаси қаримас, дейдилар! — деди Ботир фирмә. — Гап кўп. Бари маза-матрасиз гаплар!

— Ўзи, майлис шундай бўлади-да, раис бова.

— Бу қайта қурувчилар ҳали беш-олти кўйлак йиртиши керак. Қайта қурувчиларда ўша... кўйлакни ўзи ўйқ! Қайта қурувчилар ҳали... кўйлак кўрмаган! Қайта қурувчи демократ — ялангоч қирол! Шундай, қайта қурувчи демократлар ялангоч қирол!

— Гап десанг, қоп-қоп денг?

— Яна-тагин, қайта қурувчи демократ зоти бор — фақат... худони номидан гапиради! Ўша худо — Яратганни ўзи ҳар бандасига бир арава беради. Демак, ҳар бандани ўз араваси бўлади. Ана шу аравасини йўлда қолдирган банда — одам бўлмайди! Бири икки бўлмайди. Шу боис, ҳар банда ўз аравасини ўзи тортиши керак. Деҳқон экинини экиши керак. Қурувчи иморатини қуриши керак. Олим фанини яратиши керак. Ашулачи ашуласини айтиши керак. Шоир... шеърини ёзиши керак! Ана ўша демократлар — шоир. Демак, улар шеър ёзиши керак, шеър! Бир сўз билан айтсак, ҳар банда ўз касбий аравасини тортиши керак. Ана ўшанда... қайта қуриш бўлади! Ана ўшанда... эл-юрг обод бўлади. Булар бир оғиздан Орол-Орол, дейди. Нима, қайта

Куриш демак — Орол денгизи, демакми? Қайта куриш демак — Оролни түлдириш, демакми? Яхшилаб эшитсам, қайта курувчи демократларни дарди бошқа, кампир.

— Нима экан, билдингизми?

— Ҳали айтib бераман.

Ботир фирмә ёнбошлади. Қайта курувчиларни ўйлади. Ҳаёлидан ажаб-ажаб гаплар ўтди.

«Биз учун бор эъзоз-эҳромларни нобуд этмоқдалар. Улуг сиймоларни инкор этмоқдалар. Табаррук бисотларни тортиб олмоқдалар, — деди. — Ўзи... бисотда бирор нима қолдими? Менда, манави... кампирим қолди! Бор-йўқ бисотим — кампирим. Топган-тутган хазинам — кампирим. Суянган қанот-қўйруғим — кампирим».

Ботир фирмә кампирига тикилиб ўйлади. Кампиринга тикилиб сўзлади:

— Кампир, шу қайта курувчи демократлар бир кун эмас, бир кун... коммунистлар, кампирларингни топширглар, деб қолса-я!

— Нима-нима?

— Коммунистлар, кампирларингни олиб келиб топширглар, деб қолса... нима қиласмиш?

Кампир сокин кулди. Бош чайқаб кулди. Оғиз ушлаб кулди.

— Ҳар нарса деяверманг, раис бова. Даққионусдан қолган кампир кимга керак?

— Ия, ўттиз тўққизинчи йилдан қолган орденни топшир, деган қайта курувчи... кампирингни топшир, демайдими?

Кампир кетига чалқайиб-чалқайиб кулди.

61

«Булар бунча бақиради? Оғиз фақат шуларда борми? — дея ўйлади Ботир фирмә. — Гапингда мазматра бўлса, бақирма. Одамга ўхшаб гапир. Одатда, бошида ақл-фаросат йўқлар бақириб-чақиради. Бақириб-чақириш эса... ожизлик аломати!

Булар бу ожизлик билан... нимани қайта куради? Қандай қайта куради? Қачон қайта куради?

Қайта курувчилар олдин ўтмиш-кечмишини унутди. Ўзларини кимлигини унутди. Энди эса... келажагинида унутди!

Келажак қайтиб келмайди!

Келажакда эл-юрт нима бўлади? Ўзлари келажакда ким бўлади?

Билмайди, бирори-да билмайди. Келажакни билиш учун — ўтмишдан сабоқ олиш керак. Ана шу сабоқлар заминида келажак режаларини тузиш керак.

Ўтмишсиз келажак йўқ!

Ўзбек зиёлилари нега бечора бўлиб қолди? Нега гариф-бенаво бўлиб қолди? Нега муштипар бўлиб қолди?

Боиси, зиёлилар... ўзини йўқотди! Ўзини зиёлиман деб юрувчилар оломон бўлиб қолди. Ўзини олим дея, кўкрак керувчилар сояга ўхшаб қолди. Ўзини арбоб дея, кўкрагига урувчилар қўғирчоқ бўлиб қолди.

Зиёлиларни... бир гурӯҳ ўнгга бошлади. Бир гурӯҳ чапга бошлади. Зиёлилар эрталаб ўнгга борди, пешинда чапга борди. Қайта қурувчилар нима деса — бош иргаб ўтириди. Чапак чалиб ўтириди!

Оқибат, зиёли ўз юзини йўқотди. Ўз сўзини йўқотди. Ўз юзи йўқ, ўз сўзи йўқ одам... зиёли бўлармиди?

Энди нима бўлади? Қайта қурувчилар зиёлиларни чиқитга чиқариб ташлайдими? Қаерга олиб бориб ташлайди? Зиёлилар ҳали соғ-омон-ку? Соғ-саломат зиёлини чиқиндига ташлаб бўладими?»

Ботир фирмә йиғилишда бўлмиш гапларни бир-бир ёдлади. Гапларни ўзича мушоҳада этди.

— Мана бу зотлар зиёли эмас! Йўқ, зиёли эмас! Булар халқдан чиқсан одамлар...

«Мадиев шундай дедими? Ҳа, Мадиев шундай деди, — ўйлади Ботир фирмә. — Хўп, Мадиевчасига ҳам борайлик. Чин, биз халқдан чиқдик. Чин, биз шунчайки одамлар. Хўп, одам шунчайки бўлмай, қанчайки бўлади? Хўп, одам халқдан чиқмай, қаердан чиқади? Одам... ердан чиқадими? Одам... молдан чиқадими?»

Мадиевни шеърлари-да шунақа! Шеърларига: «халқ ўлида», «халқ оҳангларида», деб қўяди.

Эй, фитна шоир, халқ ўлида ёзмай, кимни ўлида ёзасан? Сигир-бузокларни ўлида ёзасанми? Қўй-қўзиларни ўлида ёзасанми?

Мадиевлар ўзини авангард-авангард, дейди. Илғор, демоқчи-да?

Менимча, авангард... елвизак, елвизак, демак! Адабий авангард — адабий елвизак, демак!

Совет даврида эшиклар берк эди. Адабий елвизаклар... адабиёт эшигидан киролмас эди! Кўча-кўйда елиб-елиб... дунёдан ўтиб кетар эди.

Демократия даврида барча эшиклар баралла очилди. Адабий елвизаклар адабиёт эшигига... бостириб кирди!

Адабий елвизаклар йўлида учрамиш адабиёт дарғаларини... белидан олиб, беланги қилди. Бошидан олиб, тумов қилди. Бурнидан сув оқизди, кўзидан ёш оқизди. Оғзидан қон оқизди...

Эшикдан елвазакдай хуриллаб кириб... Адабиёт тожтахтига ёпишди! Шу тож-тахтни олсак... Адабиёт бизники, дея ўйлади.

Афсус бўлсин, елвизак — ўз оти ўзи билан елвазак! Фувв этиб ўтиб кетади!

Ким асл зиёли?

Имон билан яшагувчи, ноҳақликка чидолмовчи, хўрлик — золимликдан нафратланувчи, чин инсон бўлиб яшагувчи зот — асл зиёлидир!

Мадиевлар зиёлими? Зиёли бўлса, ушбу талабларга жавоб берса оладими?

Мана, Мадиев оғиз кўпиртириб нутқ сўзлади. Тош отмаган одами қолмади. Ўртоқ Лениндан тортиб... менгача тош отди! Тош отишидан мақсади — мансабдор бўлиш!

Ана шу тош отишини ўзи... Мадиев ор-номуссиз эканини кўрсатади. Шон-шавкатсиз эканини билдиради. Юз-гуурсиз эканини айтиб туради.

Ор-номуссиз одамга эл-юрт тақдирини топшириб бўладими? Юз-гуурсиз одамга эл-юрт ихтиёрини бериб бўладими?

Дунёда қалтис ишлар кўп. Ана шундай қалтис ишлардан бири... тентак одам қўлига милтиқ бериш, юзсиз одам қўлига мансаб бериш!

Эл-юрт учун иккови-да қалтис!»

62

Матбуотда Орол денгизини кутқариш ҳақида хабар берилди.

Деворларда эълон осилди.

Йифилишга оммавий равишда таклиф этилди. Телефонда таклиф этилди. Оғизма-оғиз таклиф этилди.

Ботир фирмә телефонда таклиф этилди. Шахсан таклиф этилди!

Йифилиш хиёбонда бўлди.

Хиёбон мўл-мўл одам бўлди.

Ботир фирмә мөхнат ва уруш ветеранлари қаторида ўтириди.

«Үзи, одам йиғилса йиғилгүдек ташвиш. Бундай ташвиши күпайишиб ҳал этмаса бўлмайди, — дея ўйлади Ботир фирмә. — Орол эл-юрт дарди бўлиб қолди. Мен ҳам шу эл-юртни бир заррасиман. Аммо-лекин шахсан мен Оролга қандай ёрдам берсам бўлади? Коммунист Эсонов, сиз Оролга қандай ёрдам берасиз, десалар нима дейман? Олди-қочди гаплар билан Оролни кутқариб бўлмайди. Баландпарвоз сафсаталар билан Оролга ёрдам бериб бўлмайди. Мен... пенсия пулимдан Оролга бераман! Мана шу ойлик пенсиямни Орол фондига бағишладим, деб айтаман».

Оролпаноҳлар бирин-кетин минбарлади.

Оташин-оташин нутқлар билан Оролни... тўлдириб-тўлдириб ташлади! Лирик-лирик шеърлар билан Оролни... кутқариб-кутқариб ташлади!

Минбарга ашаддий оролпаноҳ Мадиев кўтарилиди. Йиғилиш аҳлига қараб бош иргади. Ўнг қўлини кўксига қўйиб бош иргади. Бирдан... асл мақсадга ўтди:

— Хонимлар ва жаноблар! — деди. — Мен умримга ачинмайман, мен марксизм-ленинизмни ўрганишга кетган вақтимга ачинаман!

Йиғилиш гувв-гувв этди. Йиғилиш қий-чув этди. Йиғилишчувв-чувв этди.

Мадиев қарсаклар остида қолди.

Мадиев кўкрак чўнтағидан бир ҳужжат олди. Ҳужжатни халқقا пешлади.

— Мана, КПСС билети! — деди. — КПСС, КПСС... Барча тараққийпарвар мамлакатларда ижтимоий-иқтисодий қонун-қоидалар инсон ҳуқуқлари манфаатидан келиб чиқади. Бизда эса, етмиш йил мобайнида ҳамма нарса ҳукумат манфаатлари нуқтаи назаридан келиб чиқди. Ҳукумат ким? КПСС! Чунки КПСС етмиш йил давомида ҳукмрон бўлиб келди. Коммунистик партия етмиш йил давомида мамлакатни бошқариб келди. Коммунистик партия етмиш йил мобайнида биз сизларга фаровон турмуш ато қилдик, деб қайта-қайта уқтириб келди. КПСС бизга гўзал ҳаёт тақдим этган эмиш! Буни қаранг-а! Мана шу қип-қизил билет бизга ҳаёт ҳадя этибди! Шугина билет-а! Демак, шу қизил билет бўлмаса — ҳаёт бўлмас экан-да? Шу қалин қофоз бўлмаса — биз яшамас эканмиз-да? Буни қаранг-а! Мен энди мана шу қуруқдан-куруқ КПСС қонун-қоидаларига қараб эмас, тараққийпарвар жаҳон мамлакатларида

қабул қилингандын умуминсоний қонун-қоидалар, умумбашарий хүлкә-ахлоқ талаблари асосида ўз тақдиirimни ўзим ҳал қылмоқчиман. Мени шу кундан бошлаб Совет Иттифоқи Коммунистик партияси аъзоси ҳисобلامасликларингизни сўрайман!

Гулдурос қарсак бўлди. Узлуксиз қарсак бўлди.

Мадиев КПСС билетини минбарга ташлади. Халқа қарата қўл силкиди.

«Наҳотки, партия ташкилотлари бефарқ қарайди? — ўйлади Ботир фирмә. — Наҳотки, коммунистлар сукут сақлайди?»

Минбарга Диля кўтарилиди.

— Ҳа, КПСС — партия эмас эди! — деди Диля. — КПСС ҳукмрон эди, КПСС ҳоким эди! Гўрингдан ту-тун чиқкур Брежнев КПСС яккаҳокимлигини янги Конституция билан қонунлаштириб ҳам берди. Камина ана шундан кейин КПСС сафига ўтишга мажбур бўлдим. Чунки кўриб турибсиз — камина бир ожизай заифа, КПСС эса, диктатор эди! КПСС золим эди! Биз ожизай заифалар диктаторлик зулми остида ўз... аёллик иффатимизни йўқотиб қўймаслигимиз учун КПСС сафига киришга мажбур эдик. Биз заифалар, золим КПСС қамчиси остида... ногирону нотавон бўлиб қолмаслигимиз учун КПСС взносини тўлаб туришга мажбур эдик. Атоқли шоиримизFaфур Гулом айтганларидек, бизнинг аёлларга ҳаё фазилат! КПСС учун эса — ҳаё бегона, ор-номус бегона! Мен энди КПСС сафида қололмайман! Номи улуғ, супраси қуруқ КПСС сафида қололмайман! Шундай бир жирканч партия сафига ўтганим учун мен сиз қоракўзлардан... кечирим сўрайман! Шундай бир жаллод КПСС сафида йиллаб взнос тўлаб юрганим учун мен сиз қоракўзлардан... минг бора узр сўрайман! Мени афв этинг, яхшилар! Мана, жаллод КПСС билети!

Диля КПСС билетини минбарга ташлаб тушди.

«Буларни йўлдан қайтариш керак, — ўйлади Ботир фирмә. — Булар ҳали ёш коммунистлар. Буларга тушунтириш ишлари олиб бориш керак. Буларни партия ўқув юртларига, сиёсий курсларга ўқишига юбориш керак. Ана ўшанда кўзлари очилади. Ана ўшанда КПСС нималигини англаб етади. КПССни лаънатлаб бўлмайди. КПССга шак келтириб бўлмайди».

Мадиев боши билан имо этди — қайта қурувчилик бир ласта шохча қўлтиқлаб келди. Шохчаларни ўртага тўдалаб қўйди.

Мадиев нигоҳи билан имо этди — қайта қурувчилар бир шиша ермойи олиб келди. Ермойини шохчаларга сачратиб сепди.

Мадиев құли билан ишора этди — қайта қурувчилар гүгүрт қутисини оча-оча келди. Шохчалар остидан чирсиллатиб гүгүрт ёқди.

Шохча ўтин олов олди. Олов одам бүйи күтарили.

Мадиев минбардан КПСС билетини олди. Олов олдига келди. Мисоли ўлик сичқонни думидан ушлаб күттармишдай... КПСС билетини учидан ушлаб күттарди. Мисоли ўлик сичқонни теваракка күрсатмишдай... КПСС билетини боши узра айлантириб-айлантириб күрсатди.

КПСС... ўлик сичқон мисол шалвир-шалвир этди!

Мадиев КПСС билетини... олов учига тутди!

Олов учи билан... КПСС учи учрашди. КПСС билан олов... юзма-юз бўлди!

КПСС олов олди! КПСС ёнди!

Мажлис аҳли қийқириб қарсак чалди. Мажлис аҳли ҳайқириб олди.

Ботир фирмә ўтиrolмади. Сапчиб турди. Тишлари фижир-фижир этди. Кўллари мушт бўлди. Муштини шим чўнтағига тиқди. Халқقا жовдираб боқди. Жовдираб-жовдираб боқди.

Халқдан најот бўлмади! Халқдан паноҳ бўлмади!

КПСС... лов-лов ёнди!

Мадиевни қўли куйди — КПССни... ташлаб юборди!

КПСС олов ичига тушди. КПСС олов ичиди қолди!

Мадиев йиғилиш аҳлига қараб таъзим этди. Қўлини кўксига қўйиб таъзим этди.

Энди, Диля келди. Мадиевни қилиқларини такорлади. Мадиев нима қилди — Диля ҳам шуни қилди.

Йиғилиш аҳли Диляни ҳайқириқ-қарсаклар билан олқишли.

Кейин, учинчи қайта қурувчи, тўртинчи қайта қурувчи, бешинчи... эллигинчи қайта қурувчи демократ келди!

Ботир фирмә... элликдан кейин таҳликада қолди. Довдираб қолди. Эс-хушини йиғолмай қолди.

Ботир фирмә... гимн айтатётган арбоб мисол ғоз-ғоз турди. Гимн эшитаётган коммунист мисол мағрут-мағрут турди.

КПСС... олов бўлиб ёнди! Олов бўлиб осмон ўрлади. Буралиб-буралиб ўрлади.

«Үртоқ Ленин сиймосидай мангу олов! — деди Ботир фирмә. — КПСС ғояларидай нурафшон олов! Коммунист қалбидай оташин олов! Коммунист фаолиятидай шон-шавкатларга, меңнат жасоратларига бой олов!»

Ботир фирмә беихтиёр... чап күкрагини ушлади. КПСС билетини... устидан ушлаб-ушлаб қўйди. Кафтини... билетлик чўнтағи устига қўйиб турди.

«КПСС яраланди! Жуда ёмон яраланди! — деди Ботир фирмә. — Аммо-лекин КПСС ўлган эмас! Йўқ, КПСС ўлган эмас...»

Ботир фирмә кетга тис бўлди-тис бўлди — йифилишдан чиқиб олди.

Боши букик, қадам олди. Боши кўксизда, қадам олди. Бехаёл қадам олди.

Уйда кўрпа-тўшак қилиб ётиб олди.

63

«Тўйдим, мен энди кетаман!»

Ботир фирмә ётди-ётди — ана шундай хулосага келди.

«Бўлди, мен яшашдан чарчадим, — деди. — Мехроқибат, ҳурмат-иззатлардан чарчадим. Мансаб-амал, шон-шуҳратлардан чарчадим. Қаҳр-ғазаб, нафрат-аламлардан чарчадим. Майли, мендан нафратлансинглар, мендан жиркансинглар. Мендан ҳазар қилсинглар. Тўйдим, мен яшашдан толдим.

Ҳар бандани ўз сифинажак қиблагоҳи бўлади. Ўз сифинажак улуғ зоти бўлади. Сифиниш эса — эътиқоддан бино бўлади. Эътиқодсиз яшаб бўлмайди!

Мен пионерга эътиқод қўйиб яшадим. Мен комсомолга эътиқод қўйиб яшадим. Мен партияга эътиқод қўйиб яшадим.

Үртоқ Ленин улуғ зотим бўлди! Жонажон КПСС қиблагоҳим бўлди!

Мен улуғ зотим Ленин учун ички-ташқи ғанимлар билан курашдим. Жон олиб, жон бердим. Мен ўртоқ Ленин ғанимини ўз ғанимим деб билдим!

Мен қиблагоҳим КПСС учун неча-неча беш йилликларни ошириб-ошириб бажардим. Неча-неча ўн йилликларни бажариб-бажариб ташладим. Мен қиблагоҳим КПСС учун миллион-миллион тонналаб пахта териб бердим!

Қиблагоҳим КПСС барча ютуқларим илҳомчиси ва ташкилотчisi бўлди!

Инсонда ватан битта бўлади. Ватан ёлғиз бўлади.
Шу боис — ватанга оҳанжома тақиб бўлмайди. Ватанга
упа-сурма қўйиб бўлмайди. Ватанга гард юқтириб
бўлмайди.

Ватан ўз оти ўзи билан — ватан!

Жуда бўлса — ватанга она сўзини қўшиб айтса
бўлади. Боиси, ватан билан она айрилмасдир. Ватан
билан она мангудир. Шу боисдан — она-ватан, деймиз.
Она-ватан!

Аммо-лекин мен — коммунист Эсонов, ватанга...
социалистик сўзини қўшиб айтдим! Социалистик ватан!
Она қолиб... социалистик номини кўлладим! Она
қолиб... социалистик ватан, деб айтдим!

Бирдан... бари хароб бўлди. Бари сароб бўлди.

Ёмондан-ёмони — энди бу харобани тиклаб бўлмайди.
Энди бу саробани тўлдириб бўлмайди».

Ботир фирмачап ёнига ағдарилиб ўйлади, ўнг ёнига
ағдарилиб ўйлади. Чалқанча ётиб ўйлади. Қарори қатъ-
ий бўлди:

«Тўйдим, мен энди кетаман!»

64

Одам қариса... умидини йўқотади. Умидини бой беради.
Келажакдан умидини узади.

Одамни ана шу... одам қилиб туради. Одамни ана
шу умид... суяб юради. Шу боис, одам... умидсиз яшай
олмайди!

Одам ҳамиша... уфқа қараб яшайди. Уфқа қараб
юради. Уфқа қараб хаёл суради. Уфқа қараб орзу
қиласди. Уфқа қараб... дуои фотиха ўқииди.

Умид — одам учун мисоли уфқ. Умид — одамзот
учун одамзот уфқи.

Оlamни охири — уфқ. Odamni oxiри — umid!

Olamni sўnгgi tаянч нуқтаси — уфқ. Odamni sўnгti
tаянч нуқтаси — umid!

Olam ufkqa borib tamom bўлади. Odam umidinini
йўқотиб tamom bўлади. Odam қариса, ana shu tаянч
нуқта — umidinini йўқотади!

Шу боисдан, қари одам юрса — оёғи остига қараб
юради. Қари одам ўтиrsa — ерга қараб ўтиради.

Ботир фирмача да ана шундай бўлди!

«Ўзи, пешонам шўр экан, — деди Ботир фирмача. —
Бир донишманд айтиб эди: худо ёмон кўрган бандаси-
ни... қайта қуриш даврида яратади, деб эди. Худо шўри

куриган бандасини... ўтиш даврида яратади, деб эди. Шу гап чин экан. Мен шүрпешона эканман. Мана, умрим қайта қуриш билан ўтди. Қайта яратиш билан ўтди.

20—30-йилларда ўртоқ Ленин кур-кур, деди. Мен совет давлатини қурдим. 30—40-йилларда ўртоқ Сталин ярат-ярат, деди. Мен социализм жамиятини яратдим. 40—50-йилларда Йўлдош Охунбобоев барпо этбарпо эт, деди. Мен завод-фабрикалар барпо этдим. 50—60-йилларда ўртоқ Хрущев чўлларни ўзлаштир-ўзлаштир, деди. Мен чўл-биёбонларни боф-бўстонга айлантиридим. 70—80-йилларда ўртоқ Брежнев билан ўртоқ Рашидов мўл-мўл пахта бер-пахта бер, деди. Мен ҳар йили олти миллион тонналаб «оқ олтин» териб бердим, олти миллион!

Партия-хукумат нима деса — лаббай, деб жавоб бердим. Эл-юрт учун қўлимдан келган барча ишни қилдим. Қайта қурдим, қайта туздим, қайта яратдим!

Қайта, қайта, қайта... умрим ана шу «қайта» сўзи билан ўтди! Таржимаи ҳолим ана шу «қайта» сўзи билан тўлди!

Мана энди, тағин... қайта қуриш! Нимани қайта қураман? Қарийб бир аср... қайта қурдим! Бир аср... қайта яратдим! Бир аср йўқни бор қилдим! Бир асрлик меҳнатим кам бўлдими?

Энди нима қилсам — тинч бўламан? Нима қилсам — кур-кур, деган гаплардан қутулиб... ором оламан? Нима қилсам — ярат-ярат, деган гаплардан қутулиб... оёғимни узатиб ётаман?»

Ёлғиз бир йўл қолди. Ягона йўл қолди...

У умрида барини кўрди: XX асрни бош-адоқ кўрди. XX асрни ўз кўзи билан кўрди. XX асрни қўли билан ушлаб кўрди. XX асрни ўз бошидан кечирди.

Ҳаётда маъно қолмади. Турмушда мазмун қолмади. Яшашда мақсад қолмади.

Факат бир йўл қолди. Энг қийини қолди. Энг ёмони қолди.

Ана шу ёмон йўлга... қандай етса бўлади? Қачон шу... ёмон кун келади?

Қачон шу... қайта қурунчилардан қутулади?

Одамда ички бир руҳ-қудрати бўлади. Уни ўз-ўзини балогардонлардан ҳимоя этиш ички руҳ-қудрати деса бўлади. Ўз-ўзини бало-қазолардан авайлаш руҳ-қудрати деса-да бўлади.

Бу руҳ-қудратни енгиб бўлмайди. Бу руҳ-қудратни даф этиб бўлмайди.

Аммо бу рух-құдратни улуг мақсадлар йүлида фидо этса бўлади. Масалан, эл-юрт йүлида фидо этса бўлади. Эл-юрт йүлида садақа этса бўлади. Эл-юрт йүлида қурбон этса бўлади.

Айнан... ўлим инсон ким эканини кўрсатади! Инсон тош-тарозисини... тарозига қўйиб кўрсатади. Инсон қиёфасини ойнага солиб кўрсатади. Инсон қадр-қимматини... оппоқ қоғозга битиб кўрсатади.

Асл инсонни асл баҳосини... ўлим беради! Шу боис, асл инсон учун ўлим писанд эмас! Асл инсон ўлимни очиқ юз билан кутиб олади. Асл инсон ўлимни табасум билан кутиб олади.

Боиси, асл инсон эл-юрт учун қўлидан келмиш эзгуликни бажариб бўлади. Асл инсон эл-юрт олдида ўз бурчини адо этиб бўлади.

Ана шунда, асл инсон ўз ҳаётидан кўнгли тўлади. Асл инсон ўз яшашидан кўзи тўяди.

Теварак-бошига муニс-муニс боқади. Тўқ кўнгил билан боқади. Тўқ кўз билан боқади.

«Мен энди... кетақолай», дейди.

Инсон дунёга келди, дейдилар. Чин, инсон дунёга келади. Аммо инсон дунёга ўзи келмайди. Ўз оёғи билан келмайди.

Боиси, инсон онаси кўкрагида юролмайди. Оёқлари бўлади, аммо юролмайди. Шу боис — инсон онаси кўкрагидан ёруғ дунёга қадам босиб тушолмайди.

Инсон туғилса: «инга-инга — мен келдим», дея овоз беради. Инсонни биринчи бўлиб... зана кўтариб олади! Энага бағрига босади. Энага инсонни ўраб-чирмайди. Энага инсонни йўргаклайди.

Энагадан кейин... ҳамширалар инсонни айланиб-ўргилади. Дўхтирлар инсонни кўз қорачиғидай авайлайди.

Энди, инсон: «дод, дунёдан кетаман», деса-чи?

Бирор... отинг нима, демайди! Бирор... ҳолинг нима, демайди. Ҳатто, бирор... итмисан-эшакмисан, демайди!

«Хай, номард дунё, номард дунё! — деди Ботир фирмә. — Дунё нотанти экан, нотанти! Одам дунёга келаман деса... Инга-ингани эшитиб... қулоқлар динг бўлади! Энага, ҳамшира, дўхтирлар қучоқ очиб келади! Одам: «дунёдан кетаман», деса... Бирор зот итмисан-эшакмисан, демайди! Одам... дардини кимга айтишини билмайди! Кампирга айтсаммикин? Ҳай-ҳай,уввос солиб йиглайди! Дунёни бошига кўтаради! Дўхтири-

дан маслаҳат сўрасаммикин? Йўқ, чол айниб қолибди, дейди. Унда, инсонни дунёдан ким кузатиб қўяди? Энага тоифа бир зот борми? Кимга мурожаат этса бўлади? Кимдан маслаҳат сўраса бўлади?»

Ботир фирмә ўйлади. Бирдан тан-жони илиқ-илиқ бўлди. Юз-кўзлари ёруғ-ёруғ бўлди.

У шундай маслаҳатчини топди. У шундай энагани топди:

«Гўрков! Қари одамни энагаси — гўрков!»

65

У улкан дарвоза олдида оёқ илди.

Дарвоза ўнгига турмиш тошга чўқди. Ўткинчи-кеткинчиларга қараб ўтириди. Бирорта таниш-билиш учратмади. Кўнгли тинч бўлди. Оҳиста қўзғолди.

Темир дарвоздан ичкарилади.

Ана шунда, ажаб бир синоатни кўрди: сонсиз қабрлар. Панжара билан ўроғлик қабрлар. Ҳовли мисол ўроғлик қабрлар. Ялт-юлт сағаналар. Мармар плиталар. Оҳанжома тошлар. Ёлғизоёқ йўллар...

«Шаҳар, мисоли шаҳар! — деди Ботир фирмә. — Бу шаҳар абадий уйқуда ётади. Мангу оёқ узатиб ётади. Бу шаҳар кўзларини юмиб ўйлайди. Фақат ўйлайди. Ана, одамзотни ибтидоси! Ана, одамзотни интиҳоси! Одамзотни сўнгги макони — бир парчагина ер. Одамзотни сўнгги макони — бир сиқимгина тупроқ. Барча инсон ана шу маконга келади. Инсон қип-яланғоч келади. Инсон шип-шийдам келади. Мен... ҳаммадан олдин келаман! Ўз оёғим билан келаман!»

Ботир фирмә марҳумлар шаҳри оралаб юрди. Марҳумлар йўлаги бўйлаб юрди. Теварак-бошга кўз солиб юрди. Бўш жой... бўш жой тополмади!

Марҳумлар шаҳри шу қадар сераҳоли бўлди, шу қадар тифиз шаҳар бўлди!

У марҳумлар шаҳри оралаб юрди-юрди, бир қулбага дуч келди. Қулба эшигини қия очиб қаради: ичкарида бир одам устачилик қилиб ўтириди.

Уста Ботир фирмәга бош иргади. Асбоб-анжомларини ёнига қўйди. Ботир фирмәни ичкари таклиф этди. Бир думалоқ кундани кўрсатди.

Ботир фирмә думалоқ кундага ўтириди. Устадан ҳолаҳвол сўради.

Уста бош иргаб-бош иргаб жавоб берди. Ботир фирмәга бир пиёла чой узатди.

Ботир фирмә кулба ашқол-дашқолларини томоша этди. Баш иргаб-ирғаб томоша этди.

— Хүш, келинг-келинг? — деди уста.

— Шундай... Ўтган-кетганларни ёдга олиб дегандай? — деди Ботир фирмә.

— Яхши, яхши. Ўтганларни хотирлаш савоб иш. Баъзи бирорлар ўз ота-онасини қабри қаердалигини билмайди. Ана, обод қилиб қўйдик. Айланиб кўришингиз мумкин.

— Айланиб кўрдим. Хўп обод шаҳар бўпти!

— Қанақа бўпти-қанақа бўпти?

— Обод шаҳар бўпти!

— Шаҳар? Ҳа, тилингизга бол, тилгинангизга бола! Шаҳар қилиб қўйдик-да, ҳа, шаҳар! Баъзи бир қабристонларни кўриб, одам ҳам тириклар шаънига ачинади, ҳам марҳумлар ҳолига ачинади. Деворлари нураб тушған супуриб-сидирилмаган, моллар оёқости қилган. Ўшанақа қабристонларни кўриб, одам... ўлишгаям қўрқади! Одам ўлишиниям билмайди, қолишиниям билмайди! Ана, бизни шаҳримиз — ярақлади! Бизни шаҳримизни қўрган одам... ўлгиси келади! Ўлган сайнин, ўлгиси келади! Бизни шаҳримизни қўрган одам... тезроқ омонатимни топшириб... шу шаҳардан макон топсам дейди!

— Раҳмат, раҳмат...

Ботир фирмә бош иргади. Ботир фирмә дудукланди.

«Биз ҳам келадиган бўлдик, ука», дейишига бир баҳя қолди!

Аммо нафасини ичига ютди. Гапни бошқа ёққа бурди. Асл мақсадга ўтди:

— Сиз бу шаҳарда кўпдан буён ишлайсизми, ука?

— Шу, йигирма йиллар бўп қолди-ёв. Нима эди?

— Ҳалиги... гўрков, дегич одамлар ҳам бўлар эди?

— Бор, гўрков бор. Гўрковни кулбаси мана буёқда.

Шаҳарни ўнг бурчагида. Бирор иш бўлса айтаверинг, хизматингизга тайёрман.

— Сиз...

— Мен тошга битик битувчиман. Олдин тош қўювчи эдим. Кейин, маҳоратим ошди. Тошга шакл берувчи бўлдим. Ҳозир, тошга битик битувчи бўлиб хизмат қиляпман. Охир-оқибат, шу шаҳарлик бўлиб қолдим. Ҳудога минг қатла шукур, менча бўлган ҳам, бўлмаган ҳам бор.

— Чин, чин. Тошга битик битишни ўзи бўладими? Мана шу қабр тошлар тайёр мармарга шакл берилиб қилинадими ё бирор-бир қолипга солиб тайёрланадими?

— Асл сағаналар соф мармардан бўлади. Шунчаки сағаналар цементдан бўлади. Кум ва мармар увоқлари аралашмасидан бўлади. Барчаси тайёр ҳолга келтирилгач, мармар плитаси ёпишириллади. Ана ундан кеъин, мархумни исми шарифи ҳусниҳат билан ўйиб ўйиб битилади.

— У-у-у, ташвиши кўп экан!

— Ҳа-да! Ўлишни... ўзи бўладими? Ўлишни... чидалганга чиқарган!

— Чин, ўлишни ўзи бўлмайди. Ҳозир танқисчилик даври. Ашқол-дашқолни қаердан топяпсиз?

— Бир инсон жон бериб келади-ю... тош топмаймизми? Топамиз! Тошларни мармар заводидан сотиб оламиз. Арматура билан цементни дуч келган қурилиш иншоотларидан олиб келамиз. Шағал-күм деганларни ариқлардан оламиз.

— Шундай қимматбаҳо тошлар, сағаналар, панжалар... Менимча, бу нодонлик, манманлик аломати деб ўйлайман. Дунёдан ўтганлар кетидан шон-шуҳрат, обрў олмоқчи бўлиш, деб ўйлайман.

— Энди, манави беш қўл баравар эмас, отахон. Ҳаётда ҳаром пулини қаёққа қўйишни билмай юрган тентаклар кўп. Аслида, эскичада... қабр тош қўйиш гуноҳ! Ҳа, қабр тош қўйиш гуноҳ! Мусулмончиликда қабрни тошлар билан бостириб қўйиш ман этилади. Аслида, мусулмончиликда қабрлар ер билан бир текис бўлиши керак. Қабрлар ер билан баравар бўлиши кепрак. Пайғамбарларимиз ҳам ана шундай йўл-йўриқ берганлар. Пайғамбарларимиз қабрлар устига фақат биттагина белги қўйишни буюрганлар. Сабаби, Расулуллоҳ алайҳиссалом Усмон ибн Мазъун қабри бошига биттагина тош қўйганлар. Бу тош: «Биродарим қабри қаердалигини билишим ва бошқа қазо қилган уруғларимни ана шу қабр қабатига олиб келиб дағн этишим учун белгидир», деган. Расулуллоҳ алайҳиссаломимизни ўз қабрлари ҳам ердан бор-йўғи бир қаричгина баланд, холос. Шу сабабдан ҳам қабрлар бошига фишин бинолар қуриш, бетон оҳанжомалар ўрнатиш, суратлар ўйиб солишни асло буюргмаганлар.

— Мен ҳам шундай деб ўйлайман. Қайтанга совет даврида яхши эди.

— Тұғри, совет даврида халқ қонунлардан құрқиб... камтарона яшар эди! Совет халқи инсоф билан иш қилар эди. Совет халқи оғзини катта очмас эди.

— Совет халқи күп сабр-қаноатли халқ эди. Совет халқи бор бўлсаям, йўқ бўлсаям... борига шукур қилар эди! Совет халқи қорни оч бўлсаям... борига шукур қилар эди! Боиси, совет тузуми күп халқпарвар тузум эди, күп меҳр-оқибатли тузум эди. Совет тузумини байналминаллигини айтмайсизми, байналминаллигини!

— Лекин совет давриниям ташвишлари күп эди. Шу бугунгидай эсимда: совет раҳбарлари сиёсий тафтиш учун келар эди. Сағаналардаги: «Худо раҳмат қилисин», «Жойи жаннатда бўлсин», деган битикларни ўчиририб ташлар эди. Мармар тошлардаги ярим ой шаклларини ўйдиртириб ташлар эди. Қабрларни номнишонсиз қолдирганлари камдай, «Яна шундай тақрорласам, жиной жавобгарликка тортинглар», деган тилхат ёздириб оларди.

— Мабодо ўшалар орасида... мен йўқмидим?

— Йўқ, сиз йўқ эдингиз. Бўлсангиз, танир эдим. Раҳбарлар ҳам ҳар кил бўлади. Ичиди бир... худо безориси бор эди! Худо йўқ-худо йўқ, деб дўқ урап эди. Мана, худо бор экан, бечорани... жинни қилиб қўйибди!

— Жинни? Йўғ-е?

— Ҳа-да! Савдои бўлиб, жиннихонада ётган эмиш! Фамилияси... ҳа, фамилиянг қурсин... ҳа-ҳа, Ражабов, Ражабов! Падарингга лаънат, бир келиб: «Тошлардаги дуои фотиҳаларни ўчири», деди. Икки келиб: «Сағаналардаги байт-ғазалларни ўчири», деди. Жонга тегиб эди! Ана, худони ўзи кўрсатди. Жинни қилиб қўйди, жинни!

— Ражабов... Ражабов... ҳа, таниш фамилия, таниш. Жинни эмасдир-е?

— Энди, психбольницада ётгандан кейин... ким бўлади? Имом-хатиб бўладими? Албатта, жинни бўлади-да!

— Ражабов, Ражабов...

— Ана ўша: «Барча қабр тошлар устида беш қирралик юлдузлар порлаб турсин», дея буйруқ бериб кетар эди. Буёғига нима дейсиз?

Ботир фирмә нафас ютди. Қилт этиб ютинди. Дераздан ташқари қараб олди. Бирдан сергакланди. Бирдан жонланди.

— Бизга... беш юлдуз яхши! — деб юборди.

— Хўп, сиз омонатингизни бемалол топшириб келаверинг. Буёғини бизга кўйиб беринг.

- Нима қилай-нима қилай?
— Сиз олдин омонатингизни бериб келинг. Буёғи-
ни биз боплаймиз!

66

Одамзотни ёши қайтса... маросимма-маросим юра-
ди. Маъракама-маърака юради. Чақирса-да боради, ча-
қирмаса-да боради. Орқаворатдан эшитиб қолса-да, бо-
ради. Гап йўқ, сўз йўқ — қўли кўксига кириб боради.

Одамзот мартаба-mansabda эканида... ана шу дар-
гоҳларга қўй сўйиб чақирса-да бормайди! Одамзот оёғи
узангига эканида... ана шу маросимларга ялиниб-ёлвор-
са-да бормайди!

Ботир фирмә-да ана шундай бўлди.

— Бир профессор қазо қипти, дейишяпти, — деди
кампири.

— Худо раҳмат қилсин, нечада кетибди?

— Ҳали пайғамбар ёшига етмаган экан. Бир бало
касал экан, дейишиди.

— Худо раҳмат қилсин. Дард ёмон, ўз вақтида қарат-
маса ёмон.

Ёнбошлаб ётмиш Ботир фирмә кўзғолди. Маросим
учун тайёр бўлди. Кўчага йўл олди.

Марҳумни оти нима — иши бўлмади. Марҳум кими
бўлади — иши бўлмади. Сўраб-суринтириб кириб
борди.

Ҳовли тўла... сонсиз оладўппи бўлди! Сонсиз бека-
сам тўн бўлди. Сонсиз белбоғ бўлди.

Ҳовли қилт этмас сокин бўлди. Пашиб учмас со-
кин бўлди. Нафас билинмас сокин бўлди.

Ушбу сокинлик оти... мотам... мотам бўлди!

Мотамда... кўз билан кўриб бўлмас бир товуш ке-
зиз юрди. Қулоқ билан эшитиб бўлмас бир товуш
учиб юрди.

Ушбу товуш... ҳовли узра учди. Дараҳт япроқлари
бўйлаб учди. Тўн-дўппилар узра учди. Маъюс юзлар аро
учди. Мунгли кўзлар аро учди. Ёшли ёноқлар аро учди.

Ушбу товуш оти... унсиз йиги... унсиз йиги бўлди!

Ботир фирмә ҳовли бўсағасига манзил олди. Қўл
қовуштириб ўтирди. Гап-сўз орасига марҳумни би-
либ олди.

«Ҳа-а, институт декани экан-да, — дея ўйлади Бо-
тир фирмә. — Декан бозори чаққон одам бўлади, оғзи
ошдаги одам бўлади. Деканни қўлида бутун бошли фа-

кульятет бўлади. Ҳа-а, шу боисдан ҳам одам тумонот экан-да».

Тумонот қўзғолди: ичкаридан тобут қалқиб-қалқиб чиқиб келди. Катта кўчага қараб йўл олди.

Ана шунда, Ботир фирмә бир савоб олмоқчи бўлди: тобутни бир четидан беш-үн қадам кўтариб бормоқчи бўлди... Шу мақсадда тобут кетидан эргашди. Тобутга қўл узатди. Тобутга бармоқ ўйнатди.

Аммо қўли етмади — тобут қадам сайин олислаб борди. Ботир фирмә қўл узата-узата қолди. Тобутга қўли етмагани учун ёшидан ўпкаламади. Қувватсизлигиданда ўпкаламади.

Одам тумонот бўлди, тумонот!

Ботир фирмә тумонот одамдан кўнгли ёруғ бўлди.

«Қайсики марҳумни жанозасига тумонот одам йиғилдими, бўлди, ана шу одам жаннати бўлади! — ўйлади Ботир фирмә. — Ана, тумонот одам, ана! Демак, профессор жаннати бўлди, жаннати!»

Ботир фирмә тобутга эргашиб борди. Тумонот одамни оралаб борди. Кўнглидан манави гаплар ўтиб борди:

«Менгаям... шунча одам келармикин? — деди. — Келмайди, келмайди! Совет даврида партия-совет органлари барчани сафарбар этар эди. Пионерлар фахрий қоровулда турар эди. Комсомоллар орден-медаллар кўтариб юрар эди. Коммунистлар оташин нутқлар сўзлар эди. Энди, комсомол ҳам йўқ, партия ҳам йўқ. Аммо-лекин ўлим бор! Ана ўлим, ана...»

Катта кўчада одам тағин-да кўпайди. Одам тумонотдан-тумонот бўлди!

«Мен бечорани жанозамга ҳеч ким келмайди! — деди Ботир фирмә. — Қизил эди, деб келмайди. Коммунист эди, деб келмайди. Ўз оти ўзи билан Ботир фирмә эди, деб келмайди. Шундай экан, мен бечораям... шу бутун омонатимдан қутулиб олсан бўларди! Ана, тайёр тумонот одам. Мен бечораям... шу бутун кетақолсан бўларди! Ана, ўз оёғи билан келган тумонот. Ана, тайёр тумонот одам, тайёр...»

67

«Сиз омонатингизни топшириб келаверинг. Буёғини бизга қўйиб беринг».

Ботир фирмә тош битикчини ушбу гапини ўйлади. Чалқанча ётиб ўйлади. Радиодан музика эшитиб ўйлади.

«Омонатни топшириш кераклигини биламан, — деди. — Аммо-лекин шу омонатни қандай топшираман? Ана шуни билмайман! Доно бўлсанг, айт? Омонатни узиш йўлини айт».

Радио хўп музика чалди. Мумтоз-мумтоз музика чалди.

Ботир фирмә музика оғушида ётди-ётди — руҳи ором олди. Қалби роҳат олди.

Қалбида мунислик давр сурди. Тан-жонида мунтазамлик давр сурди.

Жойидан оҳиста қўзғолди. Ўзига оро берди. Ташқарилади:

— Йўл бўлсин? — деди кампири.

— Оёғимни ёйиб келаман, — деди.

Тағин қабристон йўл олди.

Ўткинчи-кеткинчилар билан салом-алик этмаслик учун — йўлини четлардан олди. Одамларни кўриб-кўрмасликка олди. Тикка қараб юрди.

Қабристонга-да тикка кириб борди. Тош битикчи-ни кулбасига-да тикка кириб борди.

Тош битикчи билан кўришиб-сўрашди. Тош битикчини ёнидан жой олди. Юзларига фотиҳа суртди.

— Марҳумларни йўқлаб келибсиз-да, отахон? — деди тош битикчи. — Марҳумларни йўқлаб туриш савоб иш. Кўп савоб иш. Расууллоҳ саллаллоҳу алайҳи васаллам айтадиларки, дафн этилган марҳумни ҳоли бамисоли сувга фарқ бўлаётib, ёрдам сўраётган инсонни ҳолига ўхшайди. Борди-ю, ота-онаси, ёр-биродарларидан дуо ёхуд истиғфор бориб қолса, бу марҳум учун дунёдаги барча нарсалардан маҳбуброқ бўлади. Дарҳақиқат, Оллоҳ таборака ва таоло қабрларга аҳли тирикларнинг дуоларини етказади. Тирикларнинг марҳумларга қиласиган ҳадяларини талаби гуфрон ва раҳмат ҳамда истиғфордир...

— Шу мақсадда келдим, ука... — дея манқаланди Ботир фирмә.

— Яшанг, отахон, яшанг. Пайғамбар саллаллоҳу алайҳи васаллам нақл қиласиларки, инсон қабристон ёнидан шунчаки ўтиб кетаётганда ҳам: «Кул ҳуваллоҳу аҳад»ни ўн бир марта айтиб, марҳумларга унинг савобини бағишиласа, марҳумлар одатича, ўша инсонга ҳам савоби тегади.

Ботир фирмә бош иргаб маъқуллади. Кафти билан лабларини силади. Томоғини қирди. Нимадан гап бошлишини билмади.

— Шу, биз партия-совет органдарыда ишлаб, шундай намозхонликка вақтимиз бўлмади, ука... — дея чайнади Ботир фирмә.

— Ия, ҳали намоз ўқишни билмайсизми?

— Партия-совет ишларини биламиз, ука. Ўзингиздан қолар гап йўқ. Кабинет, кресло, телефон, мажлис, нутқ... Умримиз ана шундай ўтди, ука. Увол-савоб ишларидан бебаҳра қолдик.

— Намозхонликни фойдаси катта, отахон. Намоз ўқиш вақтида намозхонни асаб томирлари мулоим бўлади, диққат-эътибори бир нуқтага жам бўлади. Намозхон руҳияти тирикчилик ташвишларидан холи бўлади. Ҳордиқ-ором олади. Зеҳн-заковати пешланади, фикр юритиш учун соғлом бўлади. Намозхонлик еттилик рақамига имон келтиради. Яъни, намозхон ерга сажда қилганда — намозхонни ташқи аъзоларидан еттига жойи ерга тегиб-тегиб олади. Бурни-пешонаси, иккита қўли, иккита тиззаси ва иккита ёғини иккита учларидир. Намоз вақтида намозхонни ички аъзолари чўққидан само сари талпинган... бургут мисол парвоз туйғуларини ҳис этади! Шу сабабдан донолар: «намоз ўқиш — меърожга чиқиш демакдир», дейдилар. Боиси, намозхонни ички аъзолари билан илоҳий дунёни ички мулоқотда бўлиши — меърожни бир кўриниши, демакдир.

Тош битикчи деразадан марҳумлар шаҳрига қаради. Кейин, Ботир фирмәга қаради.

— Увол-савоб ишларини билмасангиз, унда қийин экан, — деди. — Савоб ишларни Ҳадисларга қараб қилмасангиз, марҳумлар уволига қоласиз, отахон. Яхшиси, бундай қиласиз: шундай бориб, қабрни бир четига ўтирасиз. Асло, қабр устига оёқ босмайсиз. Ҳадисларда: қабр устида ўтиришдан кўра чўғ устида ўтириб... кийим ва баданларингиз куйса, яхшироқдир, дейилади! Қабр бошига борганингизда, марҳумдан бирор нарса сўраманг. Овоз чиқариб йиғламанг. Қабр бошида чироқ ёқманг. Қабрни бир четгинасида ўтириб, дуои фотиҳа ўқинг. Ҳали дуониям билмайсизми? Унда, ён дафтарингизни олинг. Қани, ёзинг...

Ботир фирмә ён дафтарини кўкрак чўнтагига солди. Ручкасини жойига қистирди. Оҳиста қўзғолди.

— Келиб туринг, келадиган жойингиз, — деди тош битикчи. — Ҳа, келадиган жойингиз!

— Келадиган жойимиз, шундай, келадиган жойимиз!

Ботир фирмә мархумлар шаҳри аро равона бўлди.
«Биламан, келадиган жойим, биламан, — деди. —
Аммо-лекин қандай қилиб келаман?»

Ботир фирмә мархумлар шаҳрини сайдир этди. Шаҳар
йўлаклари бўйлаб сайдир этди.

Мархумлар шаҳри обод ҳам саришта бўлди. Мар-
хумлар шаҳри хушҳаво ҳам хушманзара бўлди.

У шаҳарни сайдир этди-этди — қайтиб кетмоқчи
бўлди.

Шунда, оппоқ панжарали бир қабрга кўзи тушди.
Мармардаги мархум сиймоси кўзларига иссиқ-иссиқ
кўринди.

У ана шу қабр олдида оёқ илди. Чўнтағидан кўлла-
рини олди. Кўзойнагини пешлади. Мармардаги сиймо-
га тикилди...

Ана, ўша райком бўлиб ўлмиш, аммо... жанозасиз
кўмилмиш Тўракулов! Ана, ўша райком бўлиб дафн
этилмиш, аммо... жанозасиз дафн этилмиш Тўракулов!

Ана-ана, ҳамон райком бўлиб ётмиш, аммо ҳамон...
жанозасиз ётмиш Тўракулов!

Ботир фирмә райком Тўракуловга тикилиб қолди...
Қалби қон бўлди! Қалби қоп-қора қон бўлди!

— Эй, парвардигор! — дея кафтларини очди. —
Сен раҳмдил ва кечирувчи зотсан, эй, парвардигор!
Биздан олдин ўтган мана шу зотларни гуноҳ-айблари-
ни маффират айлагин! Ана шу зотларга нисбатан қал-
бингда гина-кудуратинг бўлса, ювиб ташлагин, эй,
парвардигор!

Ботир фирмә юзларига фотиҳа суртди.

Шунда, ён дафтари эсига тушди. Кўкрак чўнтағини
пайпаслади. Ён дафтарини олди. Бармоқларини тупук-
лади. Дафтарини варақлади. Ҳали ёзиб тўлғизмиш бе-
тини топди.

Қабрни кунботар тарафидан келди. Панжара олдида
чўнқайди. Дафтарчани панжара орасига кўйди — даф-
тарча силжиб тушди. Тағин олиб кўйди. Дафтарча пан-
жара тирқишида жойлашди.

Ботир фирмә дафтарча бошида жойлашиб ўтириди.
Оёқларини ичига қайирди. Тиззаларига тирсак тира-
ди. Кафтларини очди. Кафтлари узра дафтарчага кўз
тиқди.

Мачитда ўтиришиб мулла қиёфасини олди.

Қабр бошида оят ўқиди.

Сүзлар Куръондан бўлди, овоз... партиявий бўлди! Овоз... райкомона бўлди! Сўзлар пайғамбардан бўлди, оҳанг... партия съездиде сўзловчи оҳанг бўлди. Сўзлар охиратдан бўлди, оҳанг... райком бюросида дағдаға этувчи оҳанг бўлди:

— Ассаламо алайкум аҳлад диёри минал мўъмина ва муслимийна ва инна иншоллоҳу бикум лоҳиқун. Антум фаратуна ва наҳну лакум табаъун...

Ана шу жойда Ботир фирмә чидаб туролмади. Ботир фирмәни кўнгли бузилди. Ботир фирмәни кўнгли вайрон бўлди.

Ботир фирмә... хўнг-хўнг йиглаб қўя берди! Ботир фирмә... ўкириб-ўкириб йиглаб қўя берди!

— Ув-ув-ув!.. — дея йиглади.

Кўзларини қўллари юзи билан артиб-артиб йиглади. Бурунларини тортиб-тортиб йиглади. Юз-кўзларини костюми этаклари билан артиб-артиб йиглади.

— Эй худо, мен бир нотавон бандангман! — деди. — Мениям... йигиштириб ол! Мен ғарип бандангниям йигиштириб ол-да қўй!

Ботир фирмә костюми ёқаларига юз-кўзларини артди. Ҳиқ-ҳиқ эта-эта, пешонасини билакларига қўйди. Үпкасини босолмай — ҳиқ-ҳиқ этди. Елкалари силкиниб-силкиниб — ҳиқ-ҳиқ этди. Кўзларини юмиб... оғир тин олди.

Шунда, чала қолмиш оятни эслади. Тағин бошини кўтарди. Дафтариға қаради. Кафтларини дуо учун очди. Оятни давомини ўқиди.

Оятлар... сукунаттага сингиб-сингиб борди:

— Насъалуллоҳа лана ва лакамул оғията. Оллоҳум мағfir лаҳум, Оллоҳу марҳам ҳум...

Шу вақт турли-туман овозлар эшишилди. Овозлар тобора яқин келди.

У елкаси оша қаради. Кафтлари муаллақ қўйи қаради. Кўзларини пирпиратиб қаради.

Орқа тарафда бир-иккита қора кўринди. Қоралар яқин-яқин келди. Бирорини бошида... ҳарбий каска бўлди. Бирорини бошида... қизил аскар телпаги бўлди. Икковини-да қўлида... милтиқ бўлди! Улар... милтиқ пешлаб-милтиқ пешлаб келди!

Ботир фирмә юзларини ўнглаб олди. Муаллақ кафтларига тикилиб қолди.

«КГБ-КГБ! — дея ўлади. — Булар КГБ! Кўза кунда синмайди, кунида синади, деганлари ана шу бўлади. Мен ўртоқ Ягода қиличларини айланиб ўтдим. Мен

ўртоқ Ежов ўқларига чап бердим. Мен Лаврентий Берия қамоқларидан эсон-омон ўтдим. Ана, ана энди күлгө тушдим! Ниҳоят қўллик бўлдим».

— Тур жойингдан, тур!

Ботир фирмә олдин бир тизза бўлди. Кейин, икки тизза бўлди. Кафтларини ерга тиради. Оҳиста қўзғолди. Елкаларини қисиб, турди. Фарибона турди.

— Кўлингни кўтар!

Ботир фирмә қўлларини оҳиста кўтарди. Елкалари оша кўтарди. Боши узра кўтарди.

— Қимирлама, отиб ташлайман!

Ботир фирмә қотиб қолди. Райком Тўракуловни сиймосига қараб қотди. Икки кўзи Тўракуловни сиймосида бўлди, бор эс-хуши орқа тарафда бўлди.

«Мен бу ерда оят ўқиётганимни КГБ қаердан билди экан? — деди. — Айтмоқчи, тош битикчи! Падарлаънат тош битикчи! Демак, тош битикчи КГБни агенти экан! Тош битикчини эжакилаб-эжакилаб гап ковлашидан билиб эдим. Бир гапи бор, деб ўйлаб эдим. Аниқ, тош битикчи КГБни агенти, аниқ! Энди нима бўлади?»

— Пих-пих-пих!

— Пақ-пақ-пақ!

Ботир фирмәни ёнидан бирори чопиб ўтди. Изидан иккинчиси қувиб ўтди.

Бирорини бошида ҳарбий каска-товоқ бўлди. Бирорини бошида ҳарбий телпак — чойнахалта бўлди. Қўлларида милтиқ — шохчўп бўлди.

Болалар... уруш-уруш ўйнади!

Ботир фирмә... ҳаммомдан чиқмишдай енгил бўлди. Ботир фирмә... елкасидан бир қоп унни ташламишдай енгил бўлди.

Кўлларини оҳиста-оҳиста туширди. Болаларни кетидан қараб-қараб қолди.

«Турқ-тароватидан... қайта қурувчи демократларни боласи! — ўйлади Ботир фирмә. — Шундай, тана бузоқни турқи туққанидан тамға!»

— Т-фу! Итдан бўлган қурбонликка ярамаслар! — деди.

Бир инсон таваллуди нишонланар бўлса... халқ юбиллярни кўкларга кўтариб мақтайди. Юбилиярни хизматларини улуғлайди. Савоб ишларини бармоқ билан сабаб беради. Юбилиярга... ҳайкал қўяди!

Ана шу зот бандачилик этса... ҳайҳот, мархұм әрта кетди, дейди. Ҳайҳот, мархұмни күп ишлари чала қолди, дейди.

«Биламан, мен ҳақимда-да шундай дейди, — ўйлади Ботир фирмә. — Хүш, қайси ишим чала қолди? Үзи, кексалик... бир умрлик мәҳнат самараси, демак. Кексалик... бир умрлик азоб-уқубат, демак. Кексалик... бир умрлик ғам-андуқ демак. Шу боис, кекса одам... ҳаминқадар зъозуга лойиқ. Ҳаминқадар марҳаматта лойиқ. Боиси, кекса одам... яшамайди, яшамайди! Кекса одам... сүнгги маросимига ҳозирлик күради. Кекса одам... дағы маросимини пойлайди! Дағы маросимини... узи-киб-узикиб пойлайди...»

70

«Бу сафар дангал гаплашаман, — деди Ботир фирмә. — Үзиям, тош битикчи билмаган бало йүқ экан. Шундан бир иш чиқади. Ҳинд чойни күрса, тағин-да очилиб гаплашади».

Ботир фирмә токчадан бир юмалоқ ҳинд чой олди. Кампираига билдирмай, костюм чүнтакка солди.

Бахмал шляпани бошга қўндириди.

— Фотиҳага бориш инсон учун ҳам қарз, ҳам фарз! — деди.

— Фотиҳали жой бор эдими? Айланай, раис бовамдан, айланай...

У хаёллар оғушида мархұмлар шаҳрига кириб келди.

Кулба очиқ бўлди. Аммо тош битикчи йўқ бўлди. Вазиятдан, тош битикчи шу теваракда юрмиш бўлди.

Ботир фирмә тош битикчи келгунича мархұмлар шаҳрини сайр этди. Қўлларини орқасига қўйиб сайр этди. Тўхтаб-тўхтаб сайр этди. Фавқулодда... тош битикчини олдидан чиқиб қолди!

Тош битикчи бир қабр панжарасини тузатар бўлди. Панжарани динг-динг уриб кўрсатди.

— Манавини қаранг, отахон, — деди. — Шундай темирни майиштириб кетибди-я! Ёш боладан ҳеч бало қолмайди-я!

— Ёш бола, ёш бола-да, — деди Ботир фирмә.

— Бошқа нарса қуригандай, шу панжарани майиштириб олиб, қиличбозлик ўйнайди-я! Бировини кулогидан чўзиб, панжара ичидаги қабрни кўрсатдим. Манави нима, дедим. Анави суратдаги одамни ҳовли-

си, дейди! Унда, бирони ҳовлисига ўйнама, бор, ўзингни ҳовлингга ўйна, дедим.

— Бинойи қилибсиз, хўп бинойи қилибсиз.

Ботир фирмә шундай дея, панжара олди скамейкага чўкли.

Тош битикчи панжарани тузатиб бўлди. Асбоб-анжомларини халтага солди. Ботир фирмәни ёнидан жой олди. Нафасини ростлади.

— Ҳа-а, келинг, отахон? — деди. — Оламда нима гаплар, энди?

— Олам тинч-осойишта. Шу, қайта қурувчилар бақириб-чақириб юрибди, холос.

— Мен қайта қурувчилардан қўрқмайман, отахон. Қайта қурувчилар мени ишдан бўшатолмайди. Мен ишсиз қолмайман. Чунки одам бор — ўлим бор. Ўлим бор — мен бор! Ўлимни иши — менсиз битмайди.

— Ишқилиб, қайта қурувчилар ҳаммани ҳайда-япти.

— Ўзбек ўзагини қирқади, отахон, ўзбек ўзагини қирқади!

— Шу боис, ишдан ҳайда-ҳайда, штат қисқаришлар авж оляпти.

— Мен штат қисқаришлардан ҳам қўрқмайман. Юзлаб иш жойлар тақа-тақ ёпилиб қолади. Аммо... ўлим иши тақа-тақ ёпилмайди! Дунёда ҳамма штат қисқаради. Аммо... ўлим қисқармайди! Дунёда ҳамма нарса тамом бўлади. Аммо ўлим тамом бўлмайди! Ўлим мангу яшайди! Ўлим барча тузумлар учун абадийдир! Яшасин, ўлим!

— Шундай, ишингиз зўр, касбингиз ноёб касб, шундай.

— Ҳа-да, ҳа! Мен ноёб одамман, отахон, ноёб! Иш жойим ҳам ноёб. Мана иш жойим — шаҳримизда барча шароит муҳайё. Шаҳримизда... жондан бошқа нарса бор! Шаҳримизда фақат... жон йўқ, жон!

Ботир фирмә ана шунда мақсадга ўтар бўлди. Максадини айтиш учун сўз излади. Партиявий сўз излади. Илмий сўз излади. Халқона сўз излади.

Охири, медицина сўзида бир тўхтамга келди.

— Шу, суицид... суицид... — деди.

— Ким-ким?

— Суицид, дейман...

— У ким?

— Суицид... мана шу шаҳарга ўз ихтиёри билан ташриф буюриш, демак.

— Ҳа-а, ўз жонига ўзи қасд қилиш, денг! Тинчликми, отахон?

— Тинчлик-тинчлик. Шу, биттаси бор. Шуни ҳәётида сиуцид содир бўлмаса эди, деб кўрқаман.

— Эси жойидами, ўзи?

— Жойида, эси жойида. Ақл-заковат бобида... ул зотга тенг кам топилади! Юксак интеллектуал, шундай, юксак интеллектуал!

— Унда, нега... ҳалигидақа ҳолатга тушади?

Ботир фирмә... ярасини ёрди! Мадда олиб кетмиш ярасини ёрди:

— Одамга алам қиласар экан, ука. Қарийб бир аср мобайнида ўртоқ Ленин дохий, дедилар. Ўртоқ Ленин улуғ, дедилар. Шундай деб ўқитдилар, шундай деб тарбия бердилар. Энди, бирдан... Ленин жаллод, Ленин фашист, деб бошлади! Совет тузуми бир аср мобайнида ҳур замон бўлиб келди, тўкин-сочин замон бўлиб келди. Энди, бирдан... Совет тузуми қамоқхона, деб бошлади! Совет тузуми дўзах, деб бошлади! Идеал қолмади, ука, идеал қолмади! Идеалсиз яшаб бўлмайди, ука, идеалсиз яшаб бўлмайди! Идеалсиз ҳаёт — ҳаёт эмас, ука. Мана, идеалсизлик оқибати — совет халқи бир-бирини итдай талаб бошлади. Совет халқи бир-бирини жаллоддай отиб бошлади!

— Тузум алмашяпти, отахон, тузум алмашяпти. Тузум алмашиб даври энг ёмон давр эмиш. Тузум алмашиб даври уруш даври билан баравар эмиш.

— Аммо-лекин одамга алам қиласида, ука. Газеталарни очиб қарайсиз: уруш қатнашчиси ё меҳнат ветерани қазо қилган бўлади. Бечоралар, қайта курувчиларни дағдағасига юраклари бардош беролмай... оламдан ўтмоқда!

— Бўламан деган эл бир-бирини ботирим, дейди, бўлмайман деган эл бир-бирини этини ейди!

— Буёғи қимматчилик. Гўшт қиммат, дори-дармон ундан-да қиммат. Пенсия пул дори-дармонга етмайди. Ваҳоланки, кекса одам дори-дармон билан тирик. Пенсия... арпага улоқ бўлмайди! Оқибат, кексалар биринкетин кетяпти. Газетани энг сўнгги четида — қора рамкага ўралиб-ўралиб кетяпти. Ана ўша қора рамкага ўроғликлар — уруш ва меҳнат ветеранлари. Мана шу XX асрни яратган зотлар! XX асрни қурган зотлар! Бу зотлар урушда полк-полк бўлиб жон берди. Армия-армия бўлиб жон берди. Энди эса... битта-битта бўлиб кетяпти! Якка-ёлғиз бўлиб кетяпти! Эни бармоқдайгина рам-

ка ичидә кетяпти! Түрттагина рамка ичидә кетяпти! Бечораларни кетаётганини бирор биляпти, бирор билмай қоляпти. ХХ асрни яраттан зотларни қадри шу бўлдими? Билсам, таъзиянома бериш учун — газетага яхшигина пул тўлаш керак экан. Арпага упоқ бўлмас... пенсия қайси бирига бўлади? Ҳадемай, уруш ва меҳнат ветеранларидан фақат хотира қолади, холос. Ҳали, шу хотира қолса! Замон шундай кетса, ХХ асрни бино этган зотлардан хотира-да қолмайди...

— Ўз жонига ўзи қасд қилувчилар ёмон одам бўлмайди, дейишади.

— Бўлмасам-чи, ука, бўлмасам-чи! Суициллар доно одам бўлади, ука, суициллар ҳалол одам бўлади! Эразм Роттердамский: фақат мутафаккир зотларгина ўз жонига ўзи қасд қила олади, деб эди!

— Совет даврида ўз жонига ўзи қасд қилиш жуда кўп бўлар эди. Бирор ўзини осар эди, бирор ўзини томдан ташлар эди. Тағин бирор йўғон томирини кесар эди, уксус ичар эди. Бир инсон нима учун ўз жонига ўзи қасд қилгани билан совет раҳбарлари шугулланмас эди. Шуғулланса ҳам... бечора марҳумни ўзини айблашар эди.

— Ўзимиз ҳам... бундан мустасно эмасмиз, ука.

— Ўзингиз ҳам?

— Беайб парвардигор, дейдилар, ука. Совет даврида... биз коммунизм қурамиз, бизда суицил бўлиши мумкин эмас, деб келдик. Шу билан суицилга барҳам бердикми? Аксинча, ўз жонига қасд қилувчилар сони йил сайин кўпайди. Ҳар йили минглаб инсон ўз жонига ўзи қасд қилди. Биз бу ҳолатни совет турмуш тарзига зид, деб баҳоладик. Суицил ҳолларни бекитиб келдик. Мабодо ошкор бўлиб қолса, ўша суицилчини... ўзини айбладик! Ўз жонига ўзи қасд қилувчиларни... бадном қилдик! Чунки энг яхши гувоҳ — ўлик гувоҳ, дейдилар. Кўзи юмуқ инсон сукут сақлаб ётаверади. Кўзи очиқ инсонлар эса мазза қилиб яшайверади. Бўлмаса, биттагина кўзи юмуқ инсон учун ўнлаб раҳбар ҳайфсан олади, партиядан ўчади, ишдан ҳайдалади. Ваҳоланки, совет суд-жамоат кодексида: «Инсонни ўз жонига қасд қилишига олиб келганлар беш йил муддатгача жиноий жавобгарликка тортилади», дейилган. Мен ҳалигача бирор раҳбарни ана шу модда билан жавобгарликка тортилганини эслай олмайман.

— Унда, сиз ҳам чатоқ экансиз, отахон.

— Беайб парвардигор, ука, беайб парвардигор.

— Үнда, сиз билан мuloқотда бўлиш хавфли экан...

— Ия, ундей деманг, ука, ундей деманг.

Ботир фирмә довдираб қолди. Жойидан лик этиб турди.

Апил-тапил ўнг чўнтағини ковлади. Чап чўнтағини ковлади. Шошиб, ҳинд чойни олди.

Тезлик билан тош битикчини кафтига қўйди. Тош битикчини бармоқларини юмиб, чойни ушлатди.

— Мана, ука, мана. Ҳақимизга дуо қилиб ичасиз, деб олиб келдим.

— Бу, ҳинд чойми?

— Шундай, яхши чой, шундай.

— Нима қиласарингиз, отахон, ўзингиз ичсангиз бўларди?

— Энди, сиз эл-юртни савоб ишларини қиляпсиз, ука. Эл-юрт хизматини қиляпсиз. Шу боис, кўнгилдан чиқариб олиб келдим.

— Раҳмат, раҳмат. Илоҳи омин, умрингизга умр кўшилсин, Оллоҳ-акбар! Мен сизга айтсам, отахон, бандачилик — худойи таолонинг даргоҳига меҳмон бўлиб бориш, демакдир. Марҳумлар шаҳрига сайёҳ бўлиб бориш, демакдир. Шундай экан, инсон меҳмон бўлиш учун шошилмаслиги керак. Меҳмон бўлишни эрта-кечи бўлмайди. Қолаверса, ўз жонига ўзи қасд қилишни ёмон томонлари кўп. Авваламбор, ўз жонига ўзи қасд қилиш — худо олдида жиноят қилиш, демакдир. Маълумки, бандасига иссиқ жонни худойим таоло ато этади. Ол, қулим, дейди! Иссиқ жон — энг ноёб бисотдир. Иссиқ жон — энг ширин неъматдир. Ўз жонига ўзи қасд қилиш — худойим таолони ноёб мулкига қасд қилиш, демакдир! Ўз жонига ўзи қасд қилиш — худойим таолони неъматига қасд қилиш, демакдир! Шу боис, ўз жонига ўзи қасд қилиш — худога кўл кўтариш, демакдир! Албатта, худойим таоло бундай бандаларини лаънатлайди. Эй инсон, сен менинг бандам эмассан, дея лаънатлайди. Шу боис, ўз жонига ўзи қасд этган бандасини... ювмай кўмишни буюради!

— Нима қиласи-нима қиласи?

— Ўз жонини ўзи олган инсонни... ювмайдилар. Марҳумни тобутга солишдан олдин... ювиб-чаймайдилар.

Ботир фирмә сесканди. Баданлари увишди. Кўзлари пирпиради. Кўзойнаги устидан олайиб-олайиб қаради.

— Бир инсон-а? — дея ҳайратланди. — Ўз ихтиёри билан тарки дунё этаётган инсон-а...

— Худойим таоло: бу менинг бандам эмас, лаънатини ювиб-чаймасдан... кўмиб ташланглар, дейди. Садқаи инсон номи кетсин, дейди. Ҳаромлайн... ҳаромлайн кўмиб ташланглар, дейди.

— Инсонни ювмасдан кўмиш? Инсон... мол эмас-ку?

— Бандасиям эмас-да? Бандасиям эмас эканки... ўз жонига ўзи қасд қилади!

— Инсон-а, бир инсон-а...

— Худойим таоло ўз жонига ўзи қасд қилганлар учун... жаноза ҳам буюрмайди, жаноза! Суф сенга жаноза, суф, дейди!

— А-а?! У-уҳ! У-у-у...

Ботир фирмә... ҳир-ҳир товуш чиқарди. Пиш-пиш нидо чиқарди. Шир-шир хуштак чиқарди.

Аммо... тили айланмади! Тили калимага келмади. Бир сўз-да айттолмади.

Беихтиёр-беихтиёр жойидан кўзғолди. Қўлларини ён чўнтакларига солди. Мархумлар шаҳрига қараб серрайиб қолди. Мархумлар шаҳрига қараб қотиб қолди...

Ботир фирмә ана шуларни... билмас эди! Дафн урфодатлари барча мўмин-мусулмонлар учун бир хил, дея ўйлар эди. Мархумлар бир хил расм-русумда дафн этилади, дея ўйлар эди. Мархумми, бўлди — кўп қатори дафн этилади, дея ўйлар эди.

— Бирдан туриб кетдингиз, отахон?

Ботир фирмә тош битикчини овозидан ўзига келди. Сергак бўлиб, теварак-бошига қаради.

— А? Оёқларим уюшиб қолди, ука, оёқларим! — деди.

— Ҳа-а, мениям оёқларим қотиб қолди. Ҳўп, отахон, мен энди борай. Мени йўқлаётган бўлишлари мумкин. Ботир бўлинг: ўзбек — ўзагини қирқади! Бўламан деган эл бир-бирини ботирим, дейди, бўлмайман деган эл бир-бирини этини ейди! Келинг, келадиган жойингиз!

— Келаман, албатта келаман!

— Худойим таоло қуёшни зиё, ойни нур қилиб яратган, отахон. Эмишки, худойим таоло одамзотни зуваласини лойдан пишишиб бўлгач... одамзот устидан атиги бир кун... бир кунгина кувонч ёмғирини ёғдирибди! Кейин, одамзот устидан... қирқ кун, ҳа-ҳа, қирқ кун... ғам селини ёғдирибди! Ана шу ғам селига бардош бериш... бандаси учун ҳам қарз, ҳам фарз, отахон!

Қабристон дарвозасидан... бир соя чиқиб келди. Шундай, бир соя чиқиб келди.

Сояда ҳаёт аломати бўлмади. Жон аломати бўлмади. Юзларида ранг бўлмади. Кўзларида нур бўлмади.

Соя... силжиб-силжиб қимирлади. Шундай, соя силжиди, соя қимирлади.

Боиси, соя тор-тор қадам босди. Оҳиста-оҳиста қадами босди. Оқибат, оёқлари кўринмади. Қадамлари билинмади.

Шу боис, соя юряптими ё силжияптими, билинмади. Юряптими ё қимирляяптими, билинмади.

Соя қулоч отмади. Соя қўл қимирилатмади. Қўллари ни ёнларига босди.

Соя бош кўтартмади. Юзларини кўксига эгди. Иякларини ёқасига босди. Кўзларини туфлисига тикди.

Соя бирдан... силжимай қолди. Жойида турди-турди — йўл чети скамейкага чўкди.

Соя — Ботир фирмә бўлди. Коммунист Эсонов бўлди.

У оҳиста чапига — мархумлар шаҳрига қаради. Ўнгига — тириклар шаҳрига қаради.

У мархумлар шаҳри билан тириклар шаҳри ўртасида ўтиреди. Мустар бўлиб қолди. Муштипар ҳам нотавон бўлиб ўтиреди.

Ўтиреди-ўтиреди... унсиз-унсиз йиглади. Пешонасини ушлаб-ушлаб йиглади.

«Нима кунларга қолдим-а? — дея йиглади. — Бу қандай замон бўлди? Қарийб бир аср меҳнат қилдим. Бир умр тер тўқдим. Бир умр эл-юрт хизматини қилдим. Мен учун меҳнат шон-шараф бўлди. Мен учун меҳнат фурур ҳам фахр бўлди. Мен ҳаётни меҳнат деб билдим. Мен яшашни меҳнат деб билдим. Мен яратдим, мен бино этдим. Мана шу XX асрни... мен яратдим, мен!

Ана шундай зот кетса — мен ўлсан, мени... ювмайдилар, ювмайдилар! Ҳаром ўлган мол мисол кўмиб ташлайдилар! Сассиқ маслиқ мисол кўмиб ташлайдилар!

Мендай бир зот ўлса... Менга... жаноза ўқимайдилар, жаноза ўқимайдилар! Оёғимдан судраб... кўмиб ташлайдилар! Ном-нишонсиз кўмиб ташлайдилар. Отинг нима демай, кўмиб ташлайдилар. Итмисан-эшакмисан демай... кўмиб ташлайдилар!

Демак, шариат бүйича... ўлиб бўлмайди! Урф-одатлар билан ўлиб бўлмайди. Эскичасига ўлиб бўлмайди.

Мен чин коммунистман. Ленинчи коммунистман. Мен эл-юрга партиявий назар билан меҳнат қилдим. Мен эл-юрга марксизм-ленинизм фоялари билан хизмат қилдим. Бир сўз билан айтсак, мен меҳнат қилдим, меҳнат!

Мен бола-бақрам демадим — жамиятим, дедим. Мен бола-бақрам учун меҳнат қилмадим — жамиятим учун меҳнат қилдим. Бир сўз билан айтсак, совет жамияти бор бўлсин, дедим. Коммунистик жамият бор бўлсин, дедим.

Шундай бир оташин коммунист ҳаётдан кўз юмса... Шундай бир содиқ ленинчини юраги уришдан тўхтаса...

Тобутим тепасида... ҳарбий оркестр мотам марши чалмайди! Комсомоллар орден-медалларим тўла баҳмал ёстиқчаларни кўз-кўз этиб ўтмайди. Коммунистлар тобутим кетидан гулчамбарлар кўтариб юрмайди. Партия-совет арбоблари билакларига қора ленталар тақиб, тобутим бошида фахрий қоровулликда турмайди.

Емондан-ёмони... партия-совет арбоблари қабрим бошида: «У асл коммунист эди», дея оташин нутқлар сўзламайди!

Демак, коммунистчасига-да... ўлиб бўлмайди! Партиявий ўлиб бўлмайди.

Бир сўз билан айтсак, эскичасига-да ўлиб бўлмайди, янгиласига-да ўлиб бўлмайди!»

Ботир фирмә унсиз-унсиз йиглади. Оғиз-бурнини кафти билан артиб-артиб йиглади. Кафтига йўталиб-йўталиб йиглади. Кафтига ўқсиб-ўқсиб йиглади.

«Чин, мен коммунистман, коммунист. Аммо-лекин мен ҳам одамман, одам. Мен жаннат билан дўзахга ишонаман. Кўплар ҳамма гўр — бир гўр, дейди. Йўқ, ҳамма гўр — бир гўр эмас, йўқ! Гўр билан гўрни фарқи бор. Айтайлик, бир инсон дунёдан кўз юмади. Уни олиб бориб қабрга кўмадилар. Бўлди, шу билан у зотни унугдилар, отини атамайдилар. Боиси, у зот бу дунёсида бирорта эзгулик яратмаган бўлади. Бирор нима қурмаган бўлади. Бирорта боғ яратмаган бўлади. Шу боис, у зотни номи зим-зиё йўқолади. Бир сўз билан айтсак, у зотни... бу дунёси йўқолади! У дунёси эса... дўзах бўлади! Гўри гўр эмас — ўра бўлади! Гўри гўр эмас — дўзах бўлади! Мазкур ўрада одамзот ётибди ё маслиқ ётибдими — эл-юрги иши бўлмайди. Дўзах — ана шу гўр!

Ўзи, бу дунё ажаб дунё экан. Одам ўзини дўзахи ё жаннатилигини билиши учун... ўлиши керак экан, ўлиши!

Масалан, Шароф Рашидов ҳаётлигига жаннати меҳнат қилди, жаннати яратувчилик қилди, жаннати ишлар қилди. Шароф Рашидов... чўл-биёбонларни боғбўстон этди. Шаҳар-қишлоқлар яратди. Зилзиладан кеъин Тошкентни қайта қурди. Ўзбек халқи номини жаҳонга ёйди. Тошкентда метро қурди...

Аммо-лекин ўртоқ Рашидов ўзини жаннати зот эканини билмай ўтди. Ўзгалар-да... билиб-билимасликка олди!

Ўлим... Шароф Рашидов жаннати зот эканини тасдиқлади!

Бу дунёдан Шароф Рашидов ўтди — демак, бу дунёдан ҳамма ўтади!

Мана, мен яратдим, мен бино этдим. Энди, бемалол оёқ узатсам бўлади. Аммо-лекин қайта қурувчилар қандай қилиб... ўлади? Демократлар қайси юз билан ўлади? Шариатпешво муллаваччалар билан ювуқиз отинчалар қайси имон билан ўлади? Қайси шон-шраф билан ўлади?

Қайта қурувчи муллаваччаларни кўмиб... одам ўлишини-да билмайди, қолишини-да билмайди! Ўлай десанг... қайта қурувчи муллавачча-отинчаларга бу дунёни ташлаб кетиб бўлмайди. Қолай десанг... ирова бардош бермайди.

Майли, бир жон бўлса — бераман! Бир жон — бошдан садақа!

Аммо-лекин қайси фоя учун жон бераман?

Мен бир умр фоя деб яшадим. Фоя деб меҳнат қилдим. Фоя деб пешона тери тўқдим.

Мен бир умр фоя деб эзилдим. Фоя деб азоб чекдим. Фоя деб... жон олиб-жон бердим!

Боиси, коммунист учун фоя — бирламчилик, бирламчи!

Шундай экан, мен қайси фоя учун жон бераман? Шундай азиз жонимни қайси фоя учун садақа этаман?

Мени жоним унча-мунча жонлардан эмас. Кимсан — Ботир фирмани жони! Коммунист Эсоновни жони!

Кўчада қолган жон йўқ!»

Ботир фирмә оёқлари остидан бир сиким тупроқ олди. Тупроқни кафтида ёйиб кўрди. Кўзлари олдига олиб келиб кўрди. Ҳидлаб-ҳидлаб кўрди. Димогида... ер ҳидини туйиб-туйиб ўлади...

«Мана, одамзотни отаси. Мана, одамзотни онаси. Мана, одамзотни бешиги! Дунёдан неча-неча жамиятлар ўтди — фақат ер қолди. Неча-неча партиялар ўтди — фақат ер қолди. Неча-неча сиёсатлар ўтди — фақат ер қолди.

Демак, бу дунёда-да, у дунёда-да... ердан бошқаси бекор экан!

Биз ана шу ердан яралдик. Биз ана шу ердан одам бўлдик.

Айтайлик, она ўз боласини тупроқ ерга қўйиб юборади. Яланг оёқ қўйиб юборади. Бола ер чангитиб ўйнайди. Ҳолдан тойгунча ўйнайди. Малори қуригунча ўйнайди... Кейин, она боласини яна қайтиб ўз бағрига олади. Она боласини яна қайтиб ўз кўксига босади...

Ер ана шу она мисол. Инсон ана шу бола мисол. Инсонни ўтмиши-да ер, инсонни келажаги-да ер.

Ана, мени-да онам келди. Онам: кунинг қайтди, деяпти. Кетар вақтинг бўлди, деяпти. Кунинг тўлди, деяпти...

Шундай, кетар вақтим бўлди. Шундай, куним тўлди.

Яшашдан мазмун қолмади. Яшашдан мақсад қолмади. Боиси, эл-юртга фойдам тегмай қолди. Эл-юрт хизматига ярамай қолдим. Эл-юртга яхшилик қилиш қўлимдан келмай қолди. Оқибат, эл-юртга керак бўлмай қолдим. Эл-юртга керак бўлмаслик — жуда ёмон!

Одамзотни ибтидоси-да ғойибда бўлади, интиҳосида ғойибда бўлади. Ғойибдан йўлга чиқиб, мана, яна ғойибга кетдик.

Энди, фанодан бақога рихлат этамиз. Энди, руҳимиз танамиздан ажралади. Фоний дунёда покланмиш руҳимиз фаришталар ҳамроҳлигида Оллоҳ таоло маконига сафар этади. Руҳимиз поклана олмаса — фаришталар тазиийқида азоб чекамиз.

Мана, мен поклана олмадим. Боиси, қандай покланишни билмадим. Шу боис, фаришталар исканжасида азобдаман!

Ҳаёт мисол бир боғ бўлади. Боғда дарахт мўл бўлади. Гул мўл бўлади. Ана шу боғни сара муаттар гули — одамзот бўлади. Серҳосил дарахти — одамзот бўлади. Одамзотда дарахт мисол уруғдан унади. Ниҳолдан ўсади. Дарахт бўлиб етилади. Мева тугади. Эл-юртга мева пишириб беради. Ниҳоят, куни битади. Оёғи ердан узилади. Боқийлик сари равона бўлади.

Яратганни ўзи одамзотга жон ато этади. Жон одамзотни олдин ҳалқумига киради. Кейин, кўзла-

рига киради. Ундан кейин, танани бошқа жойларига киради. Жон энг охирида одамзотни... оёқларига киради. Шу боисдан-да, одамзотни жони энг олдин... оёқдан узилади. Кейин, танани бошқа жойларидан жон узилади.

Одамзот қачон жон беради? Қачон күз юмади? Одамзот айни куч-күвватга тулиб, жон бермайди. Одамзот айни пишиб, етилиб күз юммайди.

Одамзот... жисман ишлаб бўлиб жон беради. Одамзот... руҳан меҳнат қилиб бўлиб күз юмади. Одамзот... қалбан ҳам жисман ҳориб-толиб жон таслим этади.

Мана, мен қалбан қарибим. Мен жисман толидим. Сафарим қариби, сафарим қариби!

Биз... ўлишдан қўрқамиш! Ўлик сўзидан қўрқамиш. Тобут сўзидан қўрқамиш. Марҳум сўзидан қўрқамиш. Қалбимиз музлаб қолади. Тилимиз айланмай қолади. Бошимиз эгилиб, елкаларимиз чўкиб қолади. Бир кун эмас, бир кун... ўламан, дея қўрқамиш.

Биз... ўлишни билмаймиз, ўлишни билмаймиз!

Шу боис, кўп одам... ўлишдан қўрққанидан... ўлиб қолади! Шундай, ўлишдан қўрққанидан ўлиб қолади. Уҳ, ана ўлдим, мана ўлдим, дея ўз ўлимини ўзи тезлатади. Ўлим даҳшатидан қўрқиб — ўз жонини апилтапил топшириб қўяди.

Аслида, табиий ўлим... тонг вақти келади, тонг вақти! Боиси, одамзот туни билан тиниқади. Туни билан хузур олади. Туни билан роҳатланади.

Ниҳоят, тонг вақти сўнгти бор... ирода билан энтиқади. Сўнгти бор... озод ҳам оғир энтиқади.

Шундай, ўлим ҳақ, шундай... Шундай экан, худо мен бечорага-да раҳм этса эди. Худо мен бандасини-да ўз раҳматига олса эди!

Олмайди, худо мени ўз раҳматига олмайди! Худо мени гапимга... қулоқ-да солмайди!

Боиси, мен умримда худони отини атамай яшадим. Мен умрим мобайнинга худога тош отиб яшадим. Мен умрим давомида худога шак келтириб яшадим!

Шундай экан, худо мени... итмисан-эшакмисан, демайди!»

Марҳумлар шаҳри... жимжит бўлди. Жон аломати бўлмади. Ҳаёт нафаси бўлмади.

Марҳумлар шаҳридан... мотам нафаси уфурди.

Тириклар шаҳри... ҳайқириб турди! Ашула айтиб турди. Ханда отиб турди.

Тириклар шаҳридан... палов ҳиди анқиди. Кабоб ҳиди анқиди.

Үртада... Ботир фирмә бўлди. Коммунист Эсонов бўлди.

Осмон йироқ, ер қаттиқ бўлди!

У тириклар шаҳрига қараб ўйлади. У марҳумлар шаҳрига қараб ўйлади. У осмонга қараб ўйлади.

«Бу дунёда ўлиб бўлмайди! Бу дунёда яшаб бўлади. Шу боисдан-да, бу дунё отини ҳаёт, дейди. Ҳаёт — яшаш, демак, қуёш — яшаш, демак.

У дунёда... ўлса бўлади! У дунёда қуёш йўқ.

У дунёда сув йўқ. У дунёда нон йўқ. Шу боис, у дунёда яратиб бўлмайди. У дунёда экиб бўлмайди.

У дунёда... КПСС йўқ, КПСС йўқ! У дунёда социализм қуриб бўлмайди. У дунёда коммунизм қуриб бўлмайди.

У дунёда... орден-медал йўқ, орден-медал йўқ! Қўшакўша унвонлар йўқ.

У дунёда... гимн айтиб бўлмайди! У дунёда «Интернационал» айтиб бўлмайди!

У дунёда... пенсия бермайди! У дунёда пенсия йўқ!

У дунёда... кампири нозик таъб билан боқмайди. Силаб-сийпаламайди. Саранжом-саришталамайди.

Шу боис, у дунёда... ўлса бўлади! У дунёда оёқ узатиб ётса бўлади! Кўз юмиб ётса бўлади!

Бу дунёда эса... яшаса бўлади! Бу дунё — яшаш учундир! Сен яшагувчи дунёга келдинг. Сен ҳаёт завқини тотувчи дунёга келдинг. Сен умр гаштини сурувчи дунёга келдинг.

Бу дунёга келдингми? Энди яша! Тишни тишга қўйиб-қўйиб яша. Муштни тугиб-тугиб яша. Алп-алп одим отиб яша. Чидаб-чидаб яша. Яшашни чидаганга чиқарган!

Бу дунёга келдингми? Энди чида! Дунё — чидаганники! Охиригача чида, худо берган кунгача чида!»

У тушлик уйқуда ётди, ғарқ уйқуда ётди.

Уйқусида телефон жиринг этди. Узун жиринг этди.

Ботир фирмә жирингни эшишиб, ётди. Кўзларини очиб ётди. Шифтта тикилиб ётди. Турай дея ҳафсала этмади.

«Телефон айвонда, — деди. — Айвонга бориш учун ким қанча йўл? Дивандан туриш керак. Уст-бошни кийиш керак. Ўйқуҳонадан йўл босиб ўтиш керак. Айвон эшигини очиш керак. Зинапоядан тушиш керак. Ана ундан кейин телефонни кўтариш керак. Ким қанча йўл, ким қанча азоб».

Телефон бетиним жиринг этди. Ётиш учун қўймади.

Ботир фирмә инқилаб қўзғолди. Эснаб керилди. Ўйкучил кийинди.

«Падарлаънат, бундай телефонни! — деди. Овози қайта қурувчи демократларни овозига ўхшайди-я? Билмайман, телефонлар ҳам қайта қурувчи демократ бўлиб қолдими?»

Ботир фирмә имиллади-имиллади — телефонни олди.

.Телефон этувчи ўзини танидди. Ҳол сўради. Мақсадини айтди:

— Отахон, эски горком — ҳозирги ҳокимият биноси олдидан Буюк ипак йўли ўтади, демоқдалар.

Ботир фирмә уйқучил пиш-пиш этди.

— Йўлингиз унсин, ўртоқ ҳоким, йўлингиз унсин, — деди.

— Гап шундаки, отахон, ҳокимият биноси олдида беш-ўнта ўриси дарахт бор.

— Ўриси дарахт? Чинор денг, чинор.

— Ҳўп, чинор, чинор. Гап шундаки, отахон, Буюк ипак йўли ана шу чинорлар жойидан ўтар эмиш. Ҳокимият маъмурити кенгашиб, ана шу ўриси дарахт... чинорларни ҳашар йўли билан олиб ташламоқчи бўлди. Беш-олтита оқсоқолни ҳашарга айтмоқчи бўлди.

— Қуллук, ўртоқ ҳоким, қуллук. Бизни ёшимиз тўқсонни қоралаб қолди. Энди, ҳашар бели бақувват ёшларни иши.

— Кўпни дуоси кўл, дейдилар, отахон. Сиз оқсоқоллар фақатгина дуои фотиҳа берасизлар, бўлди. Ҳашарни ёш авлодни ўзи боплайди.

— Бўпти, борганимиз бўлсин. Соат учга? Бўпти, борамиз.

Ботир фирмәни умрида кўнгилсиз вазиятлар мўл бўлди. Хижил дақиқалар мўл бўлди. Ўзини ўзи эзувчи вақтлар мўл бўлди.

Аммо... кундузги уйқудан кейинги вазият! Одам тарс ёрилиб кетай дейди. Кўнгилга қил сифмайди. Одам ўртаниб кетади. Одамни пашша ғинғиллаши эзади. Ғинг-

ғинг пашшани мильтиқ билан отсам дейди. Кундузги уйқу ёмон!

Кундузги уйқудан сүнгги ҳолатдан қутулишни билмовчилар күчага чиқади. Күнгилочар ҳолат излайди. Күнгилёзар мулоқот излайди.

Ушбу ҳолатдан қутулишни билувчилар аччиқ чой ичади.

Ботир фирмә кофе ичади. Бу сафар кофе ичмади.

Үйкүси бирдан очилди. Тан-жони жимир-жимир этди. Вужуд-вужуди лов-лов этди. Ич-ичи қизиди.

Ботир фирмәни күнгли... кулди. Ботир фирмәни юзи... кулди.

— Кампир... улар мениям дуои фотиҳамни олар бўпти... — деди.

Афсус, кампири йўқ бўлди. Тўйда келинкўрди учун кетди. Ҳали қайтиб келмади.

Ичига чироқ ёқса ёнмайди, дейди эл. Бу гап ичи қора одамлар учун айтиладими? Ичимдан топ, дегич одамлар учун айтиладими? Зиқнадан-зиқна одамлар учун айтиладими?

Ботир фирмә ушбу гап мазмунини тушунмас эди. Элни топган гапини қаранг-а, дер эди. Одамни ичи бир уй ё кўчамидики — чироқ ёқади, дея ўйлар эди. Кулгиси келар эди. Муштдай лампочка оғзига сифмайди — қандай қилиб одамни ичига ёқиб бўлади, дея ўйлар эди.

У мазкур гап мағзини ана энди чақди. Айни шу вазиятда чақди.

Ботир фирмәни... ичи ёнди! Ичи... ёруғ-ёруғ бўлди. Ичи... ойдин-ойдин бўлди. Кўзлари-да равшан-равшан бўлди. Равшан кўзларидан равшан-равшан ёшлилар оқди...

— Кампир, улар мениям... одам ўрнида кўрибдилар... — деди.

Ботир фирмә алант-жалант бўлди. Кампир келинкўрдидан қайтмаганини билди.

Оҳиста диванга чўқди. Елкаси билан суюнди. Бошини чапга чалқайтди. Кўзларини юмди... Үнсиз-унсиз йиглади. Ич-ичидан йиглади. Кўзларини қўл юзаси билан артиб-артиб йиглади...

Кўнгли хиёл босилди. Тани сокин бўлди. Руҳи вазмин бўлди. Оғир тин олди.

Дарвоза тарафга қаради. Бедарак кампирини айблади. Кампирини койиди. Кампирини оқлади:

«У бечора бунақа телефон бўлишини қаердан билди? Бечорани умри мени қобоқ-тумшугимга қараб ўтапти. Майли, бир тўй-тўйласа тўйлабди-да».

Ботир фирмә бет-бошини ювди. Бет-бошини атиради. Бет-қўлини мойлади.

Тагин дарвоза тарафга қаради. Кампиридан ҳамон дарак бўлмади.

— Ўзим кийинаман, кампирни қараб ўтираманми.

Шундай дея шифонъерни очди. Кийим-бошини кўздан кечирди. Бўқоқлик шимни олди. Украинча кўйлакни олди.

Ана шунда... кампири йўқлиги билинди. Ўта билинди.

Ботир фирмә украинча кўйлакни... костюм деб ўйлади! Украинча кўйлакни жимжимадор гулларини... костюм ёқаси деб ўйлади!

Шифонъерда осигурик костюмларни ушлади-ушлади — орден-медали бор қора костюмни сугуриб олди. Чўнтағидан партбилетни топди. Силаб-силаб, украинча кўйлакни кўкрак чўнтағига солди.

У орден-медалларига тикилиб қолди.

«Беш-олтита оқсоқол деяпти. Демак, танлаб-танлаб таклиф этибди, — дея ўйлади. — Ундей казо-казолар олдига бор топган-тутганни тақиб бориб бўлмайди. Танлаб-танлаб тақиб бориш керак».

Ана шунда... кампири йўқлиги тагиндан-тагин билинди!

У украинча, кўйлакни ҳамон... костюм дея ўйлади. Ҳамон... костюм кияяпман, дея ўйлади.

Ботир фирмә украинча кўйлакка... орден тақиб бошлилади!

«Бир... икки... уч. Мановни-да кўнгли қолмасин».

Тақир бошига похол шляпа қўндириди. Кўзойнак тақди.

У ўзини ойнага солди. Димог ҳам гурур билан томоқ қирди.

Эшик-дарвозаларни кулфлади. Ҳокимият сари йўл олди.

74

Ботир фирмә қўллари кетида қадамлади. Оҳиста қадамлади. Таантанали қадамлади.

Бетон кўприкдан ўтди. Пастлаб энди. Оёқ тираб-тираб энди. Оёқ илиб-илиб энди. Нафас ростлаб-ростлаб энди.

Ҳокимият биноси олдида қаторланмиш машиналарни қоралаб келди. Машиналарга сұяниб турмиш шофёрлар билан салом-алик этди.

Шофёрлар Ботир фирмәні бош-адок қаради. Украинча күйлақдаги... орденларға қаради.

Бир шофёр оғзини ушлаб кулимсidi. Бир шофёр бетини бурчакка буриб кулимсidi. Бир шофёр чаппа бурилиб... чучкирди.

Баҳонаталаб шофёрлар чучкурикдан... яйраб кулди.

— Ия, саломат бўлсинлар, саломат бўлсинлар! — дея кулди.

Ботир фирмә-да... қўшилиб кулди! Бош иргаб-иргаб кулди.

— Биз-да шу тилакка ёрмиз! — дея кулди.

Кўзидан кўзойнакни олди. Рўмолча билан артди. Ҳокимият боғига қаради. Эътибор билан қаради. Синчковлик билан қаради.

Боғ... йўқ бўлди. Қуюқ-қуюқ боғ йўқ бўлди. Ям-яшил боғ йўқ бўлди.

Ҳар-ҳар ерда кундалар юмалаб ётди. Шохлар тўда булиб ётди. Тупроқлар уюм булиб ётди.

Арралар қирр-қирр бориб келди. Болталар тарс-тарс ёрди. Шохлар қарс-қарс синди.

Боғ марказида битта чинор омон қолмиш бўлди. Уям бўлса, бир ёнбош қийшайиб ётмиш бўлди.

Чинор теварагида одам мўл бўлди. Сариқ-сариқ устбошларидан — курувчилар бўлди.

Бир қурувчи чинор шохига арқон бойлаб тортиди. Бирори чинор шохи айрисига арқон ташлаб осилди. Бирори чинор томирини болталади.

— Чинорни белига трасс солиб, анави самосвал билан тортиш керак, — деди Ботир фирмә.

— Тросси йўқ экан-да камбағалларни, — деди бир шофёр.

Ботир фирмә бошидан шляпасини олиб силкитди: хайр, ишорасини берди.

— Йўл бўлсин, отахон? — деди бир шофёр.

— Мана шу боғ ҳашарга таклиф қилиб эдилар, — деди.

— Ҳа-а, расмий қисми ўтиб бўлди, отахон.

— Ия-ия! — деди Ботир фирмә.

— Лекин сизни кўп қарадилар.

— Ҳамма бўлди, фақат сиз бўлмадингиз.

— Ия-ия, шунақа денг?

Ботир фирмә бир келган йўлига қаради. Бир шоғёрларга қаради. Бир оёқлари остига қаради.

«Чин-да, битта мени кутиб ўтирадими? — деди. — Энди, қайтиб кетаверсаммикин?»

— Отакон, озиб-ёзиб келибсиз, — деди бир шоғёр. — Энди бир бориб, қурувчиларга ҳорманг-бор бўлинг этиб келинг.

— Шундай денг, аммо-лекин шундай денг?

Ботир фирмә йўлида давом этди. Ҳокимият олди йўлакдан юрди. Йўлакдан боққа борди.

Бог айланаси аргамчи ип билан ўралмиш бўлди. Аргамчини ҳар-ҳар ерида қизил байроқчалар илиғлик бўлди. Огоҳ этувчи ёзмалар илиғлик бўлди.

Ботир фирмә аргамчи остидан ўтмоқчи бўлди. Бир ўнгига қаради, бир чапига қаради. Бир қўли билан шляпасини бошига босди. Бир қўли билан аргамчини кўтарди. Аргамчи остига эгилди.

— Ҳай-ҳай! — дея овоз келди.

Ботир фирмә қаддини кўтариб қаради.

Сариқ кийимлик киши шаҳодат бармоғи билан янди. Аргамчида илиғлик ёзмага ишора этди.

Ботир фирмә бошидан шляпасини олиб, кишига қаратса силкитди: узр-узр, демиш бўлди.

Шляпасини бошига кўндириб, аргамчи-девор ёқалаб юрди. Шаҳодат бармоғини боши узра ниш этди.

— Чин, техника хавфсизлиги! — деди. — Ўртоқ Эсонов, техника хавфсизлиги!

Аргамчи-девор ёқалашда давом этди. Богни чап тарафига келди. Оёқлари толди. Йўл бўйи скамейкага чўкди. Шляпасини тиззасига қўйди. Чукур нафас олди. Тақир бошини рўмолча билан артди. Ҳокимият майдонига тикилди: худди ўзини бошидай теп-текис майдон. Ўзини бошидай тап-тақир майдон.

«Совет даврида ҳар шаҳарни ўз Ленини бўлар эди. Ўртоқ Ленин шаҳар бош майдонида тикка тураг эди, — деди Ботир фирмә. — Бизни Ленин мана шу майдонда тикка тураг эди. Ўртоқ Ленин қўлини мана бундай узатиб, йўл кўрсатиб тураг эди. XX аср ўзбек халқи доҳийси Шароф Рашидов байрамларда келар эди. Оталарча қучоқ очиб тураг эди. Энди ўртоқ Ленин йўқ. Энди ўртоқ Рашидов йўқ...»

Шу вақт бир нима қарс этди.

Ботир фирмә сапчиб оёқлади. Ўпкасини қўлтиқлади. Воҳ-воҳ этди. Ичига туф-туф этди. Теваракка аланглади. Бирор милтиқ отди-ёв, дея ўйлади.

Йүқ, боңда... боғда сүнгги чинор қулади!

Бирдан моторлар ўчди. Қурувчилар овози тинди. Олатасир босилди.

Ботир фирмә уёққа аланглади, бүекқа аланглади. Соатига қаради: иш вақти тамом бўлди.

Шляпани бошга кўндириди. Шими кетини қоқди. Шимини тортди. Украина кўйлак ёқани тузатди. Бофсари юрди.

Бу сафар аргамчи-девор олдида эгилиб ўтирмади. Аргамчини шундай кўтариб, ичкари кирди.

Шохчаларни қисир-қисир босиб борди. Шохлардан ҳатлаб-ҳатлаб борди. Япроқларни эзиз-эзиз борди.

Сўнгги... сўнгти чинор олдида оёқ илди.

Бир уй ичи жой ўра бўлиб ётди. Ўра одам бўйи чукур бўлди. Ўра гирди уюм-уюм тупроқ бўлди. Ўра ичи патила-патила томир бўлди. Бармоқдай томир бўлди. Билакдай томир бўлди. Одамни сонидай томир бўлди. Ўқ томири... одамни белидай бўлди!

Чинорни ўзи... ўра ёнбошида суюниб ётди. Ҳайбатли шохлари эллик қадам олисларда тарвақайлаб ётди...

Ботир фирмә энтиқди. Ботир фирмә қизиди. Ботир фирмә лов-лов этди.

Кўллари қалт-қалт этди. Юзлари дир-дир этди. Кўзлари пир-пир учди. Кўз олди туман бўлди. Кўз олди зимзие бўлди.

Оёқ олди бир кундага... шилқ тушди.

Бирдан... олам ёруғ бўлди. Дунё тиниқ бўлди. Ҳаёттирилди.

Ботир фирмәгага... дунёни энди кўрмиш одам мисол ўрага мўлтайди. Уйқудан энди уйғонмиш одам мисол чинорга мўлтайди. Мунис-мунис мўлтайди.

Мўлтайди-мўлтайди... ҳўнграб йиглади. Ҳўнг-ҳўнг йиглади. Нотавон-нотавон йиглади. Хокисор-хокисор йиглади.

Ёноқларидан дардлари дув-дув тўкилди.

Фавқулодда кулимсиди! Тотли-тотли кулимсиди. Энди... кулимсиб-кулимсиб йиглади.

— Кампир, бизни боғларимиз... халқаро йўл бўлар эмиш, — деди. — Бизни боғларимиз... Буюк ипак йўли бўлар эмиш. Биз энди Буюк ипак йўлидан юрамиз.

Ботир фирмә кундадан қўзғолди. Оёққа қалқди.

Шунда, ўра лабидан тупроқ кўчди. Кўчар тупроқ Ботир фирмәни оёқлари олдида бўлди.

Шу боис, Ботир фирмә мувозанатни бой берди. Қулочлари ёйилди. Кетига чалқайди. Шашт билан ўзини ўнглаб олди.

Орденлари жаранг-журунг этди. Нимадир бир нима... лип этиб ерга тушди. Күчар тупроқ билан ўра остига силжиб кетди.

Ботир фирмә энкайиб қаради. Синчиклаб қаради. Нима экан — билолмади. Боиси, ўра чукур бўлди, тупроқ қора бўлди. Ботир фирмә орденларини қаради. Орденларини ушлаб-ушлаб санади. Орденлар... туғал бўлди!

Кўкрак чўнтақни пайпаслади. Ана шунда англади.

Партбилети... партбилети ўрага тushiб кетибди! Коммунистик партия билети ўрада ётибди! Ўртоқ Ленин сиймоси тупроқда қоришиб ётибди!

Ботир фирмә сувга калла қиласжак чўмишувчи мисол қулоч ёйди. Қулочини битта жамлади. Боши бара-вар этди. Ўрага ниш этди. Ўрага бош эгди.

Ўра чукур бўлди, ўра қалтис бўлди.

Қалтисдан-қалтис жойи — ўрага ташловчи... қарис бўлди! Тўқсонларни қоралаб қолган муnis чол бўлди.

Шу боис, қария шайтонга ҳай берди. Қария шаштидан қайтди.

Аммо қария аҳдидан қайтмади. Ўра лабига кафтларини қўйди. Олдин ўнг оёғини ўрага солди. Кейин чап оёғини ўрага солди. Қария ўрага тushiб бошлади.

Шунда, оёғи ости тупроқ кўчди. Кўчки оҳиста энди. Уям кўчки билан энди. Кўз очиб юмгунча ўра остида бўлди.

Ботир фирмә қаддини қоматлади. Кафтини кафтига уриб қоқди. Орденларини ушлаб-ушлаб кўрди. Сокин тин олди.

Теварак-бошга қаради. Энкайиб қаради. Томирлар орасини мўралаб қаради: партбилет кўринмади.

«Ё мен тushiб келгунимча сичқон тортиб кетдимикин? — деди. — Энди қазилган ўрада сичқон нима қиласди?»

Ботир фирмә серрайиб турди. Энди, ўзи эниб келмиш тупроқни ковлади. Партбилет ана шу кўчки остида бўлди!

Ботир фирмә партбилетни кўшкўллаб ушлади. Пуфлаб-пуфлаб тозалади. Кўзлари олдига олиб келди. Мисоли олис айрилиқдан кейин тикилди. Соғин-соғинч билан тикилди.

«Бу партбилет мени ўқитди, хат-саводли этди, — деди. — Шу партбилет туфайли ўсиб-ундим, катта мартабаларда ишладим. Еганим олдимда бўлди, емаганим кетимда бўлди. Мана, қарилик пенсияси олиб ётибман. Бир сўз билан айтсан, ушбу партбилет мен учун нон-насиба бўлди. Ушбу партбилет ризқ-рўзим бўлди».

Ботир фирмә партбилетни тағин пуллади. Силабисийпади. Эҳтиёт учун галифе шим киссасига солди. Энди, ошкора айтди:

— Ўртоқ Ельцин шундай бир табаррук партбилетни ташлади, — деди. — Яна-тағин, Кремль саройида ташлади. Минг қиласа-да, ўртоқ Ельцин... насроний-да, насроний, ўртоқ Ельцин насронийлигига борди. Худога шукур, мен мусулмонман, мусулмон. Мен мусулмон фарзанди... мени боқдан партбилетни ташламайман. Мен мусулмон фарзанди, партбилетни ташлаб... нонкўр бўлмайман!

Ботир фирмә юзага чиқиш йўлини ўйлади. Тушиб келмиш йўлидан... тўрт оёқ бўлиб ўрмалади. Ўра белигача юқорилаб борди. Ўра белидан тупроқ билан қайтиб тушди.

Кафтларини артди. Шляпасини босиб кийди. Теврагига бокди. Томирларни тутамлаб, чинор кундага чиқди. Кунда устидан ўрмалади. Тўрт оёқ бўлиб ўрмалади. Ўрмалади-ўрмалади — юзага чиқиб олди.

Ўзини тап этиб ерга ташлади. Елкасидан нафас олди. Уст-бошини тузатди. Галифе шимини қоқди. Боя ўтиришицундага чўқди. Осоишта тин олди.

Ўрага қараб ўтириди-ўтириди... ўзига-ўзи қойил бўлди:

«Ерни етти қатига тушиб келдим-а, ерни етти қатига-я? — деди. — Ақл бовар этмас жасорат! Шу жасоратимни кампир бир кўрса эди? Кампир ҳар гапини ўролида мени камситади. Шартинг кетиб-партинг қолди, дейди. У дейди, бу дейди... Мана, мен кимман, мана! Тили бўлса, мана шу чинор айтсин!»

Ботир фирмә юмалаб ётмиш чинорга қараб хаёл сурди. Хаёллари бир жойларга кетди. Хаёллари қаерларгадир кетди...

Хаёллар оғушида ўтириди-ўтириди... тағин йиғлади. Ҳўнгир-хўнгир йиғлади. У ушбу чинорларни... ўз қўли билан экиб эди. У ушбу чинорларни... ўзи парваришлиб ўстириб эди.

Мазкур чинорлар остида эл-юрт учун жон фило этди. Яхши-ёмон кунлари мазкур чинорлар остида ўтди.

Умри мазкур чинорлар остида адо бўлди. Оддин баҳор — охир ҳазон бўлди. Умр йўли — борса келмас йўл бўлди.

Ботир фирқани жони ачиdi. Ботир фирқани тани куйди. Ботир фирмани тан-жони... шодланди.

— Ўртоқ Рашидов... — дея энтиқди. — Шароф Рашидович, биз эккан чинорлар... Буюк ипак йўли бўлди, Буюк ипак йўли!

Ботир фирмани ичи куйди. Ботир фирмани ичи кулиди...

— Ўртоқ Рашидов... биз яратган боғлар... Буюк ипак йўли бўлди, Буюк ипак йўли!

Ботир фирмани кўзларида қайгу бўлди. Ботир фирмани кўзларида байрам бўлди...

— Ўртоқ Рашидов... биз энди Буюк ипак йўлидан юрамиз. Буюк ипак йўли бизни жаҳонга олиб боради. Истанбул, Париж, Лондон...

1994—1998 йиллар

ХИКОЯЛАР

БОБОСИ БИЛАН НЕВАРАСИ

Оёқларига қизил ботинка, устига күк иштон-күйлак, бошига эски ола дүппи кийиб олган уч яшар невара, ҳаммадан олдин ўрнидан туриб, айвонга чиқади. Дастурхон атрофида ўтирганлар унга парво ҳам қылмайдилар. У дахлизда бирпас тик туради. Түгридан қараганда худди вақтингча ўрнатиб қўйилгандек кўринадиган катта-катта қулоқларини кўрганлар неварани тоғасига ўхшатадилар. Куралай кўзларини, бир оз япасқидан келган бурнини, кенг ва дўнг, ҳали ғам нималигини билмаган ялтироқ пешонасини кўрганлар эса уни отасига ўхшатадилар.

Невара зинапоядан авайлаб тушади. Орқасига бир қараб қўяди. Майда-майда қадамлар билан ҳовли эшиги олдидаги мотоциклнинг ёнига бориб туради. Эсида бор, отаси билан мана шу мулоим ўриндиқقا ўтирган, ўшанда бу мотоцикл дегани қаттиқ овоз чиқариб юриб кетган, невара кўрққанидан отасини маҳкам қучоқлаб, кўзларини юмиб олган эди. Мана, у бугун ҳам мотоциклга минади, ўзининг минмоқчи эканлигини билдириш учун орқа ўриндиқقا қўлини теккизисиб туради. Ҳадемай отаси ҳам келади, сўрайди:

- Йўл бўлсин?
- Мен ҳам бораман.
- Қаёқقا?
- Ишга.

— Ҳа-а. Директоримиз кеча педсоветда сени сўраётган эди, нега ишга келмаяпти, деб, — дейди отаси ҳазиллашиб.

Невара отаси айтган сўзларга деярли тушунмайди. Ҳатто айрим сўзларни биринчи эшигиши. Аммо шундай бир нарсани пайқаб қоладики, кимдир: холосими, аммасими уни келсин дебди. Боради, боради.

Шу пайт отаси бир нарсани тепади, пат-патлаган товуш чиқади. Невара бир чўчиб тушиб, киприклари ни пирпиратади.

Агар олиб кетмасангиз, йиглайман, дегандек, лабларини буради, елкасини силкиб, бораман, дейди. Отаси парво қилмай кетади. Пат-патнинг орқасидан тутун чиқади, невара тутун ичидаги қолади. Ана энди, у ерга ағанаб, аламидан чиққунча йигламоқчи бўлади. Аммо... бобоси ёмон. Юмшоқ тупроқда ағанаб, мазза қилиб йиглаб олишга кўймайди. Неварасини қўлидан етаклаб ичкари олиб кириб кетади. Ҳар қалай ёмон бўлса ҳам ўзи билган одамлар ичидаги бобосини яхши кўради. Шудақиқадан бошлаб бобосини аввалги қараганда ҳам кўпроқ яхши кўради. Сабабки, бобоси ҳозиргина унга токчадан шоколад олиб берди.

Неварасининг кўнгли ниманидир истайди. Бир куни бобоси уни қаергадир олиб борган, у ерда катта-катта уйлар бор, одамлар кўп экан, кўчаларда олма, бодрингларни одамлар ҳаммага кўрсатиб ўтирас экан. Ушанда бобоси унга ширин сув олиб берган эди. Невараси ҳали-ҳали эслаб лабларини ялаб қўяди. У ҳозир, яна шу ерга олиб боринг дегиси келади, лекин айтольмайди, қаерга борганини ўзи ҳам билмайди. Бобосининг тиззасига ўтириб олиб харҳаша қиласди.

— Жим ўтириб, жим. Қара, анавуни қара. Эҳ-ҳе, болаларни қара, — дейди бобоси бурчакда турган телевизорга ишора қилиб.

Невараси бу ярми шиша катта қутининг телевизор деб аталишини яқиндагина билди. Аммо ҳалигача унинг номини айтольмайди. Бобоси телевизорда қизиқ томоша кўриб кулиб юборади. Невараси нима гаплигини пайқаса-да, бобосига қўшилиб кулади. У томошага қараб ўтириб, ҳайрон бўлади: бунча кўп одамлар қандай қилиб шу кичкина қутининг ичига сифади?..

- Бобо, бу одамлар қаерда?
- Телевизорнинг ичидаги-да, улим.
- Шунинг ичидаги уйи ҳам борми?
- Бор, улим, бор. Ҳаммаси бор.
- Уларнинг шоколадиям борми?

Миттигина невараси ўзича, кишилар учун энг ширин ва керакли нарса шоколад деб билади. Шунинг учун ҳамма нарсани аввало шоколадга таққослаб кўради. Неварасининг саволи жавобсиз қолади, телевизорда ҳеч нарса кўринмай қолгани учун бобоси уни ўчириб қўйиб, ҳовлига чиқиб кетади. Невараси қўли билан деворга суюниб ўрнидан туради. Кўрсаткич бармоғини оғзига тиқиб, бошини чапга сал қийшайтириб, телевизорга бирпаст қараб туради. Сўнг аста-аста ке-

либ, телевизорнинг орқасидан ичига қарайди — йўқ. Чаккасини телевизор ёнига теккизиб қулоқ солади — йўқ. Ҳалиги одамлар йўқ. Ҳозиргина шунинг ичида эди... Қаёққа кетди улар?..

У ҳайрон бўлиб, уй ичига назар солади. Печка олдидаги турган кичкина машинаси кўриб қолади. Машина олдига боради. Шу ерда турган синглисингининг қўғирчоқ қизини оёғидан судраб келиб машина устига ўтиргизади. Машинанинг узун ипларидан судраб ҳовлига чиқади, чеккароқда бир нималар қилиб ўтирган бобосига қарайди. Бобоси дераза ясаяпти. Олдидаги усталар учун керакли асбоблар, ҳар хил ҳажмдаги ёғочлар сочилиб ётиби. Вақт-вақти билан ёғочга чизадида, сўнгра кичкина қаламини қулоғи устига қистириб қўяди. Буни кўрган невараси завқ билан кулади ва ўзи ҳам шундай қилиш учун қалам қидиради, бироқ тополмайди. Машинасини судраб дараҳтлар орасига қараб кетади.

Бобоси кўз остидан неварасига қараб қўяди. Яна ишини давом эттиради. Бобоси пенсияга чиққанига икки ойча бўлди. Ҳукумат уни тақдирлади. У пенсияга чиқмасдан олдин қачон пенсияга чиқиб мундоқ дам оларканман, деб ўйларди. Иш деганлари жонимгаям тегди, деб қўяди. Мана, орзусига етди. Аммо ўзини қўярга жой тополмай қолди. Нима иш қилишини билмайди. Ишлаб ўрганган одам — ҳадеб ётавергиси келмайди. Ҳовлини кузатиб, кўзига ёмон кўринган нарсаларни — деворнинг кўчган жойларини, бузилган деразаларни, эшикларни тузатади. Токларнинг учини кесади. Ҳуллас, ҳовлидаги беўхшов нарсаларни ўхшатмаса кўнгли ором олмайди. Бобоси, «Манави Исмоил... Э тавба-е, қирқ йил Совет ҳукуматига хизмат қилиб, минглаб одамлар билан тил топишдиму, икки ойдан бўён шу тирмизак билан келиша олмайман-а!..»

Бугун икки кундирки, бобоси товуқ катагига эшик тайёрлайди. У қўлидаги ёғочни қаричлаб кўради, адашиб кетади. Яна қаричлаб, бу сафар қалам билан боплаб белги қўяди. Кесмоқ учун аррани олади. Бобоси: «Бекор пенсияга чиқибман. Ишдалигимда кунига камида ўн киши мени сўраб туарди. Энди эса ҳеч кимнинг мен билан иши йўқ». Бобоси яна кўп нарсаларни ўйлайди... Неварасининг дараҳтлар тарафга ўтиб кетганини эслайди, хабар олади. Хотиржам бўлиб, ишини давом эттиради. Неварасига ачинади: «Бунга қийин. Бирга ўйнайдиган болалар йўқ. Уйдагилар мениям ташлаб

кетади, униям ташлаб кетади. Ё иккаланг бирга ўйнай-вер, деганларимикан бу... Иўғ-е...»

Дўмбоққина невараси ўйиндан зерикади. Машинасини судраб келаётib, товуқ катагига қараб, ичида товуқ борлигини кўради. Чап оёғини ерга тап этиб уриб «кишт», дейди. Товуқ шунда ҳам индамай ётаверади. Невараси: «Ҳамма товуклар ҳовлида ўйнаб юрибди, бу товуқ нега бир ўзи ўтирибди экан?...»

Кўғирчоқ қизнинг қўлинини суғуриб олиб товуққа отмоқчи бўлади, лекин ололмайди. Ердан майда тош олиб отади, товуқ қоқоқлаб катакдан чиқиб кетади. Невараси товуқ ётган жойда оппоқ тухум турганини кўради. Қўлинини узатади, етмайди. Урмалаб катакнинг ичига кириб кетади. Тухумни машинасига солиб, бобосининг олдига оборади.

- Бобо, товуқ туғди, мана.
- Яхши бўпти.
- Тухуми иссиқ экан.

Бобоси ва невараси қўл ушлашиб ток вайиши остига борадилар. Жажжигина невараси токда осилиб турган узумларга қарайди. Ўз қўллари билан олиб емоқчи бўлади. Худди бобосидек қўлинини узумларга чўзади. Эҳ-хе, ҳали жуда узоқ, жуда...

Бобоси неварасига боқиб, беихтиёр ўзининг болалигини эслайди.. Кўнглида неварасига нимадир... нимадир пайдо бўлди... Неварасининг беғубор пешонаси ва тиниқ юзларига узоқ боқиб қолади...

1966 йил

КУЗНИНГ БИР КУНИДА

Елкасига пахталик нимча ташлаган доцент Обидович, ёниб бўлган ўт чўғида кўмилган картошкаларни учи қорайиб қўйган косов билан кавлаб, тинмай сигарета чекади. Чўғ тафтидан юзлари қизариб кетган бу салобатли, катта одамнинг қаршисида ийманиб, ориқ қўлларини қовуштириб, йигирма ёшлардаги мўйловли йигит — Раҳимжонов ўтирибди. Ҳамиша талабалар даврасида бўладиган Обидовичнинг бутун ёлғиз, муnis ўтириши Раҳимжоновни ажаблантириди. Пешонаси тиришиб, устма-уст сигарета чекаётганларини кўриб эса домланинг кайфияти ёмон, жуда ёмон, деган хulosага келди. У, Обидовичнинг олдига тортиниб, кўзларини пирпиратиб, қобиги қорайиб куяётган картошкаларга

тиклииб ўтири. Обидович ҳар қанча чекмасин, бар-
бир кечадан буён қийнаётган түйғулардан қутуломади.
Эх, ҳаёт бераҳмдир, бераҳм, деди ичиди. Узига, қола-
верса, Раҳимжоновга завқ багишлайдиган бирор қизик
гап ўйлади, тополмади. Кечаги ёмғирдан ҳўл пахтазор-
га қаради. Хўрсиниб, бош иргаб қўйди. Туриб, лабига
янги сигарета қистирди-да, пахтазор оралаб кетди. Бир
чангаль пахта териб яна қайтиб келди. Кафтидаги оп-
поқ толаларда йилтираётган ёмғирнинг охирги томчи-
ларига, сўнг шийпон олдиди ўсма қўйиб ўтирган қиз-
ларга қаради.

— Кўряпсанми қизларнинг ўсма қўйишини. Ўсма-
ни ўzlари учун қўяди, деб ўйлайсанми? Йў-ўқ, сен
учун, ҳаммаси сен учун, йигитлар учун. Ҳаёт шунақа,
гўзал... — деди.

Раҳимжонов доцент Обидовичнинг гапидан завқ-
ланиб кетди. Уялган боладай бошини чапга сал қий-
шайтириб, тобора қорайиб бораётган чўққа тикилга-
нича жилмайди. Буни кўрган ва ҳис қилган Обидович
унга биргина бўлсаям завқ бера олганидан қувониб,
кулимсиради. Ҳали ювилмаган бир пақир картошка
кўтариб ошхонага бораётган йигитга:

— Миркарим, болаларни кечаги жойга олиб бор,
энди терса бўлади, — деди.

Йигит ҳўл қўлинни олдига тутиб олган этакка ар-
тиб, хўп, деди-да, йўлида давом этди.

— Сен, Раҳимжонов ука, қолгин, иш бор.

Талабалар бир-бирларини қувлашиб оппоқ далаларга
қараб кетдилар. Обидович шошмасдан картошкаларни
арчиб, мис товоққа солди.

— Хў-ўш, қалай, зерикмаяпсанми, ишқилиб?

— Йўғ-е, домлажон, келганимизга бор-йўғи уч кун
бўлди-ю.

— Кечача қанча тердинг?

— Ўн беш кило.

— Маза йўқ-ку. Болалар икки юз, юз килолаб те-
рибди.

— Биза, энди, домлажон, пахта териб /кўрмаган-
миз-де...

— Ҳа, майли. Қўлдан келганича териш керак. Ука-
ларинг кўпми? Опаларинг...

— Тўртта укам бор. Опамла ҳаммаси эрга чиқиб
кетишиган.

— Уйланганмисан? Йўқ? Ҳа, яхши, ҳали биринчи
курссан. Анча оғир бўлади. Ма, картошкани е.

— Йўқ, раҳмат, домлажон. Жа-а, тўйиб турибман, ўзийиз енг, раҳмат.

— Олсанг-чи, ҳаммамиз ҳам тўйиб турибмиз. Бу ширин бўлади, ол.

Раҳимжонов бир қўлини кўксига қўйиб, Обидовичнинг қўлидан картошкани олди.

Обидович йигитга ачиниш билан қаради. Жуда раҳми келди унга. Картошкага туз сепаётиб, кўнглига: «Болалар... Укаларимга қарайман, деб бу ҳали ўқиши ташлаб кетмасайди», деган гап келди. Ҳозир бор гапни айтмоқчи, кеча штабдан олиб келган телеграммани кўрсатмоқчи бўлди. «Ҳозир айтсам. Бу ҳали бола бўлса. Бирдан миясига таъсир қилса... кейин нима бўлади?» У ўйлаб-ўйлаб, бу гапни ҳозир айтмасликка қарор қилди. Яна ўйлаб ўтириб, умуман, айтмайман, деган хulosага келди. Шунда Обидович онаси бечорани эслаб, кўнгли бузилиб кетди. Ўрнидан кескин туриб, сигарета чека бошлади. Кічкина кўк автобусга ишора қилиб, бирор иш буюрилишини кутиб турган Раҳимжоновга:

— Этакларни қолдириб, машинага чиқ. Бир жойга бориб келасан, — деди.

Раҳимжонов, Обидович кутгандан ҳам эртароқ автобусга чиқди. Иккалови ёнма-ён ўртароқдаги ўринидикда ўтирди. Обидович автобуснинг очиқ деразасига тирсагини қўйиб, йўл четидаги пахтазорга қараб кетди. Ўзини қанча бошқа фикрлар билан овутмасин, барibir онаси кўз олдидан кетмади... Обидовичнинг томографига бир нарса тиқилгандек бўлди, қириниб йўталди, кўзларига ёш келганини билмай қолди.

Киссасидан рўмолчасини олиб, шунчаки юзларини артаётган кишидай кўз ёшларини артди.

Район марказидаги автобус бекатига тушлилар. Раҳимжонов устма-уст сигарета чекаётган Обидовичга эргашиб кетаверди. Шаҳарга борадиган автобусни суриштирилар: яна икки соатдан кейин келар экан. Улар бир четдаги узун ўтиргичга ўтирилар. Обидович айтмасликнинг ҳеч иложини тополмади. Охири айтишга мажбур бўлди:

— Ука, бу дунё шунаقا бевафо экан, — деди у хўрсиниб. Бироқ сўзини давом эттиrmай, хотиржамлик билан ўчиб қолган сигаретасини яна ёндириди. Жуда сийраклаб қолган соchlарини орқага силаб, гапини давом эттириди: — Ука, дунё бевафо экан. Онамиз бечорани эсласам, юрак-бағрим эзилиб кетади. Аммо одам

бўлиш фақат онага боғлиқ эмас экан. Бир шоирнинг гапи бор-ку, она бўла қолгин, менга табиат, дейди. Шундайин, мана, онасиз ўсдик. Замон, табиатнинг ўзи тарбиялари. Табиат бизга она бўлди. Кечаде, Раҳимжонов деган фамилияга бир телеграмма келди. Сенгами, бошқагами, аниқ эмас. Ҳар ҳолда сенга бўлмаса керак, чунки телеграммада исминг йўқ. Иккинчидан, меҳматда ҳам шунаقا бола бор экан. Чамаси, ўшанга бўлса керак телеграмма. У болани уйига юбордик. Ҳар ҳолда сен ҳам уйингга бир бориб кел-чи... Ишонаманки, сенга эмас бу телеграмма.

Обидович ён чўнтағидан телеграммани олиб унга узатди. Сўнг, гўё осмонга қараб сигарета чекаётгандай, кўз остидан Раҳимжоновни кузатди. Раҳимжонов телеграммадаги, тез етиб кел... онанг вафот этди, деган сўзларга анграйиб қараб турди. Кўзлари пирпираб, ерда тўнтарилиб, ўзини ўнглолмай, жажжи оёқларини қимирлатастган чумолига тикилганича ўйлаб қолди. Шу ҳолиша сўзсиз, узоқ ўтириди. Ҳалиям кузатиб ўтирган Обидович: «Шаҳарлик болалар енгилтабиат бўларди. Бу жуда иродали экан, кўзларидан ақалли бир томчи ёш чиқмади-я», деб ўйлади. Обидович, Раҳимжоновнинг соchlарини силаб:

— Хўп, хайр, яхши етиб боргин... — деди.

Автобус томонга кетаётиб, орқасига бир қайрилиб қаради-да, яна қайтиб келди.

— Нима, Раҳимжонов ука, буёқдаги нарсаларингдан ташвишланмасангам бўлади. Курсдошларингта тайинлаб қўяман, хўпми? — деди бошини ирғаб ва бутунлай кетди.

Автобус кетди. Раҳимжонов курсдошлари пахта тераётган олис далаларга кетаётган автобуснинг орқа ойнасидан унга ғамгин термилиб ўтирган Обидовичга қаради. Автобус кўринмай кетгандан кейин ўрнидан туриб, касса атрофини узун таёқقا супурги боғлаб, чанг чиқармаслик учун авайлаб супураётган чолдан, шаҳарга қандай қилиб телефон қилишни сўради. Чол супуришдан тўхтаб, оғзидағи носни тўда-қўқим ичига туфлаб, шаҳар телеграфининг қаердалигини узоқ тушинтириди. Раҳимжонов чол айтган телеграфни излаб топди. Телеграммани кўрсатиб, отасининг иш жойидаги телефон рақамларини айтди. Икки қулоғига ҳам телефон трубкасини тутиб турган лаблари қип-қизил қизга нажот истаб, ёлворувчи оҳангда бош эгиб, қараб турди. Қиз бу йигитнинг руҳиятига тушунди. Тезда унга

айтган рақамларини олиб бериб, иккинчи хонага югуринг, деди. Раҳимжонов иккинчи хонага кириб, турбакани олди:

— Ада? Сизмисиз? Ман, Акромжонман. А? Ҳа, келди. Жа-а, ваҳима қилиб ёзибсиз, касал десайиз ҳам бўлившуарди. А? Ҳа, машина юборинг. Самарқанд автостанцияси бор-ку, ўшатта келиб турсин. Ҳўп, хайр, хўп...

Раҳимжонов телеграфдан чиқиб буфетга қараб юрди. Буфетдан тамадди қилиб чиққанда оқшом туша бошлиған, жафокаш дехқон кузининг олтин бир куни туғаёттан эди...

1967 йил

КУ-КУ-КУ...

I

У жуда ориқ, ўзи сариқ бўлгани учун сийраклашиб қолган соchlариям сарғиш. Қачонлардир яхшигина шеърлар ёзиб, энди расмий ишлар гирдобига тушиб, назмий туйғулари сўниб қолган. Сал энгашиб, оҳистаоҳиста, нималарнидир ўйлаб, хафақон касали билан оғриб юради. Хафақон касалига йўлиққандан бўён имайди, чекмайди. Сўзлаганда овози оғир касалларни кидай нимжон, хаста чиқиб, диққат қилмаган одам яқинида бўлсаям эшитмайди. Кулганда тишлари кўрин-маслиги учун лабларини лабларига шундай қаттиқ босадики, кўй кўзлари юмилай-юмилай деб, юzlари қизарib кетади...

У журналларга обуна бўлишни яхши кўради. Ҳар йили кўплаб хорижий ва ўзимизнинг журналларга обуна бўлади. Уйида журналлардаги расмларни, Рембрандт, Рафаэль, Боттичеллининг нодир асарларини томоша қилиб ўтиради. У яна қўшлар, уларнинг сайрашиниям яхши кўради. Ишлаб ҷарчаганида ўзи директор ўринбосари бўлиб ишлаётган шаҳар истироҳат боғининг хилват жойига ўтириб, Шишкиннинг расмларини томоша қиласи, қушларнинг сайрашини кутади. Айниқса, Шишкиннинг «Буғдойзор»ига узоқ тикилиб қолади. У ўзича икки тоифадаги одамларга ачинади. Бири — Шишкиннинг расмлари олдидан бепарво ўтган одамга, иккинчиси — қушлар сайраётганда сўзлашган одамга. Шу одамларни тўхтатиб, дегиси келади:

«Биродар, тұхтанг, күрятпизми Шишкиннинг қайинларини: ҳаёт гүзал, шунақа...»

«Биродар, әшитяпизми, тоғ чумчуги сайраяпти. Бу оқанғни Бетховен ҳам билмаса керак. Афсус, бу оқанғларнинг номи йўқ. Эшитинг, күшларни эшитинг...»

Шу пайт дараҳт шохларидә құниб турған қүшларнинг түрли нағмадаги сайрашлари эшитилади. У «Муножот»ни тинглаётгандай бошини маъюс эгиб, әшигади. Юзларига табассум югуради. Ўрнидан туриб, құлларини кўксига қўяди-да, қүшларга таъзим қиласы:

— Офарин, биродар, офарин. Қуллук!..

Хаёлан қүшлар овози қанотида узоқларга — оппоқ булулар оламига учиб кетади...

У:

«Ай, биродарлар, сизлар учун ёғочдан уя ясадим, шунақа. Тоғлардаги биродарларимизгаям айтинг, боғимизга келсинлар. Мен уларгаям уя қуриб бераман, шунақа...»

У хушвақт жилмаяди...

II

У кекса ота-онасини кўриш учун қишлоққа бориб, тез қайтди. Машина баланд довондан сойга тушиб, шовуллаб оқаётан күм-кўк сувдан ўтди. Чапга бурилиб, сув ёқасида тұхтади. У машинадан тушиб, костюмининг тұгмаларини ўтказди. Теваракка қаради: йўлни икки томонидан ҳайбатли тоғ чўққилари ўраб турибди. Ботаётган қуёш тоғ чўққиси учида осилиб қолғандай... Тоғдан оқиб тушаётган сувнинг шовуллаши эшитилиб, сув оқаётган сойдан салқинлик уфуриб турибди. Тоғ қүшларининг нағмалари... Бир гала ёввойи каптарлар чўққилар узра учиб юрибди. Каптарлар қўнганды, чап қўлини пешонаси устига соябон қилиб қаради. Кўрмади. Сайр учун каптарлар қўнган тарафга юрди. Катта тош остида бир нарсанинг питирлаётганини кўрди. Тўхтаб, ўша ёқقا юрди. Икки тош орасидаги қизил тупроқ устида турған инни кўрди. Яқинроқ борди. Хас-хашакдан усталик билан ясалған инда қүш боласи, юмшоқ тупроқда эса яна бири... Ердагиси типирчилаб инга чиқмоқчи бўлар, аммо чиқолмас, индагиси эса бўйинларини қисиб, пусиб ётарди. У ин яқинидаги сариқ тошга ўтириб, уларни узоқ томоша қиласы.

Мусича болаларининг онаси йўқ... Ё улар онаси мизикин?

Күёш ботиб тоғларга оқшом чўкди. Мусичаларнинг онаси ҳамон йўқ. У кетмоқчи бўлди. Шунда, мусичалар бўйинларини чўзиб, бирам ғалати чийилладики... Унинг юраги увушиб кетди. Мусичаларни олиб уларнинг ҳўл баданини тўлиқ ёпмаган жунларини силай-силай пастга тушди. «Энг беозор қуш. Булар одамларга фақат яхшилик тилайди. Кукулашлари, таъзимлари... шунаقا», деди у ўзича. Рўмолчасини машина ўтиргичига ёйиб, устига мусича болаларини қўйди. Идорага келганларида у мусича болаларини диванга қўйиб, жунини силади. Уларни ҳовлига — дараҳтлар остига қўйиб юбормоқчиям бўлди. Тоғдагидай бу ерда ҳам ўз тирикчилигини ўзи қилар, деб ўйлади. Авайлаб, ҳовлига олиб чиқди. Кўум-кўк ўтлар устига қўйиб бирпас кузатиб турди. Улар жойидан қимиirlайвермагач, мендан ҳайикяпти, деб ўйлаб, хонасига қайтиб кирди. Бирпас янги журнallарни титкилаб ўтириб, деразадан қаради. Мусича болалари дараҳт ёнида бошларини бир-бирига тегизиб, мудраб, мунғайиб турардилар!.. У шошиб бориб, уларни олиб келди. Ҳеч қаёққа чиқармасликка аҳд қилди. Уларга жой қидира бошлади. Қоровулхона қулайдай. Айниқса бурчакда турган шкаф тепаси. У ҳовлидан ранги қўчиб кетган эски мис товоқча топиб, унда сув олиб келди. Ер, емаса турар, деган хаёлда бозордан ярим кило тариқ олиб келди-да, бир сиқимини мусичалар олдига сепиб, уйига кетди.

Мусичалар ўз умри билан туғилган экан. Катта бўлиб қолишиди.

III

Совет — Япон шартномаси имзоланиб, алоҳида моддаси бир давлатдан иккинчи давлатга учеб ўтган қушларга озор бермаслик, уларни авайлаш ҳақида эди. У газетадаги шу моддага тикилиб тўймайди. Кувончи ни боғ қоровулига изҳор этади:

— Эшилдиларми, отахон. Ҳукуматимиз кўп танти ҳукумат, қушлар тўғрисидаям ғамхўрлик қиляпти, шунаقا. Раҳмат, ҳукумат, раҳмат. Айтгандай, қушларга уя ясанг, деб эдим, тайёр бўп қолдими?

— Энди иккита бўлди.

— Э, тезлатинг-да, отахон, мен қушларга ваъда берганман, биродарларимизни олиб келинглар деб. Ҳали-замон келадилар, шунаقا...

У қоровулхонага кирди. Мусичалар энди учадиган, хонада йўргалаб юрадиган, бир-бирларини қувалаб столлар остига кириб кетадиган бўлган эдилар. Сарғиш жунлари қорайиб, тумшуқлари бигиздай... Чиройли! Узун қанотларининг усти сал қорайган, ости эса оппоқ. Бирининг қанотлари худди капитарларни дай ола. У пойандоз устида йўргалаб юрган мусичаларга қараб завқланиб:

— Э-э, жуда гўзал бўпсизлар-ку, биродарлар. Яхши эмас, кўз тегиши мумкин, шунаقا, — деди.

Тариқ олиб келгани бозорга борди. Сотувчи чолга:

— Илтимос, яхшироғидан беринг, яқинда мусичаларим кукулайди, шунаقا, — деди.

Чиндан ҳам мусичалар оқшомда илк бор... илк бор ёнма-ён туриб, вазмин, самимий таъзимлар билан салом қилдилар:

— Ку-ку-ку-ку...

IV

У мусичалар кетиб қолмаслиги учун деразаларни ёпиб қўйди. Хонада мусичалар қўниб-учиб турадиган жой қилмоқчи бўлди. Ҳовлидаги ўрикнинг кичкина шохчасини синдириб олди-да, деворга суяб қўйди. Мусичалар қўнишига бу нокулайдай туюлди. Идора супуриш учун ишлатиладиган пақирларнинг бирига пичалой олиб келди-да, ўрик шохчасини лойга суқиб қўйди. Пақир атрофига дон сочиб, кичкина мис идишда сув олиб келди. Мусичалар хона ичидаги айланиб учиб, стол остига қўндилар-да, бараварига бошларини эгиб, таъзим қилдилар:

— Ку-ку-ку-ку...

У ўзида йўқ қувониб, бош ирғади:

— Бали, бали...

V

У эрталаб ўзини ёмон сезиб, валерьянка ичди. Ёнбошлаб ётганида қоровул телефон қилиб, директор курортдан қайтиб, идорага келганини айтди. У кийиниб, уйидан зўрға чиқди. Сочсиз боши юзларидай қипқизил, қоп-қора кўзлари чиройли, лаблари гўдакларникидай жуда юпқа, қошлари сийрак директор бир сохта табассум қилди-да, ўна аслига қайтди:

— Жа, янгилик кўп-у. Бизнинг ақлнимиз етмабди-да шуларга. Буни қаранг-а...

Кутилмаганда директор күзларининг оқи кўпайиб, қорачиқлари қаёққадир йўқолиб қолгандай бўлди.

— Бу маданият боғи! Бу ерда паррандалар эмас, халқ ҳордиқ чиқариши керак! Тавба, ҳамма дараҳтларга уя қўндириб чиқиби-я. Ҳаммаёқ мусича тезаги... Нима, бу зоопаркми?..

— Ўртоқ директор, кушлар ҳам халқ...

— Сиз раҳбарми ё капитарбоз октябрятми? Марҳамат, ёзинг ариза. Ақли кириб қолар, болалигини ташлар, деб шунча сабр қилдим, етар...

У директор суриб қўйган қофозни олди-да, ўз хонасига чиқиб, ариза ёзди. Ариза ёзганида юраги ёмонлашди. Шунда зўр соғиниш билан мусичаларини кўргиси, улар билан мулоқотда бўлгиси келди. Қоровулхонага бориб аланглаб, туриб қолди. Мусичалар йўқ. У стол, шкаф тагларини, дераза пардалари орқасини қаради. Йўқ. Қоровул ҳам йўқ. Директорнинг эшиги олдига келиб энтикиб:

— Мусичаларимни кўрмадингизми? — деди.

— Ана ҳовлида. Ўзларидан кўрсин, ҳайдадим, кетмади... — деди директор бошини кўтармай.

У шошиб ҳовлига чиқди. Чиқиндилар кутисида мусичалар бошлари орқасига қайрилиб ётарди... Унинг юзлари оқариб, лаблари пирпиради. Боши гувиллаб, бутун фикру хаёллари тумандай хиралашиб, кўзлари ҳеч нарсани кўрмай қолди. Энтикиб, чукур нафас олмоқчи бўлди-ю, аммо нафаси етмади. Юрагини худди бир маҳлуқ панжалари тирноқларини ботириб чангллагандай, кейин эса бирдан... фижимлагандай бўлди. Кўкрагини ушлаб инграб, синиқ овоз билан: а-а-а-а-а-а... деди-да, скамейкага ўтириб қолди.

У ўзига келиб, бошида унга термулиб турган қоровул билан директорни кўрди. Директор жилмайди:

— Айёрлик қилманг-е, қўрқитвордингиз. Ариза ёз, деб шунчаки айтдим-да...

У ёруғ оламга қаради... Худди Шишкиннинг расмларини томоша қилаётгандай ҳаётга сукланиб-сукланиб термилди. Шунда, олча шохига қўниб турган мусичага кўзлари тушди. Унинг мусичаларига жуда ўхшаркан. Мусича бир нағмада ку-кулади:

— Ку-ку-ку...

Табассум! Унинг оппоқ юзларida маъюс табассум...

1970 йил

ЭР-ХОТИН

Йўқ, улар Анҳор бўйида учрашмади. Учрашувда ўзиники қилиб айтиш учун китоблардан шеърлар кўчириб олмади. О, мен сени севаман, сенсиз яшай олмайман қабилидаги мавсумий сўзларни сўзлашмади. Лаблар топишганда қизнинг узун товони ердан сал кўтарилимади. Йўқ, йигит қизни безорилардан кутқариб қолмади...

Яхши шоир Ўролбой кўрпага бурканиб, ишқий шеър битди. Мисраларини фарзандидай ардоқлаб, вояга етказди. Беихтиёр ўзининг биринчи муҳаббатини — синфдоши Холбувини эслади... Қоронгини қучоқлаб, Холбувини бағрига босгандай бўлди. Кўнглига оқшомдай маъюслик чўқди. Тўшакдан имиллаб туриб, тимирскиланиб бориб чироқни ёқди. Биринчи китобини вараклади. Шеърлари кўзига жуда бачкана кўринди. Юзларини бужмайтириб, китобни каравот остига отиб юборди...

Йўқ, шоир аввало ўзининг шоҳ асарини яратиши лозим экан. Ўролбой мана, ўттизга тўлибдик, шоҳ асари ҳақида ўйлаб ҳам кўрмабди. Буюк асари қолиб, иккинчи даражали асарлари билан овора бўлибди...

У зўр пушаймон билан ўзига қайлиқ излади. Топди: оддий тикувчи Барчиной. У Барчиной билан сохта бўлса-да, жилмайиб гаплашиб, шаҳар истироҳат боғига борди. Ярим килодан музқаймоқ ейишиди. Ўролбой бўлажак қайлигининг кўзларига тикилиб... кўнглига доир ҳеч нимани ҳис этмади. «Ҳаётда жуфт бўлиб яшаш керак экан, иложимиз қанча», деди ичида. Сўнгра, ўз гапини ўзи маъқуллаб, бош ирғади. Барчиной эса ҳатто унинг шоирлигига ишонмади: «Поэзия degани нафосат, жозиба-ку, шоирнинг ўтиришини қаранг...»

Қиз, у мени писанд қилмаяпти, деган хulosага ҳам келди. Шундай бўлса-да, тўйга розилик берди. Чунки унинг ҳам ёшлиги ўтаётган эди...

Тўй ресторонда бўлди.

Ниҳоят, шоҳ асар яратилди! Ҷақалоқни деразадан кўрсатдилар. Ўролбой илжайиб, ўғлига термулди: «Ана буюк асар, ана! «Анна Каренина»! Йўқ, «Ҳамса»!

У буюк асарига сўнгги нуқтани кўйган адибдай яйраб, керишиди.

Ўролбой яхши кунларнинг бирида кечаси узоқ ўтириб шеър ёзиб, кеч ётди. Эртасига тушда уйғонди. Балконга чиқди. Ҳаво жуда соф, сайрбоп... У ўйлаб, Василий Шукшиннинг «Қизил бодрезак» фильмини ҳали кўрмаганини эслади.

— Кийин, кинога борамиз, — деди Барчинойга.
Барчиной янги мода бўлган камзул-шимини кийиб чиқди.

Ўрлбой қовоғини уюб, уф-ф, дея тиззасига урди:

— Барчиной, мен аёлимни атлас кўйлакда кўриши хоҳлайман!

— Шоирга қолса-ку, кўп нарсаларни хоҳлайди.

— Аёл аёлдай бўп юрса-да.

— Юринг, кечикамиз.

— Бормайсан, ўзим бораман.

— Ажаб бўпти, обормасайиз оборманг.

— Нимага гапни айлантирасан? Мен сенга гапиряпман!

— Вой, жа-а қизиқсиз-а, бир манда борми шунаقا кийим? Ҳамма маданиятли хотинлар кийишади-ю...

— Анови атласлар маданиятга ёт матоми? Қайси мамлакатда шунаقا мато бор? Сенлар ношукур: пешонангдаги маданиятни кўрмайсанлар...

— Сиз доим шунақасиз. Топган гапингиз — ўзбек атласига бутун жаҳон харидор, Самарқанддаги тарихий бинолар жаҳонда йўқ. Унақа-бунақа...

— Бас қил!

— Ҳо-о, бас қилмасам қўлийиздан нима келади...

— Келмайдими, келмайдими?

Ўрлбой шиддат билан иргиб туриб, анграйган Барчинойнинг юзига тарсакилаб юборди.

Барчиной диванга учеб тушди. Юзларини қўллари билан яшириб йиглади.

Ўрлбой унга бирпас анграйиб қараб турди-да, торгина ишхонасига кирди. Стулга ўтирди. Соchlарига бармоқларини ботириб, кўзларини юмди.

У аёл зотига биринчи марта қўл кўтарди...

Барчиной ўпкасини босолмай йиглаб ётди. Ухлаётган ўғли йиглади. Тоқати тоқ бўлиб, ўрнидан турди. Юзларини ювиг артди. Ойнага қараб, бир сесканди. Чап ёноғи кўкарган эди. У аламидан лабларини буриб яна йиглади. Ўғлини бағрига олди. Ўғли овуниб, мулоийм лаблари билан унинг кўкракларини сўра бошлиб эди... кўнгли ёришди. Кўкарган жойининг оғриғи қолгандай бўлди. Ўғлининг сийрак соchlарини силаб, пешонасидан ўпди: «Ўғлим, ўйлаган эдим-а, кўнгилсиз турмуш бўлмайди деб. Мана, айтганим келди».

Барчиной деразадан осмонга қараб хаёл сурниб ўтириди. Ўғлини ухлатиб ўзи ҳам ётди. Эри бош қўядиган ёстиқни муштлаб-муштлаб қаппайтирди. «Ёлғиз ўзи

ётмайды, барибир ёнимга ётиб, овутыш учун бағрига босади, эркалатади...»

У шундай хаёл қила-қила тескари ўгирилиб ухлаб қолди.

Эрталаб турса, ёнида эри йўқ. «Ҳатто ёнимга келиб ётмадиям. Мени кўргиси йўқ. Бўлди, энди бўлди. Кетамиз, ўғлим, кетамиз. Кўнгилсиз турмуш барибир турмуш бўлмайды», деди.

Ўқинч ҳам алам билан орқасига бурилиб қаради: «Ақалли хонасидан чиқиб, кўнгил учун бир оғиз кетма, демади-я. Қишлоқилигига борди-да... Ҳеч бўлмаса, ўғли билан хайрлашмади-я. Шунчалик жонига теккан эканман, шу кунгача билмабман».

Эшик кўнғироги жиринглади.

Барчиной эшикни истар-истамас очди. Остонада Ўролбойнинг қишлоқда яшайдиган тоғаси билан икки нотаниш одам турди.

Барчиной зўрға жилмайиб, меҳмонларни ичкарига таклиф этди.

Ўролбой чиқди. Меҳмонлар ўтирди. Сўрашдилар.

— Эртага қурултой экан, шунга келиб эдик. Бир кўриб кетайлик деб... — деди тоғаси.

— Яхши, яхши, — деди Ўролбой сохта жилмайиб.

— Ҳа-а, ишлар яхшими ўзи, шоир? Шеър планлари қалай бўляяпти? Шеър планларини ошириб бажарайпсизми? Мана, биз пахта планларини юз эллик процентга бажардик. Биз ҳақимизда ҳам шеър ёзинг энди...

Ўролбойнинг тоғаси дала ишларини гапираётиб, дастурхон тузатган Барчинойнинг юзидаги кўкариғни кўрди.

— Э, юзга нима бўлди, келин?

Ўролбойнинг юраги шув этиб кетди. Ирис қофозидаги кучукчага тикилиб, бир дақиқа нафас олмай қолди.

Барчиной жилмайиб, кўкариғни силади:

— Ҳозир янги уйларга манавунаقا линолиум тўшалади. Бу ўлгур ювса сирғанчик бўлиб қолади. Кеча юваётиб денг, сирғаниб кетиб, юзим билан тушсам бўладими...

— Уҳ, чуқ-чуқ, эҳтиёт бўлинг-е, иш адо бўлармиди...

Ўролбой энтиканидан нафаси титраб кетди. Бошини янада эгиб, қизарди. Барчиной ҳам қизарди. Тураётуб, меҳмонларни дастурхонга уннади:

— Олинглар, олиб туринглар. Ўролбой ака, чойдан қуйинг.

Ўролбой шундагина ўзига келди. Буш пиёлаларга чой қуйиб, қани, олинглар, деди.

Меҳмонлар ҳалигидай арзимаган фалокатлардан келиб чиқадиган баҳтсизликлар ҳақида эшитган-билгандарини гапириб ўтиридилар.

Барчиной овқатни олиб келди. Дастанхонга болгар конъяги билан шампань виносини қўиди.

— Манавиларни қўйинг, Ўролбой ака.

Ўролбой қадаҳларга конъяк қўиди. Тоғаси боши билан Ўролбойни кўрсатиб, Барчинойдан сўради:

— Шоир қалай, келин?

— Яхши, жуда яхшилар.

— Агар сал ёмонлиги бўлса айтаберинг, гапиришиб қўнимиз?

— Йўқ, нега энди, яхшилар. У кишини ойимларам мақтайдилар...

Ўролбой ён-верига аланглади. Меҳмонларнинг олишини кутиб ўтирмаи, қадаҳдаги конъякни бир кўтариб ичиб қўиди. Барчиной эрига тузланган бодринг узатди. Эри конъякнинг зўрлигидан кўзларини юмиб, бодрингни олди.

Меҳмонлар ўзоқ ўтириб, уларни қишлоққа таклиф қилиб кетди.

Ўролбой меҳмонларни кузатиб қўйиб, ишхонасига кирди. Йиғма каравотта чалқанча ётди. Кўлларини чалиштириб, боши остига қўиди. Ўтган воқеани шоирона мушоҳадалади... Юзларида табассум ўйнади. Иргиб туриб, деразадан ташқарига қаради. Икки кафтини бирбирига завқ билан ишқади. Папирос чекавериб-чекавериб сарғайиб кетган тишларини кўрсатиб, илжайди. Орқасига кескин бурилиб, меҳмонхонага кирди. Барчиной йўқ. Эшик тарафга юрди. Барчиной эшик олдида қовоғини уюб, лабларини чўччайтириб, аравачада ўтирган ўғлини чойшабга ўради.

Ўролбой унинг қўлини ушлади.

— Кўй энди, одам қизиганда нималар қилмайди.

Барчиной унинг юзига қарамай, қўлини силтаб ташлади.

— Барчиной, биласан, шоир халқининг асаби ёмон...

Барчиной индамай, яна эшикка кўл чўэди.

Шунда, Ўролбой унинг қўлидан ушлаб, яна ўзига қаратди-да, белидан маҳкам қучоқлаб... ўзи қўқартири-

ган ўша ёноқларидан ўпди. Лабларини Барчинойнинг лабларига узоқ босиб турди.

Барчиной эрининг бўйнига осилиб... йиғлаб юборди. Унинг кўзларидан оқаётган илиқ ёшлар эрининг бўйнига томди...

Оқшом бир-бирига тикилиб, юзма-юз ўтирадилар.

Ўрлбой меҳмонлардан қолган конъяқдан бир қадаҳ ичди. Барчинойга термулди. Олис термулди... Барчиной кўзларини олиб қочди. Кўзлари учрашиб, бир сонияча тикилиб қолдилар. Ўрлбойннинг қалбida аёлига шундай илиқ, маъсум туйгулар кўпириб тошдикি... Бу туйгулар ўша синфдошининг кўзлари билан кўзлари учрашганда... Ҳа-ҳа, ўшанда шундай кўпириб тошган эди...

1970 йил

МАҚОЛАЛАР

ГАЗЕТАГА ИНТЕРВЬЮ

Хозир шундай бир давр келди: китобхоннинг ҳам, ёзувчиларнинг ҳам ердан оёғи узилган пайт. Ким минбарга чиқиб бақирса, ким иккита мақола ёзиб, шовшув қылса, шу актив ҳисобланади.

Шеър ёзиб, асар ёзиб халқ орасига кира олмаётгандарнинг куни туғди — қайта қуриш бошланиб қолди. Уларнинг дарди Орол ҳам, пахта ҳам, халқ ҳам эмас, уларнинг дарди — мансаб, каръера. Мақола ёзиб адабиётга кирмайдилар, мақола ёзиб журналист бўлиш мумкин. Ёзувчи асари билан адабиётни эгаллади. Ўша бақириб-чақириб юрганлар ҳам анча нарсага эга бўлиши, ҳа-ҳа, шундай. Бироқ Адабиёт қасрига киромадилар. Номлари чиқди, халқдан сўрасангиз: ҳа, яхши, ўткир мақолалари бор, дейишади. Лекин халқ на шеър, на ҳикоя, на қиссасини ўқиган.

Рабиндранат Тагор айтмиш Адабиёт — бу улкан бир қаср, демакдир. Улкан қасрнинг эса дарвозаси ҳамиша битта бўлади. Бу дарвозадан ҳамма бир хил йўл билан киради. Лекин кира олмай қолувчилар ҳам жуда кўп бўлади. Булар аламидан ана шу қаср теварағида шовқин солиб, «ура-ура» қилиб юради. Олисдан қараган одам бу улуғ қасрнинг эгалари шу бақироқлар, деб ўйлади. Аслида эса булар адабиёт дея атамиши қўхна қасрнинг дарвозасини топа олмай юрган аламзадалардир.

Адабиёт қасрини қандай забт этса бўлади? Адабиёт дарвозасидан қандай кирса бўлади? Асл ижодкор Адабиёт қасрини ўз асари билан забт этади. Асл ижодкор эл-юргта «ура-ура» гаплари билан эмас, бадий асарлари билан хизмат қиласди.

1990 йил

СЕТОН-ТОМПСОН ҚИТОБИГА СЎЗБОШИМ

Сетон-Томпсон 1860 йил августнинг 14-кунида Англияда таваллуд топди. Унинг томирида шотланд қони бор. Эрнестнинг аждодлари тоғликлар бўлиб, улар ҳамиша табиат орасида, табиат билан ҳамнафас яшади. Бобоси Эрнесттага ҳадеб: «Бир кун келиб, барибир қонингга тортасан, барибир аслингга тортасан», деяверди. Дарҳақиқат, бобоси айтгандай бўлди. У ўз аждодларига тортиди, суяқ сурди.

Эрнест олти ёш бўлганда уларнинг оиласи Канадага кўчиб келди. У шу ёшидан бошлаб эсини таниди, кўрган-билганларини эслаб қоладиган бўлди. Шу йил қишида мактабга борди.

«Киши олис-олис бўлди. Ниҳоят, мартда чинакам кўклам келди, кун чараклаб кетди, теваракдаги қорлар эрий бошлади, осмон тиникдан-тиник, зангори бўлди.

Шунда, жажоғигина бир қушча уйимиз олдидаги теракка келиб қўнди-да, оҳиста-оҳиста сайради. Биздан каттароқ бир бола уни: «Бу — баҳт қуши», деди. Хаёлимда баҳт қушининг мовий елкасини кўргандай бўлдим. Баҳт қуши қайта-қайта сайраб, ўзининг нафис қўшигини кўйлади.

Нимагалигини ўзим ҳам билмайман, шунда мен бирдан ўткам тўлиб, йиғлаб юбордим. Баҳт қушининг қўшиғидан кўнглимнинг туб-тубигача тўлқинланиб кетдим. Шундан буён мен ҳар йили баҳор билан мовий қушимни — баҳт қушимни кутадиган бўлдим».

Истеъодлар ҳамиша ўжар бўлади. Шу боис, мактабдаги энг истеъодли бола ҳам, энг ўжар бола ҳам Эрнест бўлди.

«Бир куни бир эълон ўқиб қолиб, унда доктор Росснинг «Канада қушлари» китоби чиқиб, Пиддингтон китоб магазинида сотилаётганини билиб олдим.

Эртаси куни ҳаяжондан қалт-қалт қалтираб, ўша ёқقا йўл олдим. Қарасам, китоб бир доллар турар экан. Отамдан пул сўраб бўлмайди, у менинг табиат илми билан қизиқишимга қарши одам. Ўзимда бўлса пул йўқ. Шунда мен ана шу юз центни ҳалол меҳнатим билан топмоқчи бўлдим. Иккита ажойиб қўёним бор эди, шуларни бозорга солиб, эллик центга пулладим... Бир ҳафта ўтиб, бир аёлнинг ўтиналарини кўчасидан ҳовлисига ташиб бердим. Аёл хизмат ҳақим учун ўн цент берди. Жамғарган пулим жами олтмиш цент бўлди.

Кейин бор майда-майда тошларимни пуллаб, яна ўн икки цент топдим. Тағин иш изладим. Бисотимдаги нарсаларимни жаллобларга пулладим. Бир инглиз хонимга ҳашарот териб бердим. Бир-икки ҳафта деганда жамғарма пулим түқсон цент бўлди. Сунг, омадим келмай, қолган центларни тополмай қолдим... Аммо китоб магазинига бормаган куним қолмади, ҳар куни Пиддингтонга бориб, китоб магазини токчасидаги мени табиатнинг бор сир-асоридан воқиф этажак мўъжизавий китобни кўриб-келиб юрдим».

Кейин акаси Эрнестга иш буюриб, ҳақига бир галстук узатди. Эрнест галстукни эмас, пулини олди. Шундай қилиб, пули юз цент — бир доллар бўлди. Ниҳоят, магазиндан орзу қилган китобини олиб, мурод-мақсадига етди.

У аввал-аввал расмлар чизди. Рассом бўлмоқчи бўлди. Қатор-қатор расмлар чизди. Расмлар кўргазмасини кўйди. Бир расмда одам еяётган бўрилар тасвири бор эди. Одамлар расмни томоша қилиб: «Бу худога шак келтириш-ку!» — деди. Тўғри, расм мазмуни жуда аянчли эди, аммо одамлар расмни ўта қайгуиликда эмас, айнан худога шак келтиришда айблади. Бу қадим-қадимдан ҳукм суриб келаётган қарашлар акс садоси эди.

Ўрта асрлар бошларидан бошлаб динлар таъсири оқибатида инсон билан ҳайвон ўртасига Хитой девори қўйилди. Илоҳиётчи файласуф Фома Аквинский, «Ҳайвонларнинг қалби йўқ», дея таълим берди. Бу таълимот ҳайвонот дунёси билан табиат оламини ўқиб-ўрганишни тақиқлаб қўйди. Охир-оқибат, Сетон-Томпсон «Бу қанақаси? Ҳудонинг бандаларини бекордан-бекорга ўлдираверар экан-да!» қабилидаги танбеҳларга қолди.

Аммо давр ўзгариб борди, бу қабилдаги қарашлар қариди. Илму фан жониворларнинг қалби бор эканлигини кашф этди, табиатга бўлган қарашлар ўзгарди. Бу борада Сетон-Томпсоннинг замондоши, буюк олим Чарльз Дарвиннинг хизмати беназир бўлди. Дарвин ўтган аср ўрталарида ўзининг «Турларнинг келиб чиқиши» асарини битиб, кашфиёт яратди. Дарвин инсон шаънини камситмаган ҳолда инсонга ўзлигини танитди. У инсонни табиат тараққиётидаги бир бўғин деб қаради. Дарвин таълимотига биноан инсон фақат табиатга илоҳийларча назар солибгина қолмасдан, шунингдек, ўзига ҳам табиат нуқтаи назаридан, табиат кўзи билан қарashi, айниқса, ўзи билан табиат ўртасидаги қондошликтин англаб етиши лозим бўлди.

У ажойиб анималист — жониворлар тасвирини яратувчи рассом бўлди. Аммо «баҳт қуши»ни табиатшунос олимликдан, адабликдан топди.

Жониворлар бадиий адабиётда қадим-қадимдан бўён оралаб юради. Қадимги адабиётларда жониворлар шунчаки ҳолатларда бир кўриниб қўйди. Бир кўриниб, бир йўқолиб турди. Кўрингандга ҳам шунчаки, инсон хизматкори сифатида, йўл-йўлакай кўринди.

Йўқолганда йўқолгани билинмади, ўқиган одамда йўқлов туйфуси туғдирмади, демак, қўмсаш, ачиниш, қайғу қўзғамади. Боиси, жониворлар бир жонли буюм сифатида тасвирланди. Борди-ю, бирор жонивор, айтайлик, от ўлган бўлса, асар муаллифи шу заҳотиёқ отнинг эгар-абзалини олиб, уни ўлган жойида ташлаб кетаверди. На асаддаги одамда, на китобхонда отга нисбатан хайриҳоҳлик, ачиниш содир бўлди. Чунки муаллиф отни ҳайвон, ўз оти ўзи билан ҳайвон, деган нуқтаи назар билан тасвирлади.

Бадиий адабиётда жониворларни тасвирлашнинг маълум бир мезони, маълум бир қолипи пайдо бўлди. Бу мезон бора-бора шаклланиб, одатдаги рисолага сифмай қолди. Кейин-кейин жониворлар бадиий адабиётда бир воситачи сифатида тасвирланадиган бўлди. Муаллиф ўз мақсадини амалга ошириш учун ҳайвонларни керак бўлганда ишлатди, керак бўлмаганда, воқеадан четга чиқариб қўйди. 1498 йил да улуғ ўзбек шоири Алишер Навоий «Лисонут-тайр» — «Қуш тили» асарини яратиб, унда инсон билан табиат, илоҳиёт масаласини бадиий таъриф-тавсифлади. Буюк шоир ўз қарашларини Попишак, Тўти, Товус каби ўттиздан зиёд қушлар тили, қилмиш-қидирмишлари, саргузаштлари орқали мажозий тарзда бадиий ифодалади. Ўзбек халқ достонлари яратилиб, бу достонларда отлар инсоннинг энг яқин биродари этиб тасвирланди, инсонни балолардан омон сақлади, оғирини енгил қилди, инсоннинг тоғдай таянчи бўлди. XVIII асрда француз табиатшуноси Бюффон қирқ тўрт жилдан иборат «Табиат тарихи» асарини яратди. Бюффон бу асарида жониворлар ҳаётини тасвирлади, жониворларнинг ўзига хос портрети, хулқ-авторини чизди. Брем ўн уч жилдан иборат «Ҳайвонлар ҳаёти» китобини яратди. XIX асрда улуғ рус ёзувчиси Лев Толстой «Холстомер» деган асар ёзди, унда отлар тилга кириб, одамлар мисол ўзаро гаплашди, баҳслашди, талашиб-тортишди, фалсафий мушоҳдалар қилди.

Сүнг, бадиий адабиётда жониворларга энг бир хокисор, дунёдаги энг бечора жонзот сифатида қараб ёзилган асарлар пайдо булди. Бунда муаллиф асардаги одам билан қүшилиб, жониворларга ачинувчан түйгүлар билан мурожаат қылди, жониворлар учун күйибишиди, қайғурди, елиб-югурди, одамгарчилик қылди, күзёшлар түкди.

Тургеневнинг «Муму» асари шундай асар.

Кейин, жониворларни кўкларга кўтариб улуғловчи, ҳатто унга сифинувчи, уни илоҳийлаштирувчи асарлар яратилди. Жониворлар ҳатто одамдан ҳам ақлли, доно, одамдан ҳам инсонпарвар, халқпарвар, эзгу мақсадли қилиб тасвирланди. Одам ким, ҳайвон ким, билиб бўлмай қолди. Бундай жониворлар таъриф-тавсифини ўқиб, ўзи, инсон инсонга бўри экан, қайтанга инсондан ҳайвон яхши экан, деган хуносалар ҳам пайдо бўладиган булди. Баъзи бир ҳайвонлар, масалан, итлар инсон билан баб-баравар қўйиладиган, айрим ҳолларда инсондан ҳам юксак қўйиладиган булди.

Жек Лондон ана шундай асарлар яратди.

Яна бир туркум асарлар пайдо бўлиб, булар бадиий асар бўлиб, бадиий асар бўлмади, илмий асар бўлиб, илмий асар бўлмади. Улар чинакам бадиий асар дараҷасига кутарила олмай, илмийликка тобе бўлиб қолди. Оқибат, ўз соҳасига оид қўлланма асар бўлиб қолди.

Даррелл шундай асарлар ёзди.

Табиатни ким яхши билади? Рассомми? Йўқ, расом кўз олдидаги турган тайёр табиатни қофозга кўчиради. Ёзувчими? Йўқ, ёзувчи табиатга юзаки, сиртдан қарайди, табиат жамолинигина кўради. Табиатни ўз мақсади йўлида тасвирлайди. Тўлмаган ойни хоҳласа ёр қошига, тўлган ойни хоҳласа ёр жамолига қиёслаб тавирлайди. Олимларми? Йўқ, олимлар табиатни билади, аммо ҳис қилолмайди. Олимлар табиатни қафасга қамаб, қафас тешикларидан мўралаб, девордан бўйлаб қараб ўрганади, шарикли ручка билан ўрганади.

Табиат ана шу уч олам нуқтаи назаридан келиб чиқиб тасвирланди. Аксарият ҳолларда бу уч олам нуқтаи назари, фикри бир-бирига тўғри келмай қолди. Рассомлар табиати бошқа, ёзувчилар табиати бошқа, олимлар табиати бошқа бўлиб келди. Сетон-Томпсон ана шу уч нуқтаи назар, ана шу уч қараш — рассомлик, ёзувчилик, олимликдан Сетон-Томпсон булди.

Сетон-Томпсон:

Табиатга зийрак анималист рассом, синчи адид, нуктадон олим кўзи билан қаради.

Жониворларга тоза кўнгил, тоза кўз билан қаради.

Жониворлардан ўзининг қингир, фалсафий фикрларини айтиш учун фойдаланмади.

Жониворларнинг ички дунёсини ҳалол, холисона очиб берди.

Ҳаётта жониворлар кўзи билан боқди.

Жониворларга тушкун муносабатда бўлмади.

Бирон-бир динга сифинмади, яккаю ёлғиз паноҳи табиат бўлди.

Ўз бошидан кечирган ҳаётни, ўз кўзи билан кўрган табиатни, ўз қўли билан ушлаган жониворларни қандай бўлса шундайлигича бадиий асар қилди.

Сетон-Томпсон бадиий адабиётда биринчи бўлиб жониворларни бадиий асарнинг бош қаҳрамони қилиб олди. Ҳайвонларни образ қилиб тасвиirlади, ҳайвонларни қаҳрамон даражасига кўтарди. Жамики ташқи муҳит, энг улуғ зот бўлмиш инсонни ҳам ҳайвонлар образини яратиш учун хизмат қилдирди. «Мен билган жониворлар», «Қувфидилар тақдири», «Ҳайвонлар — қаҳрамонлар», «Митти ёввойилар», «Рольф ўрмонда», «Крэг — кутеней қўйи» каби қатор асарлар яратиб, уларда ҳайвонларни бош образ қилиб тасвиirlади. Бу асарлар китобхонлар қалбига тез кириб борди, китобхонларнинг мулки бўлиб қолди.

«Жониворлар ҳақида ҳикоялар» китоби эса Сетон-Томпсон номини оламга ёйди. Китоб қўлма-қўл ўқилди, тик туриб ўқилди, овоз қўйиб ўқилди, кечаю кундуз ўқилди. Китобни бутун дунё ўқиди.

Китоб бу қадар оммавийлашиб, қўлма-қўл бўлиб кетиш сабабларидан бири — уни болалар ҳам, каттапар ҳам, кексалар ҳам бирдай ўқийди. Китоб етти яшар китобхонгаям, етмиш яшар китобхонгаям бирдай суюкли, бирдай ардоқлидир.

Сетон-Томпсоннинг ўзи айтмиш: «Бу китоб, шубҳасиз, адабиётда жониворларни тасвиirlаш бобида янги, реалистик йўлни бошлаб берди. Унда биринчи бўлиб жониворлар туриш-турмуши ҳаққоний тасвиirlаб берилди.

Шу вақтгача жониворлар ҳақида масаллар, эртаклар, ҳикоялар мавжуд бўлиб, уларда жониворлар ҳайвон терисини ёпиниб олган одам бўлиб юриб-турди, одам бўлиб гапириб-гаплашди».

Асарни Николай Чуковский русчага таржима қилди. 1936 йилда «Домино» номи билан китоб бўлиб чиқди. Шу дастлабки нашрда «Спрингфильд тулкиси» ҳамда «Чинок» деган ҳикоялар ҳам бор. Бу ҳикоялар Сетон-Томпсоннинг таржимаи ҳол китобидаям, «Жониворлар ҳақида ҳикоялар» асари хусусида ёзилган мақолалар, хотиралар, илмий манбалардаям қайд этилади. Ажабо, бу ҳикоялар асарнинг кейинги нашрларида Йўқ. Асарни йилиги юзлаб нашриётлар миллионлаб тиражда чоп этади. Даромад учун бир-бирларидан шундайгина олиб, кўр-кўёна босади. Бу Сетон-Томпсонни билмаслик, узумини еб, богини суриштирасликдир. Мен асарнинг ilk нашрини топиб, иккала ҳикояниям ўзбекчалаштириб, ушбу китобга киритдим.

Сетон-Томпсон ҳайвонлар ҳақида шундай асар яратдики, бундай асарлар Сетон-Томпсонгача яратилмаган эди, ундан кейин ҳам яратилмади. Табиат, хусусан, жониворлар ҳақида минглаб асарлар ёзилди, аммо ҳеч ким Сетон-Томпсондан ошиб ўтолмади.

Хеч ким Сетон-Томпсон бўлолмади.

Оқибат, ожиз адиблар, гарид адиблар куйиб кетди. Адиблар гаюр бўлди, адиблар қитмир бўлди, адиблар иғвогар, фисқ-фасодчи бўлди. АҚШнинг ўша даврдаги машҳур адиби Жон Берроус «Атлантик Монсли» журналида Сетон-Томпсонни уриб чиқди. Сетон-Томпсон мақолани кўриб-кўрмасликка олди, миқ этмади. Журнал ундан жавоб мақоласи сўради, у рад жавобини берди. Ваҳоланки, оқсоқол адиб кўйган айблар туҳматдан иборат эди.

Бир куни бир бойвачча нью-йорклик элликта адиби уйига чақириб, ўтириш қилиб берди. Берроус чол Сетон-Томпсонни кўриб-кўрмасликка олди, тескари қараб ўтирди. Сетон-Томпсон хонадон хўжасидан ўзини Берроус билан бирга ўтиргизишини сўради. Оқсоқол адиб ҳайрон бўлди. Қизариб-бўзариб: «Ҳалиги гапларга хафа бўлманг, сизга шахсий баразим йўқ», деди. Сетон-Томпсон: «Қайси гап? Эшитмаган эканман», дея елкасини қисди. Берроус ўзини қўярга жой тополмай қолди. Шунда Сетон-Томпсон оҳиста гап очди:

— Жаноб Берроус, умрингизда бирон марта бўрилар туриш-турмушини кузатганимисиз?

— Йўқ.

— Бирон марта бўри овига чиқсанмисиз?

— Йўқ.

— Тирик бўрини расмга туширганмисиз ё унга қараб расмини чизганимисиз?

— Йўқ.

— Биронта бўрининг терисини шилиб олганмисиз?

— Йўқ.

— Бирон марта озод юрган ёввойи бўрини кўрганмисиз?

— Йўқ.

— Унда айтинг-чи, мени шунчалар ёмонлашга нима хаққингиз бор?

Берроус қизариб, деди:

— Умумий биология қонуналари бор, бу қонуналар барча ҳайвонлар учун баробар.

Берроус изтиробга тушиб, кўзларида ёш қалқиди.

Кўп ўтмади. Берроус худди шу журналда Сетон-Томпсонни кўкларга кўтариб мақтаб чиқди. Шундан кейин Сетон-Томпсон Берроусга ўзининг шахсий музейини кўрсатди. Музейда беш минг китоб, фотоаппаратда ўз қўли билан расмга тушириб тайёрлаган икки юздан зиёд ҳайвонлар альбоми, ўзи чизган ҳайвонлар билан қушларнинг мингдан зиёд расми, икки мингдан кўпроқ ҳайвонлар, қушлар териси билан патлари ҳамда ҳайвонлар, қушлар ҳаётини кузатиб, тўлдириб борган ўттиз жилдан иборат қалин-қалин кундалик дафтар бор эди.

Берроус лол бўлиб қолди.

АҚШнинг ўша вақтдаги президенти Теодор Рузвелт Сетон-Томпсон билан Берроус ўртасида бўлган гапни эшлитиб қолиб, Сетон-Томпсонга шундай маслаҳат берди:

— Ана кўрдингизми, қандай улкан ҳаётий манбаларга таяниб асар яратганингизни ҳеч ким билмайди. Энди шу манбаларингизни чиқаринг.

Сетон-Томпсон ана шу ҳаётий, илмий ишларини йиғиб, «Шимолий ҳайвонлар ҳаёти» номли улкан-улкан икки жилдлик китоб қилди. Китоб учун «Аланга медали» олтин мукофотини олди. Ўн йил ўтиб, «Ёввойи ҳайвонлар ҳаёти» деган тўрт жилдан иборат илмий ишини китоб қилиб чиқарди. Бу сафар Америкада энг яхши илмий ишлари учун бериладиган «Элиот» олий даражали олтин медалига сазовор бўлди.

Сетон-Томпсон табиатни ардоқлади, табиат ҳам уни ардоқлади.

Биз бўлсак, табиатни ўз-ўзини кўз-кўз қилиш, мавқе эгаллаш, шон-шуҳрат, обру-эътбор топиш восита-

си қилиб олдик. Биз табиатни бозорга солдик, табиатни спекуляция қилдик. Табиат ҳақида ёлғондан-ёлғон асарлар ёздиқ. Табиат, хусусан, ҳайвонлар шаънига туҳмат асарлар яратдик. Биз ҳайвонларни бадном қилдик. Ҳайвонларни хоҳлаган кўйимизга солдик, кўғирчоқ қилиб ўйнадик. Агар ҳайвонлар маъмурияти бўлганида, жуда кўп ҳайвонлар, хусусан, бўрилар билан итлар кўпдан-кўп ижодкорларни судга берар, жуда кўп ижодкорлар жиноий жавобгарликка тортилиб кетарди.

Биз табиатни тўп қилиб тепдик. Табиат қонунлари, табиатнинг ўзи нима эканини билмадик. Масалан, ижодкорлар тобора қуриб бораётган Орол денгизи ҳақида асарлар ёзди. Бир шоир шеърининг ҳар сатри охирида «Оролим» сўзи такрорланади. Мен эринмай, «Оролим» сўзининг ўрнига «севгилим» сўзини қўйиб чиқдим. Ҳеч нима ўзгармади. Шу шоир ўзини табиат муҳофазачиси, табиат куйчиси деб билади. Ўзини табиат куюнчаги, оташин граждан, фидойи ватанпарвар санайди. Экран, радио, матбуот, минбарларни ҳеч кимга бермай, табиат бобида наъра тортади. Мен шу шоирдан: «Оролнинг энг чукур жойи неча метр?» — деб сўрадим. У елкасини қисди. «Оролнинг жами майдони қанча?» — дея сўрадим. У бошини иргади, яна билмади. «Ўзи, Орол қаерда?» — тағин сўрадим. У шимол тарафга қўл силтаб: «Где-то, Қорақалпогистонда», деди. Мен харитани очиб, унга Оролни кўрсатдим. У харита га қараб: «Ия, Оролнинг ярми Қозогистонга қарап экан-ку!» — деди ҳайрат билан. Қаранг, «табиат муҳофазачиси, табиат куйчиси», Оролнинг юзига ақалли харитадан бўлсаям бир қараб қўймаган экан.

Сетон-Томпсон умр бўйи табиат қўйнида яшади, табиатдан бор насибасини олди. Саксон олти йил умр кўрди. Бир ошнаси унга: «Мабодо ўлиб қолсанг, қаерга кўмамиз?» дея ҳазиллашди. Шунда Сетон-Томпсон: «Ернинг нима фарқи бор», деди, кейин: «Мана шу адирларга кўминглар», деди.

Васият бажо бўлди.

Сетон-Томпсон асарлари давримизнинг энг дол зарб муаммоси бўлмиш табиатни асраш муаммосини ҳал этишда дастуриламал бўлади.

Табиат омон экан, Сетон-Томпсон асарлариям омондир.

1989 йил

ЁШ ҚАЛАМКАШЛАРГА ТИЛАКЛАРИМ

Биродар, сизга айтажак уч оғиз гапим бор.

1. Биродар, фақат ёлғиз одам асар излайди. Фақат ёлғиз одам асар топади. Фақат ёлғиз одам асар яратади.

Ана шу ёлғиз одам Ёзувчилар уюшмаси останасидан кириб келади. У зот ўйчан ҳам ғамгин бўлади. Марур ҳам димоғдор бўлади. Салом нима, алик нима — билмайди.

Ёлғиз одамни бир қўлтиғида Кафка бўлади, бир қўлида Камю бўлади. У зот фақат қўлтиғидаги қаламкашларни ва... ёлғиз ўзини тан олади!

Ёлғиз одам Ёзувчилар уюшмасига кириш учун учта йўлланма олиб келади. Йўлланмалар мана бундай бўлади: «ўз дунёси бор, ўз йўли бор, ўз тили бор...»

Гўё у зот бу сайёрадан эмас, ўзга сайёрадан. Гўё, у зот ер фарзанди эмас, само фарзанди. Хуллас... буюк!

Ёлғиз одам ана шундай йўлланмалар билан Ёзувчилар уюшмаси аъзоси бўлади-ю... ёлғиз одам бўлмайди.

У энди... «дўст» орттиради, «дўстлар давраси» орттиради.

«Аввало одам бўлиш керак», «Граждан бўлиш керак», «Шоирлик тақдир — ҳаммамиз ҳам бир дарвеш».

«Дўстлар» ана шундай шиор остида «ижод» қиласди.

У «дўстлар» билан наҳорда ошга боради, пешинда ошга боради, оқшомда ошга боради.

У энди... «аввало одам бўлади», «граждан бўлади», «бир дарвеш» бўлади. Қўли кўксисида — тутун чиқсан жойдан қолмайди.

У кўнса кўнди, кўнмаса — бадном бўлади.

Бирор устоз бўлиб, уни ўнгта етаклайди. Бирор ака бўлиб, уни чапга етаклайди. Бирор муҳаррир бўлиб, бошқа бир ёққа етаклайди.

У энди... «кўп қатори бўлади», «ўзимиз қатори» бўлади.

«Катта бир нима деганда хўп денг», «Сиз айтганни қилинг, кам бўлмайсиз», «Акаларингизни маҳкам ушласангиз, одам бўласиз».

У ана шундай устозона маслаҳатлар остида «ижод» қиласди.

У кўнса кўнди, кўнмаса — ишга киролмайди, уй ололмайди, машина ололмайди.

У энди партиялар манфаати йўлида бўзчини мокиси бўлади. Фракциялар мақсади йўлида халқ дилидагиги ни айтувчи халқпарвар бўлади.

У энди ҳақиқатпарвар қиёфасида муқаддас даргоҳларни алғов-далғов этади. Покдомон дилларни яра этади. Мажлисларда дунёни бошига күтаради.

Охир-оқибат — яланғоч қирол бўлиб қолади.

Биродар, эзгулик йўлида партия тузмайдилар. Ватан йўлида фракция тузмайдилар. Халқ йўлида фронт тузмайдилар.

«Партия — бир-иккита зот манфаати йўлида бир тўда оломон телбалигидир».

Жонатан Свифт ана шундай деб эди.

Биродар, сиз «Мустақил Ўзбекистон», дея ҳайқирасиз. Чин, Ўзбекистон мустақил бўлди. Чин, Ўзбекистон уч йилдан бўён мустақиллик гаштини суриб яшамоқда.

Энди... сиз ўзингизга бир... ойна олиб қаранг: сизчи, сиз ўзингиз-чи?

Биродар, мен сиз-да Ўзбекистон юртингиздай мустақил бўлсангиз, дейман. Мен сизга-да мустақиллик тилайман.

Биродар, жаҳонда бир қатор халқаро ташкилотлар бор. Барчаси-да олам-жаҳон ташкилот, барчаси-да нуфузли ташкилот. Жаҳон мамлакатлари бирорга қўшилмайдиган халқаро ташкилоти ана шулар жумласидан. Қанақа ташкилот экани номидан аён — бирорга қўшилмайдиган давлатлар ташкилоти.

Биродар, Ўзбекистон юртингиз ана шу халқаро ташкилот аъзоси бўлди. Ўзбекистон юртингиз бирорга қўшилмайдиган жаҳон давлатлари сафидан жой олди.

Энди... сиз-да ўзингизга бир... ойна олиб қаранг: сизчи, сиз ўзингиз-чи?

Биродар, мен сизни бирорга қўшилмайдиган Ўзбекистон юртингиздан намуна олсангиз, дейман. Мен сизга мустақиллик тилайман.

Биродар, Ўзбекистон юртингиз ўз гербига эга бўлди.

Герб — давлат юзи, демакдир. Герб — эл юзи демакдир.

Ана энди Ўзбекистон давлатингизни ўз юзи бор давлат, деса бўлади. Ана энди ўзбек элингизни ўз юзи бор, деса бўлади.

Энди... сиз ўзингиз-да бир... ойна олиб қаранг: ўзларида-чи, ўзларида?

Биродар, мен сизни Ўзбекистон давлатингиз йўлидан борсангиз, дейман. Мен сизни ўзбек элингиздан намуна олсангиз, дейман.

Биродар, мен сизда шахсий герб — ўз юзингиз бўлса, дейман. Мен сизга шахсий герб — шахсий юз тилайман.

Биродар, Ўзбекистон юртингиз ўз гимнига эга бўлди.

Гимн — давлат сўзи демакдир. Гимн — эл сўзи демакдир.

Ана энди Ўзбекистон давлатингизни ўз сўзи бор давлат, деса бўлади. Ана энди ўзбек элингизни ўз сўзи бор эл, деса бўлади.

Биродар, сиз ўзингиз тагин бир... ойна олиб қаранг: ўзларини-чи, ўзларини?

Биродар, мен сизда-да шахсий гимн — ўз сўзингиз бўлса дейман. Мен сизга-да шахсий гимн — шахсий сўз тилайман.

2. Дастват нима?

Дастхат — бармоқ. Дастват — қўл. Дастват — имзо.

Ана шу тамғалардан инсон зоти ким — билиб олса бўлади.

Шу боис, имзо — хужжат, имзо — дастват.

Хаётда дастватлар кўп: олим даствати, қаҳрамон даствати, санъаткор даствати...

Аммо қаламкаш даствати — дастватлар даствати. Қаламкаш даствати — табаррук дастват. Қаламкаш даствати — тарихий дастват.

Мен Абдулла Ориповдан дастват олиш учун... нонга навбатда тургандай туриб эдим. Мен Чингиз Айтматовдан дастват олиш учун... аэропорт бориб пойлаб эдим.

Үйимда ана шу зотлар даствати бор. Мен ушбу дастватларга қараб-қараб яшайман. Мен хаёлимда... Орипов билан ёнма-ён яшайман. Мен хаёлимда... Айтматов билан қўшни яшайман.

Мен ушбу дастватларга қараб-қараб... ўзимни дадил ҳам улуғвор чоғлайман!

Биродар, кимдир лидер бўлмоқчи бўлади. Аммо лидер бўлолмайди. Ожиз бўлади.

Аслида, инсон учун ер яхши. Боиси, инсон ер фарзанди.

Аммо у зот ерга қаноат қилмайди. У юксакларни кўзлайди. У фазога талпинади.

У зот кўтарилиши учун нарвон излайди. Нарвон дея, ватанпарвар қиёфасида ватанфурӯшлик қиласи, халқпарвар қиёфасида халқфурӯшлик қиласи. Нарвон дея, мол-дунё тарқатади, жон куйдиради.

Охир-оқибат, нарвон топади. Узун-узун нарвон. Йигирма-үттис зинапояли нарвон.

У зот ана шу нарвондан юқори күтарилади. У теварекка димоги билан қарайди. У улугвор-улугвор қарайди. У буюкона-буюкона қарайди.

Гүё, у чўқчи, барча — ер. Гүё, у улут, барча — фақир. Гүё, у буюк, барча — чивин.

Биродар, ана шу нарвон... сиз йигажак имзолар! Ана шу нарвон... сиз қўяжак имзолар!

Узун-узун. Қават-қават. Бир имзо — бир зина, бир зина — бир имзо. Бир, икки, уч... йигирма бешта имзо. Демак, йигирма бешта зина!

Лидер ана шу нарвон зиналар — имзоларингизга оёқтираб мансабга күтарилади. Лидер нарвон зиналар-имзоларингизга оёқ қўйиб шон-шухрат чўққисига юқорилайди. Лидер нарвон зиналар — имзоларингизга оёқтираб ғанимлардан ўч олади.

Сиз... зинапоя бўласиз!

Ахир, бир имзо остида бир шоир елкаси ётади. Бир имзо остида бир адаб боши ётади. Бир имзо остида бир олим кўкраги ётади.

Лидер... шоирона елкангизга оёғини қўйиб күтарилади. Лидер... адабона бошингизга оёғини босиб юқорилайди. Лидер олимона кўкрагингизга оёғини тираб кутарилади.

Шундай, сиз зинапоя бўласиз.

Имзолар — зиналар, зиналар — имзолар...

Матбуотларда зина-зина шоирона имзолар, зина-зина адабона имзолар! Юқори идораларда қатор-қатор шоирона имзолар, қатор-қатор адабона имзолар! Архивларда қават-қават шоирона имзолар, қават-қават адабона имзолар!

Биродар, адабиёт — имзо санъати эмас, йўқ, адабиёт — имзо санъати эмас!

Сиз имзо эмас, сиз — сўз йифинг. Сиз аризага эмас, сиз асарга имзо қўйинг.

Ана шу асарингизни нарвон қилиб — юқори кўтарилинг. Оёқларингиз остида имзонгиз эмас — асарингиз бўлсин!

Эл-юртда қачон қайта куриш бўлади?

Ҳар бандада ўз аравасини ўзи тортса — эл-юртда қайта куриш бўлади. Ҳар бандада ўз аравасини ўзи тортса — эл-юрт бой ҳам обод бўлади.

Биродар, сизнинг аравангиз — адабиёт!

Биродар, шоир имзоси қулги бўлмиш ушбу кунда сиз ўз имзонгизни авайланг.

Эл сизни бир кўриш учун ёғилиб келсин. Эл сиздан дастхат олиш учун навбатда турсин. Эл дастхатингиз билан фахрлансанн.

Биродар, адаб имзоси шармисор бўлмиш ушбу кунда сиз ўз имзонгизни қадрланг.

Эл сизни кутиб олиш учун пешвоз чиқсин. Эл сиздан дастхат сўрасин. Эл дастхатингизни уйи тўрига қўйсин.

Биродар, қаламкаш имзоси оёқ ости бўлмиш ушбу кунда сиз ўз имзонгизни кўз қорачигингизда олиб юринг.

3. Самарқанд миноралари олисдан чўп мисол кўринади. Гўё, ушласа кафтга сифади. Яқинроқдан эса каллакланган тут мисол кўринади. Гўё, қучоқласа қучоққа сифади.

Олдидан баҳайбатдан-баҳайбат минора бўлиб кўринади. Кафт тугул, ақлга сифмайди. Қучоқ тугул, хаёлга сифмайди.

Минора учидан ер сайин кентгайиб келади. Ерга келиб йўғонлашади. Минора жойи улкан гумбаз бўлади. Инсон гумбаз пойида бир ушоқ бўлиб қолади.

Ана шу гумбаз пойdevор минораларни асрлар оша кўтариб келди. Умр ато этиб келди.

Бадий асар-да мисоли бир минора. Асарни-да ўз пойdevори бўлади. Асар умри ана шу пойdevордан бино бўлади.

Асар пойdevори — тил.

Тагин бир тил бор. Бу — оғиз тил. Гўдак кафтидай лаҳим эт. Суяксиз эт.

Ижод оламида бир тоифа қаламкашлар бўлади. Улар асари... ҳарфлардан иборат бўлали. Тузсиз сўзлардан иборат бўлали. Бетайн сўзлардан иборат бўлали.

Бу қаламкашларни оғиз тили эса... асфалът йўлдай бўлади. Оғиз тили асфалът йўлдай узун ҳам чексиз бўлади. Оғиз тили асфалът йўлдай қоп-қора ҳам қўланса бўлади.

Биродар, тил — дил, дил — тил. Фарқи — бир ҳарф, биттагина ҳарф.

Бундай қаламкашлар умриям асфалът йўлдай эзилиб ўтади. Умри қишида музлаб ўтади. Умри ёзда куйиб ўтади.

Бундай қаламкашларда тан-соғлик бўлмайди. Ранг-рўй бўлмайди. Уст-бош бўлмайди.

Биродар, ёмон тил ё, жонга уради, ё, имонга уради!

Бундайлар ҳар сўзини ойлаб ўйлади. Ҳар сўзини ҳафталаб ўйлади. Ҳар сўзини кунлаб ўйлади. Ўйлаб-ўйлаб гап тарқатади, гап сотади, гап сасийди.

Гапи айланиб ўзига келса — у без бўлиб тура беради, у тониб тура беради. «Қанақа гап?» — дейди. «Тилни суяги борми, гапираверади-да», дейди.

Бундайлар ижодини жамласа бир жилд бўлади, ифвосини жамласа — ўн жилд бўлади!

Бундайлар мақсадларига қандай эришади? Бундайлар... салом-аликда оташнафас бўлади. Муомалада «одамни жони» бўлади. Улфатчиликни қотиради. «Дўстим», «ўртоқ», дея ўпишиб кўришади. Дуо-фотиҳани боплайди. «Жаноб», «тақсир», дея сўзамол бўлади.

Биродар, сену менлар нимадан бошланади? Бир оғиз ифводан бошланади. Бир-бирлари аро тиш қайрашлар нимадан бошланади? Бир оғиз фисқ-фасоддан бошланади. Ўзаро ғанимлик нимадан бошланади? Бир оғиз фитнадан бошланади.

Таёқ этдан ўтади, сўз суюқдан ўтади.

Биродар, жаҳон урушлариям... фитнадан бошланиб эди!

Ҳаёт тил билан бошланади, ҳаёт тил билан адо бўлади. Шу боис, ҳаётга келажак инсонни: «тили чиқибди», дейди. Ҳаётдан кетажак инсонни: «тилдан қолибди», дейди.

Биродар, қаламкашни сўйдирадиган — асари тили, қаламкашни куйдирадиган — оғиз тили!

1993 йил

ЁЗУВЧИЛАР УЮШМАСИННИНГ 60 ЙИЛЛИГИГА ТЎЙХАТ

Мен етмишинчи йилларда Тошкент Давлат дорил-фунуни журналистика факультетида ўқидим.

Ўшанда Ўзбекистон Ёзувчилар уюшмаси Алишер Навоий кутубхонаси пешонасида эди.

Мен Ёзувчилар уюшмасидан бир кишини-да билмасдим.

Аммо Ёзувчилар уюшмасидан оёқ узмасдим. Анжу-манлар, мушоиралар, йиғилишлардан қолмасдим.

Эң охирги қаторда ўтириб олардим. Қайси ёзувчи нима дейди, қайси шоир қандай қилиқ қилади — барчасини эътибор билан кузатардим.

Ёзувчилар уюшмасида кўрмиш-бильшишларимни ётоқхонада тўлқинлана-тўлқинлана айтиб берардим. Қайси ёзувчи қанақа гапиради, қайси шоир қанақа қилиб шеър ўқиди — барини кўрсатиб берардим.

«Сайд Аҳмад шундай ёнимдан ўтиб кетди-я, шундайгина ёнгинамдан-а», деяр эдим.

Ўшанда-да ичи қора тенгдошларим мени камситар эдилар.

«Сайд Аҳмадгаям сенинг ёнингдан бошқа жой қуриб қолибди-да», деяр эдилар.

Мен ўшанда-да сассиқ гапларга чидай олмасдим. Мени хўрлигим келарди. Мен кўрпага бошимни буркаб ухлаб қолардим.

Бир сафар Ёзувчилар уюшмаси қоровули олдида «СССР Ёзувчилар уюшмаси аъзоси» дегич қип-қизил гувоҳномани кўриб қолдим.

Мен гувоҳномага кўзларим ўйнаб-ўйнаб қарадим. Мен гувоҳномага мириқиб-мириқиб қарадим.

Беихтиёр қоровулни қошига ўтириб олдим. Ўнг қўлимни стол устига қўйдим. Ниманидир баҳона этиб, гувоҳномага кўл сурдим. Кишибилмас кўл суриб бора бердим-кўл суриб бора бердим.

Ниҳоят, қўлим... гувоҳномага тегди.

Шунда, баданларимга ажиг бир илиқлик оралади. Шунда, баданларим қизиди. Шунда, юрагим тез-тез урди.

Мен гувоҳномани кишибилмас қўлимга олдим.

Мен гувоҳномага термулиб қолдим.

Юзларим лов-лов ёнди.

Гувоҳнома юзларимдан қизил бўлди, юзларим гувоҳномадан қизил бўлди.

Коровул қўлимдан гувоҳномани олиб қўйди.

Мен бўлиб ўтмиш воқеани ётоқхонада айтиб бердим.

«Ёзувчилар уюшмаси ҳужжатини қўлимда ушлаб кўрдим, чўғдай товланар экан», дедим.

Мен ўнг кафтимни ёйиб кўрсатдим.

«Манави қўлимда ушлаб кўрдим», дедим.

Ичи қора тенгдошларим тагин сасидилар:

«Қайси аҳмоқ сенинг қўлингга ҳужжат берди», дедилар.

Ёзувчилар уюшмасини тағин бир йиғилишида Пиримқул Қодиров гапирди.

Ўша кунлар Ойбек вафот этмиш кунлар эди.

Шу боисдан, Пиримқул акамиз зўр қайғу билан мана бундай деди:

«Ғафур ака кетди, Абдулла ака кетди. Мана, Ойбек акаям кетди. Мана шу Ёзувчилар уюшмаси у кишилардан бизга мерос қолди. Биз энди шу меросни бойитиш учун жонимизни куйдириб меҳнат қилишимиз керак. Биз энди шу меросни авайлашимиз керак».

Мана, ушбу сўзларга-да йигирма беш йил тўлди.

Йигирма беш йилдирки, Пиримқул акамизни сўзлари миямда қўрғошиндай-қўрғошиндай қуюлиб келади.

Етмиш олтинчи йилда «Юлдузлар мангу ёнали» номли биринчи қиссам чоп этилди.

Ёзувчилар уюшмаси йўлагида мени раҳматлик Уйгун ака ушлади.

— Ўша бола сенмисан? — деди. — Яша, ука, яша. Бу, сени ҳеч ким танимас экан. Мен, ҳам бош муҳаррир Мирмуҳсиндан сўраб билдим. Гап бундай, мен сенга эътиборли йиғилишда сўз олиб бераман. Бўлди, шу билан таниласан.

Дарҳақиқат, у даврларда Ёзувчилар уюшмаси йиғилишларида сўз олиш қийин эди.

Оғзи бузуқларга сўз йўқ эди. Оғзи сассикларга сўз берилмас эди.

Шу боис, кўнглимда Ёзувчилар уюшмаси минбарига бир чиқиш орзуси пайдо бўлди.

Мен шу орзу билан Ёзувчилар уюшмаси катта залига кириб бордим.

Зал бўм-бўш эди. Тўрда Ўзбекистон Ёзувчилар уюшмаси минбари қайқайиб турди.

Мен қўлларимни белимга тираб, Ёзувчилар уюшмаси минбарига тикилиб қолдим.

«Бу минбарга Ойбек чиқсан. Ана энди мен чиқман, — дедим. — Аммо бироргина қисса ёза солиб, минбарга отилиб чиқиб бўладими? Кўрмаганни кўргани қурсин бўлмайдими? Яхшиси, тағин бир қисса ёзиш керак. Ана ундан кейин чиқиш керак», — дея ўйладим.

Кейин, «От кишинаган оқшом»ни битдим.

Уйғун ака мени Дўрмонда кўриб койиди.

— Сен ўзи қизиқ бола экансан, — деди, — кераксиз вақтда оёқни остида чиқасан. Керакли вақтда сувга

чўккандай йўқоласан, тайёрланиб юр, барибир сенга сўз олиб бераман, — деди.

Мен тагин ўйлаб қолдим.

«Бу минбарга Faфур Еулом чиққан, бу минбарга Абдулла Қаҳдор чиққан, бу минбарга Миртемир чиққан, — дедим. — Шундай улуғ минбарга отилиб чиқиб, ўша қиссалар муаллифи мен бўламан, дейинми? Узи, бор-йўғи иккитагина қисса бўлса? Ўл-а, иккита қисса ёза солиб, минбарга отилиб чиқма-я, десалар-а? Таги кўрмаганга гилам битмасин, десалар-а? Яхшиси, учинчи қиссани яратиш керак. Ана ундан кейин минбарга чиқиш керак», — дея ўйладим.

Мен «Ойдинла юрган одамлар» номли учинчи қиссамни яратдим.

Ана шунда... ана шунда, шу улуғ минбарга чиқиш орзузи тагин-да зўрайди.

«Ана энди минбарга чиқсам, мени бирор айбситмайди, — дедим. — Ана энди минбарга чиқсам, мени бирор камситмайди. Учта қиссаси бор, лейди, учта», — дедим.

Шу вақтда қайта қуриш бошланиб қолди.

Қайта қурувчилар шу улуғ минбарга чиқиш учун... қайта қурувчилар шу улуғ минбарга чиқиш учун... ароққа... ароққа нағбатта турмишдай турдилар.

Қайта қурувчилар улуғ минбарни муштладилар.

Қайта қурувчилар улуғ минбарни тепдилар.

Шу-шу, Ёзувчилар уюшмаси минбарига чиқишдан кўнглим қолди.

Шу-шу, Ёзувчилар уюшмаси минбарига чиқиш мен учун армон бўлиб қолди.

Ниҳоят, Ёзувчилар уюшмаси йигирма йил мобайнида мана бугун насиб этди.

Мен Ўзбекистон Ёзувчилар уюшмаси минбарига йигирма йил деганда етиб келдим.

Ҳатто қуёшни-да ўз боражак манзили бўлади.

Биз у манзилни уфқ, деймиз.

Ҳатто қуёшни-да бош қўяжак ўз макони бўлади.

Биз у маконни қиблигоҳ, деймиз.

Барча мўмин-мусулмонларни-да ўз боражак масканни бўлади.

Биз у масканни масжид, деймиз. Мўминлар ана шу масжидида тоат-ибодат этади.

Масjid — барча мўминлар учундир.

Аммо ҳар касб әгасини-да ўз боражак масжиди бўлали. Масалан, олимлар масжиди — академияси. Санъаткорлар масжиди — театри.

Қаламкашлар масжиди — Ўзбекистон Ёзувчилар уюшмаси.

Қаламкашлар суюги қотар-қотмас ана шу масжидга аъзо бўлиб киради. Қаламкашлар бўғини ана шу масжидда қотади. Қаламкаш ақли ана шу масжидда киради. Қаламкаш тили ана шу масжидда чиқади. Қаламкаш ана шу масжидда камол топади.

Қаламкаш ўз юлдузини-да ана шу масжиддан топади, ўз шўрлигини-да ана шу масжиддан топади.

Қаламкаш яхши кунида-да ана шу масжидга йўл олади, ёмон кунида-да ана шу масжидга йўл олади.

Қаламкаш куч-кудратдан қолганда-да ана шу масжидни тарк этмайди. Икки кўзи ана шу масжидда бўлади. Икки кўзи ёшларда бўлади. Ёшлардан умидланиб-умидланиб яшайди.

Қаламкаш ёруғ оламдан-да... ана шу масжиддан кетади.

Шу боис, асл қаламкаш қалбида ана шу масжидга ички бир меҳр ётади.

Шу боис, покиза қаламкаш қалбида ана шу масжидга ички бир садоқат ётади.

Шу боис, ҳалол қаламкаш қалбида ана шу масжидга ички бир оқибат ётади.

Ана шу меҳр, ана шу садоқат, ана шу оқибат пайванд бўлиб, эътиқодга айланади.

Қаламкаш зуваласи ана шу эътиқоддан олинади.

Асл қаламкаш кўнгилда ана шу эътиқод ётади. Асл қаламкаш каллада ана шу эътиқод бўлади. Асл қаламкаш қонида ана шу эътиқод юради.

Қаламкашни ана шу эътиқод суюб юради. Қаламкашни ана шу эътиқод олиб юради.

Ана шу эътиқоддан жудо бўлмиш қаламкаш ўзини шоирман, дея юрмасин.

Ана шу масжидни Қодирийдан мерос даргоҳ, дея ўйламагич қаламкаш ўзини шоирман, дея юрмасин.

Қодирий даргоҳи аъзолик гувоҳномасини кўкрак чўнтагида — кўксига олиб юрмагич қаламкаш ўзини шоирман, дея юрмасин.

У ўз масжидини оёқости этади. У ўз масжиди аъзолик гувоҳномасини осмонларга отади.

Оқибат, ёлғон шуҳратларга интилиб яшайди. Оқибат, шоирбашара фитна бўлиб қолади.

Боиси — назм ана шу эътиқоддан яралади.

Ана шу эътиқоддан айрилмиш қаламкаш ўзини ёзувчиман, дея юрмасин.

Ана шу масжидни Чўлпондан қолмиш ёдгорлик, демагич қаламкаш ўзини ёзувчиман, дея юрмасин.

Чўлпон ёдгорлиги аъзолик гувоҳномасини кўкрак чўнтағида — кўксига олиб юрмагич қаламкаш ўзини ёзувчиман, дея юрмасин.

У ўз масжидини парокандаликка гирифтор этади. У ўз масжиди гувоҳномасини минбарлар узра отади.

Оқибат, мансабларга талпиниб яшайди. Оқибат, ёзувчибашара соя бўлиб қолади.

Боиси — наср ана шу эътиқоддан яралади.

Ана шу эътиқодни бой бермиш қаламкаш ўзини адабиётшуносман, дея юрмасин.

Ана шу масжидни Ойбекдан қолмиш маскан, дея қарамагич қаламкаш ўзини адабиётшуносман, дея юрмасин.

Ойбек масканни аъзолик гувоҳномасини кўксига олиб юрмагич қаламкаш ўзини адабиётшуносман, дея юрмасин.

У, ўз масжидини хокисор этади. У ўз масжиди аъзолик гувоҳномасини стол-стуллар узра отади.

Оқибат, бировларга эргашиб яшайди. Оқибат, олимбашара тўти бўлиб қолади.

Боиси — бадиа ана шу эътиқоддан яралади.

Охир-оқибат — барчаси яланғоч қирол бўлиб қолади.

Ўз масжиди аъзолик гувоҳномасини отмиш қаламкаш ўз онасини-да отади.

Ўз масжидини оёқости этмиш қаламкаш ўз халқини-да оёқости этади.

Ўз масжидини пароканда этмиш қаламкаш ўз ватанини-да пароканда этади.

Боиси, аҳли мўминлар учун ватан — остонаядан бошланади.

Аҳли қаламкашлар учун ватан — Ўзбекистон Ёзувчилар уюшмасидан бошланади.

Олтмиш ёшинг қутлуғ бўлсин, адабиёт масжиди!

1994 йил

МУНДАРИЖА

РОМАН

Бу дунёда ўлиб бўлмайди	5
-----------------------------------	---

ХИКОЯЛAR

Бобоси билан невараси	169
Кузнинг бир кунида	172
Ку-ку-ку	176
Эр-хотин	181

МАҚОЛАЛАР

Газетага интервью	186
Сетон-Томпсон китобига сўзбошим	187
Ёш қаламкашларга тилакларим	195
Ёзувчилар уюшмасининг 60 йиллигига тўйхат	200

ТОҒАЙ МУРОД

БУ ДУНЁДА ЎЛИБ БЎЛМАЙДИ

Роман, ҳикоялар, мақолалар

«Шарқ» нашриёт-матбаа
акциядорлик компанияси
Бош таҳририяти
Тошкент — 2001

Мұхаррир *Б. Эшпұлатов*
Рассом *Х. Зиёхонов*
Техник мұхаррир *Л. Хижсова*
Мусаҳид *Х. Ҳожсиметова*

Теришга берилди 21.08.2000. Босишга рухсат этилди 20.05.2001.
Бичими 84x108^{1/32}, «Таймс» гарнитураси. Офсет босма. Шартли босма
ма табоги 10,92. Нашриёт ҳисоб табоги 10,80. Адади 5000 нусха.
Буюртма № 1003. Баҳоси келишилган нархда.

«Шарқ» нашриёт-матбаа
акциядорлик компанияси босмахонаси,
700083, Тошкент шаҳри, Буюк Турон кўчаси, 41.

M 89

Мурод, Тогай.

Бу дунёда ўлиб бўлмайди: Роман, ҳикоялар, мақолалар. — Т.: «Шарқ» нашриёт-матбаа акциядорлик компанияси Бош таҳририяти, 2001. — 208 б.